

KITAB LAID

Tafsiran dit Ayub, Zabur, Amsal
om nabi Yoel, Obaya, Yunus om Daniel

I BUUK DI AYUB

Umpatod:

Iso buuk di Kitab Laid (ko Kitab Ibrani) di iadino ogumu o panarangan om pongimpurasan miabal di buuk di Ayub. Sabap ino buuk di Ayub mad buuk di kagavul sid ongobuuk pilian sid sompomogunan om it ongobansa dit ahatul o koundango om keloo. Amu engkod i gama dit ongoelo mongil-ilo di kavazao om kobuatano om bahazan om kosipan di Ayub, ino-no i Ayub dino, ulun dot apaham om elin om okosog. Iosido dino ulun do lumundu om osinang, mad kisurupu iosido. Topot tigogi, naratu iosido sid kosusaan dit amu asakapan. Kuran-ka dit ongoulun, iosido dino kakali kogoos mangasip sampai humarap sid Kinoringan antava nopiduvo-no i ginavo, ong kodung nanangan iosido do karaatan om kapagasan om kopunavatan om ongo-panakit? Humongkop iosido, gima ino kosusaan dau dino sampai kada o kosipan, tu mad a-konong i kabanaran do Kinoringan, ka? Kurozon humarap it ulun ko songriniba sid Kinoringan, ong iadino it ongopanakit om i kopunavatan om kosusaan sampai kapatazan?

Manjadi i buuk di Ayub dino mongil-ilo dit ongoduatan om kopiduvaan do ginavo dino dot amu misingkavaro o gama monginsosok om monodiri om pidadahavaan. Ong it usul di Ayub, bai Fasal 1 om 2 sampai i kinompusan F. 42,7-17. Inot a-ko piro fasal manarang di kuran di kosinango om kosusaan di Ayub. Topot i Fasal 3 sampai 42,1-6 pogili di gama di Ayub mogkorudu om manarang di kosusaan (F. 3) om i gama dau popuhondom sid Kinoringan di kosusaan dau dino (F. 29-31) sampai i timpa di Ayub (f.40+42) di mangambat sid kovosihan do Kinoringan (f.38-42). Sid ongofasal vokon, nokogulu-no i tolu it anggai-anggai di Ayub mumbongut manarang do mad manala di Ayub sampai mongogorot di Ayub, retanko dioti ko i Ayub kisala dot a-milo-milo nga mangakun di karaatan om kasalaan dau. Okonko induvo, intolu ioti mingguguli momoros. Topot toriso-iso i boros dioti dino dahavaon di Ayub. Nokobongut-po it anggai-angai kapat, ino-no i Elihu, kondiri-no di Kinoringan momoros om nambaton-no di Ayub.

Iri-ogi nopolizan-no vagu i Ayub dot osinang-no om lumundu-no om sinurupuvanom binarakatan vagu do Kinoringan i Ayub.

(Basao-po i Umpatod sid Kitab Momogun)

Isai i Ayub? Ong tumimpuun i F. 1 dot, *Varo-po iso ot ulun do kusai, i ngaran dau i Ayub*, ka, mad vaza **manangon** ino boros dino. It ulun dino bagaral, ino-no i Ayub, topot aso boros do kiama ko kiidi iosido antawa varo-po't anganak dau do nokotungkus di Ayub dino. tu i tuturan rontob i Ayub banal. Na i Kitab amu minongusul do siongo antad ko siombo o kolombusan di tuturan di Ayub. Okonko it ulun banal o tinomod manarang om mongusul om manarang di Ayub dino, inoi nga bai i kobuatano om kavazao di iadino o sabap di buuk di Ayub diti. Sid vaza monuturan om poromot di tudukan om keloo dino, it ongoanggai-anggai mamakai do tasantanid-tanid o vaza manarang. **Mamabal** varo, ino-no i gama mongumba om mangalu-kalu o kiroom di panangan do hal. Varo-no **mamahul**. Ong bahul, keloo dot aralom antad sid ulun di kihukum. I kihukum okonko mamalang di hal om kosungguvo dot ulun di mad lovong ko obungou, inoi nga sid suriban pogili i kihukum di keloo dau om manarang di kobungahan. Ong **sundait**, mamakai do suriban sid gama mongoduat om pogili di keloo dot ulun. I harati, it ulun di mongining di sundait dino osusa mongitung om mongiro dot ombo it noboros om

noduat. Manjadi minsanko i f. 1 om 2 sampai i F.42,7-17, mad usul di kavazao di Ayub, kakali ino gama mongusul di Ayub baiko tangon banal, gima a-kosuput i kavazao om kopolosizan di Ayub sid ongobansa ko ongoaliza vokon. Kodung arait i ngaran di pomogunan dau, retanko sid **Us** om varo-po noboros-no dot ponong sid **Timur**, ka, kakali amu tokou elaan banal do siombo ino kampong ko pomogunan dot Us dino om ino pongoretan dot Timur, amu atarang-no do siombo. Sabap nunu-nopo i pomogunan dit Timul mantadko i sid Barat, nga Timuri. Pengkaa dino amu noboros om natarang sino do **sera** i Ayub diri. Kianggai-anggai iosido. Topot minsan narait-no it ongokampong dioti, topot asot elaan tokou ong biano do siombo inot ongokampong dino.

Nokokuro tu iadino o buuk do nakagavul sid ongobuuk do Kitab Laid?

Noboros-no sid umpatod di Kitab Momogun dot ino buuk di Ayub dino nokembulai dati hiza di nokouli-no it ongoulun do Yahudi antad sid kinarakapan sid Babil. (TGM 540) Tu, ka dit ongoelo di mongintutun dit ongoboros sid Kitab, ino hiza diri nokotimpuun-no it ongoulun Yahudi do mononteologia sampai minoniim mokitarang om mokitalahas di kosusaan dioti kondiri om kuran dot amu kopionong di gama do Kinoringan monunda om mangagazad dioti, gima oholian o narampus om kokilong dit ulun Yahudi sampai kinumodou do Kinoringan. Ino-no i kosipan dit ulun do Yahudi, Kinoringan minomili di Ibrahim im pinajadi di Ibrahim do puun do barakat om puun di bansa dau. Indoson dioti ong aso-no kosusaan ong kodung bansa do Kinoringan. Alaid sid kinuripanan sid Babil om ohorotizan-ogi dioti dot ong kodung nabarakatan om notunda do Kinoringan, okonko bai sid kosinango om kavantango o tunda do Kinoringan, inoi nga i karaatan om kosusaan nga vaza do Kinoringan pemumui vagu di bansa dau ong natagak ko nokedu ioti antad sid kovosihan dau. Sabap nokosurut i kohorotizan dioti kananganko i vaza do Kinoringan monunda dioti dino, nohorotizan--po ioti dot ino kotulungan om gama do Kinoringan mangapad om mongopud di riniba okonko bai momili di bansa ombo o kenginan, inoi nga ipat-ipat it ulun sid palad kavi do Kinoringan, sampai i Kinoringan mongontupat dit ipat-ipat it ulun, supaya atag o kavazao om kobuatano dot ulun. Iso nga aso't ulun kadapat sumusut sid tinoguvangon do Kinoringan. Na i buuk di Ayub mongindazou di kogofoo om kohormatan do Kinoringan om i kavazao di kabanaran do Kinoringan. Kinoringan kitanggung jawab bahagi dit toriso-iso it ulun sampai iso nga aso karaatan om kosusaan dit okonko Kinoringan mangakun om bozoturur. Ino-no rontob, okonko i Kinoringan monusa ko mongindaraat. Ino vozoon do rogon di sid ginavo dot ulun, ong mokisasavat ko mokisisinang om mokisususumbung iosido, o mamalid di ginavo dit ulun sid saralom di pongitungan do mongivogu do Kinoringan om mokirorompok do Kinoringan. Pengkaa dino ino kabanaran do Kinoringan ot ujion di buuk di Ayub, dot ino kabanaran do Kinoringan amu miabal di kabanaran do riniba.

I mad kuhakob di buuk di Ayub: F. 1-2 (om 42,7-17)

Ino duvo fasal dino monginogom di tudukan di kohormatan do Kinoringan, dot i vaza monginogom, Mad wayang di pogili dit a-ko piro o kobuatano, antawa iadko lakunan di manarang do tuturan sid a-ko piro o suntuan, ino duvo i fasal dino manarang sid a-ko piro o pongimatan di sokovia i it a-milomilo mongining, supaya humarati it ulun di tudukan di Ayub dino.

Hogot Keso:

1,1-5 **I kolunduo om kosinango di Ayub songongkob.** Ong mongining tokou di kasapahan dit ongopangazam di Ayub om i piro-piro it ongouripon di manaud di pangazam om mangaradu di tagad, lumundu banal i Ayub sampai iso nga aso katalib di Ayub. Mad avantang om osinang-nopo iosido om it ongkob dau. I Ayub mad suntuan di kelino om kokosogo om kabanaro dot ulun. Ino kinolunduo dau dino a-nakapamalid di Ayub sid gama monongkudau om mokisasavat om i gama mangaladtak dit ulun vokon. Pengkaa dino kikosipan i Ayub sid Kinoringan sampai ahatul i gama dau posuhut dit anganak dau sid Kinoringan om manangkis-po do karaatan dioti dino.

Noboros-po i iadino, tanid-no o bahagi di wayang mimbulai, ino-no i dewan razat do surga.

Hogot Koduvo:

1,6-13. Sid surga kikumpulan dot i Kinoringan mongumpug dit ongokuasa om ongosundu om isainopo i kihak ponong sid vinangun om riniba. I monuturan di Ayub mamakai di keloo dit ongoulun kodori kananganko i gama dioti mongusul om manarang di kobuatano do Kinoringan. Ogumu o gama dit ongoulun popiompok di Kinoringan sid riniba, i kogofoo dau, i konoruvo dit obuk dau, kibongit ko aso, tu varo kiniro dot ongoulun do miluu di Kinoringan om i riniba. Rontob-nopo, ong i Kinoringan om i kinoruhangan dau, sid surga ot initoronon, ong i riniba sitid vinangun om sitid pomogunan, ka dit uog dit ulun diri. Manjadi iadko it ongorazat do riniba ohoturan dit ongoelo om it kiongokuasa, pengkaa dino ong sid Kinoringan. Kinoringan mongodim om mongingut dit ongokoruhang dau, malaikat, it ongosundu, it ongokuasa di tumabang di Kinoringan sid gama dau mangahatul om monunda dit ongobansa. Kokiraai iadko EXKO do gorija, ino **Dewan Razat** o puun di hoturan do Kinoringan, ka. Ong i vozoon do rogon, inot inantadon do karaatan, torinsan-insan koumpug sinod umpug do Kinoringan, tu antad sid Kinoringan iosido, bai nokotongkizad om nakadano i vozoon do rogon. vokon-no ong bai mongunang o tomodon ko misingkavaro om posusa do Kinoringan.

Iadko lakunan i Kinoringan mongoduat om monginsosok di gama di vozoon do rogon dot, *Antadko siongo?* ka. Sabap i vozoon do rogon mad ulun di kiakal om bolikung di mirimpanau mongunang om monusa dot ulun, ino-no o tinomod di Kinoringan mongoduat: varo-no naku vagu kobungahan-nu diti, ka, ko aso? Dot i timpa di vozoon do rogon: Aso. Banal-no, kuran i vozoon do rogon manarang di kopintaro dau, naku? Mad mianggan di Kinoringan om i vozoon do rogon, tu ong i Kinoringan monguji di kosipan om kokosogo di Ayub. Topot ong i vozoon do rogon pakaraat di Ayub, retanko i kosipan om kokosogo di Ayub baiko antad sid kinolunduo dau. Oruhai humarap sid Kinoringan ong abarakatan-no do Kinoringan di iadino o kolunduo, ka. Iadko sid ongotangon dit ongodupot di miboboros om midadahava, ong siti, i vozoon do rogon om i Kinoringan mitimpa-timpa miduat-duat om midahava. Na i Kinoringan posuvang di Ayub sid kuasa di vozoon do rogon, supaya i vozoon do rogon momorisa om moniim di kosipan om kelinan di Ayub, suku a-piabazaan di rogon i guvas di Ayub, ka. Noboros-po i iadino, avi-no ino bahagi di mad wayang om lakunan. Dot tigogi,

Hogot kotolu: varo-no vagu poginakanan dit anganak di Ayub, dot iosido iadko koubasan, sid dau do valai, tu vaza-no manangkis dot abambaran dit anganak dau dit okonko banalko ivo-ivohon. Do kakali mogom-ogom sid apad dau i Ayub, otimpan-no it uripon mangkus-tangkus rumikot dot okikipogi om otomuk-no, dot osodu-po, moroboros-no pahabal dot, It ongosapi-nu aso-no, *tu nohizaan do mangaradu-radu it ongomanaud, rinumikot it ongomangarampas mingrampas dit ongosapi sampai pinatai-o i mandul om i sokovia i it ongomanaud. Baikko ioku-po diti o nokedu, ka dit uripon di Ayub.* dot a-po nopongo monuturan i gulu korikot, mangkus-tangkus-no rumkot it uripon koduvo do mamako mangahabal dot *Rinumikot i sangod, it ulun do Kasdim mingrampas dit ongounta sampai pinatai kavi dioti it ongomanaud*, ka, do kakali monuturan i koduvo, tirikot-po di kotolu ma-i ko mangahabal dot, Nopunso matai it anganak di Ayub, tu nohotungan di valai di humaba di piningramazan dioti, ka dau.

Na norongou-po kavi di Ayub it ongokosusaan dino, kinini-kinis-no i pakazan dau om lumoub-no sid tana, tu i iadkeno sid dioti di hiza diri, tanda do mongupus sampai minogkorudu-no iosido. Topot minsanko iadino tu norongou-no dau kavi it ongokosusaan, di nokonong sid dau dot amu opibambaan, kakali dot amu nakapangalabpu iosido do songlinsou o boros do koluu-ko kouhang do Kinoringan. Gamko, ka di Ayub:

Linumandai-oku antad sid idi-ku... mongindazou-oku di ngaran di Tuhan, ka, tu kakali atapat i Ayub mongindazou om sumamba sid kovosihan do Kinoringan. Minsanko iadino ot ongokosusaan om korugizan om kudamus sampai sampit do ginavo, atalahas-no dot i Ayub kakali mangasip om humarap sid Kinoringan. Siti-no i rontob di hogot kotolu do iadko mingwayang antawa lakunan sid tanga do riniba.

Varo-no vagu do iadko hogot kaapat, sid surga (2,1-7a): Nokopitoguvang-no vagu sid Kinoringan om i vozoon do rogon do iadko sid Dewan. Minokihabal-no vagu i Kinoringan di notomod di vozoon

do rogon riniba. Mad mongindazou i Kinoringan di rogon sid gama mirimpanau sid pomogunan sampai monginsosok-no iosido do kuran-no o kavazao di Ayub. Tu i Kinoringan momubuk sampai mongombiri do songkuro-no banal o kelino om kosipan di Ayub. Na, ka di vozoon do rogon: I Ayub kakali a-nokopongusiba ko moguhang dikau, tu rontob nokudamus do nopunso o suvang dot onkob dau om ongopangazam, inoi. Ong i guvas dau kondiri, nga tivadai-gosoi. Pogi onggugas-no dau kondiri ilo do kopurimon do kapagasan, amu-ku osorou dot okon-poko tumolikud-no sampai mongusiba om mongusok-no do Kinoringan, ka di vozoon do rogon.

Na, ka di Kinoringan, Tiimai-no-boto, ombo o rontob o gama-nu momogos. Topot ontupato, supaya amu sampai osingkad o huntung di Ayub, ka.

Na ino-no i turus sid (7b-10) hogot kolimo sid tanga do riniba, ino-no sid di Ayub. Nanangan iosido do kapagasan do mad amu-no milod asakapan. Nontok iosido do kurizap dot aso-no samatan di guvas dau sampai mozo-no tumungag ot ikam di Ayub.

Sid saralom di iadkeno o sansara di Ayub mad tinumiim iosido mogihim do vazaan sumakap, minuham-no sid avu, tu vaza di Ayub tumorima do kosusaan di mad antad sid Kinoringan. Iti-no i kavazao di Ayub, banalko otontom o ginavo dau.

Topot ong i savo di Ayub, tu ondu do pokudiai o kosipan, kodung nemot-po i purimonon di Ayub om andaman-no kudamaus dau sampai mongupus-po dit angaanak dau di nongopatai-no, kinumioduw-no di Ayub di kakali agazo o harapan sid Kinoringan. Mad nolingan-no dit ondu i kelino di Ayub sid saralom di gama manangkis do karaatan di hiza dit a-po nontok do kosusaan ioti. Notonusan-no iosido do hinondom. Mad okon-noko barakat om kovosihan do Kinoringan o minanahak dau do surupu o kopurimanan, inoi nga i noval o palad dau gumama o kinolunduan. Boros dit ondu dino, Inzkod-ingkod-no humarap sid Kinoringan do nagon-ko ong Kinoringan, baiko mongompus dikau. Kagi inot ondu nga roroton-no mimot di Ayub mad osuhulan-no ong matai-ogi koduruk i Ayub. Tu mad baiko monusa-po dau.

Topot ong i Ayub, tu otontom o ginavo, minsan iadino o kosusaan, kakali atarang ot inuagan, gam pinajal i savo dau di iadino karaat o boros: *Baiko it avantang naku o torimaon tokou it antad sid Kinoringan om amu naku torimaon tokou antad sid Kinoringan?* I pongitungan di Ayub Avantang ko it araat, antad kavi sid Kinoringan. Iso nga aso ajadi ong okonko kenginan do Kinoringan.

Manjadi ino-no i kinompusan di hogot kolimo di mad lakunan di mitorumaliu sid surga om sid riniba. *Amu monimbaru i Ayub do kasalaan sid boborosan dau.* ka.

2,11-13 Magandaha it anggai-anggai di Ayub.

I habal di kinosusaan di Ayub nakazazad-no sampai nening-no dit ongoanggai-anggai di Ayub i kinosusaan di Ayub sampai miniupakat-no ioti magandaha dit anggai-anggai dioti dino. Narait-no it inantadon dioti dino, ino-no, Teman, Suah, om Naama, ongopomogunan dit okonko osomok dati om amu elaan tokou do siombo banal. ino tolu it ulun dino, bai sid buuk di Ayub ot otuturanan ioti dino. Ino tolu i anggai-anggai di Ayub om iosido mad ulun di borontuvilan o hukum, na mongitung dot a-milo-milo kumuruhang di Ayub sid kosusaan do monginsasamod om mokibahagi di kosusaan o tomodon.

Na it ayat 12 manarang di kinorikatan dioti dino. Sabap oluvas i pomogunan om i Ayub mili-gili sid avu di sid natad do valai dati, notimpan dioti koduruk i Ayub dot it otimpan dioti, varo miburuvid-ruvid sid avu. Dupot keno ko nunu? ko mad riniba? Isai-keno? Atuk, i Ayub iti bala! Amu oruhai ioti mongintutun dit anggai-anggai dioti, tu kakali mongohondom ioti do kuran iosido diri minogkovosihan dioti diri, dot ong biano, nga modsu sid avu dot notopuan do kurizap i guvas dau. Aso-no samadan di guvas.

Bai iso-po ot elaan dioti, ino-no mongogizak mogihad om sumusui di gama di Ayub mongimbulai di kosusaan, ino-no monginis dit ongosulung-sulung, tanda dot opus om oruol o ginavo sampai dumudun di Ayub modop-odop sid avu om humongkob-nopo. Ino-no i kinompuso di hogot konom di wayang dioti, *minogom-no ioti sid toning di Ayub do koturuan do songlinsou o boros, nga aso, tu notongob di iadino kagazo i kosusaan di Ayub.* Notombol-no i kabang dioti sid saralom do

somminggu. Minsanko ulun ioti di banalko kihukum, mad sumokot i dila sid ngahad dioti.

Manjadi iaditi i vaza di buuk di Ayub monodia dit ongokeloo om i gama midadahava-hava kananganko i kohormatan do Kinoringan om i vaza do Kinoringan gumompi om monunda di riniba om monuluk di kabanaran dau sid tanga do riniba. Sokovia i it ongokodolikatan do riniba, kananganko i kobuatano om kosusao do koposizan, panakit, mogoruzou, mogolizud, kopioduhan om kopisasanaan, nga nokogili-no kavi om notiiman-no kavi dit ongoanggai-anggai di Ayub mangazazak inot ongokodolikatan dino. Kondiri di Ayub o monimpa do pogili sid dioti di kosusaan dau, mad mogkorudu iosido o gama pahabal di kinosusaan dau dino, dot okonko bai pendongou dit anggai-anggai dau, inoi nga pendongou-po sid tinoguvangon do Kinoringan. Sabap iosido dino, kiroon dau laid dot i sokovia i kavazao om koposizan om gagamaon, sid tinoguvangon-nopo do Kinoringan iosido dot iso nga aso nagama om netung dot amu kopionong sid kenginan do Kinoringan.

Fasal 3: Mungkolu i Ayub di kosungguvo do koposizan

Na sid boros di Ayub kembulai i sokovia i kosusaan dau dit okonko bai hal do guvas, inoi nga sid ginavo osusa iosido sampai humongkob. Monongkokuro iosido do koposizan do riniba. Nopupusan banalno iosido, hiza do nokotutuk it ongoanggai-anggai di Ayub sid dau, koturuan do songlinsou o boros nga aso-no. Amu katama ioti mumbongut, tu asot elaan do boroson monginsasamod ko nunununu. Baiko momodhongkob ioti sampai momongitung do kuran kadapat o vaza kumiboros di Ayub dot okon-ko tomod moro-boros dot aso panangan om bai mongingruol di ginavo di Ayub. Na sid gama di Ayub mongolupu om mongindaraat di kinosinaan dau, okudik nga aso gama dau manala do Kinoringan. Bai insani (ayat 23) mongoduat iosido di kinuro mongorinding i riniba. Ino-no it atalaha sid boros di Ayub dino, Ong sid tanga di kosusaan di iadino kahatul, a-milo-milo, nga mongimpuras it ulun di kavazao dau sampai osuba-no i ginavo dau ponong sid kopiduvaa do ginavo kananganko i kosungguvo om kogunaan do koposizan dot ulun. I sokovia i gama dot ulun mansahari om mokioopud, antad dit opodok-po sampai sumukod om lumohing, nga oporisa-no ong osukad-no do varo guna ko aso om tomodon ko amu. Sabap i Ayub banalko osomok-no ong osingkad o huntung dau. mad toroingkono-no ot opurimanan dau. I kolunduo dau om i kohukumo dau om i vaza dau mogkovosihan dot ulun sampai monorou-no iosido di kosinango dit ulun di minatai. Ong i minataino, amu-no kopurimon do kosusaan, ong a-no laid nemongo, tantu a-kotiim ko kopurimon do nununopo songkosusaan. Osinang-no ong nolobong-no... ka dau.

Ino boros di Ayub dino mimbulai do mad abasan-no iosido mizau om mokiputut-no iosido do timbagos.

Fasal 4-5: i Elifas mogkovosihan di Ayub

Sabap i Ayub kondiri nokogulu-no mumbongut, na katama-no it anggai-anggai dau tumimpa om mongogili di dau do hohorotizan kananganko i kosusaan di Ayub. Sid dioti tolu it ongo-anggai di Ayub dino, i Elifas dati it otuo-no mantadko i vokon. Iti-no o sabap dot iosido o mogulu mumbongut. Ulun iosido di kihukum sid teologia koubasan. Manjadi pangalaman dau pakazon di Elifas sid gama mongira om mamajal di Ayub, dot ino-no i vaza dau pogili sid di Ayub,

a) i kabanaran do Kinoringan (4,2-11), tu sid kabanaran dino inapadan it ulun dit aso sala. Topot ong it ulun dot araat om i kisala, tonuson dau.

b) i kentalangan di kobuatano do riniba, dot iso't ulun nga aso't aso sala (4,12-21)

c) Iti-no o sabap: bai kolovongo dot ulun dit aso't ontok kumiodu do Kinoringan (5,1-7)

d) ino-no ot atag: tumorima dit kovosihan om i insasamod do koruhang (5,8-16)

e) om iri-ogi kemot it ulun di kopioondusan om kosopulan, ka.(5,17-27)

It anggai keso katama-no momoros tumimpa di boros di Ayub dino. Kagi, sabap aralom ino boros di Ayub manarang di dau do ginavo om gama mangaharati di kavazao dau, i Elifas nga katama tumimpa sampai iuli sid di Ayub di sokovia i kosusaan dino. Gam boros di Elifas di kodung norongou-no ino boros di Ayub, Aso-no panangan do motos-po. Tu sid boros di Ayub dino varo't a-ko piro o hal dit

osusa iumbangan. Manarang-no laid i Elifas di kobuatano di Ayub diri di kakal-po tivadai kosoi i guvas sampai ulun do kihukum. Sabap i Ayub mad guru dit ongoulun om ulun di mogkovosihan om monginsasamod dit ulun. Ginaranggai-po laid di Elifas i kavantango di Ayub om garanggazo-ogi it ongokosusaan di Ayub. Monolong iosido di kelinan om kokosogo di Ayub sid Kinoringan om mongoduat iosido do nokokuro tu amu-no alanut i harapan om kosipan dau. Sino-no o kematan di Elifas i kokuguzan di kosipan di Ayub. Ozi iosido ong atatap i kosipan di Ayub. Iri-ogi bokuli dau sid Ayub ino hal dino, tu ka dau, Nunu-nopo i tonomon dot ulun, ino-no ot omoton dau. I harati, i Ayub kondiri o puun do karaatan om kosusaan, tu antad-no sid nagama nongoi-ongoi dau i karaatan dino, ka. Boros dau, ino kosusaan di Ayub mitoruva-no di gama dau, tu a-milo-milo mongohukum i Kinoringan dit ulun om i gama dau.

Gam minonuturan i Elifas di dau do pangalaman, retanko nokonong-no laid iosido do kosusaan di iadino (4,12-17) sampai niantad sid navavazaan dau i gama do mamajal di Ayub om nituvad-no dau sid ira dau di Ayub. Ong sukul sumamba i Ayub sid Kinoringan sampai tumorima di kovosihan do Kinoringan, tantu varo katagan. Sabap, ka dau, i Kinoringan, minsanko pokoruol dot ulun, kakali iosido o pengkod vagu di kosusao dot ulun, ka.

Sid gama di iadino, indoson di Elifas ong avantang o gama dau monginsasamod om kumiboros di anggai-anggai dau.

Ong kiroon it ensanan ino boros di Elifas, banalko ongoraralom, tu kihukum iosido sampai moniim iosido monginsasamod om manarabang di Ayub. Otopot-nopo ino gama mamahul di pogili di katatapo om katapatan om kabanaran kavi do Kinoringan. Otopot--no do banalko osodu i riniba antad sid Kinoringan, i banalko osusi, dot ong i riniba bai tana o ginama. Kagi i riniba naraag, gima i kasalaan. Ong i Kinoringan, agazo o ginavo dau pada di karaatan. Topot mongohukum di karaatan dot okudik nga aso timbangan. Sabap ino, bai iso-no o vazaan mopud sid tinoguvangon do Kinoringan, ino-no, Sumamba sid dau om tumuku sampai monginud di kovosihan om koruhunan dau.

Minsanko iadino o kavantang di vaza di Elifas pokosog, kakali mad amu-po miuma. Sabap i sokovia i gama dau momoros sid di Ayub, bai i keloo dau vinuvol amu-no initung dot opupusan i Ayub sampai sumompirang-no i ginavo di Ayub do sisiri ong mitinganu, gima i sokovia i pensubaan om kapagasan dau dino. Sid boros di Elifas atalahas-no dot suvai momurimon it ulun kondiri di iadino kagazo do kosusaan om kapagasan om kadapat-ogi momuriman do kuran dot ulun sid tanga do kosusaan dau dino.

Avantang dara ong i Elifas momurimon di kapagasan di Ayub sampai iosido ot insasamadan , dino, okonko bai mimot-imot do mogom-ogom sid avu i kikosusaan. Kagi ong i gama di Elifas tanid-no. Sid gama dau manarang om mongonsi di kosusaan di Ayub minsomok iosido sid kiroon di vozoon do rogon, i noboros-no laid dot, Ino kaharapan di Ayub sid Kinoringan bai antad sid nokolundu iosido. Iadino i teologia di Elifas: i kovosihan do Kinoringan o puun do harapan om kosinango dot ulun di mogihim di kosurupuvan sid saralom dit kelinan dau. It ulun suvai mangasip ong abarakatan-no iosido do Kinoringan. ka.

Fasal 6-7: I timpa di Ayub sid boros di Elifas dino

Na i Ayub tumimpa sampai manarangedot ensanan ino boros di Elifas, tantu a-nokonong. Okudik nga aso nohorotizan di Elifas i kosusaan om kapagasan om kavazao di Ayub, tu i boros dau di bai minongimbulit di keloo do riniba kananganko i kabanaran do Kinoringan di monuli di karaatan do riniba sid saralom di gama monusa di riniba. Ino keloo dino aso guna, ong i kosusaan om kavazao di Ayub o toguvangon, ka.

6,2-7 Nihodtol-no di Ayub do kavasa iosido mungkolu sid saralom dit odoi dau di momurimon dit oruol om ruol do ginavo (8-13) di toropatazo. Humijau iosido nga amu, mingkono nga amu, ogos-ogon ong aso tinganan tumahan di kobuatano dino. Gam mongoduat-no iosido do nokokuro, tu iadino, tu aso't andaman dau do nokotimbaru do karaatan.

I pongitungan di Ayub okonko iadko i boros laid di savo dau do tumongkizad om mongolupu do

Kinoringan. Inoi nga ong banalko aso tinganan lumabus sid kosusaan dau dino, usuhul-po ong Kinoringan-no pomutut di timbagos dau. Topot kakali agazo o ginavo di Ayub sid Kinoringan sampai, ong iadko matai-no iosido, itungon-no dau i kapatazan dau do iadko kovosihan do Kinoringan di rumikot sid dau sid tanga di kotuvongo sid kinosusaan dau dino. Kuran-kuran, a-kasaap i Ayub do Kinoringan, it asavat banal (10).

Banal-no, mad opupusan-no iosido. Amu kogoos iosido tumahan di kapagasan om korualan dau dit okonko bai sid guvas, inoi nga sid ginavo dau. Kagi asot kiroon dau do kadapat humarap do varo kamamagatan om kolingasan di kosusaan dau dino. Engat dau i dau do rontob. Iosido, nga riniba di varo rontob dot agasan om kakansango. Okonko basi ko tumbaga i tulang om uhat dau dit ataahan sid sokoviai, ka.

Ong i Elifas nokopomoros-no do kuran-kuran, nga varo-no vagu katagan. Na i Ayub dino a-kemot di kamamagatan dino, inoi nga i koposizan amu miabal do sodop om adau, ko i kotuvongo om iri-ogi i kanavaho vagu. Ong i riniba, kodung toropatazo, lumombus-nobo matai.

6,24-30 Iri-ogi i Ayub tumoguvang banal dit ongoanggai-anggai dau. Mongining dara iosido sid tudukan om ira dit anggai-anggai dau, ong sukul i tudukan om ira dino otopot om abanal. Topot amu tumorima i Ayub di pajal dioti dino. Opurimanan dau dot it anggai-anggai dau amu mongorinding di Ayub, gam katama iosido pojuval om pada di Ayub iadko it usan-usan, it iso't ulun nga aso-no't engin manaud. I kohorotizan di Ayub, suvai sid tanga do kosusaan om elaan-ogi dot isai banal o koruhang om anggai-anggai.

7,1-21 Noboros-no i iadino sid ongoanggai-anggai dau, kumiboros i Ayub sid Kinoringan do dumahava o tomodon. Katama iosido mumbongut sid tinoguvangon do Kinoringan. Amu opiduvo i ginavo kananganko i kobuatano do Kinoringan. Elaan-no di Ayub dot agazo o pialatan ponong sid Kinoringan, iadko i boros di Zabur 8,5: *nunu-ka o kogunaan-nu do kakal-pko-po mongohondom di riniba*, ka, om mangarait iosido di **minanaud do riniba 0**). Ong momoros i Ayub di iadino, kopihiza popuromut iosido di kosusaan dau sid Kinoringan, nga kakali sumasi iosido di kohormatan do Kinoringan om i songkuro agazo o ginavo do Kinoringan ponong sid riniba.

Bai sid kinompuso di boros dau (21) patahu i Ayub di koposizan om ginavo dau sid kobin-sianan do Kinoringan. Topotrumosi dot amu-po orikatan i kosianan dino, engkono-no iosido.

Fasal 8 I mogkovosihan i Bildad, i anggai-anggai koduvo.

Ong i anggai koduvo, ino-no i Bildad, omulok-mulok-po, okonko opian om odoromoi o gama dau mangadahava di boros di Ayub. Labaan do koturuan iosido motos mongimpa di kobuatano di Ayub om nokorongou-po i korudu di Ayub om i pajal di Elifas sampai i gama di Ayub tumimpa sid di Elifas, mad rumidi-no i ginavo dau sampai engin-no iosido paratu di dau do kovosihan. Turus moguhang om mamajal om mongira iosido di Ayub. Pinnosimozo-no di Bildad ino timpa di Ayub sid di Elifas om amu-no mongitung-po iosido dit indomoon di Ayub (6,28). Turus valangon di Bildad i dau do vaza humarati do Kinoringan, ino-no o keloo dau: I kabanaran do Kinoringan mononsuli di karaatan dot ulun, it isai-nopo. Iti-no o sabap dot a-milo-milo i riniba sumuhut di kabanaran do Kinoringan, ka dau.

I Bildad amu momozo-bozo di pongitungan di Ayub. Sid di Bildad alanta-no kavi it ongohal, i di Ayub kondiri om i kosusaan dau, ko i dang anganak di Ayub om i kinorungazan dioti dino. Iti kavi, ka di Bildad, sala kondiri om hukuman do Kinoringan. Pinunso do Kinoringan it anganak-nu, kisala ioti, gam ino kinapatazan dit anganak-nu o tanda di kabanaran do Kinoringan, ka dau. Mad onibak om oribau banal ino teologia di Bildad. Iosido mad ipongumpalad dau i Kinoringan iadko it a-ko piro ot ongoulun di retanko Kristian di tumongkizad sid ongopiumpugan, retanko bai ioti o nakaharati do Kinoringan om elo sumamba om mangasip sid dau.

Ong i Ayub mad humongkob banal, tu ka dit itung dau (7,21) amu oduruk i Kinoringan mogihim om kumakap dohon, ka di Ayub. Ong i Bildad gam monuhu di Ayub mogihim do Kinoringan, retanko i Ayub nokensodu-no antad sid Kinoringan (8,5+11). I Bildad mamakai-po dot umpamaa do Masir, ino-no i sakot dot undusan om i pandan, i sakot dit gagamaon do karatas.

Na sid kovian, nga inompusan-no vagu di Bildad mongindoroi di Ayub, tu i pongitungan dau, i Ayub nokedu-no sid tinoguvangon do Kinoringan sampai pakaso-no iosido do Kinoringan.

Fasal 9-10 I timpa vagu di Ayub

I Bildad dino minanarang sid di Ayub di kabanaran do Kinoringan dot amu ogura di nokening iosido di boros om korudu di Ayub kananganko i dau do kopurimanan di nohukuman iosido dot aso't engat dau do varo kasalaan om karaatan dau. Pengkaa dino, i Elifas nivagat-no dau dot ino kabanaran do Kinoringan o mononsuli di karaatan dot ulun. Bianco, i Ayub tumoguvang dino pamarasan do kabanaran do Kinoringan. Iosido dino amu mamakai dino kabanaran dino do iadko harapan om kosipan, gam ino kabanaran dino nga mad kogolivong i dau ponong sid Kinoringan. Iti-no o sabap dot ino gama dau tumimpa okonko tantu ponong sid ongoanggai dau, inoi nga mad kumiboros om minta dua iosido sid Kinoringan.

Atalahas sid boros di Ayub dot iosido amu mumbongut do iadko guru sid panambayangan, inoi nga it ulun di muham sid avu dit otopuan do kurizap dot ogos-ogos ong amu-no kokodos Onibak i panarangan dau di mangakun iosido dot i riniba asot elaan do dumahava ko manala do Kinoringan. Ino kabanaran om i kuasa do Kinoringan banalko avagat. Minsanko iadino o kaharati di Ayub, kakali opiduvo i ginavo, gima ino kabanaran di iadino avagat om abanal, mad mimbulai o karaatan om kosusaan do riniba sampai i riniba amu-no kotutun di kabanaran do Kinoringan. Opurimanan di Ayub dot i Kinoringan manala di Ayub, tu mongintalang do kabanaran. Ino dino amu torimaon di Ayub. Sabap varo kiroon di Ayub do sid hal dino kakali varo-po nokosusut dit amu-po ohorotizan dau. Ino-no it ohorotizan di Ayub, i sokovia i it ongokosusaan sid tanga do riniba, okonko oruhai manalahas om monodiri do retanko, Iti kavi, nga sala dot ulun om vaza do Kinoringan mongohukum di karaatan dot ulun. Amu kasip i Ayub dot dot hukum do Kinoringan i gonit i nokonong sid ulun, ko i hakim di nobolou, tu minangapil-minokiapil, ino nga okonko kovosihan ko kabanaran do Kinoringan. I Ayub kondiri mokitalahas ombo i nokembulai sid kopiangan sid surga dot milavan di Kinoringan om i vozoon do rogon sid gama humarap om pahaba di kosipan di Ayub. Minsanko amu nokelo i Ayub dino't upakat sid surga dino, nga mad varo ohorotizan dau dot okonko bai iso ralan di kabanaran do Kinoringan.

Sid pomintaan dua di F. 10,1-7 pogili-no vagu i Ayub sid Kinoringan di dau do hal. Sabap aso harapan vokon tanidko i Kinoringan om i kovosihan dau. Sid gama di iadino, mokihukum iosido do Kinoringan. Ong banalko kisala-oku, ka, valango-no i sala-ku. Iosido kondiri nga aso't elaan dau ong sala om karanggalan. Iti-no o sabap do mokitalahas iosido do Kinoringan. Kagi mongoduat iosido do Kinoringan do nunu-ka o kogunaan sid Kinoringan ong orungoi-no iosido.

Gam manarang i Ayub, ong ohukuman-no iosido dot okonko kisala, ino iadino dino mongorongoi di kohormatan do Kinoringan. Sabap i Ayub, nga antad sid palad do Kinoringan sampai kohormatan do Kinoringan iosido. Ong orungoi, mad i kohormatan do Kinoringan o nohinaan, ka dot i gama di Ayub momoros do iadino, bai mongoduat dot okonko duatan banal, tu atalahas-no laid dot okonko iadino o gama om kobuatano do Kinoringan. Hal koduvo do monginsosok i Ayub, i Kinoringan okonko kimato iadko mato do riniba dit amu tantu kosonsob ko bai memot dit osomok. Inoi nga Kinoringan mongimpuras om mongimot di sokovia i, it osomok om i sid sampaping di koribing dit avan. Sabap ino i gama do Kinoringan amu koluu di gama do riniba dit amu engat i sid tohudi om i sid sodu. Sabap ong sid riniba, ong engat laid dara i kosungguvo, ogumu o gama dit agama, tu amu nohorotizan laid i kosungguvo om rikoton. Topot, sabap amu kanohorotizan ino kosungguvo dino, varo-no't agama di mamalid om popunovot dot ulun. Pengkaa dino i hal kotolu, i sukud do Kinoringan amu miabal di sukud do riniba. Sampai penlaid iosido nga sampai penlaid ot uog om umba do Kinoringan sampai aso hal dot ahago agama ong Kinoringani. Manjadi minsanko i Ayub, tu engin banal mongilo-ilo di kobuatano do Kinoringan, kakali andaman om aharap dot ino boros om duaton di iadino, bai kopiduvaan do ginavo dit aso panangan. Sid kovian (10,7) I Ayub patahu di kondiri dau sid palad om kovosihan do Kinoringan.

Fasal 11: I Anggai kotolu mumbongut mongkovosihan di Ayub

It anggai-anggai kotolu di Ayub, ino-no i Zofar. Iosido dino o tohudi-no banal kobongut mangambat di Ayub. Iosido-kagi ot omulok banal mantadko ioti sokovia i it ongoanggai di Ayub. Sabap ino sokovia i it ongooboros dau mad baiko manasil di Ayub. It ongokosusaan di Ayub di kudamus om it ongoikapagasan, mad opodok nga asot opurimanan dau. It opurimanan di Zofar ong i Ayub, ulun dot ogumu o gagalakon, aso't onsi di boborosan. Sabap ino i gama dau momoros baiko mongira di Ayub, tu retan dau ko asot ohorotizan di Ayub di suromo do Kinoringan. A-abanal kerad dau. Sabap ino sinuhu-no dau i Ayub mokimahap om muli sid Kinoringan, tu mangatag-no iosido di Ayub. Mad otopot kagi ong kiroon tokou it ongooboros di Zofar, mad opurimanan tokou do kaharati iosido di kbuatano om kavazao sid tinoguvangon do Kinoringan. Rontob-nopo it ongopinimbarasan dau dino, lobi-po nakaharati ong i Ayub.

Manjadi sokovia i it ongooboros di Zofar om i vaza dau kumitoguvang di Ayub di nontok i Ayub do iadkeno o kosusaan, atag do pagaman tokou mongitung dot amu miuma suntuan dot oviton tokou sid vaza monginsasamod dot ulun di nontok do kosusaan. I vaza di Zofar mad iadko it ulun di minagavi sid karismatik, kinumakap iosido dit ulun mantai-vantai sid odopon do banako ahali dot engin minta dua, tu monulung dit ulun dino. Topot amu mininta dua iosido, tu it ulun dit ahali aso vinalang sid dialo do sala di kagagama, tu amu sumakit it ulun, ong okonko kisala sid tinoguvangon do Kinoringan, ka. Manjadi it ulun do sumakit nomungan-no i kosusaan, tu sumakit-po iosido om mongitung-po do kisala bala iosido sid tinoguvangon do Kinoringan kagagama didino. Manjadi i gama magandaha dit ulun do karismatik dino amu nokenggaan di kosusaan dit ulun sumakit. Sabap ino, i suntuan di nagama di Zofar suntuan do negative.

4-6 It ongoanggai-anggai di Ayub minongitung dot it ongokudamus ko i kapagasan mitoruva-no dit ongokasalaan di nangagama di Ayub, minsanko aso't andaman di Zofar do nagama di Ayub do sala, nga gamko mindamo iosido dot i Kinoringan o mongimbulai di sala di Ayub om it ongokaraatan di Ayub. Manjadi ong kodung oontok kosusaan ko kopunovot it ulun, hinukaum naku do Kioringan, tu kisala?

7-16 Na netung di Ayub, i gama do Kinoringan mongira dau, baiko mongonsug dau sumamba banal sid Kinoringan sampai mangakun dit ongokaraatan dau iadko it ulun di nokotoguvang sid pihukuman, om iri-ogi asamadan-no banal iosido do Kinoringan. Tu iti-no i kosurutan banal ponong sid ralan do kopoulosan, ka di pongitungan di Ayub.

Fasal 13-14 Monimpa i Ayub di ongooboros di Zofar

13,1-5 Amu-no minangaru i Ayub do timpa dit ongoanggai-anggai dau, tu nongoboros dioti, nelaan-no laid koviai di Ayub. Miningkod i Ayub kuiuji dioti di suromo om it ohorotizan sid tinoguvangon do Kinoringan. Okonko i gama dioti rumundu muham sid avo o kiontok, tu sokovia ino okonko kiguna sampai aso panangan. I korualan do ginavo di Ayub, ino-no i kudamus om kapagasan, amu nokotiim antawa amu opurimanan dit ongoanggai dau. It opurimanan di Ayub di mad nakada-no iosido do Kinoringan, okonko opurimanan dit ongoanggai-angaai dau, tu ioti rontob i mato o mirulorulou mimot di Ayub. Inoi ong kopurimon nga amu. Sinuhul-no di Ayub do tumoguvang sid Kinoringan sampai mokilumbatos-no do Kinoringan, do gunaon-po iosido ko amu-no, amu-no kumiambat-po dit ongoanggai-anggai dau. Aso-no vazaan vokon nelaan di Ayub tanid mantadko humarap sid Kinoringan. Ong mongitung i Ayub dot ombo-noko i Kinoringan o mongohukum, iadko mozo iosido di vaza di bansa dot Israel nojonjizan-po do Kinoringan do iadko i hakim, nitahu-no i janji dino do kodung nosainan, antad sid di Ibrahim (Kinotimpunaan 15) sampai sid nabi Yesaya om i Amos om i Hosea-po.

18-22 Manjadi it ongoanggai-anggai dau mad baiko sasi di Ayub hukum do Kinoringan. Iosido kondiri mumbongut sid pihukuman do iadko peguam di pogili di kasalaan antawa monginsosok do nuu banal i sala dau.

23-28 monginsosk iosido banal di Kinoringan dot nunu i hal dit a-nokonong. Ioti ongoanggai-anggai miniguli-guli-no minomoros do varo sala di Ayub, na mokitarang-no iosido di sala dino, supaya kogili ino om elaan-ogi dau. Aso boros di Ayub sino dot ulun iosido dot aso sala. Bai it oholian o gama dioti manala di Ayub, amu torimaon dau ong okonko nokogili ko olinggata ino kasalaan dau dino. Banal-no, amu kaharati i Ayub di kondiri dau om amu kaharati iosido do nokokuro i Kinoringan, tu amu-no sumirot om mongumbasih di Ayub(24). Omogot-no dara ong kibongut-po i Kinoringan manarang di karaatan di Ayub, ong varo. Ino kinolingan do Kinoringan it osusaan banal iosido. Mad natanus-no i Kinoringan dot aso tinganan tumoguvang. Agazo banal o ginavo dau tumoguvang vagu sid Kinoringan, gima i kinopurimanan dau do banalko iseso iosido. Minsanko kikoruhang iosido, ino-no it ongoanggai-anggai, mad kakali iseso, tu a-nakaharati ioti di Ayub. Ino kinensoduan antad sid tinoguvangon do Kinoringan ot onsi di kinosusaan dau dit amu agasan. Mad noruta-no i guvas dot ipat-ipat i tulang om uhat om koburuo nga norungoi-no om nohuzas-no.

14,1-6 Noboros-po i iadino, minongimbulit-no vagu di kobuatano om sampit dau do mad mongolupuno di kinosinaan dau sampai manarang di kavazao di kopolisan dot ulun antad dit opodok-po sampai pempatai do baiko onibak iadko i sakot om vusak di vozo-vozon-nopo do kosusaan dit amu asakapan. Iadko i Zabur 90 mongimbulit i Ayub di keloo do riniba kananganko i kavazao do riniba. Mokihukum dara iosido do Kinoringan, topot kakali andaman dot agazo o pitonidan di Kinoringan om iosido riniba. Kinoringan o kinumavid di timbagos om nezap-no laid dau it vinulanan dit ulun.

7-12 Banal-no mad aso harapan ong i riniba, tu kapatazan o kosungguvo dau. Omogot-no ong kazu, tu mutolid vagu. Sid Israel varo koubasan diri dot kodung lumohing-no o kazu, iadko Zaitun, managad di kazu do baiko tuod-po. Topot mutolid-no vagu i tuod om kazu-no vagu do monguva. Iti-no o sabap do varo zaitun do rinibuan toun i tuod om gamut dau, nga kakali avantang i monguva om muroun. Topot ong riniba, aso iadino. Ong tuod om gamut, ong sukul ovegan-no vagu, tantu masi-no. Topot ong riniba, aso harapan, antawa varo-ka harapan?

13-17 Minsanko iadino o gama mogkorudu di kosusaan di mad aso kengkadan om ensanan i kobuatano do riniba di mad tai sid tinoguvangon do Kinoringan, baiko mangalu-kalu ong varo harapan do ngaran. Ino-no rontob, suvaiko tumimpa i Kinoringan om mangahatul. Sabap ong sid Kinoringan kavasa-no kavi (Matius 19,26 Ong i Kinoringan otinganan-no kavi). I Ayub monginsosok di samod om i rodus do Kinoringan, ombo it otori om kamanang, i hukum ko i kovosihan, sampai ino kamanangan di samod om kovosihan do Kinoringan ot harapan dau. Sabap ino, minsanko opupusan sid kinapagasan dau kakali humarap iosido dot amu engkod humarap di kakali iosido, tu ong minatai-po, iri-ogi navi-no i harapan, ka dau. Na mongonsug iosido do Kinoringan om popuhondom-no di Kinoringan do minsanko iadkeno kagazo o pialatan di riniba om iosido, kakali i riniba antad sid palad do Kinoringan om sasi di kinourugan, tu pasasi di kogofoo om kohormatan do Kinoringan. Kagi, oruhai ong i Kinoringan pada di karaatan om mananus di kasalaan. Antawa..

18-22 banal-no dot aso harapan, tu rinungoi di Kinoringan i harapan naku? Sinod a-ko piro ayat dino momurimon do kuran di Ayub di iadko mantung-lantung do torinsan-insan humarap om iri-ogi opupusan vagu iosido dot okudik nga aso-no harapan dau dino. Varo kopiduvaan di ginavo dau, minsanko torinsan-insan i sinikit do harapan mimbulai om mad andab do tigogi, navi-no vagu. Songkoitung-no ong a-milo milo mongohondom i Kinoringan di riniba (Zabur 8) om iri-ogi andaman di Ayub do songkuro kagazo di vinangun vokon, it ongoburul om ongopampang, it ongolizud ko i vaig dit kababak dit ongovatu. Harapan om kopiduvaan do ginavo miganti-ganti sid ginavo om pongitungan di Ayub di muham-uham iosido sid avu dot notopuan kurizap om ongokosusaan vokon. Sabap ino, guvas om ginavo, iri-no ko iri humongkob dot a-no kemot do kosinango om kosungguvon sid atag.

Basao-no i panarangan sid Kitab Momogun nalad 266 di manarang di vaza dioti tolu kenduvo o gama mititimpa. Iri-ogi varo-no natandon sid Kitab Momogun i

Fasal 19: Endaraatan-oku do Kinoringan, ka di Ayub

Nalazan sid Kitab Momogun i vaza dioti kenduvo mititimpa. Baiko i timpa di Ayub sid Bildad ot nokamung sid KM. I Bildad mad oholian noboros-no dot i Ayub banalko a-kotutun do Kinoringan, tu kakali pakaraat iosido do Kinoringan sampai momoros dot amu apatut i gama dit ongoanggai-anggai dau dot ino-no i kinompuso dau, Ensanani vinangun minud dit adau di kapatazan di Ayub dot ohongkob o gama minud, tu i Ayub amu sinamadan do Kinoringan, gam pakaaso do Kinoringan. Momurimon i Ayub dot i dila di Bildad mad dila di vozoon do rogon dit ozi mongorongoi om mananus di Ayub.

Ong nopupusan-no laid i Ayub diri, nokosurut-po ino kinopupusan dau di nening-no ino boros di Bildad. Sabap i Bildad pinirad i Ayub ko it ulun di pakaso do Kinoringan. Nakahali-no banal i kinosusaan di Ayub, tu it ongoanggai-anggai okonko bai amu kaharati di Ayub om i kinosusaan dau, gam ioti-no o paratu ba-nal di Ayub sid korolomo do karaatan om potolong di Ayub sid kotuvongo dit orondom banal. Ong sid Fasal 14 kakali varo ha-rapan do torinsan-insan, ong siti-no, tantu natanus-no i nunu-no-po sangharapan di bai sukul-po humarap. Norongou-po di Ayub ino pajal di Bildad, novian-no do kovosihan iosido. Sabap ino 19,1-5 dumahava i Ayub dot, Songkuro-po kalaid o monusa-kou dohon, poruol-kou di ginavo-ku do mongusiba-kou dohon misinghakim-kou. Impiro-piro i Ayub pouli sid dioti di dioti do gama manala om mamajal om mongindaraat. Ino boros di Ayub iadko bilok om sapadang om karis di monobok dioti dino, sabap ioti nakadamat di Ayub sampai minonobok di damat laid om mangararad-po di damat om kinorualan di Ayub. Ino gama dau monuli humarap dot ekum ioti, gima i gama dioti paratu di Ayub do iadino. Sabap sampai biano, i gama dit anggai-anggai dau baiko mokorinding sid kondiri dau. Topot amu tinumabang ko rumundun di Ayub sid kosusaan. Iti-no o sabap do mogkorudu-no vagu iosido do iadino.

6-22 manarang-no laid i Ayub dot Kinoringan-no o sabap di kinosusaan dau dino sid sokovia i kbuatano dau dit araat, opurimanan dau dot ino kavi, nga ginama do Kinoringan. noboros-no kavi i kinahajangan di Ayub do keso, koduvo, kotolu om i iadino. Kinoringan momogos, monungkolii, pensodu dit ulun, supaya iso nga aso monulung, aso mangapad, natabanan-no i ralan, orondom-no banal, navi-no i kolunduo dau sampai norungoi-no i ngaran om bantug di Ayub. Nasaadan-po i guvas dau, nopunso-no i harapan dau, nakagazo-no i hungot do Kinoringan om nosuhu-no i sangod do Kinoringan monoro om mongorumpak di Ayub. It ongokosusaan iadko tentera di mongorumpak di monimbak, monokon om mongodumpau...do pagazo di kosusaan om kapagasan om korualan om kosompitan.

Ong varis ko anggai-anggai sumana di Ayub, ino dino, nga antad kavi sid Kinoringan. Ino kosusaan dau o pinensodu di Ayub sid sokovia i barang om ulun dau, ongakob, varis, uripon, anggai-anggai, koruhang, koubasan, simbol. Iso nga aso-no di koruhang-po di Ayub. Ino kbuatano dit ongoulun vokon dit osomok sid di Ayub, nga bai vaza do Kinoringan do mongorurud di Ayub, ka.

Sid boros di iaditi mimbulai i duaton di Yesus, isuhut di Zabur 22 dot, Nokokuro-ka tu iniduan-okuno dikau o Kinoringan: Eli, Eli lama sabaktani, ong boros Ibrani. Ong i gulu diri, i Ayub o minangahatul di sokovia i ongakob, savo, anganak, uripon, kovorisan om i razat, gima ulun do kihukum iosido. Topot ong biano, obpinai ko savo nga ovutangan-no di tinongus di kabang di Ayub. Gam it anganak nga baiko kumihi-po om mangagauk di sumakit i Ayub do nunu-nopo i gama dau manamod dioti, nga baiko sana-po ot isuli. Tarangon-po dau i kbuatano di guvas dau, i kulit, nipon, tulang, om iti-no i noholian o gama, inot ongoanggai-anggai dau mongorurud di gama di iadino, gam mampaping-po di gama momogos om mongusiba om mongindaraat di Ayub. Amu-po miuma naku dot pogoson-oku do Kinoringan, ka dau.

23- 27 Inot ongoboros do iadino, ino-no sangod-no iosido do Kinoringan om i sokovia i riniba, varis om anggai-anggai, sampai okudik nga aso-no harapan do sumimban-po i kbuatano dino, kakali amu motos i Ayub. Mindamo iosido supaya amu oolingan ino boros dau dino, inoi nga iudzul sid pampang om itahu-no sid surat om buuk do kitab. Varo kiroon dau dot ino gama-nu mogkovosihan do Kinoringan om monginsosok di kabanaro do Kinoringan kiguna bahagi sid ongotohudi. Ozi iosido dot ino kososizan dino nitahu-no sampai penlaid, iadko i pinonuhuan di Musa om kogili-no ong hiza di kembulazan di kohormatan om kabanaran do Kinoringan. Minsanko natanus-no ong i Ayub, ino boros dau o manarang di kabanaran dau. Sabap, (25) kuran-nopo, kakali i Kinoringan mangapad di

Ayub.

Tigogi, mongimbulit vagu i di Ayub do harapan, minsanko bai tulang-po iosido di linopot do kulit. Tantu mongimot-oku vagu do Kinoringan. Sid tanga-po do rondom, engat di Ayub do kotoguvang vagu iosido sid Kinoringan. Na sid ayat 26 varo boros dit amu atarang banal: manarang do minatai-po i Ayub om nakasamung-po do Kinoringan, ko kakali iosido do bai kulit-po om tulang, nga kasamung-po do Kinoringan. Na kuran-kuran, nga aso tantu bida. Varo kiroon dot ulun dit elo do Kitab do kodung minatai it ulun, mad natanus iosido, tu amu-no mongohormat do Kinoringan i minatai, ka. Topot ong i Ayub, minsanko varo kiroon do iadino, kakali mongolumbatos dot a-milo-milo kopisamung vagu do Kinoringan do kuran-kuran, nga aso't elaan. Ong i kumuro, ombo-no. Sukul kopisamung vagu, ka di ginavo di Ayub dot ino kopisomungan, a-milo-milo kosunu, ka dau. Ino-no i boros di mad boros do kamanangan: *I mato-ku kondiri o nakasasi do kakali ioku kondiri nokemot dau.*

Na sid tohudi varo boros dot ulun Kristian do sid di Ayub nokentahan-no laid do varo kogulianan dit ulun minatai.

28-29 Insan-po dino i Ayub tumoguvang dit ongoanggai-anggai dau. Ponopongontupat dau ioti, supaya amu rumatu ioti sid pensubaan om karaatan, gam mongindorosi iosido dioti di a-engkod mamajal om mongira di Ayub diri. I boros do iadko sapadang pangahandaman dot i hukuman do Kinoringan mad sapadang di monogu om mongohukum. Manjadi i Ayub mongo-hondom dit ongoanggai-anggai dau, supaya ioti kotutun di kabanaro om keloo om kovosihan do Kinoringan. Okonko i kelino om kokosogo dot ulun di mongitung do iosido nakaharati di kobuatano do Kinoringan o miuma, inoi nga i gama tumuku sid vazaan do Kinoringan mangapad om monunda om mangagazad dit ipat-ipat it ulun, supaya it ulun mangakun om sumamba sid kovosihan om koruhunan do Kinoringan dit aso't iso't ulun mongizap.

Fasal 31: i Ayub mokihukum do Kinoringan

Basao-po laid it umpatod sid Kitab Momogun nalad 267-268

Sino dino natarang-no do nunu it onsi di gama di Ayub tumimpa om posurut di gama dau dumahava om mokihukum-po iosido do Kinoringan. Sid a-ko piro it ongofasal dit a-nakamung sid Kitab Momogun, i mongimbulit dit ongoboros dit ongoanggai-anggai om di Ayub do mad iri-noko iri o boros midadahava, manala, mongira, om sumaap di dau om dau do kohorotizan.

35-37 Na noboros-no kavi di Ayub do iosido nakasaap dit ongo karalazan dot ulun di mongovit dit ulun sid kasalaan, Amu-no obingtanggai iosido dot ongondou, amu minamakai iosido do dila iadko dila do mandahatan, amu rinumoloi iosido dit ongo barang dit emot di mato dau, amu kinumiagai iosido, amu minomogos iosido dit uripon dau, agazo o ginavo dau sid ulun do mosikim, amu hinumarap iosido sid kolunduo om it ongo hojimat, amu otomon iosido ong varo kopunavatan dot ulun vokon, Poindakod iosido do panambat sid valai dau, amu misingelin iosido om minanahak iosido do kalatango sid kabun dau dot okonko toun-toun mongumo sid iso o tana. Iti kavi tanda di kokosogo om kelino om kapahamo di Ayub. Iti-no o sabap do mokihukum iosido do Kinoringan. Ong ioku, ka di Ayub, asarangka i vuross-ku sid tinoguvangon do Kinoringan. Amu osusa iosido do tumuku, tu opurimanan dau do kisala, ka. Insanpo dino mindamo i Ayub do kotoguvang iosido sid Kinoringan. Ino-no i tanda di gama dau mokibanal om mamanal di kondiri, Ong varo't ulun di minangagama do surat manala om mongohukum, ino surat dino onuvon di Ayub do sigal.

Sid boros di Ayub di mamanal di kondiri mad kinovian-no di boros di Ayub. Manjadi osusa mongoduat do kuran i iadino, mokierad naku i Ayub do Kinoringan iadko i boros di vulanut sid Kabun dot Eden diri, Ikau kerad do Kinoringan, ka, ko kuran. Banal-no-ka ko abanal i Ayub ko kuran? Na i Buuk di Ayub amu atarang monimpa di duat diti. Otopot-ka ko kadapat it ulun mokihukum do Kinoringan om mamanal di kondiri ko amu? tu ka di Kitab ong i Kinoringan mongohukum dot ulun, iso nga aso't abanal sid tinoguvangon dau. Na i Ayub bai pogili sid di tokou dinot ongoduat dino om monuduk di tokou, supaya i tokou monginsosok sampai mongonsug

mongining di Kitab Vagu, ino-no i tudukan di Yesus do kuran kadapatan tokou di kabanaran do Kinoringan om kuran o vazaan sumuhut di kenginan do Kinoringan.

Fasal 38-42,1-7 Kinoringan-no mimbulai sid tanga do borizu

38,1-40,1 Monimpa i Kinoringan

Iti-no bahagi di Buuk di Ayub diti o kosungguvo om lavis banal di sokoviai i buuk. Iti diti, tu keso, i Kinoringan mimbulai iadko i hiza di bansa dot Israel sid burul dot Torsina om i hiza dot sid Torsina i nabi Elia. Sid tanga do borizu mimbulai i Kinoringan. Ong siti, tigogi, i ngaran Yahwe o napakai-no, ino-no i Tuhan Kinoringan. Koduvo, tanid mantadko i sokoviai it ongoboros laid sid Buuk dino, tinarang-no dot i Kinoringan o mongolumbatos di nunu-nopo o hal kananganko i Ayub. Aso tinganan dit ongoelo mongotutika om monongkokuro sampai mongitung om monguog do banalko aralom. Iti kavi, mad aso guna. Sokoviai it ongodogmatik kananganko i Kinoringan om i riniba, nga aso guna om amu kotivol manarang di kavazao di Ayub om i kinosusaan dau antawa i vaza mangatag dit amu atag. Kumondiri di Kinoringan i Ayub. Sokoviai i gama kumiboros do midadahava om miagil-agil dot isai om kuran i Kinoringan, nga notutup-no kavi, tu ongobiano, kondiri di Kinoringan o mongintalang dot isai iosido om kumuro ong iosido. Iti-no o sabap bai siti-no ot arait i ngaran do Yahwe, ino-no i ngaran di pinakai do Kinoringan hiza di minokiintutun iosido di Musa (Kolobusan 3) Sabap i Ayub minokihukum do Kinoringan (31,35), Kinoringan monimpa di Ayub. Rontob-nopo, tanid i timpa do Kinoringan mantadko i metung di Ayub diri. Boros di Ayub diri di minonurat iosido di gama dau manala do Kinoringan om ino surat dino iadko antub-antub dau. Topot okon rontob manala i Kinoringan, gamko mongohukum-no di Ayub. Hinukum do Kinoringan i Ayub, sampai nunu-nopo it ongosabap di Ayub diri, nga mad navi-no, natanus-no. Sinala-no do Kinoringan i Ayub. Engin dara di Ayub do manarang dot mad amu adil i gama do Kinoringan mangahatul di vinangun om riniba, tu kopigavul i kavantango om karaatan. Topot ino-no it ambat do Kinoringan, ino hal dino bai sid pongitungan om nogolivongo di Ayub kondiri. I riniba ot amu kaharati di kovosihan om hoturan do Kinoringan sampai momudali om monimban di hoturan om kovosihan dino. Sala do riniba, ong mongitung dot i sokoviai i gama do Kinoringan, nga amu ahatul om amu atalahas, ong retanko obungou om orondom om okilong i vaza do Kinoringan momorinta di riniba. Baiko amu koduzaan do riniba i vaza do Kinoringan mangahatul, nga sokoviai i hoturan banalko avantang.

Sabap ino, sid tinoguvangon di pihukuman do Kinoringan i Ayub katama banal iosido dumahava di Kinoringan, mad banalko osiou iosido dumahava do Kinoringan. Ino-no, i sid ayat 38,3 ka kaharati tokou dot aso tinangan di Ayub mokiratu di hukum do Kinoringan.

38,4-7 I kinourugan di pomogunan

Ong Kinoringan o tumoguvang sid ulun dot osumbung, okonko iadko it ongoanggai-anggai di Ayub, tu minamajal om minonguruvan sampai minangagauk-no di Ayub diri, inoi nga tanid o vaza om i Kinoringan, manarang iosido di kogofoo om kavantango di ginama di palad dau. Pinopuhondom i Kinoringan di Ayub dot andaman-po dau ko amu-no i kinotimpuunani di vinangun om i vinangun dino gamko amu otivol di bai pongitungan do riniba. Banal-no aso't iso o riniba kotimpa dino. Noboros-no laid di Ayub, na siti mad nokosopol-no laid i keloo dau. Ong sid Kinotimpuunan Fasal 1 kakali bai noboros-no dot, Avantangan-no i Kinoringan di nagama dau diri, dot it ongokorimbutuon nga mindolongoi om momodhigak-no, gima banalko avantang i ginama do Kinoringan diri, sampai i Kinoringan minangakun-no dot avantang i ginama dau, ino vinangun, korimbutuon om it ongomalaikat mambat manapap, mad kiuningou-ogi i kinourugan di vinangun dino om i vaza mongindazou do Kinoringan.

38,8-11 I rahat

Ong sid ongotangon dit ongobansa kodori varo retanko i rahat dino, nga rogon di banalko araat i monusa di tindal om i riniba. Ong ologod o barat om ozunzungan-po, retanko it ongorogon do rahat mirumpak, tu engin ioti do mananus di vinangun. Dot ong otopot, aso-po rahat kiKinoringan-no laid. Amu-po navangun i pusot do rahat alaid-no laid i Kinoringan, gam i Kinoringan o pinongolopot di rahat iadko uvun do kavut. Kinoringan-no o minanantu dit ongorontob di rahat supaya amu kahambil

sid tindal. Baiko boros do Kinoringan o minongimbulai dino kavi, it ododos i rahat, nga pozomon sampai sinumuhut di hoturan do Kinoringan.

38,12-15 I panganavau

Mad mangagauk i Kinoringan di Ayub di mongoduat iosido dot, i Ayub naku o minonuhu dit avan momunsilou? tu i kanavaho do pomogunan o mongimbulai di kavantango do pomogunan om i suvang dau om pentalang di karaatan di sid lapak di mato dot adau. Sabap ino iso nga aso kosusut dit amu mimbulai om sumoribau. I kenginan do Kinoringan om i kavantango do vinangun miaanggan-anggan.

38,16-21 I kosongoho di pomogunan

Ong riniba, aso't elaan dau do kumavid om monukat di kogofoo do vinangun, i korolomo om kosongoho do rahat ko pirantaban di rondon om it anavau. Minsanko nelaan di riniba nga amu do siombo i puun dot anavau om kumuro i rontom om it adau om sodop. Kakali i Kinoringan mongorodsit di Ayub tu retanko sino-no laid i Ayub dati, antawa kuran?

38,22-30 i kobuatano do pomogunan, darun om manangadau

Songkuro-nopo i pangalamanan do riniba kananganko i kolosuo dot adau om i sera manampangi om manangadau, om kuran i gonit om korud sampai i kosondoto do ais, Varo-no ong mongimbulai di kouvaan om barakat bahagi di nunu-nopo o mula, tu varo-no ong mongindorosi di riniba sampai andaman di riniba dot i Kinoringan mongumbasih om mongohukum. Ino gama do Kinoringan mongurug om mangahatul di vinangun amu kotitotirou i nunu-nopo songpongitungan om hoturan om keloo do riniba. Sabap i Kinoringan okonko bai moniram dit ongotanom do riniba, inoi nga mongozopos di sokovia i vinangun, minsanko ongotpomogunan dot iso't ulun nga aso sino. I belantara om i pomogunan di kiais dit amu mudou tinounan, nga sid palad om hoturan kavi do Kinoringan.

(Ong i pangalaman sid Momogun: I toun 1992-93 ogumu ot ulun dot amu minongumo, tu, ka dit indan, ahandaman ipat hopod toun mesti mamatai. It ongotuturan om tangon do Kina, nga iadinoi. Topot oupus-no it amu nokoumo, tu toun 1992-93 biano banalko minongopud.)

38,31-38 it avan di mongodungung di pomogunan

Ong tuingaha sid avan ontok do sodop, bai avangaan tokou, tu iso nga aso kadapat monimban ko bai mongiro di kogumuo do korimbutuon. (Ong i diri-po, aso-po't elaan do riniba di kosoduo dit ongotkorimbutuon antawa i kogofoo dit ongotkorimbuton ko i kogumuai. Minsanko biano, varo korimbutuon mimbulai dit a-nengat laid dit ongosaintists). Ong riniba moniim dara do baiko mongizap, topot ino korimbutuon dino kavi, antad kavi sid palad do Kinoringan. Baiko i Kinoringan o monguasa dino sokovia i.

38,39-41 Mondou om mangkahak

I gama di Kinoringan mangarazou di vinangun, i ginama di palad dau, ong tumopik sid ongodupot. Kinoringan-no o monorundakai dit ongodupot, i mondou om it uzang dau ko i mangkahak, inot ombolog di banalko orusak. Minsanko it ongodupot di iadino, nga kakali tinaud di palad do Kinoringan, ka.

39,1-4 I kambing sid koburulan om i tozino

Minsanko i karanzatan dit ongodupot, nga kakali hinatul do Kinoringan. Aso't el-elaan di riniba do songkuro kahatul dit ongodupot maganak om manaud dit anak dau, tu ong riniba, bai mongimpori ot el-elaan.

39,5-8 I kaladai dit osizau sid belantara.

I riniba rontob nakadapat do mangalayam om manampangazam do iso o bansa do kaladai. Topot i kinasakanai sid belantara, aso tinganan mangazam. Inot dupot dino ohigak sid labus manadko piaazam dot ino kavi Kinoringan ot engat-no.

39,9-12 I kalasiu

pengkaa dino i kalasiu, songkuro-nopo gama do riniba tumiim mangazam di kalasiu, nga aso tinganan om aso kosuruto. Ino dino dupot nga sid palad om tinaud do Kinoringan, a-no songkuro pitonidan di sapi om i karabau. Sino-no o kematan di rontob di keloo do riniba momorinta ko monguripon om mamakai di vinangun om i suvang do vinangun.

39,13-18 It ombolog dot unta

Minsanko inot dupot di retanko lovong, tu mongolobong dit ontolu dau sid pantai om isusuk it ulu sid luvang, ong umbalan do sangod, tu indoson ong a-noimot iosido di sangod, baiko tumangkus o harapan dara, ong tumangkusogi. Ino-po o vaza dot a-opunso it alangka, tu manangkus i dupot dino. Ino, nga hinoturan-no do Kinoringan. Ong it anganak dau nga amu-piohondom di molohing, nga kakali amu opunso ino't ombolog dino...

39,19-25 I kuda

I vaza monguji di kuda, mad gama dit ulun di banalko ogorot manamod do kuda sid gama manarang di kogunaan om koozian do kuda sid rumpak om sid kalangkaso.

39,26-30 I koniu om gorudan

Ong i koniu, varo hiza do kumaa sid Selatan, hinoturan do Kinoringan mivali-valiu isuhut di musim, om i gorudan, it ombolog di mad raja dit ongoombolog di mirumun sid timpak do burul sid tempat dit iso't ulun nga aso kendakod. Onibak-no natarang i kavazao om kobuatano dit ongodupot dino, retanko iti nga antadi kavi sid kinenginan do Kinoringan. Ong riniba okonko bai a-milo mongurug do iadino, minsanko monguog di kavantango om kogunaan om kosilato om hoturan dino't ongovinangun kavi, nga aso't elaan dau momoros om monodiri.

Na i sokoviai iti nigili-no kavi di Kinoringan sid di Ayub, iso-no o panangan, ino-no, i riniba mongitung dot i riniba ino-no i randavi sid sokoviai i vinangun, isuhut di kinourugan. Sabap sid palad do riniba nitahak-no kavi di Kinoringan it ongodupot om it ongototonomon om i nunu-nopo i sid suvang do vinangun diri. (tanid mantadko it iso o kazu do koposizan). Na riniba tumiim do mongintutun di sokoviai it ongodupot dino om i kogunaan dit ensanan i vinangun, Topot togigi mad nokedu-no antad sid Kinoringan, indoson ko kadapat rumompok do Kinoringan, isuhut di boros di vulanut. Nolingan di riniba dot antad sid Kinoringan kavi i koposizan om pangarantaban. Inot ongoduaton kavi dino manarang di rontob dit ulun om pentalang dot minsanko it ulun, om i sokoviai i koposizan dau, nga antad kavi sid Kinoringan. Topot ong i Kinoringan om i vaza dau mangahatul di sokoviai i vinangun, a-koduzan do riniba om amu kaharati i riniba sampai a-kadapat mongumpalad. I gama do Kinoringan potugas di sokoviai it ongodupot, nga suromo do Kinoringan, om i gama dau mangahatul dit adau om darun, it ongorimbutuon ko i vulan om adau, nga suromo do Kinoringan dit aso tinganan mokitarann om mokihaharati. I riniba engin do kosunggu sid Kinoringan, minsanko elaan dot aso tinangan sumunggu. Kakali osodu om asavat i Kinoringan antad sid riniba. Topot kakali agazo o ginavo do Kinoringan manamod di vinangun dau, it ipat-ipat i dupot i ginama di palad dau. Tu antad ino kovosihan om samod do Kinoringan nopud-no kavi i vinangun om i riniba.

40,1-5 Insan-ogi monimpa i Ayub sid Kinoringan

Sid 31,35 i Ayub tumimpa do Kinoringan. Ong bianco, (40,1) i Kinoringan monuhu di Ayub tumimpa di duaton dau dino. *Engin-ko-ka sumaap,, monori om gumuvail dohon?* ka. Na tigogi i mokihukum dara do Kinoringan, nohukuman-no. Notuntuvad-no i gama mihukum. Mad notombol-no i kabang di Ayub. Baiko mangabang pahung-po i Ayub. Ioku diti, ka dau, nousiba-no banal. Momoros iosido tumimpa iadko i vaza di Yakub sid Yabok om i Yesaya sid panambayanan (Kinot. 32,11; Yesaya 6,5; Yeremia 1,6 ko i Musa Kolobusan 3,11) I harati, opurimanan-no di Ayub dot amu miuma iosido, a-ko onong om a-kotoguvang iosido do Kinoringan. Noboros-no laid, ong saribu o boroson do Kinoringan, sonlinsou nga aso't otimpa do riniba. Iti-no o sabap do sumuri-no i Ayub om tinombol-no do palad i kabang dau. Andaman-no dot oholian-no o gama dau diri manala om kumioduw do Kinoringan. Nohorotizan-ogi dot a-nokonong i gama dau, gam nokensodu-no iosido antad sid kenginan do Kinoringan.

42,1-6 Kenduvo tumimpa i Ayub

Tanid mantadko i gama laid di Ayub mongimpuras om monolioso di ginama do Kinoringan om i hoturan om kovosihan om kabanaran do Kinoringan. Bianco mangakun-no iosido dot a-nokonong i vaza dau kumiboros di hal do Kinoringan. Tu ong Kinoringan, aso rontob, aso't a-nelaan, ong

Kinoringan. Ong sid Kinoringan, elo-elo-no kavi, ko otinganan-no kavi.(iadko i boros di Yesus sid Matius 19) Iti-no o sabap di nokening-no di boros om timpa do Kinoringan, bai iso-po ot elaan di Ayub, mongo-vongo-po sampai mongindazou-no iosido di kogofoo om kohormatan do Kinoringan. Kaharati-no i Ayub dot i hiza do mangkabang iosido, atag-no dara ong minotos-no laid iosido, tu mongining di boros do Kinoringan. Sabap sid sokovia i kobatano dau dino mad noboros-no laid do Kinoringan. Baiko a-ning dau, tu netung dau, apatuti iosido mumbongut om manala om mokihukum. Bianco mangakun-no iosido di mad nakamato iosido do Kinoringan (42,5) Iri-ogi mokimahap-no iosido sampai oruol-no i ginavo dau. I gulu diri rontob nening-ku i vaza dit ongoulun manarang di kobatano do Kinoringan. Topot ong bianco, nokotoguvang-oku-no banal, ka dau.

I netung di Ayub diri, antad sid ongoboros dit ongoanggai-anggai dau, mad sangod-no dau i Kinoringan sampai i vuoros do Kinoringan mad kapatai sampai katanus dau. Sid kovian-po kaharati-no iosido dot i Kinoringan potungag om mongoguna di Ayub. Kinumakap i Kinoringan di Ayub sid tanga di kosusaan om minongingkakat-no vagu di Ayub. Indoson di Ayub ong nakada-no iosido sid tinoguvangon do Kinoringan sampai aso-no sungguvon do varo-po kengkakatan, tu pinoling-an-no iosido do Kinoringan, it okon banalko pongohondomon iadnoko i Ayub, tu agazo om kihormat. Kondiri di Kinoringan kinumakap di Ayub do pinembulai di kovosihan om koruhunan om kosianan dau. Manjadi hiza di banalko nopupusan i Ayub dit okudik nga aso-no harapan dau, minimbulai-no i kogofoo di kovosihan do Kinoringan. Kodung noholian-no i kosusaan, mininsomok-no i kovosihan do Kinoringan. Sid kopupusan-po minotos-no i Ayub, okonko rontob it oholian-no kagazo di kohormatan do Kinoringan dot aso-no tinganan mangkabang, (40,4) inoi nga motos-no iosido, tu tinozupo iosido do Kinoringan do banalko sinamadan.

42,7-17 I kinompuso di tuturan di Ayub

42,7-10 I Kinoringan mamajal dit ongoanggai-anggai di Ayub

Notoliban-po do kondiri di Kinoringan tumoguvang kumiboros di Ayub diri, atalahas-no dot notorino i Vozoon do rogon om i savo di Ayub. Kondiri di Kinoringan mamanal di Ayub sid tinoguvangon dit ongoanggai-anggai dau sampai monuhu-no dioti mokiada di kasalaan om karaatan om manahak-po do persembaan sampai mokiontok di Ayub minta dua mindamo bahagi di kaadaan di karaatan dioti. Ginaratan do Kinoringan ioti magandaha vagu di Ayub om mokimahap sid di Ayub, gima it ongoboros dioti sid di Ayub diri.

42,11-17 Noulit-no vagu i kolunduo di Ayub.

I tuturan mongusul di kinompuso om kosungguvo di Ayub, ino-no, Nolingos-no i kurizap dau linumundu-no vagu do nenduvo kogumuo i kolunduo laid. Hiza nontok i Ayub do kosusaan diri, iso o varis nga aso kinumakap tanidko ino tolu-no angaanggai-anggai dau diri. Suvai notongulit i kolunduo dau sampai ohijau-no vagu i Ayub om iri-ogi it ongovaris om koubasan sampai ponu-ponuon-nopo i valai di Ayub. It ulun di minogidu di hiza di natanus-no i kosurupuvan di Ayub miniguli-no vagu, gam minangatod-po dot ongohadia ponong sid kolunduo vagu di Ayub. I pangazam, nga nenduvo o kogumuo. Topot ong it anganak, rontob noulitan i kogumu, tu ong dupot ong riniba, varo pitonidan. Na i kinompuso banal di tuturan dino: Hatus-po om apat nopod tinounan antad ddiri om minatai-ogi i Ayub sampai nokemot om nokokibit-po iosido dit ongomuaki om muaki lombus dau om minatai-ogi do banalnoko lumohing.

TAFSIRAN DI BUUK DO ZABUR

Umpatod: 1. Iti buuk do Zabur antad sid Kitab dot Ibrani, ino-no i buuk dit oruhai mamakai ong ulun Kristian, tu i buuk dino pinongumpungan dit ongolongoi dit ulun do Yahudi. Iti-no o sabap dot ogumu ongolongoi do Kristian sumusui di tajuk om onsi dit a-ko piro it Ongozabur. It ongogorija kagi mamakai dit ongozabur sid liturgia, ino-no sid gama sumambayang ontok do minta dua om mongohormat do Kinoringan. Varo-no laid sid piumpungan dot ulun Kristian sid Korintus (1.Kor. 14,5 om 26) om sid Efesus (Efes.5,19)

Vokon-no ong mamakai it ulun Kristian do Zabur sid dau om dau do vaza minta dua sid ongekob dau ko it iseso iosido. Sabap it ongozabur dino, oruhai mongohondom om mongimbulit minta dua (iadko i Zabur 23 om 121) ino-no i zabur di sumasi di gama do Kinoringan manaud om mamarakat dot ulun.

Vokon-no, ong hiza dot opupusan it ulun ko osompitan iosido, bai i Zabur-po ot andaman dau sid gama poromot sid Kinoringan di kosusaan dau, tu mad neduan do tuo sampai a-no kohondom do boros dit apatut sid gama dau minta dua om mokitulung.

2. I harati do Zabur: ino ngaran dino napakai-no laid sid Kitab Vagu, ino-no sid Lukas 20,12 om 24,44 om Usuran Rasul 1,20. Na inanu-no i ngaran dino sid solinan di Kitab sid boros Yunani, i retanko Septuaginta (i harati: turu nopod, retanko turu nopod ot ulun minanalin dot miinsodu, nga kopionong banal o gama dioti manalin dot iso hurup nga aso't a-no kopionong, ka). Nasalin i Septuaginta ontok di abad ko-3 GM Psalmoi. Ong i boros sid Ibrani, Mizmor (Masmur). Na 57 o zabur o mamakai di pongoretan dino sid tajuk, dot i tajuk dino manarang dot hiza di longoi dino, varo unizon di mad sundatang di mambat di gama mindolongoi. Kagi ino't unizon dino retan dot Mizmor.

3. I vaza di kinosompuruan dit ongozabur.

- a) a-kosuvang i sokoviai it ongolongoi di bansa dot Israel sid Buuk do Zabur (imatai sid Kolobusan 15,1-18; 1. Samuel 2,1-10; Yesaya 38,10-20; Yusus 2,3-10 ko it ongolongoi di Sulaiman. Bai 150 ot Ongozabur sid Buuk do Zabur.
- b) Isuhut di limo bahagi o Taurat, i Buuk do Zabur nabahagi-no sid limo bahagi, ino-no 1-41; 42-72; 73-89; 90-106; 107-150. Sid kovian dit ikid bahagi dino, varo't a-ko piro ot ayat di monutup di gama mangarazou do Kinoringan. Ong sid bahagi kolimo, gam ensanan i zabur 150 o mongompus di vaza pangarazou do Kinoringan.

4. I vaza mamakai dit ongozabur.

I Buuk do Zabur retan do Buuk do longoi dit ongopiumpungan dit ongoulun do Yahudi. Varo a-ko piro o zabur di kitajuk di manarang do sera om siombo om nunu o guna di zabur sid gama sumambayang. Suntuan: Z. 30 > mangarazou do panambayangan
Z. 100 > pasamba do monorima kaseh sid Kinoringan
Z. 92 > ontok dit adau do pongintaranan
Z. 24 > hiza do minggu i kopomukaan om kapangarasmian do panambayangan
Z. 113-118 > hiza do Paska

Na i tajuk **Haleluya= Pongindazou-kou di Kinoringan, ka** nga tanda dot i zabur dino apakai sid Liturgia (105;106; 111-113; 115; 117; 135; 146-150) ko i tajuk: **ipongindolongoi** (inalazan sid Kitab Momogun, tu aso tantu o harati, sabap amu monguni tokou dit ongozabur), inlimo nopod o minongumba dot i zabur dino, nga longoi do kuaya. Pengkaa dino, varo-po pongoretan **SELA**, ino-no o harati, Gulian.

5. Kuran, tu do varo koundango do varo zabur sid ongoulun dot Israel?

- a. Suvaiko i kogumuai dit ongouripon i retanko Habiru ko Ibrani sid Masir jinumadi do bansa dot Israel, hiza di kinolobusan antad sid Masir om i kinotupakan sid rahat do kitundusan om nokotimpuun-ogi i koundango dot Israel. I Miryam om i Musa minindolongoi di kinoponorian dit ongojal di Faraun (kolobusan 15) om i Hakim Debora minonguji di kamanangan sid pomogunan do Kanaan. Sabap norongou-no laid dioti it ongolongoi sid Masir om sid Kanaan, minamakai ioti di vaza dit ongobobolizan do Masir om Kanaan mindolongoi om momurinait sid ongokuasa dioti sid gama mongindazou om monorima kaseh sid Kinoringan i Tuhan. (Iadko i bobolizan do Momogun. Ong momurinait, induvo reton dau do posondot di boros sid vaza mangambo dit ongoosundu om ongorogon ko lumaag, pengkaa dino i bobolizan sid Masir ko sid Asur om Babil induvo momoros di pomintaan dua dau. Insan sid boros koubasan om iri-ogi baiko patalasan i boros di bai i sundu o kaharati, tu boros dit ongorogon om ongosundu gima. Suntuan:

BOROS BANAL PATASAN

Giango-ku-po i rongobon	Sikuvo-ku-po i hontilon
Giangan om mizang-izang	Sikuvon om mansa-bansal
Mai-ogi ong boroson	Obuut-ogi ong sunudon
Nokorikot do podsuon	Nakadavot do zomokon
Anak apui migasazon	Lahing damal mikohundang
Migasazon dot inongkob	Mikohundang do linamin
Sano-ku-po i tanggaan	Bilidai-ku-po i voigan.)

- b) Ong hiza di sumabayang it ongoulun dot Israel, ontok do Paska ko Pentakosta, ino poginakanan do Kamatan, basaon-po laid it Usuran di kinolobusan antad sid Masir om i vaza rumungkap sid Kanaan (imatai sid Yosua 24). Iri-ogi i piumpugan misusungkod-sungkod sid gama mindolongoi dit ongozabur di mangarazou di kotulungan om i vaza di Kinoringan do mangagazad. (imatai sid 1. Samuel 1,3.21-24; 1. Raja 8,2;12,32; Hosea 9,5; Yesaya 30,39; Ulangan 31,10; Yehezkiel 45,25) Sabap ino, asarok varo boros dot, Tumoguvang tokou sid Kinoringan, vaza dioti mongohondom di hiza di sid Burul do Torsina di tinumoguvang i bansa dot Israel sid Kinoringan. I panangan dino, mokibarakat do Kinoringan (Kolobusan 24,10 om 33,12 om Bilangan 6,24).
- c) Sabap it ongo bansa vokon minangarazou di dau do raja, retanko anak do Kinoringan ko minamangun iosido, i bansa dot Israel minamakai dit ongovaza mindolongoi do iadino. Topot pinopisodia dot, I Tuhan Kinoringan o raja banal, okonko bai riniba, om iosido dino asavat mantadko it sokoviai it ongokuasa om ongopinokokinoringan vokon. (Zabur 93,; 95; 96)
- d) It ongozabur mad kososizan di ngaran do Kinoringan, i Tuhan. Varo-po't ongonangan vokon kananganko i Kinoringan, ino-no Zebaot = i kinasapahan dit ongomalaikat ko i Minamangun, ko i Monguasa di sokoviai, ko i Kinoringan di Ibrahim, Ishak om Yakub. Ino-no kavi i kososizan dit ulun dot Israel sid tanga dit ongougama vokon om vaza momihot di kosipan do piumpugan. Ong it ongo bansa vokon retan do varo kuasa di bai dioti om i raja dioti antad sid kuasa dino, sampai, ong kodung manansanganu -no do pomogunan vokon, isuvang ko pengkakat di dau do patong sid pomogunan dino, tanda dot i kuasa dioti o monguasa-no di pomogunan do nosoruvang. Topot i bansa dot Israel, tu opodok o bansa om opodok o tana, sinumasi dot i Kinoringan dioti, o manansanganu di sokoviai i riniba om vinangun, tu iosido-no o minongurug. Na sid kososizan dino, minongusul om mongimbult i Zabur di ginama do Kinoringan (Z. 71,10; 77,12; 143,5; 22,23; 118,17)
- e) Vokon-no ong onibak o gama mongohondom di kovosihan om katatapo do Kinoringan sid bansa dau (Z. 98,3; 25,10; 100,5; 117,2; 138,2) ko i zabur i pasasi dot ulun dot, Pasasi-no i Tuhan, tu sampai penlaid a-engkod i kovosihan om katatapo dau Z. 106,1; 107,1; 136,1) Antawa i zabur mongonsug dot, Siti-kou-no, imatai-no dikou i gama di Yahve (46,9; 48,9; 66,5; 69,33; 90,16; 98,3; 107,42) ko mongindoronokom mongintatap di piumpugan, supaya kosuhut (Z. 95,7 Biano pongining-kou-no om pangasip-kou-no sid Kinoringan. Kada-no pokodoho i ginavo dikou iadko it angaki dikou
- f) Varo't a-ko piro o zabur di mongindazou do Kinoringan iadko raja iosido (2; 18; 20; 21; 72; 89; 101; 110) ko monguji di Kuta Yerusalim di retanko Sion. (46,5; 48,2; 76,2; 84; 147,2) Na varo-po zabur di monodiri dit ongoulun sid piumpugan (1,4 it ulun di pakaso do Kinoringan nga sid kotonusan o rikoton dau), gam i Kinoringan iadko hakim songriniba (96,13 om 98,9). Na i gama dau mongohukum ponong sid kapangatagan, okonko ponong sid kotonusan.
- g) Vokon-no ong i zabur mangagauk om mongusiba dit ongokuasa om pinokinoringan dit ongo bansa (92,8; 96,7; 97,7; 82; 58)

6. It ongoginis dot ongozabur

- a) Varo zabur ko longoi di mongindazou do Kinoringan (8; 19; 33; 65; 100; 103; 104; 105; 111;

113; 114; 135; 145-150) varo-no ong mangarazou di Sion (46; 48; 76; 84; 87; 122). Varo ong mangarazou di kapamangkato di raja (i mongontok do Kinoringan) (47; 93; 96; 97; 98; 99). Sid ongozabur di iadino, pengkaa dino o hoturan:

1. mongonsug mongindazou do Kinoringan

2. arait i boros di kopongindazahan, om manarang di sabap (gima i gama do Kinoringan). Varo panarangan di kotulungan, kosopulan, kotundaan

3. Mongimbulit mongonsug mongindazou

Vokon-no ong arait do siombo apakai i zabur. Sid panambayanan (100) sid tinoguvangon do Kinoringan (96,13; 122,1+4; 150) ko i rikoton dit ulun di kumaa sid Yerusalim.

b) Varo zabur di mad longoi do mogkorudu om humongkob ko mongohomu, vokon-no ong bahagi di bansa (44; 74; 79; 80; 83; 137), vokon-no ong bai it iseso ot ulun (3; 5; 7; 13; 17; 22; 25; 26; 27; 31; 35; 42-43; 51; 55; 57; 77; 88; 123; 140; 141; 143)

Vokon-no ong varo-po kaamung do longoi monorima kaseh, tu nokemot do kotulungan do nendamo-no laid i kotulungan dino (6; 13; 22; 61; 102; 120; 130)

Ino-no i hoturan di zabur di iadino:

1. Mongodim om tumoguvang do Kinoringan

2. Pogili di kosusaan sid Kinoringan

3. Mindamo do kotulungan

4. Manarang di sabap do mokitulung iosido

5. Sumumpa dot, ong kodung otulungan, tumatapko varo't isamba

It ongokosusaan di narait sino, oruzahan o pomogunan, gizok, butu, panakit, rumpak, sangod ko i kopiduvaan do ginavo, agauk dot ulun, kasalaan. Vokon-no, ong varo minta dua mongontok dit ulun dit okugui om orukung di nopupusan-no. (102) Na i panangan di zabur di iadino, suvai kembulai ong sid kopupusan, ong tumompik i longoi sid gama monorima kaseh sampai manarang di kotulungan ko kengkadan do kosusaan. Na ino zabur dino pongompus sid kososizan sid anga do piumpugan (22,23) om i vaza mongindazou do kotulungan, dot ino gama mongindazou sampai penlaid.

c) Zabur om longoi do monorima kaseh

Varo zabur dit apakai dot ensanan i bansa ko piumpugan monorima kaseh (124,1; 129,1; 107,2+8) Ino longoi dino napakai hiza do pasamba do dupot sid panambayanan do tanda do monorima kaseh (1. Samuel 1-2) Minsanko varo persambaan di mad Ucap Syukur -i hiza diri do dupot - lobipo avagat om kiharati ong i kososizan di manarang di kotulungan. Sabap i kososizan dit ulun dit otulungan monuduk dit ongokoruhang do varo harapan sid Kinoringan (31,24; 32,6+10; 51,15; 67,2)

d) Zabur om longoi di mamarakat om mongolupu

Sid ngaran di Yahve nakakapit-no i barakat (24,5; 128,5; 134,3) Isai-nopo i sumuhut disyarat di janji do Kinoringan (Kolobusan 20-24) ino-no ot abarakatan (2,12; 24,5; 40,5; 84,6+13; 91,1; 146,5). Vokon-no kaamung-po i pongoretan dot, Osinang-no it.. I zabur di iadino apakai dit Imam sid gama mamarakat di piumpugan ko it ulun (121) Ong zabur do mongolupu, varo sid 137 om 83,10.

e) Zabur di mad Amsal= keloo om pangalaman om tudukan. Ino zabur dino nga vaza monuduk om poromot sid ulun di keloo om pangalaman dit avantang (127; 133; 1; 112; 128). Sid Z. 73 varo-po nakamung do tudukan, isuhut di kogolivongo om kopiduvaan do ginavo dit ulun dino.

7. Kuran i kinembulazan dit ongozabur om isai-no o minongimbulai?

Varo panarangan dit ongoulun di minongintutun di Kitab Ibrani dot, It kogumuai dit ongozabur varo-no laid guluko i kinarapkapan sid Babil (TGM 587). Baiko it a-ko piro o zabur mongohondom di hiza di kinarakapan sid Babil (137; 74; 79).

Na 72 o zabur retanko antad sid raja Daud, duvo i di Sulaiman, ko-90 di Musa do zabur, 12 di Asaf, 11 dit anganak di Korah om i Z. 88 di Heman om Z. 89 di Etan. Minsanko iadino, inot ongongaran bai mongohondom di tradisi ko kinopongumpugan laid dit ongozabur. Sabap i mula-mula i kinopongumpugan, varo a-ko piro o tasan-tanid-tanid ot ulun om rombongan mamakai. I hiza diri

amu-po nokopomoros dot antad sid disai i zabor dino.

8. I vaza popiumpug dit ongozabur.

Sid Z. 102,19 nokosurat-nodot, Iti diti nokosurat-no bahagi dit ongoturunan di rumikot, supaya i bansa dit amu-po kosino mongindazou do Kinoringan om Z. 72,20, ontok di kinompusa do bahagi koduvo dit ongozabur: Iti-no i kinompuso dit ongopomintaan dua di Daud, it anak di Isai.

It ongozabur di retanko antad sid anganak di Korah (42-49 om 84-88) nga inumpug-no laid do mad buuk longoi di Kuaya di Korah.

Sid pialatan dit pongumpugan di zabor di dang Daud, varo't a-ko piro o zabor di manarang di sera om siombo om nunu o kosusaan om panangan di Daud sid gama dau mongimbulai di zabor dino. Iri-ogi mongompus iosido di zabor sid gama sumasi om mongindazou do Kinoringan (3;7; 18; 34; 51; 52; 54; 56; 57; 59; 60; 63; 142)

Na sid Septuaginta ogumu-po o ngaran di retanko inantadon dit ongozabur dit aso-po ong sid Kitab Ibrani. Ino-no o kosondoto, minsanko noumpug laid it 150 it ongozabur, hiza di nasalin-no sid boros do Yunani, kakali varo lumombus do momungaran do zabor.

A-ko piro o zabor nenduvaan-no posurat sid ongobahagi, ino-no i Zabor 14 = 53; 40,14-18 = 70; 57,8-12 om 60,7-14 = 108). Vokon-no ong bai i ngaran Yahve = Tuhan nogontian dot ELOHIM = Kinoringan.

Ong it ongozabur 3-41 mad atandas-no zabor di Daud o oumpug sino.

>> Basao-po it umpatod sid Kitab Momogun nalad 272-273

ZABUR 1 I DUVO O RALAN

Iti zabor mogkovosihan dit ulun dit elin om okosog, iadko i tanda sid alun-alun di manarang do nokorikot it ulun sid bandar ko sid alun-alun ko rikoton. Mad i tanda Welcome sid valai dot ulun, ong varo't muli ko varo ombuvoi di magandaha. I panangan di Zabor keso, mongonsug dit ulun di mamasa di buuk do Zabor, supaya sumuhut iosido di kenginan do Kinoringan om humarap om sumondi sid panaud om tunda do Kinoringan. (i gulu diri, iti buuk do Zabor songlundun-no, ino-no i kulit di nisuratan-no i 150 o zabor. Suvai elo-no it ongoulun do mangagama om monurat sid karatas om nokobuuk-ogi it ongolundun.

It ulun di minonodia di tudukan dino, guru dati iosido dot ongosolumpak vagu di mokituduk di keloo om pangalaman dit onogulu-gulu. I keloo om pangalaman di nouji-no sid zabor dino, varo't inantadon, ino-no i pinonuhuan do Kinoringan. Ino pinonuhuan dino mad labu di pentoron dot alud, supaya amu otilibi ko orulun. Aso kopurimanan dot i pinonuhuan o momogos om mongimvagam dot ulun.

Iadino i tolu bahagi i zabor diti:

1-2 i duvo i ralan

3-4 i kogunaan dit ulun dit abanal om i kosondoto dit ulun dit araat

5-6 i vaza do Kinoringan monodiri dit ongoulun

I Zabor posinang dit ulun dit atag o gama om otulid o vazaan, ino-no, Amu mozo iosido di cadangan dit ulun di pakaso do Kinoringan (it araat), ko gumavul sid ulun di kidusa ko rumompit di ulun di mamangagauk, gam agazo o ginavo dau sid pinonuhuan do Kinoringan dit pihondom dau sodop adau. I monuduk dino, monodiri banal dit araat om avantang, it abanal om it aranggal, supaya i sumikul gumamit di pitonidan. I gama dau monuduk mad pentahan iosido di rontob, poontupat di sumikul do varo kolonduan sampai mongonsug om kemumui banal sid ralan dot abanal. I hiza di kinembulazan di zabor diti, aso-po rombongan dot ulun Parisi. I kolonduan tumimpun, ong mongining om sumuhut it ulun di cadangan dit ulun di pakaso do Kinoringan. Iri-ogi mozo it ulun om sumusui di kobuatano dot ulun di monimbaru do karaatan dot alaid-nopo, mobpuput-no sid ulun dit aso tantu-tantu. Iadino-no i kosurutan di karaatan om kasalaan. I guru monuduk do kuran humali i karaatan antad di bai mongining do boros dot ulun di nokotolikud sid Kinoringan. It oholian-no, ino-

no mangagauk om misingkavaro ponong sid Kinoringan. I Yesus manarang sid Tudukan sid Burul dot minsanko i bai boros di mangagauk ko mongusiba mad mamatai dot ulun, dot ipat-ipat it ulun, nga kiguna sid Kinoringan om guna do Kinoringan (Matius 5,21-27 om Mat.25,34-44) Sid tanga dot razat varo i mamalid. Topot ong i pinonuhuan do Kinoringan, ino-no mangagazad sid rikoton dit atantu. I gama monuluk di pinonuhuan, nga hal do katamanan om kohigakan om koozian, om i gama mihohondom di kenginan do Kinoringan, ino-no kiguna banal sampai posinang dot ulun. (varo gama mamalid om monipu ko mangagauk di mad pohigak dot ulun ko mongintatamanan ong nasaadan ot ulun. Suntuan sodiaon i sulung om iri-ogi monuhu dot ulun maza sino sampai kosulung iosido ko rumatu sid luvang di noukad laid i burunsut.) Ong i Paulus manarang, i pinonuhuan o momogos om monusa sampai mongindaraat dot ulun. Topot i Zabur keso mongitung dot i pinonuhuan do Kinoringan ot ovud do katamanan. Suvai kaharati tokou di katamanan dino, ong mongitung tokou do kuran it ongoulun kodori dit amu-po kaharati di kogunaan om rikoton do riniba. Ogumu o kovosihan om cadangan dot ulun diri di minongimbulai dit ongougama om vaza mangahatul om momorinta dit ongoulun. Iti-no o sabap dot i Zabur diti monguji di pinonuhuan do Kinoringan, tu sid pinonuhuan dino mimbulai i kenginan do Kinoringan dot atarang o vaza pogili dit avantang o ralan om rikoton. Ong it ongoulun diri, asarok bai mongintutun o gama momili di rikoton. Rontob i pinonuhuan do Kinoringan o monodia di ralan dit alanta om arantang om oluvas sid rikoton dit atantu, okonko sid kabambaran. Na ino pinonuhuan do Kinoringan okonko bai hal do hopod ayat om hopod atag i iadino ko kada-no do iadino, inoi nga suvaiko it ulun soumul-umul sid tinoguvangon do Kinoringan sid saralom di sokovia i kopolisan dau, sodop adau, pongitungan, gama, panau, koruhang, anggai, ongakob om simbol, om varo koozian dit otopot.

3-4 I kobuatano dit ulun dot okosog om it ulun dot araat

I Kitab Laid pinerad om pinoluu it ulun dit atag o gama di kazu dit avantang o sinunizan, tu osukup o vaig om homburung o tana, tu asapou ot uva. (Yeremia 17,8 om Ayub 8,16). Suvaiko biano om kaharati-ogi it Ongomomogun do kuran o kobuatano do kazu, ong okurang i vaig sid saralom do tana om okurang o darun (it akasia mangavi om pokorob banal do tana sampai matai it ongokazu vokon). Iadko i kazu suvai kiguna ong osukup o vaig om amu-ogi lumondihu i roun, gima alasu o barat ko okurang o darun sampai asapou om avantang it ongouva, pengkaa dino it ulun di monuluk di pinonuhuan do Kinoringan sampai sumuhut di kenginan do Kinoringan. Sabap i kenginan do Kinoringan o mangahatul om kokovidan om sondihon dau. I sokovia i kobuatano om gagamaan om kavazao om bahazan, nga ajadi-nopo, ka. Ong siti varo harapan om pongitungan dot it ulun do kadapat monuluk di kenginan do Kinoringan. It ongoulun Parisi nakalandu sid harapan dino, retanko bai ioti ot osusi, tu nokoponuluk ioti di kenginan do Kinoringan. Na i zabur diti amu mongitung ko monuduk do iadino. Gam iti-no o kosipan di zabur, Ong sukul sid tinoguvangon-nopo do Kinoringan it ulun, sokovia i gama dau sumuhut di kenginan do Kinoringan, nga abarakatan-no om tunda do Kinoringan. Okonko i gama dot ulun o harapan, inoi nga i gama do Kinoringan o monunda om mangagazad om manaud dit ulun dot abanal.

Topot it ulun dot araat, banalko tanid o vazaan om rikoton. I suntuan, ino-no i gama mangatap do parai. Bai apol it ulun di iadino, apis, aso guna, aso't onsi, om iadino i kopolisan dot ulun dit amu engat do varo Kinoringan ko pakaso do Kinoringan. I sokovia it ongokaralazan om kohigakan di bai oribau, nga bai buatan, okonko kionsi om aso kosondoto om panangan. Ong manarang i Zabur do iadino, amu mongusiba iosido dit ulun di iadino (iadko it ongoulun do Parisi, imatai sid Lukas 18,9-14), rontob monuduk iosido di rikoton di sid kobinasaan.

5-6 I korotuan do hukum do Kinoringan

Ong sid ayat diti, mogulu noboros i panangan om i rikoton dit ulun dit rumaag. Ino-no i suriban dot apol, asarok napakai sid Kitab bahagi di hukuman do Kinoringan (Hosea 13,3; Yesaya 29,5; Zabur 35,5; Matius 3,12). Iadko i gama di Musa mongolupu om mamarakat (Ulangan 27) mongitung i zabur di kopongohukuman penlaid sid gama mamahagi om monodiri dit ulun. Ong i Yesus sid Matius 25,31-44 iadko i manaud do pangazam di pogibangon om pavananon it ongokambing om domba o gama dau monodiri dit ongoulun di nokosuhut di kovosihan dau om it amu, ko iadko it ulun di

mangatap do parai. Ong it ulun kodori diri, gam varo sikub dit apakai sid gama popilai di gandum sid sodu, tu monnilib dit apol. Manjadi it ongolinsou minarab sid sahau, tu avagat, topot ong it apol, notilib-no do barat sampai osodiri-no banal it onsi om it baiko apol. Manjadi hiza di pongohukuman do riniba, atalahas-no dot i ralan om vazaan sid kotonusan o rikoton. Topot ong i piumpugan dit ongoulun dit obinsuhut, atarang o piumpugan dit otunda om agazad om posinangon do Kinoringan. Manjadi sabap tu i Kinoringan o monunda om mangahatul dit umpug dino, iti-no o sabap dot kaharap it ulun dino sid kovosihan om tunda do Kinoringan. Ensan i kobuatano om koposizan dot ulun dit obinsuhut, nga nokosuvang-no sid palad om kenginan do Kinoringan. Okonko it ulun kondiri o mopud, inoi nga inopud iosido di kuasa om taud do Kinoringan. Manjadi iti-no nihodtol di Zabur dino, i kosipan om i kosuhutan dot ulun kopikawin om mikokoruhang, mad toruntudon dit ulun dit okosog.

Ong arait sid Zabur diti i pinonuhuan do Kinoringan, banalko tanid o pongohorotizan di Zabur dino mantadko i vaza dit ongoulun Parisi manarang om posondot i hiza di Yesus. Sabap ong sid ongoulun do Parisi i pinonuhuan iadko dawai di kirugi di momogos dit ulun nokokurung sid rinuvang dit ansal, gima ogumu it ongokada om gama moniag kananganko it ongohal dit bai oribau, iadko i momoug do palad ko manahak do perpuloan do baiko bawang om lompodos om pangavau vokon, do kakali amu mongontupat di nunu banal o harati ong kabanaran om kenginan do Kinoringan. Ino-no o panangan di pinonuhuan, pemumui dit ulun sid ralan dot abanal dot okudik nga amu tumohiang ko lumisang om mantas, ong pamarasan dot otopot, tumolikud sid kenginan do Kinoringan, isuhut di pinonuhuan dot asamod. Amu kadapat do manarang di kenginan om kabanaran do Kinoringan sid a-ko piro ko sid kinogumuai dot ongoayat, isuhut di sokoviai it ongosituasi di mimbulai-ogi. Gam i gama mongumbasih dot ulun hiza dot adau do pongintaranan lobipo atag om kiguna mantadko i sokoviai i vaza monuluk dit ongoundang-undang di retanko monuluk di pinonuhuan dit adau do pongintaranan di mad momogos om monusa dot ulun, sabap asadapan iosido montupat-tupat, supaya amu karanggal di hoturan om undang-undang dino. Manjadi antad sid gama mongontupat banal, varo-no nalazan, tu aso-no kotibangan monulung dit ulun vokon, gima baiko i dau-po do vaza mongilin ot engat dau om posuruton dau. Iti-no o sabap dot ino Zabur dino mangagazad dit ongoulun ponong sid ralan di Habal do Kovosihan, om iti-no kavi o niboros di Yesus hiza di minanarang iosido dot iosido-no o monuluk di sokoviai i pinonuhuan do Kinoringan.

ZABUR 2: I Kinoringan om i Minananggung dau (it Almaseh)

Basao-po laid it umpatod om iri-ogi i Zabur ko-2.

I kodori diri, ong kodung minatai i raja sid karajaan dot agazo ko i Faraun do Masir, banalko rinumosi sampai mogkikip it ongoulun. It ongobansa di narakop tumiim-no mogihim do kolobusan antad sid hoturan di karajaan dino, om it ongoulun dit ongodaerah di nakasamba-no sid raja laid diri, gima aso tinganan sumaap, nga mogihim-no do vazaan lumabus sid hoturan di karajaan hiza di varo-no raja vagu. Iti-no o sabap, dot asarok dot i gamaon keso dit ulun di napangkat-no do raja, momorinta dit ongodaerah om monongpomogunan dit ogulou om pozom dit ongoulun di kumodou dara. Ipat o raja vagu, osusa iosido pakansang om patatap vagu di dau do razat om karajaan sampai momihot dit ongovolit di pomogunan om karajaan dau.

Sinod kobuatano dit ongobansa vokon ot inanu om suntuan do kuran i raja dot Israel mangahatul om momorinta dit ongobansa di mintutuk di bansa dot Israel. Mad kondiri di raja vagu o momoros om manarang. Mad tolu ot ayat sino, 1-3 it ogulou dit ongobansa. 4-6 i kogofoo om kohormatan do Kinoringan di tumalib di sokoviai i nunu-nopo songhoturan, 7-9 i kinapamangkatan di raja vagu om iri-ogi (10-2) I bahanda sid sokoviai it ongoraja do sompomogunan do mongoguna om mongindazou sampai sumamba sid Kinoringan, di kakali avanus i Kinoringan om pemozo di kobungoho om karaatan dit ongobansa. Sabap ong humungot i Kinoringan, mad tumanus i riniba om it ongobansa iadko kazu sid apui dit oduruk om ovuvu-no.

a) 1-3: It ongoraja sid sompomogunan: I Zabur mongovit di tokou sid tanga di kodurhakaan dit ongobansa. It ongoraja dit ongopomogunan sid mintutuk dot Israel di nokosuvang-no sid pomorintaan dot Israel moguhang-nopo di hoturan do pomogunan sampai sumaap om miupakat lumabus sid

hoturan di raja dot Israel (i hiza di raja Daud varo hopod ot ongokarajaan do nokosuvang sid kuasa di raja Daud.) Rontob-nopo, ong it ulun di minongimbulai di longoi diti, okonko i karajaan dit isai-nopo o raja dot Israel ko Yahuda o boroson dau dino. Tu ong ino karajaan dot Israel ko Yahuda, minsanko hiza dot agazo banal iadko i hiza di raja Daud, kakali bai opodok o karajaan sid pialatan dit ongokuasa di banalko ahatul om agazo (Masir, Assur, Babil, Parsia om Madia) Ino-no o sumasi i Zabur diti, I karajaan di rumikot-ogi. I Zabur mamahanda di hiza di sid tohudi't adau. I hiza do varo pangkaton do raja dot Israel ko Yahuda, i piumpugan di bansa dot Israel sumasi dot sid tohudi varo karajaan di pentongkop do pomogunan dot ino karajaan do Kinoringan dino, varo-no tanda-no om umba laid sid karajaan dot Israel. Sabap ino, i raja di bai riniba antad sid rurungan di Daud, o mongontok om posuntuan di raja banal do sompomogunan, ino-no i Kinoringan. Iosido dino wakil do Kinoringan sampai i kapamangkatan dau, nga ginama do Kinoringan. Okonko it ongokarajaan di milavan om mirurumpak-rumpak om mitotori-tori o mangahatul ko momorinta di sompomogunan, inoi nga sid palad kavi do Kinoringan it ongobansa om i sokoviai it ongohoturan. Sid kososizan di Zabur mimbulai i pitonidan di kuasa do Kinoringan om i dang riniba om raja do riniba.

b) 4-6: I raja sid surga(4). Ong banalko agazo o gulou om pisaap sid ayat 1-3 sid pialatan dit ongokarajaan om ongobansa, tigogi, ong sid hoturan do Kinoringan, ozom-no. Sino-no i Monguasa di sokoviai, do sid riniba atandas it ongoraja di mokikukuasa, dot ong otopot, okonko ioti o kikuasa, inoi nga agaratan om okuasa dit ongokaralazan om i gama mokigagaral om mokihohormat. I raja do surga iadko pandangan dot it ongoraja do riniba bai korimbobotoi. Kerak ong Kinoringan di nemot dau i vaza dit ongoraja misingkosasavat om misingmonguasa, goukon dau i kavazao dioti di mianggan-anggan dot isai i randavi.

Kondiri dit ulun o monguji di kohormatan om kogofoo do Kinoringan, osinang om otomon sampai agazo o ginavo dau sumasi, do nakamung iosido sid kuasa do Kinoringan. Minsan tumiim it ongokuasa om ongoraja do mokihormat om makabul, kakali dot i Kinoringan ot asavat om pokih dioti sampai posondot di dau do hoturan. Gam (5) ong momoros i Kinoringan, iadko korud o dolou dau di mongindorosi dit ongobansa, sampai okikip-ogi it ongobansa om humarati dot aso tinganan sumaap di Kinoringan ko sumaap di raja di sid Yerusalim i mongontok di Kinoringan sid tanga do riniba.

c) 7-9 I raja sid Sion. I raja dot Israel om Yahuda, nga pinangkat di palad do Kinoringan. Kondiri di Kinoringan o mongolumbatos do pensavat di raja dot Sion. I raja do Sion inanu dot anak do Kinoringan ko pinakaanak do Kinoringan. Minsanko sid ugama do Baal varo-no laid vaza mamangkat do raja, retanko iosido-no o jumadi dot anak di Minamangun (Baal), ong kodung pinangkat iosido do raja di bansa dau. Na i Zabur mamakai di suntuan dino bahagi di raja, antad di turunan di Daud. Ino pongoretan dot, kapananganakan, o harati, i Yesus inanu do Kinoringan dot Anak dau. Iti-no o sabap do noboros dot, Bianco jumadi i iadino. Om i boros dot, Ikau-no dino ot anak-ku, ino-no i vaza mananganak banal, okonko baiko nosingkapu. Suvaiko i hiza di kapamangkatan do raja vagu om ahabaran-ogi i razat dot i raja, ino-no it ulun di mongusaha di kenginan do Kinoringan om i Kinoringan o mangagazad om monunda di raja. I raja di napangkat posurut di kenginan do Kinoringan, supaya ensanan it ongobansa sumahau sid hoturan do Kinoringan di mimbulai-ogi.

d) I Bahanda: I Zabur mamahanda om pontupat dit ongoraja om ongoulion dit ongopomogunan. Ousa do humarati it ongobansa do kodung varo raja dot Israel, ino raja dino nosungkod do Kinoringan, tu Kinoringan o sondihon dau, sampai i raja dino baiko wakil do Kinorgan. Suvai mangasip om sumamba om ipongoguna sampai mangarazou om mongindazou o gama do riniba sid tinoguvangon di raja dot Israel, i mongontok do Kinoringan. Manjadi, hiza do kapamangkatan di raja sid Yerusalim, varo kososizan sid tanga dit umpug di kapamangkatan do iadino,

Isai-nopo i pakaso do Kinoringan, anangan iosido do rodus om hungot do Kinoringan. Isai-nopo i mokitulung do Kinoringan, kemot do kotulungan dau.

It ongobansa kakali migagagut dot isai om siombo i Kinoringan, ino kuasa di minongimbulai di vinangun om i riniba. Topot i Zabur sumasi dot, Suvaiko mongoguna banal di raja sompomogunan om i wakil dau sid Burul do Sion, om atag-ogi i gama sumambayang om mongindazou do

Kinoringan. Topot it ongo kuasa vokon, nga aso kuasa om aso hak, aso biano om lobipo aso ong i hiza di rumikot-ogi.

ZABUR 6: Longoi mogkorudu om pentahan di kosusaan sid Kinoringan

Iti zabur diti, nga it iso sid pialatan do turu ot ongozabur di mokiada do kasalaan om mokitoguvang vagu do Kinoringan. (32; 38; 51; 102; 130; 143) Rontob-nopo, ong sid zabur dino aso gama mangakun di kasalaan, minsanko varo boros di manarang do kisala it ulun di minongimbulai di Zabur dino. Amu atalahas do nunu i kinosusaan diri, panakit ko i nunu-nopo, varo sangod dau di minonusa dit ulun dino. Mad apat ot ayat di Zabur dino do sid ayat keso sampai kotolu, miganti-ganti i gama mindamo om i gama manarang do kosusaan. Suvai sid ayat kapat om kembulai-ogi dot it ulun di minta dua engat do varo kotulungan sampai tumorima iosido do kakansangan om harapan.

a) 2-4 Isai-nopo it anangan do rodus om hungot do Kinoringan, bai kotonusan o rikoton. Mangakun it ulun sid zabur dot apatut dara dot ohukuman iosido do Kinoringan. Aso't elaan dau dot i boros iadko i Ayub, retanko iso nga aso sala dau. Iti-no o sabap do mindamo iosido di kovosihan om i kosianan do Kinoringan, tu baiko antad sid kosianan do Kinoringan kadapat iosido mokitulung. I zabur pogili sid tinoguvangon di kokuguzo dau om i kosompito dau. Bai iso-po ot elaan dau, ino-no mokitulung, mongoduat do songkuro-po kalaid om varo-ogi kotulungan.

b) 5-6 Kenduvo mindamo i Zabur do kotulungan, ino-no kotulungan di manapul dau antad sid kobinasan om kapatazan. I zabur mangapil sid samod do Kinoringan di kadapat mamasi dit ulun di natandaan sid kapatazan. Ong minatai it ulun, aso't elaan vagu dit ulun mongindazou ko sumasi do Kinoringan om i samod dau. Ong atanus-no it ulun, atanus-no i gama dau sumasi di samod do Kinoringan sid tanga do razat. Kenginan di Zabur, sid sokovia i gama mamasi om mopud it ulun mimbulai i kogofoo di samod om kenginan do Kinoringan. Iti diti okonko bai hal do rohani, ino-no kuran dit ulun kondiri kotoguvang sid Kinoringan, inoi nga kuran sid tanga do riniba it ulun di dang Kinoringan do pasasi do Kinoringan sid sokovia i kavazao om kobuatano dau. Ong minatai-no it ulun, nengkod-no i kotibangan om koriatan dau sumasi do Kinoringan om mongimbulai om mongolombus di samod om kenginan do Kinoringan. Suvaiko apasi om ali-ali it ulun om varo-ogi kotibangan dau mongindazou do Kinoringan. (varo pongitungan di iadino sid Zabur 16; 49; 73) Ong minatai-no it ulun, natanus-no i kotibangan dot ulun tumoguvang om sumuhut sid Kinoringan. INo boros dot it ulun di minatai a-kadapat monorima kaseh sid Kinoringan, varo-po sid Yesaya 38,18; Zabur 30,10; 88,11; 115,17) Kagi kakali agazo o ginavo dit ulun sumasi do Kinoringan.

c) 7-8 Insan-po dino mogkorudu om sumusa it ulun do Zabur dino. A-ko piro o pamarasan di mad suntuan di gama sumusa manarang om pohodtol it ulun di kosusaan dau: Mongohomu, mogihad dot osusuvaban, ozopos it odopon dau do romou, mongkung-no i mato gima i korualan do ginavo, kagi lisunon di sangod. Nakamung sid sokovia i kosusaan kondiri i gama di sangod do mangagauk om mongindaraat om mongolupu.

d) 9-11 dot tigogi, banalko tanid o boros om kososizan diti: ong sid ayat kavalu kakali pongolulumahan it ulun om opupusan iosido, ong siti, mad akansang-no vagu om osiou-no sumamung dit ongosangod om it ongomangagauk om mongindaraat. Nunuka ot ajadi di minonimban di ginavo om vuos dit ulun dino? Iso nga aso boros di manarang di kosimbanan dino. Ino-no dati, i zabur dino napakai diri hiza do mindamo do kotulungan om iri-ogi abarakatan it ulun sampai nahabaran-no iosido di Habal do Kovosihan do kuran i Kinoringan minonulung di bansa dot Israel om sid ogumu ot ongokosusaan dit a-ko piro it ulun. Ino kososizan dino ot onuvon dit ulun do tanda om siji di kotulungan di nadapat dau hiza di sid panambayanan iosido, supaya ong muli iosido sid valai, akansang-no vagu iosido, tu sinianan-no iosido. Ino dino kavi, tu i Tuhan o nokening di kosusaan om nokotorima di pomintaan dua dau. Manjadi i kelaan dot i Kinoringan minongining om harapan dit ulun dino sampai katama-no iosido mongindorosi om mamajal dit ongosangod, gam sunsubon dau ioti, supaya momodtangkus ioti mogidu.

ZABUR 8: I Minamangun om i vinangun

Iti zabur diti longoi di mongindazou do Kinoringan, i minongurug di songvinangun. Kopiamung i

vaza monguji di suromo do Kinoringan om i kinourugan dau om i gama mongimvantang do kobuatano do vinangun. Ontok do sodop tumingaha it ulun sid avan om mongimpuras dit ongokorimbutuon. Iri-ogi i mato di ginavo dau ovongo memot om monguog di kohormatan do Kinoringan. Iadko it avan o nokohontol do nokokulub sid vinangun om pomogunan, o kohohontol i kohormatan do Kinoringan sid vinangun do mad kema om kuhakop. Iti-no i boros sid ayat 2 om 10, it ayat di pinogugulian lumongoi.

Ong varo dara kuaya dit ongosukod om it anganak, sampai ensanan i piumpugan miambat-ambat sid duvo it ongoayat dino. Na duvo-po o tajuk sid zabur dino, ino-no i gama rumonok om ovongo di kogofoo do Kinoringan, om iri-ogi i katamanan, gima banalko kikohormatan i Tuhan iadko i kinopurimanan di Yesaya sid F. 6,3.

Ino-no i kososizan dit ulun dot Israel, I Kinoringan kumavid di songpomogunan om i kohormatan dau, nga nokotongkop di pomogunan om vinangun. I hiza diri kakali migagagut it ongobansa, retanko i dau om dau do kuasa om sundu ko pinokokinoringan ot agazo o kuasa sampai kiniro dit ulun diri sid vatas di dau do raja varo kuasa di pinokokinoringan dau dino. Topot i kosipan om kososizan dit ulun Israel, ino-no, I Kinoringan di Ibrahim, Isaaq om Yakub, ino-no i Minamangun di sokovia i vinangun om ensanan it ongobansa om ongopomogunan. Gam it ongokorimbutuon, i retanko pinokokinoringan dit ongobansa dot i Kinoringan Yahve o minangagama do palad dau o minongurug do iadko mangagama do politaan. (Kinotimpuunan 1) Sabap ino, isai-nopo i tumingaha sid avan om monguog om mongitung dit ongokorimbutuon om i monongkokuro dit ongokorimbutuon dino, nga mongohormat-no di Kinoringan, elaan dau ko amu, tu mongindazou iosido di kogofoo di vinangun. Ong avangaan-no it ulun, gima i vinangun om i hoturan di vinangun, tantu mongindazou-no iosido di Minamangun (2b) Aso't elaan dau do vokon tanidko iso-no o Minamangun om iseso o hormat dau sampai iso't ulun nga aso kadapat mongolim ko pakaso om polingan ino kogofoo om kohormatan do Kinoringan. Minsanko it anganak di ragang-po (3) Pohodtol di kososizan dino, tu i longoi dioti o monombol di kabang dit ongoulun di sumaap om pakaso do Kinoringan. Ong opodok-po it anak, amu-po elo mangakal om nopiduvo o ginavo. Ensanan i ginavo dau dot obntomon om obingvongo do mindolongoi iadko momoi mongohormat om mongindazou do Kinoringan. Aso-po kopintaro dau om kogolivong dau. Ino kobuatano dit anganak okonko kobungoho dioti ko hal dot okurang o pangalaman dioti dino. Gam sinod gama dit anganak di iadino mimbulai i kogofoo om korolomo di kovosihan do Kinoringan om i vaza dau mongurug om mamasi di vinangun. (Elaan tokou do vokon-no ong varo boros dot anak di tumalib dit inuagan dit ongosukod. Tu ong it osukod-no moniim mangakal om mogihim di dau do kohuntungan om katagan. Topot it anak mamalang om manalahas dit otopot dot amu mongitung iosido ombo i dau do kohuntungan om kosinangan. Suvai kiakal it ulun om tumimpuun iosido do momudali om momoros sid dau do katagan.)

Sid boros do varo kakansangan do Kinoringan antad sid kososizan dit ragang-po it anganak, mimbulai i pitonidan do kakansangan do riniba om i dang Kinoringan. Tu etung do riniba, suvai akansang ongilomina om kipakakas di monori di sangod. Topot ong sid Kinoringan, it hal dot opodok om it mad aso-po guna ko it osibak, o gunaon do Kinoringan om pakazon do Kinoringan bahagi di kohormatan dau. (Boros di Paulus sid 1. Kor. 1,27+29) it okugui sid vinangun pinili do Kinoringan, tu mangamalu dit ongokakansang, supaya iso o riniba nga aso mokindazou sid tinoguvangon do Kinoringan.) Om i Matius 21,16 mongusul di ayat dino bahagi di gara dot ulun sid Yerusalim mangarazou di korikatan di Yesus sid Yerusalim.

ayat 4: it unturu do Kinoringan o minongurug di kogofoo om kosongoho om korolomo dit avan om i sokovia i it ongokorimbutuon. Na i Ibrahim nensasakan-no laid do kadapat ko amu mangizap dit ongokorimbutuon, dot i kosondoto diri, pasa dila aso tinganan mongizap, tu miabal di kogumuo di pantai do rahat.

Suvai kaharati tokou di kogofoo om kohormatan do Kinoringan om i vaza dau mongurug di sokovia i vinangun om atalahas-ogi i kobuatano do riniba dit antad sid palad om unturu do Kinoringan. Ong i palad ko longon do riniba, okudik ot asakup ko kagama. Topot ong it unturu do Kinoringan minongimbulai di sokovia do iadko tukang o minangagama. I vangun tokou bai opodok o bahagi dit ensanan i vinangun, amu miabal di kogofoo do kilau dot opodok banal. Ino pialatan dit

ongokorimbutuon dit antad kavi sid Kinoringan, manarang di manarang di kosoduo tokou antad sid Kinoringan, om iri-ogi sid ayat ko-5, kakali dot i tokou sid palad om tinaud tokou do Kinoringan. Iti-no o sabap dot i zabur ovongo om mongindazou do Kinoringan. Sabap ong Kinoringan, aso rontob, minsanko it ongokorimbutuon di banalko osodu, vokon-no ong tinounan om kosondot-ogi i binahang dioti sid pomogunan, amu tokou osukat i kosoduo ko tumivol tokou sid rontob dot avan, nga ino kavi, antad sid unturu do Kinoringan, ka. Pengkaa i koledo di sukud do riniba om i hiza do Kinoringan, nga aso tinganan porompok, tu ong Kinoringan, kotimpunaan nga aso om kompuso dau, nga aso, tu salaid-laid nga Kinoringan. Topot ong riniba, a-ko piro nopod toun om avi-no o sukud dau. Ong i hoturan dit ongokorimbutuon, banalko atantu om atatap, amu mimban-simban sid saralom di hinotusan om rinibuvan toun. Iti-no o sabap do mongoduat i Zabur dot, Nunu-ka o kogunaan-nu do riniba? Ogumu ot ongohal vokon di lobipo kiguna dara mantadko bai i riniba, tu kinambo kavi i korimbutuon om it ongomalaikat om vokon ot ongosundu om kuasa, kakali i Kinoringan minomili di riniba, inot ongoulun di mad kilau om opodok-po mantadko bai kilau. Ong antad sid riniba kiroon, tantu aso guna, ong i riniba sid tinoguvangon do Kinoringan om i vinangun dau. Na kakali, ka di zabur, tanid o kiroon ong Kinoringan, gam Kinoringan o mongoguna di riniba om mamangkat di riniba do wakil dau sid tanga do vinangun.

Ino Kinoringan, i monguasa di sokoviai nga kakali engat ong i riniba. Kikovosihan i Kinoringan ponong sid ulun di mad dupot dot oholian kopodok o kobuatano sid tinoguvangon do Kinoringan. Iti-no o sabap dot otomon i Zabur sid gama manarang di gama do Kinoringan manaud dit anganak do riniba (5). Iadko i boros di Paulus, antad-oku sid kovosihan do Kinoringan o gama-ku om kobuatano-ku, okonko i dohon do bantug om garal om kuasa. Sabap ino, suvai it ulun humarati dot banalko osibak iosido, mad aso-no guna dau sid tinoguvangon do Kinoringan om kagamit-ogi iosido di sokoviai i kovongunando riniba, i kuasa, gama, tugas dau dit antad kavi sid Kinoringan. Iso hal nga aso kuasa om kansang om barang kondiri. Ensan an i koposizan om kopudan, bantug, nga antad kavi sid palad do Kinoringan.

6-7 manarang-po dot i sokoviai i ponong sid riniba, Kinoringan kavi o minangagama. Kinoringan-no o manganu di riniba do pongontupaton om ponoudon di vinangun. Iti-no i suromo dino, I Monguasa di sokoviai manganu di riniba do mandul, wakil, timbalan dau ponong sid gama mangahatul di vinangun. Sabap ino, songkuro-nopo o koinsodu di pialatan do Kinoringan om i riniba, tigogi, kondiri di Kinoringan minsosomok sid riniba om pensavat di riniba sid somok dau. Nabantug-no i riniba.

I Zabur mongohondom di noboros-no laid sid Kinotimpunaan 1,26-28 dot i riniba koluu do Kinoringan om mongontok do Kinoringan mangahatul di vinangun.

8-9 Ong arait it a-ko piro ot ongodupot, i pangazam om i mizon talun ko it ongosada sid suvang do rahat, inimbulit-no do kuran di riniba di gulu diri minomungaran dit ongodupot (Kinotimp. 2). Nakasasi di sokoviai i iadino, iri-ogi tumopik i Zabur sid piumpugan di noumpug sid panambayanan, supaya mangarazou i piumpugan di kohormatan do Kinoringan. Sabap, ong sokoviai i kohormatan om garal do riniba antad kavi sid Kinoringan, suvai iuli sid Kinoringan i kohormatan dino om atag-ogi. Aso garal kondiri, ong riniba, aso bantug kondiri, aso kohormatan kondiri. Gam antad kavi sid Kinoringan iti, tu mongohormat om mongindazou di kohormatan do Kinoringan o tomodon. Sino-no o kinompuso di Zabur di varo longoi di mad kuaya di manarang dot isai ot apatut do hohormaton, ino-no i Kinoringan.

ZABUR 12: I boros do Kinoringan om i boros di dang riniba

Iti zabur diti, nga pomintaan dua dot ulun di mosikim om kikihizon dot ulun vokon. Iosido poromut sid Kinoringan di kosusaan dau. Humongkob iosido, gima i kovuduto dot ulun i gama momuruvak dit ongoulun di nokopud banal, pokihi om mangaladtak dit ulun dot mosikim om it ulun dit okosog. Ombo it ulun dit atatap, otipuan dot ulun. Iadko i Zabur 73 manarang do suvai monipu om momudut it ulun om kemot-ogi iosido do kosinangan om kolunduo, na sid zabur dino nga iadino o kobuatano. Manjadi ino dino posusa di ginavo dit ulun mosikim, tu i pangalaman dau, suvai momudut om monipu om mangaladtak dot ulun vokon o vaza posurut di kosinango dot ulun. Ino karaatan di iadino pogili i zabur sid tinoguvangon do Kinoringan.

ayat 5 mad timpa do Kinoringan. Iri-ogi (6-8) monguji i piumpugan di nokening laid di kosusaan om it timpa do Kinoringan, di katatapo di boros do Kinoringan om humarap sid boros dino.

1-2 Momodhongkob it ulun, tu mad tumanus it ongopiumpugan, gima i vudut om i gama mongolombok momorinta di razat om mongorongoi di piniizaan dot ulun. Varo iadino o boros sid nabi Hosea 4,1; Mikha 7,1; Yeremia 5,1 om Yesaya 57,1.

3-4 I vudut nga sala dot agazo antad kinotimpunaan do riniba di mongorongoi di katapatan om katatapo sid pialatan dot ulun sampai sumaa do Kinoringan. Iti-no o sabap do mindamo i Zabur dot i Kinoringan momunso dit ongomonung dit ongovudut. (I boros sino, it ongomonung dit osuradit o kabang om avadsak o boros). I boros dot ulun, (dila) mad pakakas di kuasa dot ulun di mongorongoi dot ulun, mongindaraat do ngaran dot ulun, iadko mamatai dot ulun. (Mat. 5,21-27 Boros di Yesus, i gama mongolupu dot ulun iadko mamatai dot ulun: i dila kadapat mamatai dot ulun) Mamatai okonko tumimpun i hiza dino dot it ulun momingkal di sapadang ko paanta di pistol dau, inoi nga it araat o pongitungan sid koruhang o kapatai-no sid ginavo. Sid Momogun varo koubasan dot amu mamalang di karaatan dot ulun, tu amu mongorongoi dot ulun ko kapangamalu dot ulun sid tinoguvangon dot ulun vokon. Varo-no ong mad mongorinding di kondiri, supaya amu kotombil sid karaatan. Rontob boroling-rolingon momoros, amu tantu sondoton momoros. Kenginan ong rontob ohorotizan di nanangan. Topot ong it ulun vokon amu ohorotizan dot ombo ot boroson. Sid kavazao di iadino varo engat dot i boros kikuasa do mongorongoi dot ulun. Topot ong i sid zabur, gam it osumbang momuruvak di kuasa di boros dau om i kabang om dila dau.

5-6 Iri-ogi i Zabur manarang do kuran i boros do banalko tanid o panangan, tu monodiri sampai mangaratu do kovosihan bahagi dit ongoulun di inodsitan om norugizan om nokihi. Ong apakai i zabur sid panambayangan, iti boros diti mad kabang kondiri dit Imam o minomoros, tu mongontok di kabang do Kinoringan. It Imam o pogili di kovosihan do Kinoringan sid piumpugan sampai monginsasamod, ino-no o boros dau, Kinoringan-no o kikuasa o boros dau, iosido o mongorinding om mangapad om mongontok dit ulun dit a-elo tumimpa om amu katama tumahan di vudut om it avadsak o boros dit ongosusumbang.

6b Iri-ogi i piumpugan sid panambayangan monguji di boros do Kinoringan, monorima kaseh sid gama mangarazou di boros do Kinoringan om mongimbulai di kosinangan om kosopulan dit antad sid boros do Kinoringan bahagi dit ulun mosikim om it osibak o ngaran, om it ulun di baiko mongohomu-po.

Tanid mantadko it araat o boros dot ulun, osusi i boros do Kinoringan, mad perak di nososob-no banal dot okudik nga aso nakagavul ko araat, tu inturu-no kosusi. (Sid gama monodiri do perak om amas, supaya ososob banal, suvaiko inturu magazau om poridion sampai nedu-no kavi i bai avu om polopou. Tu ombo it asakau kagavul sid amas ko perak, nga sumoribau do iadko puta. Iri-ogi amu tumogol ong perak ko amas, tu alus ko osusi banal. Ino suntuan do perak mongohodtol banal dot okudik nga aso't araat sid Kinoringan om i boros dau. Ong kodung boros do Kinoringan, atantu banal, otopot dot okudik nga aso kagavul. Iti-no o sabap dot it ulun sid Zabur mokitaud om mokiapad om mokirinding di boros do Kinoringan. (Ong sid Injil di Yahya, gam noboros-no di Yesus Kristus do iosido no o BOROS do Kinoringan, Yahya f. 1, 1-18)

Sabap ino, ino zabur mad longoi di manarang di ralan mogidu sid kovudutan dot ulun om mokisapul sid boros do Kinoringan.

ZABUR 13: Songkuro-po-ka kalaid, o Tuhan?

Iti zabur diti longoi dot ulun di sumakit di mongimbulai di kopurimanan dau om i kosusaan dau. 1-2 promut sid Kinoringan di kosusaan, 3-4 mongimbulai dit indomoon dot ulun om 5-6 mongohodtol di kosipan om harapan sampai i mad sumpa, gima notulungan-no iosido.

Sid ayat k-4 varo boros dot, Ontupato-oku, o Tuhan, mad sid panambayangan i noboros dati ino pomintaan dua dino, tu kiroon dit ulun dot "sino" i Kinoringan. Sabap i hiza kodori diri, varo boros di Kitab do sid panambayangan sid Yerusalim ot intoronon do Kinoringan om sino-no o kopisomungan do Kinoringan.

Na riumosi it ulun dino dot a-nokogoos iosido tumahan di sakit dau dit alaid-no posusa dau dot aso't

elaan om opurimanan dau do varo kamagatan ko koingkadan. I kiro dau, ino sakit om kosusaan dau dino antad sid osodu iosido sid Kinoringan, mad natagak-no iosido sid tinoguvangon do Kinoringan ko noling-an-no iosido do Kinoringan. Sabap ino, ingapat mongoduat om monginsosok iosido dot, Songkuro-po-ka kalaid, o Tuhan.

Opiduvo-no i ginavo dau do varo-po harapan ko aso-no, keso, kakali iosido dot ulun sid palad om tinaud do Kinoringan, ko nakada iosido sid tinoguvangon do Kinoringan, koduvo, a-nokogoos iosido do mogihim di Tuhan, kotolu amu nokogoos i ginavo tumahan di kobimbipitan di kosusaan dau, kapat, otori iosido di sangod di mangagauk om pokihi dit ulun dino. Tu i sangod tumomon, tu osusanopo iosido dot i sangod kagi, nga ulun di pakaso do Kinoringan. Sabap ino, sid gauk dit sangod dino agauk-no i Kinoringan..

Banalko onibak o gama dau mindamo om minta dua, iadko i boros di Yesus monuduk minta dua sid Matius 6, retanko amu osusa do pasa dila o momoros minta dua iadko it ulun do Parisi di mokimot minta dua. Sabap nelaan-no laid do Kinoringan i pongitungan om boros dit amu-po kalabpu sid kabang dot ulun, ka. Sid gama minta dua, mongingut do Kinoringan minsosomok dit ulun sid tinoguvangon do Kinoringan. Sabap sino-no o varo harapan dau dot suvai apasi iosido ong soumulumul ataud om otunda di Tuhan. Suvai i mato di Tuhan o monunda om mongoluhung dau om i tolingo do Kinoringan mongining di kosusaan om pomintaan dua dau.

Ong mindamo iosido dot, Patarango-no i mato-ku, ka, mindamo iosido, supaya apasi iosido sid kosipan om harapan di sumokot om sumondu sid kovosihan om samod do Kinoringan.

5-6 ponong sid kovian di Zabur humarati it ulun dot okonko i kosusaan om kopiduvaan do ginavo ot osusa banal, tu nengkansangan-no vagu i kosipan om harapan dau. Nengkod-no i korosizan dau. Iti-no o sabap gam mindolongoi-no iosido om mangarazou di Kinoringan om sumumpa do pazazad di habal do kotulungan sid ulun vokon.

Ino zabur dino apakai dot ulun di siumakit diri, do nengkod-po i sakit sampai gumorija-no vagu ioti om monorima kaseh ioti sid gama mongimbulit om sumusui di zabur dino.

ZABUR 16: I Katamanan, gima i Tuhan o Kinoringan-ku.

Ino Zabur dino kososizan dot ulun di nakamung sid Pesta Paska, nga mokitunda iosido, gima bai i Tuhan o harapan om sondihon dau.

1-4 I kosipan dit ulun sid Kinoringan

Aso boros sino do varo kosusaan ko kosompitan dot ulun, inoi nga kikatamanan iosido, tu iosido varo kotibangan tumoguvang sid Tuhan sid rinuvang do panambayanan. Mokigazad om mokitunda vagu iosido do Kinoringan, tu i pangalaman dit nokosunsud iosido sid Tuhan o mongonsug do sumonduino om humarap-no vagu sid Tuhan sid kolombusan dau. Ino-no i pangalaman dau, I Tuhan mongorinding di piumpugan dit ulun di mangasip sid dau (retanko it ulun dot osusi, iadko i Paulus sid 1. Kor.1 om sid Rom 1. Ino-no o harati, it ulun di nosodiri do Kinoringan ponong sid Kinoringan. Ensan-an i bansa dot Israel nisodiri di Kinoringan, supaya sid bansa dino pembulai i Kinoringan di kohormatan dau.

Manjadi it ulun di nakamung sid Kinoringan ot ulun di kikosurupuan, pengkaa dino it ulun di pakaso do Kinoringan ko sumamba sid pinokokinoringan, nga ulun di mokisususa-nopo om mansahari do kopunavatan. Sabap ino sumasi-no it ulun dino dot amu-no gumavul iosido ko mamung sid ulun di iadino o kobuatano. Aso tinganan do minsomok sid ulun om ugama vokon ko mamung sid gama dioti pasamba om paraha do dupot sid ongokuasa vokon. Amu mangarait iosido di bai ngaran dit ongokuasa ko pinokokinoringan, baiko ino-no i boros dau, amu-oku mangarait dioti, om monodiri, it ongoulun di sumamba do tanidko i Kinoringan. Banalko mongontupat iosido supaya amu kalandu iosido ko mongoguna dit ongokuasa dit aso guna.

5-8 I kosinangan do nakamung sid piniizaan do Kinoringan

Induvo panarang it ulun di kogunaan do nakamung sid piniizaan do Kinoringan, ino-no, Nalaba-okuno, mad nakalabai-no i ponginum-an hiza di poginakanan do Paska. I ponginum-an dino mad tanda di piniizaan om tanda di tungkusan. Pengkaa dino, i Kinoringan monukup dohon, o harati, natahakan iosido do tana, antawa i tinungkusan dau o nohorotizan dau dot okonko antad sid molohing dau, inoi

nga antad sid Kinoringan. Banalko tanid o kiroon dau kananganko i barang di sid palad dot iso't ongekob, dapu ko tana ko barang vokon. Nunu-nopo i varo sid palad dot ulun, nga dang Kinoringan. Ino kiroon do iadino, minsanko sid Silam varo pongitungan do iadino. Iti-no o sabap do varo hoturan sid Silam dot ipat-ipat it ulun manahak dot 2.5% di barang om kohuntungan dau sid pusat do Silam bahagi di gama mamahagi sid ulun dit okurang ot otorima antad sid kovosihan do Kinoringan, ko i nosusa-no. Ino dino retanko zakat.

Manjadi ong monorima kaseh it ulun sid Kinoringan, gima i vaza dau mangagazad om monunda dit ongoulun, kikatamanan iosido sampai misingilo om humarati iosido dot i nunu-nopo i sid apald dau, nga tanda di kovosihan do Kinoringan. Iri-ogi mongitung-no iosido do kuran ot atag o vaza mamakai di varo i sid palad om barang dau dot ino pongitungan dino mozo-vozo dit ulun sodop adau. Amu osusa iosido do mongimbulit mindamo om mokitunda do Kinoringan, tu nelaan-no laid dot mozo-vozo-no i Kinoringan om mompok-rompok sid ulun dino. Iadino osomok iosido sid palad om tunda do Kinoringan.

9-11 It agazo o harapan

Banalko ohigak om otomon iosido dit nelaan-no dau dot nodundungan iosido do Kinoringan. Okonko bai i guvas, inoi nga minsanko i ginavo nga nolikupan-no di palad do Kinoringan. Ong mongitung iosido dot varo kopututan di timpagos dau, amu-no rumosi, sabap nelaan-no dau dot i kapatazan dau okonko kovian om kopupusan dit koposizan dau. Okonko kotonusan o rikoton di kapatazan dau, inoi nga kakali iosido sid palad do Kinoringan di mizau ko matai iosido. Ino pongoretan kobinasaan (10) o pavalang dot it ulun dino varo harapan sukul kananganko i kogulianan dit ulun minatai (iadko i boros sid Usuran Rasul 2,25 om 13,35) Banal-no, aso kiroon dau do kumuro i kogulianan dino. Ong i dau do ginavo osinang dot engat dot iosido dino kuran-kuran, nga ataud di palad do Kinoringan. Ong apasi it ulun sid kovosihan om palad do Kinoringan, amu-no osusa iosido mongitung ko rumosi di kosungguvo dau, tu i kuasa do Kinoringan monguasa om monori-po di kapatazan om i kuasa di huntung.

Iti kelaan diti nga vaza dau mangasip om humarap sampai tumomon soumul-umul (11), tu otudukan iosido di ralan do koposizan. Iti-no i kosipan di tumalib di nunu-nopo songharapan dit ongougama vokon.

ZABUR 19: It ongoavan mongindazou di kohormatan do Kinoringan

2-7 Iti zabur ko-19 mad duvo o longoi, tu i tajuk, i boros om i vaza momoros banalko mitanid. Ino zabur dino tantu okonko antad sid kabang dot iso -no ot ulun.

2 Ensanen i vinangun, kopiamung dit avan, mato dot adau, vulan om korimbutuon o mongindazou do Kinoringan om i kohormatan dau. I vinangun o sasi om tanda di gama do Kinoringan mongurug di vinangun. Sodop adau nga ongosasi di kogosoo di ginama do Kinoringan. Ong sid ongougama vokon diri, i sodop dino kuasa do kotuvangan om naraka, om it mato dot adau om i vulan, na ongosundu om pinokokinoringan di minaganak di riniba om i pomogunan. Topot ong sid zabur diti, ioti kavi, nga pakakas di gama mongohormat om mangarazou di Tuhan. Ipat-ipat it adau mad nalad vagu di vaza monguji di garal do Kinoringan, tu amu-po miuma i gama posondot di kogosoo di ginama di Tuhan. Ino kososizan dino nakazazad sid pentongkop di pomogunan sampai iso o bansa nga aso dot akaharati di ginama di Tuhan.

Iri-ogi varo-po longoi bahagi di mato dot adau. I Kinoringan minangahatul di vaza dit mato dot adau, iadko minuvalai i Kinoringan, supaya varo intoronon dit adau. I zabur mamakai di jangkaon dot ulun diri do kivalai i mato dot adau, do kodung sodop, muli-no sid valai it Mato dot adau, do suvai sasarap om sumilau-ogi lumabus sid valai dau. Ino dino, ka di Zabur, Kinoringan o minionodia, okonko i mato dot adau o minuvalai kondiri. Ong varo boros dit ongosaiantist diri dot i mato dot adau, nga varo hoturan kondiri dit amu milo'd sumimbanan, sumasi i zabur dot minsanko ino hoturan dino, nga antad sid Kinoringani.

8-15 I Kavantango di Pinonuhuan do Kinoringan

Minsan banalko tanid i boros om tomodon om tajuk dit a-ko piro ayat dino, sid tohudi't adau

nokopiamung i duvo i bahagi dino mongohormat dit avantang o hoturan do Kinoringan kananganko i vinangun om i pinonuhuan, i mangahatul di sokovia i o tomodon. Na it ongoayat 8-15, mad duvo o bahagi: ino-no 8-11 i longoi do mongindazou di pinonuhuan, om 12-15 i pomintaan dua dot ulun do mokitunda om mokigazad iosido do Kinoringan, supaya amu kalandu iosido ko rumanggal di pinonuhuan.

It ongoayat 8-9 monguji di pinonuhuan, do pogili laid di kogunaan om iri-ogi di tomodon.

Ino-no: I kososizan do K. banalko atantu om pelo dit ongoulun dit obungou.

Sid gama monguji di pinonuhuan, banalko tanid ot ohorotizan mantadko i pangalaman di Paulus sid Rom 6-7, tu i pinonuhuan nga arangkap, atatap, otopot, alus, osusi om obinharap. I kiro dau, i pinonuhuan mad hongkos om polihan di kovidon dot ulun sid Kinoringan, okonko iadko balud, inoi nga iadko bansahan, supaya ong ozunzungan do kosusaan, kakali sumokot om otunda do kovosihan do Kinoringan. Mad tudukan bahagi dit ulun di mokituduk do ralan om rikoton dau. Ong lluvau ko opiduvo i ginavo, inanu-no sid pinonuhuan do katatapo(8), ong obungou it ulun, nga sino dino varo keloo di rumanzat sid ulun dot obungou,(8).

12-15 Mindamo it ulun bahagi dit ongokarangalan dau dit amu andaman om amu engat om mindamo do kotulungan, supaya amu mozo dit ongoulun di mamalid. Sabap ozi iosido dot aso borotuduon sid dau, tu elaan dau dot oruhai kalandu om kasadu it ulun dit amu orindingan di kovosihan do Kinoringan. Iri-ogi mindamo iosido supaya i Kinoringan tumorima di gama dau minta dua om mindamo om i pongitungan di kakali sid bai ginavo dau dit aso tinganan mangarait om mamalang. Iti-no kavi o gama dau minta dua om mangarazou, tu i Tuhan o sondihon om minananggung dau.

ZABUR 22: O Kinoringan, nokokuro-ka, tu inedian-oku dikau?

Ino zabor dino engat kavi it ongoulun Kristian, tu it ongoboros di ayat 2 nga pomintaan dua di Yesus sid kazu do sangkap. Ino longoi dino mangagazad di tokou sid korolomo do kosusaan om kapagasan do sisiri ong matai it ulun sampai opupusan it ulun (2-22)

Iri-ogi varo boros dot, Nambat-oku-no dikau, o Tuhan om iri-ogi i longoi do monorima kaseh sid Kinoringan, gima notulungan it ulun dino (23-32). Sid ayat 24 kembulai dot i zabor dino napakai sid piumpugan, do vaza manarang do kosusaan om i-po gama monorima kaseh sid Kinoringan.

Sid bahagi keso miganti-ganti i gama patarang do kosusaan om mindamo, i korosizan om i harapan do varo kotulungan sid Kinoringan dot i sokovia i kosusaan, nga natarang-no sid ongosuriban dit amu avalang banal dot nuu ot onsi di kosusaan om i kosondoto di karaatan dit ahajangan dau. Baiko it ongosangod dau ot boroson: 7b it ongomangagauk,

8 sompilog-no ioti, 13 it ongorarampus, 17 asu om bahanan dit ongomangarampus, 18 varo sumonsob sid dau, 19 mamahagi ioti di sulung dau... Inot ongosangod dau dino bai sid suriban manarang do iosido di kobuatano dioti, iadko mamaraling o gama dau manarang di kavazao dioti dino. Sabap vokon-no ong baiko suriban o boroson, nga kopigavul do boros dit okonko suriban, apagon monodiri dot nuu banal i kosusaan dit ulun dit insan-ogi minta dua di zabor dino. Bai sakit do guvas ko oruol do ginavo di potuhop dit ulun sid korolomo do kosusaan om kopiduvaan do ginavo? Na sid gama manarang di kobuatano dit ulun di mininta dua dit insani do iadino, amu tantu osodiri ombo o bai suriban om suntuan om ombo o kosusaan banal dit opurimanan dau sid guvas om ginavo, nga kakali atalahas dot it ulun dino varo kosusaan sid ginavo asasamou om opiduvo do mangasip om humongkob dit opupusan iosido. Tumiim iosido humarap om mangasip, topot i kosusaan banalko mongogorot do pada di kosipan om harapan, tu mad aso panangan di kosipan om harapan dau dino, tu kakali kikosusaan. I tajuk, ino-no mogihim om pemumui sid Kinoringan, dot ino tajuk dino isuhut di duvo o bahagi di Zabor. Na i piumpugan minud do kuran i kosungguvo dit ulun dino, tu i kosungguvo di kobuatano dino, nga kososizan ponong sid kosipan om harapan di piumpugan. Tu ioti, i retanko piumpugan dit ongoosog om i piumpugan dit ongo-okugui, suvai atatap om engkansangan di habal om kososizan dit ulun di naratu-no sid pensubaan om kosusaan. Iti-no o sabap dot i bahagi koduvo sid tanga do piumpugan!

22,2-22 Mogkorudu om mindamo:

I pomintaan dua kotimpun sid gizak di banalko ahatul, tu i gima natagak iosido sid tinoguvangon do Kinoringan. Aso't opurimanan dau do kakal-po iosido pitataud do Kinoringan. Ong amu engat do varo-po't ambat do Kinoringan, ino-no i kobimbipitan dit aso kerad. Ino "Nokokuro-ka," o mimbulai do songkuro kagazo i kahangkaban dau dino. Mogihim it ulun do vazaan humarati di kobuatano dau om mad bantaran di tumupak antad sid kosusaan dau kumaa sid tinoguvangon do Kinoringan. Elaan dau dot i kopudan bai iso-no o harapan, ino-no i Kinoringan om i kovosihan om tinaud dau. I boros di iadino okonko boros do mogoduw ko manala do Kinoringan, iadko Kinoringan-no o kisala dit nokensodu iosido antad sid Kinoringan. Baiko nakaharati-no iosido dot banalko nokensodu iosido antad sid Kinoringan dot amu engat do kuran. Amu kaharati iosido di mad sundait dot otos i Kinoringan. Nokokuro-ka? Aso't iso boros om habal antad sid Kinoringan o sabap dot iosido mongogizak om mongugangau mongodim minta dua dot okonko opian o boros.

Banal-no, andaman dit ulun i pialatan sid Kinoringan om i baiko riniba, iadko i boros di Zabur ka-8: It unturu do Kinoringan minongurug dit ongokorimbutuon, topot kakali mongohondom i Kinoringan di riniba di bai mad kilau ongokopopodok. Atag dara dot otos iosido dot amu monoro om monusa di Kinoringan, i monguasa di sokovia. I Kinoringan it osusi-no (3). Na minsanko iadino i pongitungan om kiroon dau, kakali andaman dau dit ino Kinoringan dino nokensomok sid bansa dau. Iosido o minangalabus di bansa dau antad sid Masir om minongumba di koposizan om kopudan dioti sid Kanaan. Koho i Kinoringan dot arait iosido do raja dit ongoulun dot Israel.

Manjadi sid gama mongohondom dit usuran di bansa dot Israel di sid tinoguvangon do Kinoringan om kumurang i kopiduvaan do ginavo dau om sumurut i harapan om i kosipan dit ulun dino. Ino kopiduvaan do ginavo iadko apui di misimban-simban i kahakango. Vokon-no om humakang, vokon-no ong kumugui it apui, isuhut di barat di momisok ko pahakangi. Ong kakali mangarait dit ongokotulungan do Kinoringan bahagi di bansa dau, humakang i kosipan om harapan, dot tigogi, varo-no vagu kopurimanan do korualan sid guvas, ka ko sid ginavo, koguli-no i kahangkaban dit amu engat i kotulungan. Ong koling it ongopongitungan sid hal vokon, mad okurang ot oruol om kapagasan, dot tigogi, mulit-no vagu sampai humali mantadko i dirii.

7-9 I ginavo mad misimban-simban i poongitungan dau, varo-no ong mongohondom do Kinoringan om it agazo o gama do Kinoringan, varo-no ong bai it oruol ot ohondom, varo-no ong mongitung di lavis ponong sid sangod dau dot atag do samadan, ka di Yesus. Ino-no o kosusaan dau. Amalu iosido sid tinoguvangon di sangod dau. Amu elaan tokou do nunu i sala dino. Topot i kosusaan dau dino, ino't ongosangod kadapat mangagauk di Ponginjil ko pandita om Imam, retanko it ulun dino natagak sid tinoguvangon do Kinoringan. Ino gauk dino mad rugi sid ginavo dau, tu i boros dioti manarang dot otopot nopotut i kopioputan di Zabur sid Kinoringan.

10-12 Iri-ogi kumansang-no vagu iosido om tumatap-no i kosipan dau dit andaman dau dot hiza dit ragang-po iosido, Kinoringan-no o minangagazad om minanaud antad sid tizan dit idi dau (10). Humakang-no vagu i harapan dau dot oduruk, i mongohondom iosido dot minsanko iosido, nga sid palad do Kinoringan om osomok sid tinoguvangon di Tuhan. Bai sid Kinoringan o varo kotulungan om kosopulan, ka... om kumugui-no vagu i kosipan, tu humakang i pensubaan om kopiduvaan do ginavo:

13-16 Na kakali amu-po nengkod i korosizan, tu i gima sangod dau. Ong arait it ongosapi do Basan, ino-no it ongosapi di banalko ahakang, ko i mondou, ino dino baiko suriban kananganko it ongosangod di miabal kakansang sampai mongindorosi. Minsanko bai i kobuatano ot kendorosi. Iti-no o sabap i dau do kopurimanan, sid tinoguvangon dinot ongosangod, mudou iadko vaig, mad rilin di noudou, kumorop i dila sid kabang, inot ongoamarasan kavi manarang di kozoos di korosizan dit ulun. Ino-no o lavis, aso kiniro-po dau do kogoos iosido tumahan di sangod dau om mimbulai-no vagu i kopiduvaan do ginavo, kaluto ong banal-noko nokedu-no i Kinoringan.

17-19 Kakali retan-no dau it ongokobuatano dit ongosangod dit amu mengkod monoro om monusa dit ulun di mintadua sino. Varo-no ong mad asu, varo-no ong mad mangarampas, varo-no ong mad manakau dot it ulun i Zabur, nga sid palad banal dioti ino. Ioti nga iadko it ongoombolog om dupot di mangakan di buntung di noopung sid natad ko sid belantara. Rumosi iosido dot i kosungguvo dau, nga sid kazu do sangkap, tu iadino ot upakat dit Ongorom. Bai iso-po ot elaan dau:

20-22: itahu it ensanan i kopoulosan dau sid palad do Kinoringan, gam mangahago iosido di Tuhan monulung om manapul dau. Tu bai iso-po o harapan dau, i Kinoringan o kakansangan dau. Ino-no rontob, kuran-no ong nokensodu-no i Kinoringan sid dau? Tu mad aso-no't opurimanan dot osomok-po i Kinoringan? Iti-no i pangarantaban di harapan om kosipan om kokosogo dit ulun, hiza di Kitab Laid.

Tanid mantad keno, songlinsou o boros nga aso kananganko mononsuli ko mongonsug do Kinoringan mongohukum di sangod ko mongolupu di sangod. Iti-no o sabap dot i Zabur dino banalko oguna sid di tokou ullun Kristian.

Iri-ogi varo boros dot, Nambat-oku-no dikau o Tuhan, ka. Ino dino kopiganggazan di duvo bahagi i Zabur.

23-32 I gama mongindazou om monorima kaseh sid Kinoringan

Mad nokosilau-no om nedu-no i kotuvongo dit osodu i Kinoringan. Antad sid kogofoo do ginavo tumimpuun it ulun sid Zabur mindolongoi do mongindazou. Nakaharati-no iosido do varo kotulungan sampai nokensomok-no iosido sid Kinoringan.

Na i Zabur mongonsug di piumpugan mamung mangarazou do Kinoringan. Ong kodung iadino, atalahas-no dot okonko bai iosido o nokotorima di kotulungan, inoi nga i piumpugan nokening om nakaharati-no di kovosihan do Kinoringan. Notuluk-no i nemdamo dit ulun.

Manjadi i longoi di mongindazou, nga antad sid pangalaman dot i Kinoringan monulung om tumimpa dit indomoon dot ulun, om pentahan dino sid ongokoruhang sampai mongingut om mongonsug dioti pamung sid gama mongohormat do Kinoringan (24). Anak, osukod, ondu, kusai om ensanan i bansa dot Israel mamung sid gama minta dua om monorima kaseh, sabap kakali i andaman di Kinoringan it ipat-ipt it ulun di bansa dau. Amu pokihi i Kinoringan dit Ongoisrael ko tumolikud om minsodu iosido. I tolingo do Kinoringan, kakali osomok sid kabang dit ulun di mokitulung. Kinoringan di banalko osusi (4) amu pemozo dit ongoulun dit okugui om orukung. Okonko bai it ongokoruhang sid kampong dau ot atag mamung mongindazou, inoi nga ensanan i bansa dot Israel ot atag mozo om mamung om miaambat mongohormat do Kinoringan.

26-27 Varo-po tanda di gama dau monorima kaseh di nakamung vagu iosido sid piniizaan do Kinoringan, ino-no, mangahatul iosido do poginakanan bahagi dit ongomosikim om ensanan i piumpugan, supaya ioti kamung sid dau do kosinangan om kosihatan om kosurupuvan. Iosido pasasi sid dioti dot i kovosihan do Kinoringan lumabai-po ponong sid dioti.

28-32 Na kakali amu-po miuma ong bai iadino o gama sid tanga do piumpugan, ingutan-po dau it ongobansa om it ongosusumbung, i sokoviai i vinangun di mizaui om it aso ginavo. Tu ong aso rontob di kohormatan om kovosihan do Kinoringan, suvai atag ong ino habal dino sumampai sid sokoviai it ongobansa, supaya ioti nga mamung-po sid gama mangarazou do Kinoringan.

Ong i bansa dot Israel mangarazou do Kinoringan sid panambayanan hiza do Pesta, gima i karajaan do Kinoringan di rumikot-ogi Zabur 66,8) om i harapan di niintahan sid ongoimam laid diri, it ongobansa apatut do mongombus di longoi dino, supaya ensanan tumorima di kovosihan do Kinoringan. Amu osodiri dot isai o mangarazou do Kinoringan, tu ensanan it ongoulun nengutan-no, it onogogulu-gulu om it ongosolumpak vagu om i kakali mizaui. It ongoturunan polombus di Habal do Kinoringan (30) do miamit-amit. It ongominatai om it ongoginumanti it ongoulun, ensanan miaamung sid gama mongoguna di Tuhan, dot iso o vangun nga aso dit a-kamung sino do mangarazou di kotulungan om kovosihan do Kinoringan. Iti-no kagi i panangan di Pesta di bansa dot Israel. Tu sid Pesta otuturan-no i pangalaman dit iso't ulun, supaya oonsug i sokoviai i razat do tumatap sid Tuhan sampai mongohondom dit sokoviai i ginama di palad di Tuhan.

Na i Yesus minamakai di Zabur sid kazu do sangkap di minta dua iosido, hiza di mad inedian-no iosido do Kinoringan, hiza dit opogos om asaadan iosido minigininit. Topot ino zabur dino tinumabang di Yesus tumatap, tu i Zabur minangagazad di Yesus ponong sid kosipan om harapan om katatapan dit engat dot i Kinoringan o kamanang di mongimbulai di karajaan dau, ino-no i vangun vagu om i hoturan vagu. Om it ongoulun Kristian di gulu banal minamakai dit a-ko piro ot ayat di Zabur sid gama mongusul om manarang di kinapatazan di Yesus, iadko i Matius F. 26-27. Sabap ino, iti Zabur 22 inanu-no sid Kitab Vagu do longoi di mamahanda om mongintalang di kotulukan di karajaan do

Kinoringan.

Zabur 23 I Tuhan o panaud-ku

Aso Zabur vokon miabal diti Zabur dot apakai om ololongoi. I pangalaman dot ulun di lumohing-no dati o minongonsug dit ulun dino sumasi di Zabur dino. Ogumu o pensubaan om korosizan ot ahajangan dau, nga a-insan varo kopurimanan dau dot aso Kuasa do Kinoringan di mozo-vozo dau om mongolikup dau. Ogumu ot ongosuntuan om suriban ko mad bahul manarang di kavantango di panaud di Kinoringan. Sabap, tu sid ayat ko-6, varo boros do sid panambayanan iosido, tantu-no dot ino Zabur dino o kososizan di pangalaman sid tanga di piniizaan do piumpugan.

I vaza manarang di gama mangajaga dot ulun, sid gama di manaud do pangazam o koubasan kodori. Tu ogumu it ongosanganu do bahanan do domba mad raja sid dau do daerah. Iri-ogi varo gama posuntu di gama do raja ponong sid razat dau do miabal di manaud ponong sid pangazam dau. Ino suntuan dino, asarok sid Kitab Laid, ino-no sid Yesaya 40,11; 49,11..; 63,14; Yehezkiel 34,10..; Zabur 80,2; 95,7 om Zabur 100,3. Varo zabur vokon iadko 80,2 di minongonsug di Daud do mongimbulai di Zabur dino. I lavis, i pangalaman dit iso't ulun kananganko i dau do koposizan antad dit opodok-po diri.

Kakal-po suni vagu iosido, iadko anak do domba sid butul dit ahatul o sakot, ka, om it osomok sid vosoi ko bavang dit alaba o vaig. Iadino andaman dit ulun i kinosukadan dau do sid palad om tinaud do Kinoringan iosido.

3-4 Iri-ogi i Kinoringan iadko ulion di mangagazad sid ralan ponong sid sodu. Baiko iosido ot elaan i rikoton. A-insan kapalid iosido sid tanga do ralan ko nokokozou sid kohubungan om kogolivangan. I ngaran di Tuhan o tanda di panahon iadko it ongotanda sid ongosimpangan dot alun-alun. Iti-no o sabap dot amu osusa iosido mogihim di dau do ngaran om garal ko bantug om hormat, tu i hormat om ngaran di Tuhan ot vinazaan dau mongolombus om mopud. Okon-ka ko aso kosusaan sid tanga do ralan. Varo rondom om kotuvangan, kapagasan, kasansaraan, kopunavatan, nga kakali varo kopurimanan do sid palad iosido do Kinoringan. A-insan varo pongitungan dot aso sino i Tuhan, gam i Kinoringan mad tuan rumah di monorundakai bahagi dit ongoombuvoi om panambat, supaya osinang ioti.

Banal-no, ong it ongosangod, kakali sangod. Aso-po't elaan di Zabur i boros di Yesus do Manamodko di sangod-nu. Topot ioti ongosangod nga aso tinangan do mongunang dit umpug dot ulun di humarap sid Tuhan. Sabap ino, i lavis di Zabur, Baiko kovosihan om koruhunan o mozo-vozo suvab-suvab songkonoruvo dit apasi it ulun. Om iti-no o sabap kagi dot it ulun mangajanji dot amu tumongkizad iosido sid samod om kovosihan do Kinoringan, ino-no sid piumpugan-no po om sid valai do Kinoringan. Ong valai do Kinoringan ot oboros, okonko keso o harati, valai do panambayanan, inoi nga i piniizaan sid Kinoringan. Baiko harati koduvo, i panambayanan, tu sino-no o kopisamung it ongoulun do Kinoringan om mizo sid tinoguvangan dau.

Sid adyat dino humarati tokou dot i gama sumambayang varo panangan. Sid tanga do piumpugan di nokotoguvang sid Kinoringan kadapat it ongoulun mangarait di dau om dau do pangalaman di kosipan om harapan dau, supaya iosido om i vokon atahan om atatap mizo om humarap di Tuhan, dot osinang o ginavo om gama.

Zabur 24 Sumuvang sid panambayanan

Mad tolu bahagi i Zabur diti, isuhut di liturgia do Pesta Kamatan. Sid tanga do pesta dino varo gama manansalamat do Kinoringan di raja iosido di bansa dau di tumoronong vagu sid bansa dau. Ino-no it ongobahagi dino,

1-2 mangarazou di kokuasaan do Kinoringan di mangahatul di sompomogunan

3-6 I liturgia sumuvang sid panambayanan, iadko Zabur 15 om i panarangan dot isai kavasa sumuvang om mamung sid Pesta.

7-10 I liturgia di mangahatul di korikatan do Kinoringan sumuvang sid panambayanan

1-2 Ensan i vinangun, nga i Kinoringan o sanganu do nakamung-po i riniba om i nunu-nopo i sid soribau om saralom do tana. I kuasa om kabanaran do Kinoringan dit antad di kinourugan do

vinangun o mangahatul dino.

3-6 Sabap ino, i gama mamung sid piumpugan okonko haldo misingkavaro ko nabambaran. Varo atarang o syarat, ino-no, Suvai atarang o kosipan om harapan om aso porotuduan i ginavo dot ulun. Tu ong i Tuhan minsomok sid bansa dau, suvai osodia it ongoulun di mongoguna di Tuhan. Suvaiko osusi (Yesaya 6) it ulun. Na sid Zabur ko-15 manarang it Imam dot isai kosuvang om isai ot amu, ino-no, suvai atantu o gama sumambayang.

Ong varo boros do, Kosusian do palad om ginavo, okonko bai i hal do rapak om dungit ot boroson, inoi nga i hal do kuran it ulun mongusaha di kosipan dau, isuhut di kenginan om pinonuhuan do Kinoringan.

Na it ongoulun di tumakad kumaa sid panambayanan sid Yerusalim o mongoduat sid lalavangon do panambayanan dot apatut- ka ko amu sumuvang. Iri-ogi manarang it Imam di syarat sampai mongoho do sumuvang ioti. Do kodung nokosuvang-no, sumasi it ulun (6) dot i tomodon rumikot, ino-no, minsamung do Kinoringan.

7-10 Varo-po kuaya di manarang di korikatan do Kinoringan, ino-no, i kohormatan do Kinoringan di mad kavut. Minsanko it ongovatu dit olitang do navaon om rongobon nosuhu-no do sumodia do tumorima di raja. Rontob-nopo, it ongorongobon suvai ogiang, ong kondiri di raja o rumikot. Iti-no o sabap do varo dolou di monginsosok dot isai o tisuvang. Iri-ogi, ong kodung arait i ngaran dot, I Yahve, i monguasa di kinasapahan do Malaikat, ka, iri-ogi gumiang i rongobon om sumuvang-ogi i kohormatan do Kinoringan. Iadko i tokou ulun Kristian mindamo di Yesus, supaya koumpug iosido sid tanga dot ulun, varo kiniro dit ulun Israel dot kodung iadino o gama dioti mangahatul di liturgia, ino kohormatan do Kinoringan rumikot om mintoron sid tanga dioti sid valai do panambayanan. Na i tinimpuuni, bai insan sontoun o varo pesta do iadino, iri-ogi minggu-minggu it ulun Yahudi mongohormat di korikatan di Tuhan sid vaza mamakai di Zabur diti, tu sumasi do kodung miumpug i piumpugan, nga sino-no i Kinoringan.

Ong it Ongokristian mamakai di Zabur hiza dit apat minggu i retanko Advent keso sampai kaapat, inot apat minggu gulu dit Adau di kinosinaan di Yesus, tu mongohormat om mongohondom di kosodiaan minsamung di Yesus, ontok di kinosinaan dau. Tu sid apat minggu dino mongohondom di kinosuvangan di Yesus sid Yerusalim, i korikatan vagu dau, hiza di mongohukum iosido dit ulun di mizau om minatai, om kuran i Yahya i minomodsu minonodia di panahon di Yesus.

Zabur 42-43 Lumangad do Kinoringan

Ino duvo Zabur dino, mad iso o longoi. Ino longoi dino, varo tolu o bahagi. Sid gama mongingguli dit iso o ayat, atalahas-no ino tolu o bahagi dino (42,6.12 om 43,5). Aso tajuk kagi ong i Zabur 43. It ulun di minongimbulai di Zabur dino, ulun dit narakop-no sid sodu, mad osomok sid burul Hermon ot inintoronon dau. Amu elaan tokou i sabap do narakop iosido sino. Manjadi humongkob iosido, tu osodu iosido antad sid Yerusalim dot a-kavasa iosido mamung sid piniizaan do piumpugan om tumoguvang do Kinoringan. Kagi varo't ongosangod di mangagauk dot aso kengkadan dioti mangagauk. Iri-ogi mad mongohomu o gama dau mindamo dot, Nokokuro-ka, tu iadino o kolungui-nu, o ginavo-ku, ka (42,6+12)

2-6 Lumangad iosido do Kinoringan om mongohondom di Kinoringan.

I Zabur posuntu di langad dot ulun sid tindu (tozino) o tambang di tuliohon, nga nokorikot-po sid ovud, nasak-no it ovud dino. Iadino i ginavo dau timot om tisamung do Kinoringan. Ino- no o pensubaan dau, minsanko agazo o harapan om kosipan sid Kinoringan, varo't ongoanggai-anggai dau di mamalid dara, retanko aso't ontok do humarap-po sid Kinoringan, tu okonko sino i Kinoringan, ka dioti. Inot ongoboros dioti pogolivong dit ulun di minat dua. Sabap ino mogihad iosido, gima araat o boros dioti, om kumihi-kagi dit ulun dino.

Ong sid kinarakapan, bai mungkolu-po di hiza di kakal-po kapanau iosido kumaa sid Yerusalim om mongohormat iosido do Kinoringan (5), bai monorou-po do mad monginipi. Iri-ogi kumiboros iosido sid ginavo do monginsosok di kogunaan do humongkob. Bai iso-po o vazaan lumabus antad sid kahangkaban dino, ino-no, Humarap om sumondui sid Tuhan Kinoringan. Rontob-nopo, ong baiko insan-no ot humarap, mad amu-po miuma, tu kakali varo kopurimanan om korosizan dot

42,7-12 nakada do Kinoringan iosido om ousiba dit ongosangod. Engin dara iosido monunsub di kolunguzan di ginavo dau. Topot koguli vagu i kahangkabban iadko nuko ko damat di mad nolingos, tigogimuraha-no vagu. Songkuro-nopo iosido mongohondom om mongimbulit do kososizan kananganko i gama do Kinoringan mangapad, kakali varo-no vagu pensubaan antad sid ongosangod, retanko aso Kinoringan.

43,1-5 Iri-ogi i gama mindamo om pavalang di harapan dau
Mad kengkakat iosido do kumavid di keloo do kosopulan. Humarap iosido do kouli vagu iosido sid Yerusalim, tu mamung mongohormat do Kinoringan. Manjadi ino harapan dino o pembulai do kakansangan om katamanan, minsanko a-po kosunu i kolobusan. Ino harapan dino onuvon dau di mongohondom iosido di kavantango di hiza di nakatalib, om ino harapan dino posinang di ginavo dau sampai mongitung-po iosido di hiza di rumikot do tumoroma iosido vagu do kosinangan, minsanko kakali iosido sid tanga do kosusaan dit osodu iosido antad sid Yerusalim om i panambayanan dot osusi sid Yerusalim.

Zabur 46 Kinoringan o kuta tokou!

Ino zabur dino mad longoi randavi di manarang di kosipan sid Kinoringan. Tolu bahagi i longoi diti: 2-4 i kugangau om i gulonggong do vinangun antad sid kinourugan sampai sid kotonusan do pomogunan. 5-8 It usuran di kuta Yerusalim, do varo't ongobansa di mongolimput di kuta dino. 9-12 I kososizan sid Kinoringan, i mongimbulai di karajaan dau, hiza do notori-no it ongosangod.

Mad tolu o tajuk do toriso-iso o pamarasan: Kinourugan, Usuran, Kotonusan.

2-4 Kinourugan om kotonusan do pomogunan

Varo kososizan ponong sid Kinoringan di manarang di kogofoo do harapan om kosipan om katamanan, gima i Kinoringan o mangapad om mongorindng dioti. I rinibuvan o kotulungan antad sid Kinoringan o sabap dot i piumpugan sid panambayanan ohigak banal sid gama mangarazou do Kinoringan.

Kodung nabasa-no vagu sid piumpugan it agazo i ginama do Kinoringan, ino-no i nokosurat sid Taurat antad si kinourugan sampai nokosoruvang sid Kanaan i bansa dot Israel om i varo't ongosangod di mongorumpak di bansa do Kinoringan, sid gama mindolongoi tumatap i piumpugan om kumansang bahagi di hiza di rumikot. Bai iso o lavis di zabur, i kosipan ponong sid Kinoringan, i varo-no laid om i kakali om i sampai salaid, nga iri-no ko iri. Iti-no o sabap dot i kinourugan om i kotulungan biano sampai sid kovian, inot ongohiza ensanan, nga napadan i bansa di palad do Kinoringan. Minsanko tumanus i pomogunan, topot ong i piumpugan do Kinoringan, nga akali masi sid kovosihan di Tuhan.

Sabap i Kinoringan o minongurug di sokovia, minsanko i korungazan do pomogunan, nga kakali ohoturanan di palad do Kinoringan. Manjadi i Zabur mamakai dit ongohabal om tangon dit ongobansa vokon di manarang sid gonit om korud om gumbang om bogizu ko burul dot agazo, retanko iti-no it ongokuasa sid vinangun di banalko ahatul, supaya atalahas dot i kuasa do Kinoringan o lobipo agazo om kikuasa. Iti-no o sabap, i kososizan dot, I Tuhan di Yakub o sunsudon-za, inimbulit-no sid tolu o bahagi, tu tanda om kososizan dot notunda ioti di barakat do Kinoringan (iadko i Imanuel sid Yesaya 7,14: Kinoringan mozo-vozo di tokou, ka).

5-8 I kologodo di tongus dit ongobansa

Tigogi banalko osinang ong Yerusalim, to ozom, aandus, oliou i bavang, okonko olizudan. I Zabur monorou dot sid tohudi varo bavang sid Yerusalim, minsanko sid timpak do burul i Yerusalim. Ino kasarahan dino kananganko i hiza di sid tohudi, iadko sid kabun dot Eden, tu osukup o vaig antad sid apat o bavang. Varo-po kagi boros do iadino sid Kentalangan 22,1 om sid Yehezkiel 47,1. Ong otopot, i hal do vaig sid Yerusalim, ogumu o kosusaan, tu iso-no't ovud sino, ino-no i Siloa. Antad sinod ovud varo graviti di niudsul sid pampang sid saralom do tana sampai i ovud natakapan, supaya a-emot di sangod (Yesaya 7,1 om 8,5). Topot i Tuhan Kinoringan momihot di kuta do Yerusalim, iri-ogi varo harapan dot aso korungazan di Yerusalim. It ongosangod baiko sid natad do kuta o kadapat ioti monurung. Iri-ogi tumanus ioti ong gumuzu it ongopomogunan. Sabap i Yerusalim o tanda om sijil di panaud do Kinoringan.

9-12 I karajaan do kopioondusan (Yerusalim = Bandar do kopioondusan)

Iningutan-no i piumpugan do mongimot di sokovia i nokosunu, ino-no, i korian dit ongosangod. Nohuzas-no i kuasa om hoturan dit ongobansa. Arait-no it ongopakakas di kodori diri. Norungoi-no kavi it ongopakakas, tu iti-no o kovian di ralan do riniba mingkakat kondiri om posurut di dau do kenginan.

I noromizas it ongobuntung (iadko sid 2. raja 20), tanda di kogo zoo do Kinoringan. Ino tanda dino pentahan om pentalang di kosungguvo di vinangun om riniba, ino-no, i karajaan di kopioondusan (Yesaya 2,2-5 om 11,6-8).

Kondiri di Kinoringan mimbulai (ong sid Yerusalim i Imam o momoros mongontok di Tuhan Kinoringan) om kumiboros dit ongobansa. Iosido moniag mongorumpak vagu om posurut dit ongobansa do sumamba sid Tuhan Kinoringan. Ong mimbulai-no i Kinoringan do iadino, tumimpun-no i kopioondusan dit aso kengkadan. Na it ongoulun di sumasi do iadino, amu mogihim do kosurupuvan di bai dang riniba, inoi nga humarap di kotulukan di karajaan do Kinoringan. Tu sid karajaan dino kosunu i kenginan do Kinoringan (Matius 6,9-13), iadko i Yesus mongonsug om monuduk minta dua...

Oboros-po i iadino, dot i Imam do kipangkat o momoros, iri-ogi mambat-no i piumpugan di mindolngoi dot intolu gulio (ayat 12). I piumpugan mangarazou di Kinoringan sampai opurimanan dot nempihatan-no i kosipan om harapan diotidino.

Manjadi ino Zabur dino mad longoi di kosipan dit ahatul. Ong it ongoulun dot Israel minozo di boros di Zabur dino, hiza dot notori-no i Sanherib o pinosuntu dioti di gama do Kinoringan sid kovian do hiza, ino-no i korikatan vagu di Kristus monuluk di hoturan di karajaan do Kinoringan. Iti-no o sabap dit ongogorija mamakai dino Zabur sid gama sumasi di kogo zoo do Kinoringan sid gama monguasa di sokovia, minsanko amu-po kembulai ino kuasa dino. It ongoraja om ongotuan do pomogunan tumanus, topot ong i di tokou do Tuhan rumikot-ogi.

Zabur 51: Umbosihai-no i ginavo-ku

Iti Zabur di mokiada do sala om karaaan mad randavi sid pialatan di turu o Zabur di mokiada om mangakun do karaatan (6; 32; 38; 51; 102; 130; 143)

I korolomo di karaatan om kasalaan ot inimpurasan-no om notudukan-no do kolobusan antad sid karaatan sid Zabur dino om vazaan do kemot do kaadaan do sala om kouli vagu sid tinoguvangon do Kinoringan. It ulun di mininta dua do iadino, minomuka banal di ginavo om kopurimanan dau sid Kinoringan. Sino dino humarati tokou do kuran it ulun sumaap di kondiri sid gama monginsosok om mongukad di nolobong-no sid ginavo om pongitungan om koozian dot ulun. Iadino jumadi i Zabur do tanda om pogindikadan ponong sid kokosogo di mad miabal di tudukan di Yesus. I korolomo do kosusaan di ginavo dot ulun ot kembulai. Ino pomintaan dua dino, varo't a-ko piro ot ongobahagi, ino-no,

3-5 I gama mongodim do Kinoringan om pogili sid Kinoringan di panangan di pomintaan dua

6-8 I pangakunan di kasalaan om i vaza mongintutun di kasalaan

9-11 i gama mindamo di kaadaan do sala om karaatan

12-15 i gama mindamo di koimvogu van dot ulun

16-19 I gama mangarazou om monorima kaseh sid Kinoringan

Na i tajuk (1-2) manarang dot antad sid raja Daud i Zabur diti, hiza dot i nabi Natan nokorikot om minonginsosok di raja, gima rinampas-no di Daud i savo dit Uria sampai hinatul dau i kapatazan di Uria sid rumpak, supaya amu kembulai i karaatan di raja. Suvaiko i nabi Natan mamaraling manarang di karaatan di iadino om oupus-ogi i raja di nakaharati-no iosido do minsanko raja iosido, kakali amu kavasa iosido do iadino o gama.

Na varo momoros dot okonko ino ot inantadon di Zabur. Bai sid tohudi ot opungaranan i Zabur dot antad sid raja Daud, ka. Ong otopot, aso bida. Isai-ka ot elaan banal ong bianco. Ino-no ot atalahas, sinod gama di Daud diri kiraha i palad dau (16), minsanko okonko kondiri o minamatai di Uria do sapadang o nipamatai. I Daud minonuhu di kopitan dau do papanau di Uria sumamung di sangod om sino-no o kinapatazan di Uria dot amu kalanta dara i tizan di Batseba dot antad sid di raja Daud.

Topot ong sid Kinoringan iso nga aso kosusut. I Daud minangakal dara dit araat o gama dau monolod do savo dot ulun. Suvaiko i nabi Natan tumoronong om pogili dit araat o gama di Daud om mad notobukan-ogi i ginavo di Daud sampai oupus-no iosido. Ino dino mimbulai sid Zabur dino.

3-5 Mongodim do Kinoringan, tu mokiada do karaatan

It ulun di minta dua suminggol tumivol sid Kinoringan di sid tanga do karaatan iosido, tu mokisian. Ong okonko nelaan i koruhunan do Kinoringan, tantu a-kogoos do sumaan di karaatan dau. I kosusaan di kisala iosido mimbulai, tu okonko impiro-piro mindamo iosido do mongogorot mindamo om mokiada om mokialai om mokitanus di karaatan dino. Aso kiroon dau do pokopodok di karaatan dau sid gama mangarait dit ongokavantango dau ko monguji dot iosido ulun dot abanal do bai ngaran kisala.

Nopupusan iosido di kodung nohorotizan-no dau i kosusian om kohormatan do Kinoringan di monunda dit ipat-ipat it ulun, dot amu pemozoon dau i kobungoho om karaato dot ulun. Sinod tinoguvangon di Monguasa di sokovia i otutunan-ogi i dau do gama dit banalko amu onong. Ong i hiza di minonolod i raja Daud di savo dot ulun, aso kiroon dau do sala ino, tu ong raja, kikuasa monguripon om mongodim dot ulun, isuhut di kenginan dau. Noboros-no laid di Samuel do iadino i gama dit ongoraja. Intaman ong kodung raja, monguasa iosido di sokovia dot iso nga aso kadapat mamajal ko mongindaraat di gama di raja, tu raja gima iosido. Nolingan-no di Daud do kakali iosido do baiko wakil iosido do Kinoringan om suvai sid pinonuhuan do Kinoringan om atag-ogi o hoturan dau bahagi di razat om bahagi di raja iosido.

Suvai i nabi Natan o pogili di sala di raja sid suriban di mamaraling iosido di gama di raja om otutunan-ogi dau i kogoos di karanggalan dau. Iri-ogi om humarati om mangakun-ogi iosido di karanggalan dau, dot aso gama dau gumuvail ko mangalalau. Iti-no kagi it keso liang mogidu sid karaatan om karanggalan. Ong amu kotutun di kogoos di karanggalan, a-kadapat iosido mokiada.

6-8 I pongokunan di Zabur. Suvai kaharati di kogoos do kovosihan do Kinoringan, nakaharati-no di korolomo di karaatan om karanggalan, om varo-ogi katagan. Iti-no o sabap, i sala dau dino okonko rontob sala ponong sid ulun, gam, ka dau, Rontob sid dikau, ka (6). Aso boros do mad aso sala sid ulun, it isai-nopo. Gam i nunu-nopo i sala di minonusa dot ulun, nga sala-no di rumanggal di kohormatan do Kinoringan om i kenginan dau. Tu nunu-nopo o kenginan dot ulun di sumaap di kenginan do Kinoringan, manga-ranggal-no di kenginan do Kinoringan.

Ong kaharati it ulun di karaatan dau, sumasi iosido di kabanaran do Kinoringan (6). Na aso boros siti dot i kosinaan dot ulun, nga nagavul-no laid sid sala. Ino-no rontob, i kosino it ulun, nga kosino iosido sid tanga dot ulun om riniba di soumul-umul monimbaru do sala om karaatan. Sid tanga do karaatan om pensuban sumurut om sumukod it anak. Hiza di humarati-ogi it ulun di pitonidan do karaatan om kavantangan, momurimon iosido do kuran i ginavo atarik om sumaap di kenginan do Kinoringan. Iadko i Yesaya, hiza di nokodim iosido, kodung nemot dau i Kinoringan sid panambayanan, ino-no i kohormatan om kosusian di Tuhan, kaharati-no iosido di dau do kobuatano (matai-oku diti di nokemot-oku di kosusian di Tuha, ka (Yesaya 6). Iadino it ulun sid Zabur momoros om manarang di pitonidan do Kinoringan om i kondiri dau. Okonko i toriso-iso o sala om karanggalan o kiniro, inoi nga it oholian kagazo i pialatan sid Kinoringan om i riniba.

Na kasalaan-nopo, i Gorija RC mamakai di Zabur diti, ayat ko-7 sid gama manarang dot i sokovia i gama dit ongominisavo do miolunung om midudun, nga sala om karaatan, dot ong otopot, aso't iso o boros do iadino sid Kitab. Sid Zabur diti aso om sid sokovia it ongobuuk do Kitab vokon, nga asoi. Antad sino o vaza do RC do mongindaraat di gama miluzung it ondu om kusai di minisavo om monuduk dit anganak-po do nunu-nopo songpongitungan ponong sid bansa vokon, nga araat o pongitungan. Aso-po't elaan dot anak ong i pitonidan dot ondu om kusai, varo-no laid natanom sid ginavo dot anak ong i kopurimanan do varo sala dau ong kumavid di kekuman ko sumirot sid ulun vokon. Ong sid gama di raja Daud, atalahas dot ino dino sala do banalko agazo, tu okonko bai monolod, gam mamatai-po dot ulun supaya kosusut i gama dau. Na kakali amu onong ong ino tuturan dino ot onuvon do bahagi mongohoturan di riniba dot amu avantang ong musavo it ulun, retanko ino dino nga monimbaru do sala, ka. Banal-no, ong kalandu it ulun sid gama kumiagai, mokiagai, mongoginaka om vokon do iadino, ko mongogorot om mangalapos di savo, tu amu tumurut di

kenginan do kusai, ino-no o sala om karaatan. Topot antad sid Buuk do Kinotimpunaan varo hoturan om boros do i gama di minisavo, hal dot avantang, tu sid gama misavo mitutun banal i duvo it ulun om miinsomok banal sid dau do jumadi do kesaan dit a-engat i vokon.

Iri-ogi manarang i Kitab dot ino dino vaza do monuluk di gama misasamod. Sabap i guvas dot ulun okonko guvas do sala, inoi nga guvas dit antad sid palad do Kinoringan om inumbosihan do Kinoringan. (Kinot. 1,27-29)

9-11 Mindamo di kaadaan do karaatan.

Ong varo hal di mad manarik dit ulun sid kosumbungo ko mokierad do Kinoringan om titalib -po do Kinoringan, ino dino, nga mimbulai antad di keloo dit antad sid Kinoringan. Tu ong i Kinoringan pavalang sid riniba di kabanaran dau, iri-ogi humarati i riniba dot ombo it atag om amu. Kasalaan-nopo, asarakan di riniba mamakai di keloo do kabanaran sid gama sumaap ko pakaso do Kinoringan, tu misingkinoringan-nopo. Sinod kobuatano dino o kembulai i karaatan om kasalaan di pensodu di riniba antad sid tinoguvangan do Kinoringan.

Ong sukul gunaon i keloo dino ponong sid gama humarati dit inantadon om rikoton do riniba, kadapat it ulun tumoguvang di Tuhan om mindamo, supaya ombo i mongunang dara di kelono om kokosogo dot ulun, nga iduon do Kinoringanm, iri-ogi varo-no kemumuzan.

I Zabur mamakai dit ongopongoretan bahagi momoros om monusi om momoug, iadko it ulun di nolingasan do balang, suvaiko it Imam o potizas dit ulun do gombizau (Imamat 14,4) ko ong opongo-no mongolobong, opodsu-no om inumahanan-no it ulun di minongolobong (Bilangan 19,18) ko it ulun di minokiada di sala dau, tumorima di boros do kaadaan antad sid Imam sid panambayangan (Yesaya 1,18). Iri-ogi otomon vagu it ulun di oupus, gima i karaatan dau.

12-15 Mindamo di koimvoguvan di koposizan dau.

Na i Zabur okonko bai mokiada, ombo it amu nokonong, inoi nga mindamo supaya i Kinoringan o potorongot om ponulid dit ulun sid sokovia i kobuatano om kavazao om bahazan dau. **Umbosihai-no i ginavo-ku om imvoguvai-no do Sundu-nu i purimon di ginavo-ku**, ka. Mad nakaharati izabur dot antad sid ginavo do dato a-kogoos posurut di kavantango om kenginan do Kinoringan. Amu humarap iosido sid kondiri dau. Amu kogoos iosido do manahan di kondiri dau, tu i kobuatano dot ulun monongkudau ot apaganan dau tumolikud. Suvai i Kinoringan mongimvagu di ginavo dot ulun, om i Sundu do Kinoringan mangaganti di mad rogon, di rumusod om momorinta di ginavo dot ulun ponong sid karaatan. (Yer. 31,31-35 o pentalang do iadino o gama do Kinoringan sid bansa dau, ong sid tohudi't adau)

Ong i Yesus om i Paulus manarang dot ino kosimbanaan dot ulun iadko kalandazan vagu (Titus 3,5 om Yahya 3,1-8). Na ino kosimbanaan dino okonko mad tigogi varo om bai insani om opongo-no, iadko insani ogontian di Sundu do Kinoringan i rogon di nokorusod-no sid ulun, di mad sundu dau, inoi nga suvai it ulun nokensomok sid Kinoringan, iadko nakaraving sid Kinoringan, supaya ataud om otunda iosido di kuasa di Sundu do Kinoringan. Iri-ogi mopud it ulun isuhut di kenginan om panangan do Kinoringan. (iadko i bulb do karan, suvai sumikit ong nokosuput sid puun do karan. I bulb kondiri amu manganavau, antava ong bai bateri, oduruk om mavi i kuasa di panganavau. Suvai nokosokot sid puun do elektrik om varo kopudan). Iti-no o sabap, suvai i kenginan dot ulun kemumui sid kenginan do Kinoringan. Topot kodung kemumui it ulun, amu miuma do kanu di kosinangan di kensasamakan sid Kinoringan om i katamanan di piniizaan dino, inoi nga agazo o ginavo do poromut sid ulun vokon di pangalaman dino. Suvaiko kasasi sid vokon, ombo i nokotorima. Iri-ogi nokosondot banal i kovosihan do Kinoringan. Iadko i Petrus om i Yahya sid UR 4,20: **Iokoi diti aso tingan dot amu momoros di sokovia i nemot-za om norongou-za**, ka dioti. Ong i Kinoringan o monulung, azazad-no i pangalaman di kotulungan dau It ulun di nokotorima di kaadaan do karaatan dau monuduk dit ulun vokon di ralan om vazaan muli sid Kinoringan. Isai-nopo i nokotindal om nakasapul jumadi do pakakas di koponindalan om koponopulan.

Ino-no ot horotizan i Zabur: Ong inimvagu do Kinoringan, amu miuma ong pasamba do dupot sid Kinoringan, isuhut di hoturan laid di Musa (Imamat) Iadko i Amos 5,21... om Hosea 6,6 om Mikha 6,6-8 om Yeremia 7,21.. manarang, amu ozi i Kinoringan dot onsi do pangazam, inoi nga i guvas om ginavo dit ensanan ajadi dot isamba di mizau (Rom 12,1-2) I dila, kabang, ginavo, palad, longon,

hakod o sumahau sid kenginan do Kinoringan om posurut di kenginan om samod do Kinoringan. Bahagi di gama di iadino mindamo i Zabur do kotundaan om kotulungan, supaya konong i kososizan om i kopolosizan vagu, di sid tinoguvangon do Kinoringan o konong ponong sid kotulukan di kenginan do Kinoringan (19).

Manjadi i tokou ulun Kristian kadapat mamung sid gama di Zabur dino minta dua om mindamo, supaya ensanan i kopolosizan, guvas om ginavo, boros om gama nga kadapat di kotorontogo i kobuatano om kavazao tokou suvab-suvab pengavi di sukud tokou om jumadi tokou dino persembaan di mizau sid tinoguvangon do Kinoringan om ponong sid riniba.

Buuk dot Amsal(Sambatan)

Amsal, ino-no o harati, pamarasan ko sangkapamarasan, tu okonko bai insan o noboros.

1. Amsal iadko pamarasan di mangatod do harati, Suntuan: muramau o bosing, ino-no it ulun di banalko aparau dot amu mikotoron gumama.

I boros dot Ibrani it pinongonovan di pongoretan Amsal, nga MASHAL. Duvo o harati: momorinta dot ulun ko sala om kopurimanan om popirad, pabalon, posuntuon. Na i harati koduvo dino ino-no o panangan: poperad om ponukat do hal sid hal vokon ko pabal do kobuatano do hal ko ulun sid kobuatano dot ulun om hal vokon. I gama dot ulun mangagama om mongindugut iadko i bosing dit aparau banal. Vokon-no ong Momogun mamakai di pongoretan di poperad do hal: Sopo-ma ong, ka. Minsanko okonko enizo o tomodon, nga varo gama ko buatan di miabal ko osomok sid hal koduvo. Ong popirad do hal, i gama popirad mad momorinta ko mongohukum ko mangaratu do kovosihan om kasalaan. Iti-no o sabap do varo manalin di pongoretan MASHAL dot, sambatan di popirad, om varo-no ong Panambatanan.

Na kuran kuran, osomok ino harati sid suriban om suntuan ko umpama sid BM. Rontob-nopo, sid ongopamarasan di mad bahul, pogintukadan ko suriban om suntuan, varo gama pavalang do keloo om pangalaman dot ulun di kihukum ponong mangahatul di bahazan dot ulun o tomodon.

Na it ongoulun do Yahudi minonurat om pinatahu sid ginavo dit ongopamarasan dino do iadko tudukan. Manjadi, sabap, tu arantang i boros dino, oruhai it ongoulun mongohondom, tu iadko longoi di kilagu i kogumuai dit ongopamarasan dino. Ino dino koluu dit ongobahul om ongosundait. Vokon-no ong banalko onibak it iso o pamarasan do kakali aralom o boros om harati. Suntuan Amsal 1,5: Minsanko it ongoelo kadapat-po posurut di keloo dau, ka. Sabap ino, inot ongopamarasan iadko tudukan om timpa bahagi dit ulun di monginsosok do kuran it atag o kopolosizan om kavazao om bahazan.

Ong sid Momogun, sambatan koluu do suriban. Topot amu misuvang. Sambatan banalko apakai sid ongoulun do kihukum sid mihukum. Ong bai suriban amu aralom banal. Ong sambatan, lobipo aralom mantadko suriban. Rontob-nopo, kakali varo`t oribau. Kogumuai do sambatan apakai sid longoi do mongondi om varo`t apakai sid bahul.

2. Isai-ka o minonurat dit Ongamsal?

Minsanko i Buuk dot Amsal i retanko dang raja Sulaiman, nga okonko i sokoviai it amsal dino nokembulai antad sid raja Sulaiman (1,1; 10,1; 25,1) Varo-po retanko antad sid ulun dit elo banal (1,6; 22,17; 24,23). Varo`t antad sid di Agur (30,1) om it idi di raja Lemuel (31,1) Rontob iti-no ot atalahas, okonko kavi-avi it sambatan dino antad sid di Sulaiman om amu tokou elaan monodiri ko manantu dot ombo ot antad banal sid di Sulaiman. Kagi amu tokou elaan dot isai i Agur ko i raja Lemuel. Isuhut di boros sid 25,1 it ongokoruhang di raja Hiskia o minongindukut om minongumpug dit ongosambatan sid Fasal 25-29.

3. Sera nokembulai it ongosambatan dino dot ajadi i buuk dot Amsal (sambatan)?

Kiroon dot ulun dot sid saralom di 1000 tinounan o nokembulai om notontuan-no inot sambatan dino dot alaid-po baiko i kabang om ginavo dot ulun o mongohondom om polombus sid anganak om

muaki, dot i tomodon dino, pavalang om potungkus di keloo om pangalaman di bansa dot Israel sid generasi vagu. Suvai sid Abad ko-3 GM om nopongo-ogi i buuk dot Sambatan.

Sabap sid f. 10-22 asarok varo boros dot, I raja, ka, ino dino tanda dot inot ongosambatan dino nokembulai-no laid i hiza dit amu-po narakop i bansa dot Israel om Yahuda. Topot ong i Fasal 1-9, tantu hiza di notoliban-no i kinarakapan sid Babil.

4. I vaza di pongumpugan di Buuk Amsal amu atarang banal. Mad limo o hogot, ino-no

- a) 1-9 Mad umpatod bahagi di Buuk Amsal om i tudukan sid "Anak", supaya it anak misingilo. Koubasan diri dot it ongoelo om guru minangarait dit ongomurid dot "anak". Ong sabap, tu bai kusai o sinumikul, apakai-no i pongoretan dot "anak kusai kagi". Ong sid Momogun amu osusa do sodirizon. Kodung anak, ondu ko kusai ot oboros.
Na 1,8-19 boros di poontupat, supaya amu polidon dot ulun dit araat.
1,20-33 om 8,1-36 I keloo om katapatan di mad riniba di mongingut tumatap
5,1-14 om 6,20-35 I poontupat di murid, gima it ongosundal
- b) 10,1-22,16 I pongumpugan dit ongosambatan di tasantanid-tanid o tomodon om panangan. Aso pongitungan dit ongomongumpug do monodiri ko minongumpug dit ongosambatan dit iseso o panangan om tomodon.
- c) 22,17-24,34 I tolu nopod o sambatan dit ulun di kipongitungan. Varo posuntu sid gama dit ama atag iadko i magavuk.
- d) 25,1-29 It a-ko piro o sambatan dit nembulai-no laid sid ongofasal vokon.
- e) 30-31 Varo-po pangalaman vokon om ongoduaton om kogolivangan di Agur, om varo-po sambatan di posuntu sid ongorumul di keloo. Varo-po it imuhun dit idi sid anak dau (31,1-9) om i vaza mangarazou dit ondu dit elo mangahatul om monorundakai dit ongkob dau.

5. I vaza di boros sid Buuk Amsal (Sambatan).

I kogumuai dit ongosambatan dino, mad longoi di linggok. Ikid sambatan varo duvo o bahagi, dot i koduvo bahagi baiko patalasan pembulai di harati di bahagi keso. Iadko i rundukan o bobolizan, tu varo patalasan di mongorunduk. Rontob-nopo, sompi apakai i boros banal dot ulun, okonko iadko sid bobolizan do varo boros dot ulun om varo-po boros di dang rogon i bai it bobolizan om i rogon o nakaharati (bobolizan - vinasug om i iadino). Na i koduvo o bahagi, vokon-no ong bai

- a) mongimbulit di harati sid pongoretan vokon, ko
- b) otuvarig i harati di bahagi koduvo
- c) misaap i duvo i harati.

Suntuan:

- a) Isai-nopo it obinsianan, abarakatan-no iosido.
Isai-nopo i penum dot ulun, a-milo-milo nga penumon (11,25)
- b) It ulun dot otulid, asana do vudut. Topot i boborosan dot araat kamalu.
- c) Kadan-no barasai it ulun do lovong, tu amu-ko ohorotizan dialo.

Varo-po sambatan di polombus om pamung do harati, ino-no,

- d) 24,3 I valai di nagama pembulai di keloo di minangagama. Ong antad sid pangalaman dino, oponu-no it ongoongkob do barang di kiguna.
- e) Sambatan di poperad sid lombus do boros: Osuhul-po modop sid soribau do taap ko kumirusod di savo di soumul humungot.

Na kuran-kuran, sid gama poperad i pamarasan mongohodtol di harati di pangalaman dino.

6. I tomodon di Buuk (Sambatan) Amsal.

I buuk Amsal nakamung-no sid Hogot koduvo di Kitab Laid, i retan do Tudukan om keloo, iadko i Ayub, it a-ko piro it ongozabur, Pengkhotbah om bahul di Sulaiman.

Na sid ongobansa vokon diri, varo ongosambatan di iadino. Inot ongosambatan dino tinaud om nituduk-no sid Istana do raja sampai nilombus-no potuduk sid ongosikul i keloo di iadino. It ulun di

mongumba di dau do koposizan o misisingilo sid tudukan om pangalaman di Sambatan dit atag o keloo om gama, supaya varo panangan om rikoton dau. I sokoviai i kobuatano do riniba, i vaza ponong sid Kinoringan, i hal do gagamaon, i kolunduo, i gama misavo, i kobuatano dot ongekob, i gama monuduk dit anganak, i hoturan sid valai om sid karajaan, it ongekosusaan dit ulun mosikim, i mamambang ko i gama tanggung jawab, ino dino kavi-avi nituduk-no om nipelo-no do kuran it atag om it amu.

I Buuk dot Amsal (Sambatan) mad tudukan om pisingilaan kananganko it atag o vaza masi om mopud it ongoulun. Kiguna-no laid i buuk di hiza diri. Ong i tokou biano, atag do tumiim dot ombo i pangalaman kodori diri di kakali kiguna om kiharati bahagi di hiza biano om it ongoulun sid tasantanid-tanid o pomogunan om kobudayaan.

Na sid tafsiran diti, okonko i toriso-iso Fasal om ayat ot atarangan, inoi nga i tafsiran diti moniim do manarang dit ongotajuk di mimbulai sid ongotamarasan dino.

1,1-9 Misisingilo di keloo.

Ino-no o tinomod di Buuk dot Sambatan, monuduk di keloo om i bahazan. Ino tudukan dino kiguna ponong sid kabanaran, katapatan om i kobuatano dot atantu. Amu kopitongkizad i keloo om i bahazan, i pongitangan di kiguna om it atag o gamaon. i sokoviai it ongotongoretan dino mioobpinai om misasangai.

Na i tudukan dino kiguna sid ulun dit omulok-po om it ulun dit aso-po pangalaman (4), it ongosukod vagu om it anak-po. Na isai-nopo i tumorima di tudukan di keloo, ajadi dot ulun di sumuhut di Taurat (8). Sabap it ira do molohing (8), it ama om it idi bai vaza posondot di pinonuhuan do Kinoringan. Topot it ulun di posimozo di Taurat, ino-no o lovong. Iosido dino onining sid tanid o dolou om tudukan di mamalid.

1,10-19 Iti-no o sabap dot i sambatan ot i poontupat dit anganak, supaya amu mongining om amu lumandu ioti sid ralan ponong sid karaatan. Sabap ogumu o pensubaan om sungkoliu om apon osodia di manangkap om manahan dot ulun ponong sid karaatan om kotonusan.

1,20-33 Ong sid ongotbuuk vokon di Kitab Laid, it ongonabi o mongimuhun om monuduk di Boros do Kinoringan. Topot ong sid Buuk do Sambatan, i keloo di mad guru o monuduk om mongingut. It ongonabi minagavi pemumui di bansa dot Israel sid ralan ponong sid kabanaran om koposizan, iadko i Yeremia sid F. 7,27-29. Topot ong sid Buuk Sambatan, i sigu Keloo (20) pogili sid ongoulun dit atag o gama di suvab-suvab. Amu abasan dau mogihim dit ongoulun sid siombo-nopo o kolombuso dioti. Sid alun-alun, ko sid pasal ko sid badi, sid navaon do kuta om sid ongotongumpugan dotulun. sid restorant om sid guakap, dot ipongira dioto o tomodon.

Antad dit ongotampat dino atalahas-no laid dot it ulun dit osomungan sino, okonko ulun di mokituduk om mokipubahazan. Arampus-no laid om songlovong-lovong do natarik sid korumaato. Na kakali i sigu Keloo mongingut do magavi monian om manamod o gama dara, ong sukul onining it ulun. Topot ong i sokoviai i gama mongodim om mongimuhun aso`t timpa om hasil, tantu iada ioti dot i karaatan dioti o mongindaraat om humali mangavi dioti, do kuran-kuran, aso kolobusan-po antad sid kinaraatan dioti dino. Akanon dikou i kouvaan di ginama dikou, ka (31).

Nosodia dara di Keloo do potuntug di ginavo om samod dau sid dioti (23), ong sukul mongining-kou. Topot ong amu, iri-ogi inedian ioti di nunu-nopo songkoruhunan om kobinsianan di Tuhan. Bai iso-no o ralan di patangkis sid karosizan om kosusaan, ino-no sumuhut di tudukan di keloo (33).

9,1-6 om 13-18

It a-ko piro o ayat dino posuntu sid duvo o kobuatano di Keloo om i Kobungoho, ino-no i Inai inuvung do Keloo om i Inai Hinatus do kobungahan.

I Inai Inuvung do Keloo muvalai. Hiza do mizon sid valai dino, varo poginakanan dot ahatul. Sokoviai it ongoulun dot amu monodiri, elo ko obungou, linigahan dau, supaya kanu ioti do keloo om mozo ioti di ralan do kohorotizan. Sid karamazan om katamanan varo kosurutan ponong sid pangalaman om bahazan om kavazao dot atag. Ong sukul it ulun osodia do rumamit do keloo om kavantango, tantu varo piniizaan di banalko atag. Na kondiri di Yesus mamakai dit smabatan dino poginakanan dot ahatul sid gama posuntu di karajaan do Kinoringan (Lukas 14 om Matius 22).

Topot ong i Inai Hinatusdo kobungahan ko rampahan, banalko tanid o tomodon. Iosido kondiri otugalak. Atandas mamalid om manarik sid karaatan o gama dau ko mongorungoi do bahazan dot ulun. Elo banal iosido do monongkoliu om manangkap dot ulun, do kodung kovoza, aso tinganan do mogidu vagu. isai-nopo i bai ngaran mongining sid kodim om onsug dau, apagon do mogidu om minsodu vagu, tu iadko apon di banalko ahakang o sisiit. Kagi oruhai it ongoulun dit amu oontupat, atarik sinod gama mongingut, retanko omis om osiou it inumon dau. dot ong otopot, mad kavanait di pokulau om pavuk dot ulun sid karalanan om korungazan do bahazan. Minsanko kondiri dit ulun kadapat momeda om momili, ong kodung nakalandu, banalko apagon do sumuri ko tumolikud vagu sid ralan do karaatan, i ponong sid naraka om kobinasaan.

11,1-13,16 Ogumu it ongobahul om sambatan dit alanta o boros. Ino-no, pogili di karaatan om i kotuvarigo o katagan. Ong siti, bai a-ko piro o harati ousul-no do pemot di vaza manambatan.

a) ozi i Kinoringan dit atarang o gama monimbang om monukad.

b) bai it osibak o ginavo o tanda dit ulun di kibahazan

c) bai i ralan dot otulid, varo rikoton

d) okonko kolunduo, inoi nga kabanaran o kiguna pempatai

e) i kabanaran o mongovit sid rikoton, supaya aso kolunduo

f) It akasa o palad manahak, sumurut-ogi lumundu, topot it odoot sumikim-ogi.

Sid kogumuai do pangalaman monuduk i Sambatan dit atag o kavazao om kobuatano.

I nabi YOEL

Kananganko i nabi Yoel, anak di Petuel, bai i ngaran dau ot elaan antad sid tajuk di buuk di nabi dino. Aso panarangan sid saralom di buuk do sera banal i nabi om kuran i kavazao om nahajangan di nabi, asot iso o boros. Iti-no o sabap, antad sid bahanda om tudukan dau ot osusa do mongintutun di sera om kumuro i nabi dino.

I buuk Yoel dino, varo duvo o bahagi, ino-no i fasal 1-2,27 i mongusul di koruzahan do pomogunan om i kosusaan do banalko oholian, tu it ongobutu o minonusa di pomogunan, dot sid panarangan di nabi dino, retanko inot ongokosusaan dino, tantu tanda do nokensomok-no it Adau di Yahwe. Iri-ogi i Fasal 2,28-3,20 manarang di kumuro dit Adau di Yahwe, dot ino panarangan dino, baiko kointalangan di nabi do kuran iosido nakaharati antad sid tudukan do Kinoringan ino kavazao dit Adau di Tuhan dit a-milo-milo rumikoti. Topot i kopongupusan sid fasal 1,2-12 om 15-20 om it onsug sid ongoulun do tumolikud di kobuatano dot araat om tumoguvang sampai muli sid Kinoringan dino okonko bai bahanda, inoi nga i vaza di nabi do mongusul om mongohondom di hiza dau om kuran diosido o kinumiboros om kinumihabal sid ongoulun di panangan dit ongokosusaan di nahajangan dioti diri. Mad otopotko varot ongobutu di minangavi banal dit ongototonomon sid ongotagad om ongokabun sampai noruzahan banal i pomogunan. Inot ongokosusaan dino o sabap dot i Yoel jinumadi do nabi sampai minangahabal sid ongoulun di kenginan om ira do Kinoringan.

Agazo banal o pitonidan dino bahagi keso om i koduvo. Amu oruhai rumamit dot nokokuro ino duvo bahagi dino, tu nokopiamung sid iso o buuk. Sabap i bahagi keso tuturan om usuran, topot i bahagi koduvo atandas kointalangan om panarangan kananganko it Adau di Tuhan. Ino-no dati i sabap dino duvo o bahagi dino: Otoliban-po ino kosusaan di butu om koruzahan, iri-ogi minogom-no i nabi posurat di pangalaman dau. Sabap noboros-no laid om nakabahanda-no dau laid it Adau di Tuhan, niamung-po dau i bahagi koduvo di mongonsi banal di kumuro om i sabap dit Adau di Tuhan dot okonko onibak o vaza manarang. Ino-no o tinomod, inot buuk dino monuduk di bansa dot Israel dot it ongokosusaan do pomogunan, butu om koruzahan di retanko kosusaan do vinangun, kopikapit sid vaza do Kinoringan monunda om mangahatul di songvinangun om riniba, gam ino kosusaan dino mad vaza do Kinoringan mongohondom di bansa dau dot iosido o monguasa di sokoviai ponong sid katagan om ponong sid kosusaan. Amu nokensodu i Kinoringan om amu pemozoon it ongoulun dot avantang ko araat o gama om kobuatano dioti, inoi nga minsanko i butu ko i koruzahan, nga vaza do Kinoringan pendongou di kovosihan om kotigiran dau.

Manjadi i panangan di buuk Yoel dino, pendongou dit ongoulun di mangasip sid Kinoringan di sid tohudi masi, supaya kaharati ioti di vaza do Kinoringan momiara om mamasi sampai mongira di bansa dau do minsanko butu om koruzahan ko kolizudan om vokon o kobuatano dot adau jumadi do pakakas di tudukan om ira di Tuhan.

Sera-ka nokembulai i buuk dino om sera banal i hiza di nabi Yoel? Isuhut di F.3,2 norungoi-no i Yerusalim, dot i kuasa do Babil o minongorungoi. Kagi varot ongoulun nakazazad om narakop sid ongomogunan vokon. Ong i panambayanan sid Yerusalim, noumbosihan-no vagu (1,14; 2,7 om 16; 3,5) sampai it ongoimam sid panambayanan kikuasa di tanid mantadko i hiza guluko i kinarakapan sid Babil. Antad dit ongotuturan dit ongonabi Yesaya om Yeremia a-insan nokembulai dot agazo o hak dit ongoimam, tu kakali it ongoraja o nakakavid di kuasa sid Yerusalim om i razat. Notoliban-po i kinarakapan sid Babil, iri-ogi ohoturan-no i razat do Yerusalim om it ongoulun sid daerah om ongokamong dit ongoimam om i hoturan do sumambayang o minonukung di panambayanan. Iti-no o sabap, it ongoulun di nokelo do mongintutun dit ongosurat om pongoretan di napakai sid surat diti momoros om manarang dot ino nabi Yoel dino minasi-no hiza dit abad ko limo GM, kokiraai ontok di TGM 400.

Na i nabi Yoel dino nakaraving-no sid panambayanan om i hoturan di panambayanan. Ino tudukan om ira dau koluu di liturgia sid panambayanan. I harati, i nabi minamakai di hoturan dit ongoimam om i vaza dioti kumiboros dit ongoulun di sumambayang sid gama dau poromot sid dioti di dau do panarangan kananganko i kosusaan sid pomogunan om i bahanda om kointalangan dau kananganko it Adau di Tuhan, supaya mongontupat it ongoulun om sumodia do minsamung dit adau dino. Minamakai i nabi di vaza dit ongoimam do mangagazad momuasa om mogihad om mogkorudu,

tanda dot oupus it ongoulun, ong varo karaatan, sampai mokiada di kasalaan sid tinoguvangon do Kinoringan, isuhut di hoturan dit adau do Paska om it adau do kapangadaan do sala om kopiondusan. Topot manarang i nabi dot okonko bai sid soribau om sid kobuatano ot atag dot oupus it ulun. Suvai antad sid ginavo dit ulun dot oupus om mokiada di kasalaan dot agazo o ginavo do muli sid Kinoringan om tumatap sid tinoguvangon do Kinoringan om miuma-ogi. Kenginan di nabi dot otopot-ko sumimban i kobuatano dit ongoulun, dot okonko toun-toun, iri-no ko iri mokiada di karaatan, do kakali amu sumimban om amu otopot-ko sumuhut ioti di kenginan om kovosihan do Kinoringan. Gam ino gama miguli-guli mokiada do kasalaan om oupus o pamarasan dino bai kaadato om koubasan dit aso tantu o harati. Sid panarangan di hukuman ontok dit Adau di Tuhan ozi i nabi do mongohodtol dot sid tinoguvangon do Kinoringan amu kadapat misingkavaro om misingelin om misingtatap. Suvai atarang o gama sumuhut dot iseso o ginavo om pongitungan om kakansangan di sumokot sid Kinoringan om miuma-ogi.

Bahagi keso: fasal 1-2.

Inot ongoboros om bahanda dino nihabal-no di Yoel hiza di sinusa-no dit ongobutu i pomogunan, dot sid umpug dit ongoulun sumambayang o pinangahabaran. Sid tohudi minongumpug i nabi dinot ongobahanda dino sampai nisurat-no sid buuk diti.

1,1-20 I kosusaan om i gama mogkorudu.

Ayat keso bai mongimbulai di tajuk di buuk diti dot onibak o panarangan: Imuhun di Tuhan sid nabi Yoel, anak di Petuel. Asot niamung sino dot isai i Yoel ko sera om kuran o kinorikatan di boros do Kinoringan sid di Yoel. Ensanan i buuk di Yoel mamakai di pongoretan ko ngaran YAHWE bahagi Kinoringan, ong sid Momogun, TUHAN. Bai iti-no ot tarangon di ayat 1: okonko i nabi sanganu do boros ko mogkovosihan, inoi nga i nabi baike poromot di boros om imuhun di Yahwe. Iadino it ongonabi vokon, iadko i Hosea 1,1; Mikha 1,1 ko Zefania 1,1. Na i ngaran di Yoel, varo harati, ino-no, I Yahwe ino-no i Kinoringan, ka (Yahwe Elohim). Sabap aso boros vokon di manarang dot isai i Yoel dino, varo kiroon dot ulun do kondiri di Yoel o minonurat. Ong ulun vokon dati o minonurat, minamung-po do sera om kokukurozo di nabi iadko sid Yesaya om Amos.

2-4: Ong i tumimpun i nabi momoros, mongonsug-po laid iosido dit ongoulun, supaya onining it ongoulun. I Amos 3,1; Hosea 5,1 ko Ulangan 32,1 nga iadino. Sid onsug dino pendongou i nabi dit ongokusod om it ensanan it ongoulun sampai pongontupaton ioti, supaya karamit ioti di kososizan dau kananganko i hal dot amu asakapan om it a-insan abambaran. Ino kosusaan dit ayat 4 katalib di nunu-nopo o pangalaman di bansa dot Israel. Kagi, kenginan di nabi dot it ongoulun mongusul dino kosusaan sid anganak om muaki, sampai sid muaki lombus do mitutungkus-tungkus, supaya kosondot banal sid ongoginavo om pongitungan dit ongoulun dot ino kosusaan dino kiharati, tu nakatalib di nunu-nopo sanghal dit ongoumul om ongotoun dit ongoulun hiza didiri om didino. Ino kosusaan dino kiharati kaabal di kinourugan do pomogunan, tu antad sid palad om hukuman di Tuhan ino.

Manjadi, atalahas-no dot it ongoulun di nokening(nokorongou) di boros di nabi dino, andaman kavi ino kosusaan, mad kakali ino kosusaan dino do suvab-suvab do monusa. Ikid habal do mimbulai tumalib di habal laid diri. I nabi mongusul di kosusaan dino do rumikot i butu iadko kavut, tu mangavi di parai om dalai, lumombus-po sid ongokabun dot anggul, sid ongobutul-po om ongobuvatan, om sid ongokabun do kouvaan. Navi-no i roun, bai tulang-po, minsanko i kulit nga inakan sampai opurak-no i tulang dot aso kulit. Okonko bai i koposizon, it oula do sontoun ot avi di butu mangakan, minsanko it ongokouvaan orungoi-no kavi. Tu ong kodung navi-no i kulit, rumuzou-no i kazu. Ino kavi dino tanda dot oholian i kosusaan dino dit a-insan kahajang. It ongobahanan dot pangazam, nga nosusaan, tu navi-no i kutad.

5-14 Ong it ongoulun di magavuk, osusa-po do posikan, tu amu engat ko kening ioti do kuran di butu mangavi di kabun dot anggul. Ioti kakali minum dit anggul dit noula-no laid di toun dot amu-po nohorotizan dioti ong aso-not ipagavuk vagu, tu norungoi-no it ongokabun dot anggur. I nabi momosik dioti, supaya mamung ioti mogkoduru om mogihad. Ong iadino i kosusaan, aso tinganan do pavuk di ginavo om pongitungan, supaya olingan i kosusaan. Ong otopot, ogumu it ongoulun magavuk dot polingan i kosusaan dau o tomodon. It ulun di tumuhun sid badi, tu dumagang dara do

kakanan om kosukupu dit onkob dau di rontob miuma do sangadau koduvaan-no, tu kokudiko banal o siin dau, tigogi navi i siin sid kinomol sampai avuk-no iosido. Kouli-po, okonko bai avuk iosido om araat o gama sid onkob dau, sid savo om anganak, inoi nga akanon-po di sodop, nga aso, tu baike unturu o kopu-kopuon di minuli. Ong hiza do minum iosido, kakali mad aramai om osinang o kopurimanan dau. Suvai susuvab-no om kembulai-ogi i karaatan om kosusaan dau. Ioti siri, tu amupo nakaharati do kembulazan di butu, ko amu-po nemot it ongobutu sid ongokabun, miinum sampai magavuk. Rumamai ioti do posusut di kosusaan om polingan i kobuatano di iadino. Asarok mad duvo o tinomod di gama miinum om magavuk. Na i nabi momosik dioti, tu minsanko navuk-no, kakali amu nokedu it ulun sid kosusaan sid pomogunan, inoi nga bai posusut om peva di konoruvo dit avuk dino. Ino-no o harati di gama di nabi momosik dioti, aso tanganan do mogidu om polingan om lalahon i kosusaan dit antad sid Kinoringan. Ong kaharati-ogi ioti dot navi-no it ongokabun dot anggur, mosik banal ioti dot opipihoi o kopurimanan dioti dot aso tanganan monombol di mato, supaya a-kemot di kosusaan.

5-6 Iri-ogi i nabi manarang di kobuatano dinot ongobutu di iadko bansa do sangod, tu rumikot om iadko ongomondou di banalko ahakang it ongonipon di mongogop om mongohodtok kavi. It ongonipon iadko i tututuvon om goholu. It ongopuun dot anggul rumungoi om it ongokazu dot Nunuk, nga navi-no i kulit, baike batang-po o sontipurak.

I toun 1983, i nahandab it ongohimbaan, bai it ongotulang-po dot okudik nga aso roun dit ongokazu. Ino hiza dino, banalko araat o kematan do himbaan. Vokon-no ong nakalata-no it ongokulit, tu norungoi-no banal it ongokazu diri. Pengkaa dino o tinuturanan di Yoel i kinahajangan diri. Kakali momoros i nabi do iadino, nokembulai-no laid do kuran i Kinoringan kohiza mongohukum, tu antad sid dau i kosusaan, om humongkob do mamung sid gama dioti humongkob om mogkorudu om osuapo i ginavo dau. Tu sid ayat 6, varo boros dot, pomogunan tokou do iadko kondiri di Kinoringan o mongohondom dot ino pomogunan di bansa dot Israel om Yahuda dino, pomogunan di Tuhan. I hukuman do Kinoringan mad noulung i Kinoringan kondiri. Kondiri di Kinoringan o momurimon di kosusaan, iadko iosido ot anangan di butu om novian dot anggul om ongonunuk. Sid boros di iadino mongimbulai i Yoel di kosusaan om pensubaan di kosipan dau do kuran i Kinoringan mongohukum di bansa dau di banalko sinamadan dau. Tu ong iadino, i Kinoringan monusa di kondiri dau iadko it ulun do mitinganu.

8-10 Ensanani bansa om it ongorurungan ot anangan dino boros di nabi. It atag o gama mogkorudu, gima i kinosusaan dino, miabal dit oupus do sumuni, ong minatai i manansavo di banalko koginavaan dau. Nolobong-no kavi i harapan dau do misavo ioti do banalko osisinang ioti. Bai sid lobong-po mili-gili i harapan dau diri. Iri-ogi lumombus i nabi manarang di kosusaan di mangasau-po di gama sumamabayang om i gama pasamba sid Kinoringan di kosukupu dit ongoparsambaan do roti, umau om anggul, ino-no it ongopersambaan isuhut di hoturan di Musa diri (kolobusan 29,37 om Bilangan 28,4) It usuran di Yosefus manarang dot minsanko agazo o vitil hiza di Rumpak Rom (TM 70), kakali dot a-nokentoron it ongoimam do monunu do roti om umau, tu varo kopurimanan dioti dot suhulon mogos do vitil dit amu kakan mantadko alazan i gama manahak do parsambaan dit ongokakanan dino, retanko ong engkod pasamba sid Kinoringan adau-adau, mad oputut-no i kopioputan sid Kinoringan. Na i nabi Yoel, iadino o kopurimanan om pongitungan kananganko i parsambaan dino, lumuu dit ongoimam.

11-12 Tumoguvang-po i nabi dit ongomukabun om it ongomomongumo sampai mongonsug dioti do mamung sid gama mogkorudu om minta dua. Ioti nga nanangan-no dit ongokosusaan. Sid ongokabun om ongotagad dioti nokembulai i kosusaan. Ong iadino, engkod-no i nunu-nopo songkohigakan sid gama mutanom om manaud do kabun ko mibo sid tagad.

13-14 Iri okodim-po it ongoimam sid panambayangan. Suhuon di nabi do momonsulung do karung, ino-no i sulung do mogkorudu om mokiada do kasalaan, iadko it ongoulun sid Ninive, hiza di tudukan di Yunus ko i raja dot Israel, i Ahab (1. Raja 21,27). Monuhu i nabi do mangahatul dot adau do koupusan do kasalaan do popiuumpug di sokovia i it ongoulun sid panambayangan, tu minta dua om momuasa i sokovia. Noonsug-po di nabi it ipat-ipat i rombongan om segi di razat diri, sinuhu-po dau it ongoimam do popiuumpug di sokovia i bansa, i sid bandar om i sid ongokampong. Sabap bai

iso-no ot elaan di nabi, ino kosusaan dino antad sid Kinoringan. Ino-no i vaza dau mamambang di bansa dau, gima a-nokening ioti dit ongobahanda om ongoira laid. Aso-po boros di nabi sino di monginsasamod ko mongintomon dit ongoginavo dot ulun. Nigili-no dau i sokoviai i kosusaan, supaya kemot om kaharati ioti kavi di kobuatano di iadino. Suvai ohorotizan-po dit ulun do songkuro karalom naratu iosido om osodia-ogi iosido do mokitulung om mindamo iosido di kotulungan om korindingan dau.

15-20 I Pomintaan dua do mogkorudu om mindamo.

Nahatul-po di nabi it adau do mongupus om mokiada di karaatan di bansa, iri-ogi monuduk-no i nabi dit atag o gama minta dua om mindamo sampai tumoronong sid Kinoringan. Manarang-po laid i nabi di tinomod om kogunaan dit Adau di Tuhan (Amos 5,18-20). Varo-no laid tradisi di harati, Adau di Tuhan. I gama sumambayang sid panambayangan, retan-no laid ko tumoguvang do Kinoringan, tu sid ongakob do banalko osusi, sino-no it intoronon do Kinoringan, ka diri. Topot, boros di nabi, sid sokoviai it onkokosusaan dit nahajangan, kembulai i kuasa di Monguasa di sokoviai (15). Sid tinoguvangon di piumpugan sid panambayangan, ino-no, sid tinoguvangon do Kinoringan mangarait i nabi di sokoviai it onkokosusaan om onkokopunavatan, asot omoton, opurak-ogit it ongoravo, kumonggu sid tana i lininsahan, navi-no i gandum, nokosong it ongosulap, tilikop-no it ongopangazam, tu aso-no sakot sid buvatan. Sid Kinoringan poromot i nabi dinot onkokosusaan dino. Kenginan dau dot i Kinoringan, i minongimbulai dino kavi, nga mamung-no sid umpug di kikosusaan dino. Iri-ogi minta dua iosido do mokitulung, dot ino gama minta dua mad kumavid sid palad do Kinoringan di minamambang om minangalapos di bansa dau. Ino gizak dau di pogili sid Kinoringan di kogofoo di kosusaan dau, ino-no i napu nalagas-no, kazu, nga noruzou-no, mad nahandab, om i mizon talun humongkob-no om it ongobavang, nga nakalata-no. I harati, novian-no banal i pomogunan dot aso-not elaan do koposizan, tu aso-no koposizon. I bansa do Kinoringan baiko mongingab-po iadko i mizon talun do mokisian-nopo. Aso-no kiroon di nabi do varo pihormat om garal om kovosihan tanid mantadko bai mizon talun, dit inurugi do Kinoringan.

Fasal 2: Sumodia do tumoguvang sid Kinoringan om mokiada di karaatan, gima rumikot-no it Adau di Tuhan.

Mad kondiri di Kinoringan mongodim om monuhu monoburi sid Sion, it ompulongon sid Yerusalim, i pinengkakatan di panambayangan sid Yerusalim, supaya ensanan it ongoulun sid bandar om ongakampong kening di kodim do Kinoringan. Amu atalahas dot iti-no ka i timpa do Kinoringan sid pomintaan dua diri (1,19-20) ko varo-po vagu butu rumikot, ino-no it anganak dit ongobutu diri dot otoliban-po it onom minggu, nga mutolid-no dara it a-no ko piro o kazu ko totonomon, nga ovion-no vagu do butu. Dot ong otopot, sid a-ko piro it ongoayat diti, okonko i kosusaan dit aso hasil sid ongakabun ot boroson, inoi nga i kosusaan di butu di mad sangod di mongorumpak do kuta.

2,1-11 Inot bahanan do butu dino o suntuan om tanda dit Adau di Tuhan, it pokikip dit ongoulun om i bansa do Yahuda. Ino-no i habal di toburi, kondiri di Kinoringan sumamung di bansa dau. Ong iadino, aso tinganan do modop-po ko rumehat-po di aso nunu-nunu. Suvai sumodia ioti do sumamung di Kinoringan, i rumikot sid tanga di bahanan do butu. Sabap i Kinoringan mangahatul di sokoviai, i hiza om kahajangan di didino ko i hiza di rumikot-ogi. Ino butu om kosusaan di mimbulai iadko kotuvangan do rondom di pentahan dot amu-no songkuro om kosondot-no i kosusaan, i pangi ko i ongobutu. Ong sid di Amos, retan dit ongoulun ko it Adau di Tuhan, adau do kohigakan om katamanan, ka, adau do kanavahan do Kinoringan, ka. Topot ambat di Amos, okonko iadino, inoi nga it Adau di Tuhan dino, kotuvangan, okonko kosinangan, ka di Amos (5,18-20). Peradon di nabi Yoel i hiza di gulu om i hiza dot orikot-no i hukuman ko Adau di Tuhan iadko i sid kabun dot Eden om i belantara. Iadko it apui di mangahandab do pomogunan, ka di nabi, amu osodiri dot ino dino bai suriban di bahanan do butu ko i kavut dot apui di mongimbulai i Kinoringan di rumikot iadko sid burul do Torsina, hiza di Musa om i nabi Eliya. (Kolobusan 19,16 om Ulangan 4,11 ko 1. Raja 19). Ino-no it atalahas, sid Kitab Laid kopurimon om kaharati it ongoulun dot ong i Kinoringan, it amu elaan do songira kinotimpunan om kovian, sabap songkuro-nopo kalaid, kakali iosido, kotoguvang sid ongoulun do kopivuros sid onkokosinangan om onkokosusaan dit antad sid palad dau. Sabap ino,

ong kodung Kinoringan o mangagama om kumavid, tantu aso tinganan do mogidu-po ko miva-po (Amos 2,13 om 9,1). Iti-no o sabap do manarang i nabi Yoel di kosusaan dit ongobutu sid ongosojal di mongorumpak do kuta, dot inot ongosojal dino elo-no banal mongorumpak dot amu otinganan sumaap-po om mangahavud dioti. Murut-surut ioti minsomok sid kuta (i Buuk Kentalangan sumuntu di suriban di iadino sid F. 9,7) Mingkuda-no it ongosojal tumangkus. Mad kialad it ongozurita do rumpak ot uni dioti om it ongobutu di minangavi dit ongototonomon nga kiuningou do iadko it apui di mangahandab do valai. Aso rinding om kuta di miuma i kasavato do monobon di sangod om aso kohubungan om ansal di kadapat mongohigong di panahan dioti. Iri-ogi (6) kolombus ino kosusaan di bai butu dot it ongobansa om riniba ot anangan dot alaid-po (10), ensanan-no i vinangun ot orikatan di kosusaan di iadino. It adau om i vulan om it ongokorimbuton, nga nakagavul-po sid gama posuntu di kosusaan dit antad sid Tuhan. Insan-po dino, it ongobutu bai suntuan di kuasa om kakansangan do Kinoringan di tumalib di sokovia i it ongovazaan do riniba moniag ko pakaso do Kinoringan ko mogihim dit ongoharapan vokon, retanko ino dino o monulung om mangapad di riniba om it ongobansa. I nunu-nopo songsondihon om harapan, tumanus kavi sid tinoguvangon do Kinoringan. Iri-ogi humarati i bansa do Yahuda di kokuguzan dau om i karaatan om karanggalan dau di nakaharap ioti sid ongokuasa di bai barat om inepi.

Nakabahanda-po di nabi i iadino, nosodia-no it ongoulun do mongining di boros di Tuhan.

12-14 Kondiri di Kinoringan mongingut di bansa dau muli sid Dau. Suvai minsibak it ulun sid tinoguvangon do Kinoringan do sumingkudou sid Kinoringan om nakaharati-ogi dot hatas ko saribu o soalan do Kinoringan, iso nga aso kadapat tumimpa, om osodia-ogi do mongining di boros do Kinoringan. Baiko it ulun di mogkikip-no rumonok do Kinoringan ot osodia mongining om mambat sid kodim di Tuhan. Asot iso-po o vazaan vokon mokisapul it ulun, gam ensanan iosido engat dot bai varo kopudan, ong sid kobinsianan di Tuhan. Iri-ogi om tiining dino kodim dot, Simbanai-no dino-no ino ginavo dikou, Uli-no sid dohon, ka. I tanda di kosimbanan om i gama tumoguvang ponong sid Kinoringan om tumolikud di vazaan laid, ino-no, momuasa, mogihad, mongupus. Okonko i vaza monginis dit ongosulung, iadko it Iman do kipangkat hiza di mongohukum di Yesus (Matius 26-27), inoi nga i ginavo dit otopot om atag o gama. It ensanan it ulun, guvas om ginavo o kenginan do Kinoringan, okonko i kobuatano sid soribau, kosulungan, persembaan. I Yoel posuntu di duvo o vaza mongupus sid tinoguvangon do Kinoringan, i sid soribau dit aso guna om i koupus dit otopot dit antad sid saralom di ginavo dot ulun. (Zabur 51,19 om Yeremia 4,4). Mongohodtol iosido do bai i kosimbanan di ginavo o kiguna, okonko i bai momuasa om momogos do guvas do kakali iri-no ko iri o pongitungan om kenginan. Nokopongonsug-po i nabi do iadino, pogili-no iosido di sabap do kakali kiguna do muli sid Kinoringan, minsanko iadino akaras om ahatul i hukuman do Kinoringan, ino-no, obinsianan sampai asamod i Tuhan, alanut iosido om kotutuman do janji. Okonko i Kinoringan o tinumongkizad sid janji laid diri, gam i bansa dau o nokotongkizad sampai nokotolikud-no sid Kinoringan. Sid panarangan di nabi di iadino mimbulai sid kotuvangan di hukuman i kanavau di kovosihan do Kinoringan, sabap minsanko sid tanga do hukuman kakali i palad do Kinoringan nokosodia om nakakahang-no do kumavid dit ulun, ong sukul kumahang it ulun kumavid sid palad do kosopulan. Tu ong otopot, kakali i Kinoringan mogihim di bansa dau dit oholian kapalid. Gam kondiri di Kinoringan oruol o ginavo dau, gima aso-not elaan-po do vazaan pemumui di bansa dau, tanid mantadko momobog om monusa dioti. Kagi i nabi humarap dot i Kinoringan sumuri sid gama dau mongohukum. Rontob-nopo, suvai dati ko, ka di nabi, sampai humarap i nabi dot minsanko i ginavo do Kinoringan madlaba-laba ponong sid kosianan om samod dau.

2,15-17 I kodim di Tuhan posodia dioti mokisian do Kinoringan.

Iadko i ayat 2,1, i toburi nosuhu-no do monoburi, nosuhu-no vagu i toburi do pentahan dit adau do mokisian sid Yerusalim do tumorima dit onsug dit ayat 12-14. Koubasan laid sid bansa dot Israel dot i sangau do karabau monoburi do pentahan dit ongopesta om i gama mokisian om momuasa sid tinoguvangon do Kinoringan. Kodung orongou it uni di toburi dino, miuumpug-no i sokovia i bansa sid natad di panambayanan. Na inot adau dino, ahatul banal o gama mokisian. It ongomomodlohing om it anganak di ragang-po kamung kavi sid umpug dino. Iso sangkut nga aso do mamung sid

piumpugan dino. Varo hoturan laid do kodung nokopisavo, kadapat lumatang sumambayang, supaya kotibang do manamod om manaud do savo, tu aso kolingon. Topot ong it adau dino, minsanko i nokopisavo om kopogontong, nga mozo mokisian di Tuhan. I harati, okonko rontob antad sid ensanan o ginavo o mokisian, inoi nga ensanan it ongoulun, anak, osukod, lumohing, ondu, kusai, okugui om akansang, nga sino-no kavi miuumpug mamung sid pomintaan dua do mokisian (17b). Iti diti manarang di karangkapan di kenginan do Kinoringan dit a-koho do varot iso o watas ko hal dit a-nokosuvang sid kenginan dau om ponong sid kosusian di ginavo om pongitungan. I tinomod, supaya it ulun manamod do Kinoringan dit iseso o ginavo om pongitungan om kakansangan om kokuasaan.

Na isuhut di panarangan di nabi Yoel, kakali it ongoimam mangahatul di gama mokisian, isuhut di hoturan di gama sumambayang om manambayang, ino-no mamakai di liturgia di bansa do Yahuda om mingkakat sid tinoguvangon di meja ko pinadaha do Kinoringan i sid natad do panambayangan it ongoupug om it ongoimam, sid sampaping di pinadaha dino dot mogihad om mogkoduru. Baiko aso persembaan do dupot ko kouvaan, tu noruzahan o pomogunan dot aso-not ula (1,9 om 2,14). O Tuhan, sianai-okoi-no, ka. Ino kosianan do Kinoringan okonko bai it ongoulun ot inindamaan dioti, inoi nga bahagi-po di pomogunan, supaya amu agauk-po it ulun do Yahuda dit ongobansa vokon, retan dioti ko minogidu-no i Kinoringan, ko, aso Kinoringan dioti, ka dit ongolabus.

Sid tohudi-no om minonurat-ogi i nabi Yoel dinot ongoboros om pomintaan dua dino. Manjadi sid pialatan dit ayat 17 om ko-18 najadi-no it adau dino, isuhut di noboros laid sino. Rontob-nopo, aso tuturan di nabi do kuran o kinosunuan dit adau dino. Baiko i boros vagu do Kinoringan mangajanji sid bansa dau, nisurat-no di nabi sid buuk dau, ino-no it ayat 18-27.

18-20 I bahanda di manarang di timpa do Kinoringan.

Sid 2,15-17 minongonsug sampai minongimuhun i nabi dit atag o gama minsamung do Kinoringan dot oupus o ginavo sampai mokiada di karaatan om mangajanji do tumatap vagu sid Kinoringan, supaya i gauk dit ongobansa vokon, retanko a-tumimpa i Kinoringan, nga olopisani om atalahas do kakali i Kinoringan monunda di bansa dau. Manjadi monuturan-no laid i nabi do kuran i Kinoringan minagavi monodia di tana di bansa dau, tu i gima kobinsianan dau ponong sid ongoulun di bai ongouripon sid Masir diri. Mad mongivogu i Kinoringan, ong ikihizon i bansa dau, tu ong iadino, iosido kondiri it okihii. Noboros-no laid sid Kolobusan 20,5 dot mongivogu i Kinoringan, ong i bansa dau sumingkudou sid ongopinokokinoringan dit ongobansa vokon, tu sid kotolikudan di iadino ousiba i hormat do Kinoringan. Na i bansa dot Israel om Yahuda, suvai kaharati di gama dit ongobansa vokon do pokihi dit ongoulun dot Israel, ong varo gauk om kokihizan, retanko aso Kinoringan dioti antava nokedu-no i Kinoringan. Andaman tokou dati i nabi Eliya di minangagauk dit ongobobolizan di Baal, di minongoduat sampai minangagauk dioti, dot iri-no i boros, Siombo-ka i Baal? Kaluto ong kakali modop iosido, ko kakali dumai iosido sid jamban. Osuhul lagadai-no mongodim, supaya mosik iosido om otibang iosido do mongining sid dikou, ka di Eliya diri. Topot it bansa dot Israel nga agauk-no do momoros it ongobansa vokon dot, Siombo-ka i Kinoringan dikou, ka.(17) Sabap ino, mongohodtol i nabi dot banal-banal i Kinoringan kakali mongivogu om monunda om manaud di bansa om i tana di bansa dau dino. Iri-ogi i nabi poromut do kuran i gama om timpa di Yahwe: Tahakan-ku-no... Ino-no, a-milo-milo varo kotulungan di Tuhan.

I hiza di nokopiumpug ioti mokisian do Kinoringan sid natad do panambayangan, minomoros i nabi dot olumbatos o boros do mamahanda dot I Kinoringan monulung ontokko i kinosusaan dioti diri. Sabap noruzahan-no i pomogunan om navi-no di butu it ongototonomon, gandum, om davo om it ongosayur vokon, norungoi-no it ongopuun dot anggur om it ongoказu do Zaitun, sino-no mimbulai i kotulungan di Tuhan. Gandum, nga mopud vagu om umau om anggul-no. Ogontian-no i kovitilo do varo-no vagu paparazon. Topot okonko bai iadino monulung i Tuhan om mangatag di kosusaan dioti, gam sumaap iosido di gauk om irak dit ongobansa do monombol di kabang di mamangagauk om mongirak, ino-no, it ongobansa di minongorumpak di bansa do Kinoringan, osunsub-no do iadko i bahanan do butu sid apat sunduk do pomogunan. Vokon-no ponong sid belantara, vokon-no ponong sid rahat do sampai pada sid rahat iadko i sojal di Masir diri, vokon-no a-kedu, inoi nga it ongobangkai (buntung) oromizas sid tana sampai masa dot oholian i kovutongo. Ong momoros i nabi do iadino, mad varo pangalaman do nakasasi iosido di kosunuan di iadino. Kaluto hiza di

minamahanda diri sid piumpugan, amu-po elaan dau do kuran o kasandatan di bahanda do Kinoringan. Suvai nokosunu kavi, iri-ogi minonurat, supaya sid tohudi kakali mongohondom it ongoulun do Yahudi di kinotulungan do Kinoringan. Ino kompusan di boros antad sid Tuhan mongonsi di sokovia i panangan di gama di Tuhan: Tonuson-ku ioti, sabap ioti minomogos dikou, ka. I harati, okonko bai it ongoulun di nosopulan o nokongus i ginavo, gima natalib i kosusaan, inoi nga kondiri do Kinoringan nokongus, tu mananus iosido dit ongobansa om ongoulun, di minongusiba di ngaran di Tuhan. Sid kovian di ayat 20 varo a-ko piro it ongohurup dit amu atalang banal. Na varo di mangaharati dit ongohurup dot iadino, banal-no, agazo o ginama di Tuhan, ka.

21-27 I longoi do monorima kaseh om i bahanda do kosinangan.

I kompusan di bahagi koduvo di nabi Yoel, mad duvo o panangan dit osodiri, ino-no, 21-24 ino-no i longoi do monorima kaseh om 25-27 nga bahanda antad sid kabang do Kinoringan di pentahan di kobuatano di hiza di rumikot-ogi. I longoi monorima kaseh monguji di darun om i korombungo di tana om i kasapaho di vonod dot anggul om i nunu-nopo songkouvaan. Siti amu osodiri i kinosusaan dit nahajangan dioti, butu ko koruzahan. Nembulitan-no kavi ino.

Manjadi i longoi dino, induvaan mongonsug dot, Kada-no kohongkob (21 om 22). Ong induvaan oonsug, tomod do mongonsug do mongintomon om humigak dot notoliban i kinosusaan di butu om koruzahan om i gama dit ongobansa pokih di bansa do Kinoringan. I Kinoringan o minionian di tokou, ka. Antad sid olumban i ginavo do Kinoringan dot otulid om alus sampai ensanan i ginavo do Kinoringan ponong sid bansa dau nokembulai i kotulungan di potomon om pokongus di ginavo dot ongoulun. Iri-ogi ensanan i vinangun, it ongokabun om ongotagad, it ongokazu om it ongokouvaan, it ongonapu om it ongoharas om ompulongon, nga mamung kavi sid kounsapatan, gima nokosondot i kotulungan do Kinoringan. Songkuro-nopo koledo mad nengkod-no do varo panggi, inulit-no vagu i kobuatano do pomogunan iadko i gulu diri. (Ong siti minsanko sid Sabah varo pangalaman do mad oulau-ulau i pomogunan om it ongomusim, sabap minsanko hiza do panggi, nga momodruzou om manangadau sampai rumuzou banal i pomogunan, iadko i toun 1983 om it ongotoun di sinumuhut di toun diri. Alaid-nopo mad aso tantu o panggi om oholian alaid i manangadau. Ong mongitung banal di kobuatano di iadino, ino okonko bai nasip, inoi nga antad sid gama mangavi dit ongohimbaan di papadarun do pomogunan. Kodung avi i himbaan, amu atarik i darun do sumondot sid tana. Sabap siombo-nopo varo himbaan, mad osogit om azami i pomogunan sampai atarik i mituvong do pada di vaig. Kodung oholian alasu i pomogunan, mad rumidi i pomogunan sampai minsavat i kolosuo do monunsub dit ongomituvong. Minsanko i mituvong pada dara do vaig, ino vaig dino amu kasampai sid tana, inoi nga lumizun sid savat om lumombus sid tampat vokon.)

Sid a-ko piro it ongoayat di longoi diti, okonko bai i vinangun mamung sid gama monorima kaseh om mongindazou di kotulungan di Tuhan, gima varo-no vagu paparazan sid sulap om sid pamagaan dot anggul, inoi nga lobipo agazo o katamanan, gima i Tuhan Kinoringan monunda vagu di bansa dau sampai pembulai di kovosihan sid dioti dino. Sid ayat 23 varo boros dit vokon-no abasa do "panggi", vokon-no ong "guru di kabanaran", nga sompi kiharati. Ong bai panggi ot anaru, iadko kotimpuuni, bai inulit-no vagu i musim iadko koubasan laid. Ong guru do kabanaran, kondiri di Kinoringan mangahatul, supaya i bansa dau misingilo di kabanaran di Tuhan, isuhut di nibahanda-no laid sid di Ibrahim (Kinotimpuunan 18,19 om i Yesaya om Amos). Antawa, sid panggi, kaharati i bansa do Yahudi, dot i Tuhan mongira om monuduk di kabanaran dau sid vaza dau pembulit di panggi iadko i gulu diri. Varo kagi panarangan do iadino sid Yesaya 54,17.

Iri-ogi sid bahanda di Kinoringan (25-27) kondiri di Kinoringan manarang di kosimbanan di kobuatano do pomogunan om i vaza dau mangahatul dioti. Kondiri di Kinoringan mangaganti di kinorugizan dioti, i hiza dit a-nakadampal i gandum, tu navi do butu, om i hiza di kinoponombitilan dioti di noruzahan i pomogunan. Kinoringan o pouli di kosinangan om iri-ogi it ongoulun mongindazou di Tuhan om omoluan-no it ongobansa di minamangagauk. Gam kondiri di Kinoringan mangajanji om mongimbulit di janji sid bansa dau (27) dot amu ekum-ekum i Kinoringan.

Ong monuturan om manarang i nabi Yoel do iadino, monuturan om manarang iosido di kobuatano do Kinoringan do iadko riniba. Varo-no dot oupus i Kinoringan, varo-no ong mongivogu i Kinoringan, varo-no ong ekum i Kinoringan, gima i bansa dau tumolikud di Tuhan, minsanko

banalko avasi o gama do Kinoringan mangagazad om mongumbasih di bansa dau. Ong banalko arampus it anak, dot aso tenganan mongira dit anak dino, alaid-nopo i molohing ekum-ekum sid tinoguvangon dot ulun, tu i karampusan dit anak dino iuli sid molohing dau, retanko ioti, nga aso bahazan om aso kovosihan.

Bahagi koduvo: 2,28-3,20 Bahanda di nabi Yoel kananganko i hiza di rumikot-ogi dot aso boros do sera ko kuran. Varo boros do iadko i nabi Daniel om i boros di Yesus sid Markus 13 om i Matius 24, pentahan di kosungguvo do riniba om songvinangun.

2,28-32 It Adau di Tuhan.

Varo-no kiroon sid a-ko piro solinan do Kitab dot iti diti retanko Fasal 3,1-5 om iri-ogi i Fasal 3,1-20 retanko fasal kapat.

Na it ongonabi gulu diri iadko i Yesaya, Amos, Yeremia, okurang o gama dioti posondot dit ongobahanda kananganko i hiza di rumikot-ogi. Ong i nabi Yoel manarang di hiza dino iadko kentutun banal iosido do nunu o jumadi. Nokotoguvang laid di nabi i tajuk dot, ADAU DI TUHAN sid fasal 1-2 (i bahagi keso). Iti-no sabap, hiza di minionurat i nabi di kahajangan om kinosunuan di nakatalib diri, minamung-po iosido do panarangan do kuran iosido nakaharati dit ongobahanda laid kananganko i hiza di rumikot, iadko noboros laid sid Amos om Yesaya om i vokon it ongonabi sampai posondot di kinohorotizan dau sid buuk dino. Iti-no o sabap inot ongoayat dino o kosondoto om inonsi di pangalaman di Yoel kananganko i boros di Tuhan om i vaza do Kinoringan mangagazad di bansa dau.

Manjadi ayat 28-29 mongusul om mamahanda i Yoel do kuran i Kinoringan potuntug di Sundu om kuasa dau sid riniba, ayat 30-31 it ongotanda dit Adau di Tuhan om i kensasamakan dit adau dino. Ayat 32 pendongou i Yoel di kosopulan dit ongoulun di mangasip sid Tuhan.

28-29 Iri-ogi pentahan do varo hal di rumikot-ogi. Asarok varo pamarasan om bahanda di iadino o kotimpunaan: Iri-ogi, ka. Kinoringan manahak di Sundu dau sid sokovia i it ongoulun. (Ino pongoretan "guru" sid 2,23 mad bahanda laid om pongindukan dau kananganko i Sundu dot Osusi) Ino boros dino mongimbulit i Petrus hiza do Pentakosta, retanko, biano nokosunu iadko nibahanda-no laid di Tuhan, ka (Usuran Rasul 2, 16-21). Varo-no vagu boros do iadino sid Yesaya 44,3; 32,15 om Zakaria 12,10). Ino-no o harati ino boros dino, I hiza di rumikot, okonko bai it a-ko piro ot ulun soruvangan di Sundu do Kinoringan, iadko i raja Daud diri, ko i nabi Eliya om i Elisa, i Amos om it ongonabi vokon, ko i turu nopod it ongosukod sid belantara om i Musa, inoi nga i kuasa do Kinoringan, retanko Sundu dot Osusi momodsuvang di sokovia i it ongoulun di mangasip. It ulun di nosuvangan di Sundu do Kinoringan nakaharati om nokelo di kenginan do Kinoringan om i panangan di gama do Kinoringan ponong sid riniba. Inot ulun amu engat di dau do kenginan om dau do pongitungan, inoi nga agazad iosido di kuasa om kenginan do Kinoringan. Noboros-no laid hiza di Musa do varo hiza rumikot dot amu osusa do varo nabi di pentahan sid bansa om it ongoulun sokovia i i kenginan om pinonuhuan om kovosihan do Kinoringan, inoi nga kokondiri dit ulun kopitoguvang om kopiboros om kopihaharati di boros do Kinoringan. Ong i hiza di Musa kakali osusa do varo momialatan om bantaran sid pialatan do Kinoringan om it ongoulun, retanko it ongoulun amu kogoos do bai tumimpan sid Kinoringan ko kopitoguvang do Kinoringan, ka. Na i Yeremia 31,33 om Yehezkiel 36,26 varo boros di miabal dino, ino-no, it ongoulun kumondiri rumikot sid Kioringan, sabap varo ginavo vagu om varo kopolisan vagu di mad ogulian it ongobangkai om buntung dit ulun minatai. Sid a-ko piro panarangan di iadino minimbulai di kiroon om jangkaon do varo kosinaan koduvo dot ulun, i retanko lahir baru ko vangun vagu.

Ino-no i kovongo siti, okonko bai it anganak dot ondu om kusai, it ongolumohing om it ongosolumpag vagu, inoi nga minsanko it ongouripon, it ulun dit aso hak om aso ngaran, tumorima kavi di Sundu dot Osusi. I harati, hiza di rumikot-ogi amu momeda-po dot ulun di bai uripon ko tuan, ulun do lumundu om mosikim, ulun do kigiral om pangkat om ulun di pemozon di vokon, ondu om kusai. Ong sid Kinoringan, kiguna om kihak kavi, sabap i kosopulan di Tuhan Yesus ponong sid isai-nopo it ulun di mangasip (Yahya 3,16). Ino kotorimaan di Sundu okonko gama dot ulun om keloo dot

ulun ko kopintaro dau. Kagi it ulun a-kadapat mansahari sid kosunduvo dau, retanko iosido manansanganu di Sundu, ko, Kisundu ong ioku, ka, ko, ioku o manansanganu di kosinaan vagu (memiliki lahir baru). Gam kodung i Sundu dot Osusi monguasa dot ulun om i ginavo dau, amu momuruvak it ulun dino, inoi nga antad sid kagazadan di Sundu mokiuripon iosido di sokovia i om mongimbulai dit ongotanda do Sundu, ino-no samod om kabanaran om kovosihan sid isai-nopo it ulun. Sabap, kodung i Sundu dot Osusi manansanganu dit ongoulun, iri-ogi otopotko i Kinoringan mangahatul om manaud dit ongoulun sampai i pomogunan, isuhut di kenginan dau. Iti-no o sabap, i Sundu di nosuvangan sid ginavo dot ulun popezo dit ongoulun, okonko popitongkizad di piumpugan om gorija. Sabap ino, siombo-nopo varot ulun di retanko kisundu iosido, topot i gama dau nga ponong sid kopitongkizadan, tu retanko bai iosido o kisundu om bai iosido o nokelo di sokovia i om notudukan di Sundu, ka, ino dino tanda dot okonko i Sundu do Kinoringan o monguasa dit ulun dino, inoi nga i kuasa do retan Rogon di mangasau om mongunang, momurogou dit ongoginavo dot ulun. (it kagi i harati di pongoretan do Saitan ko Iblis ong sid boros Yunani: Diabolos, ino-no i mongimpilai popigavul om mangasau di sokovia i).

30-31 Iri-ogi manarang i Yoel dit ongotanda di mad pogintutunan di hiza dit Adau di Tuhan, ko Adau do kovian, ko, iadko sid Kosipan dot Ulun Kristian, Rumikot vagu i Kristus, tu mongohukum dit ongoulun di mizau om minatai, ko i retanko Adau di hukuman, ka. Ong manarang i Yoel dinot ongoongintutunan dino, mamakai iosido di keloo om kiroon di hiza diri: kotuntug o raha om apui om rumidi i lisun. Kakali andaman di Yoel i kinosusaan sid Masir diri do sinumiliu it ongobavang om rahat do raha, ko minonirang it apui sid Sodom om Gomora ko i lisun om kavut, i minozo sampai minangagazad di bansa dot Israel sampai amu otimpan di sangod dau. Vokon-no i rinduog do lisun mad tanda di nokensomok i Tuhan sid bansa dau iadko sid burul do Torsina, ko it apui di minonorob di persembaan di Eliya sid timpak di burul do Karmel. Pengkaa diri, ong kodung arob i vulan ko i mato dot adau, retanko dit ongoulun do varo hukuman do Kinoringan (ong sid Momogun, retanko it ongorogon minangakan di vulan ko it adau). Varo-no laid iadino sid 2,2,10, om sid Amos 8,9; Yesaya 13,10; Yeremia 4,23; Yehezkiel 32,7) Iri-ogi kondiri di Yesus mamakai dit ongoongintutunan di iadino sid dau do tudukan kananganko i hiza di rumikot-ogi (Markus 13 om Matius 24, Lukas 21 om Kentalangan 6,12). Na ong i Yoel, bai it a-ko piro it ongotanda di iadino onuvon dau do manarang om pentahan o tomodon, kananganko it Adau di Tuhan om i kuasa di Tuhan di mongimbulai di iadino. Okonko bai i riniba ot anangan dit adau dino, inoi nga ensanan i vinangun rumungoi om humuzas sampai minud do mimbulai vagu ko varo koimbulitan om kovongunan vagu. Ensanan i vinangun mad varo hingoton do sumino vagu dot sid kobuatano dino, bai i Kinoringan o mongohogkon (2,27). Suvai noboros i iadino om mamahanda-po i nabi i kosopulan dit ongoulun dit okosog om i mangasip. Minsanko it ongoulun dino maza sid tanga dit ongokosusaan di iadino. Rontob-nopo okonko i kobinasaan o rikoton dioti, inoi nga varo kolombusan dioti, ino-no i kosopulan om kopioondusan sid Kinoringan. It isai-nopo i tumahan sid tanga do kosusaan om pensubaan, ino-no ot apasi sampai penlaid, poguluvon it ongoulun do Yahudi, sid Yerusalim, ka om iri-ogi it ongobansa vokon. Ong sid di Yoel, bai ngaran-no nokoboros do varo-po kosopulan bahagi di sokovia i it ongoulun di mangasip. (Zabur 46). Ong i Paulus posondot dit ongoayat dino sid dau do panarangan dot i sokovia i it ongobansa kadapat mamung sid kosopulan di nokembulai sid di Kristus dot amu osodiri bansa om boros om kulit ko harapan laid diri. Pengkaa dino i Petrus posondot di harati dino ontok di Pentakosta bahagi di nunu-nopo it ongobansa di nokopiumpug sid panambayanan sid Yerusalim diri.

Sid kovian varo boros dot i Kinoringan o momili om mamasi, ka di Yoel.

3,1-15 I hukuman dit ongobansa

Nitarang-no di nabi sid 2,27-32 i hiza di rumikot-ogi, momongo iosido sid f. 3 do manalahas om monodiri di kosunuan di hukuman dit ongobansa. Ayat 1-3 om 9-15 mongintahan di hukuman do mad longoi dot a-ko piro o tomodon. Ayat 4-8 nokosiat siti do baiko boros do mongolupu di bansa do Poniki om Pilisti. 9-12 mad longoi di ponulung di Tuhan di pentahan sid ongobansa dot mirumpak sid konopuan do Yosapat. Iri-ogi 13-15 posuntu di hukuman dit ongobansa sid omoton.

1-3: Insan-po dino, varo boros di Tuhan. I nabi Yoel monodiri di dau do boros om i boros dit inanu

antad sid Kinoringan. Ino koimbulitan di Yerusalim om Yahuda nokopitombil sid kobuatano om nasip dit ongobansa. Varo hiza do kosimban kavi i riniba, ka. Sid Amos 9,14 varo iadino o boros dot, I hiza dino.. ka. It usuran di bansa do Yahudi, minsanko ogumu ot ahajangan, kakali varo-po kopioondusan di noumba di Tuhan. Kondiri di Kinoringan mongorumpak dit ongobansa, supaya ioti tumabang, minsanko a-nelaan dioti, do pouli di bansa do Yahudi om it ongoulun do Yerusalim sid dau do pomogunan. Minsanko kogoruvangan do pomogunan o kematan, kakali ino iadino, nga isuhut di kenginan om umba do Kinoringan. I kabanaran do Kinoringan o kamanang. Kogili i Yoel di kobungahan om ongokaraatan dit ongobansa di minamahagi di pomogunan do Yahuda om Israel om minonguripon om minangarakop dit ongoulun do pasok Yahudi sampai pinazad dit ulun dino sid ongobansa dot osodu, dot i tomodon monguripon, vokon-no ong bai inanu it ongosumuni do sundal ko momoi dit ongoulun sid tayangan. Iti-no o sabap monuli i Kinoringan di sokoviai it ongokaraatan di iadino. Sabap isai-nopo i pokihi dot ulun di dang Kinoringan (ong otopot okonko bai ulun Yahudi), ino-no pokihi di Kinoringan om mongorungoi di ngaran om hormat do Kinoringan. Sabap ipat-ipat it ulun nokoluu di kobuatano do Kinoringan sampai tanda om suntuan iosido di kohormatan do Kinoringan. Ong ousiba it iso it ulun, ousiba-nopo i Kinoringan.

4-8 Inot a-ko piro ayat dino bai tuturan, okonko longoi di kadapat longozon. Varo pongitungan dit ongoulun dit elo mongintutun dit ong surat kodori, retanko inot ongoayat dino nokosiat siti, topot okonko niamung laid di nabi. It ongoulun di nipamung siti inot ongoayat dino, nga minongitung dot avantang om posiat siti, tu miabal i gama mongolupu om momoros do hukum sid ongobansa. Inot bansa do Poniki om Pilisti minomoros i hiza diri dot i gama dioti mongorumpak do Yahudi, retanko bai monuli di karaatan dioti. Sabap ino, boros di Tuhan, okonko ikou o mononsuli, gam ioku o mononsuli di karaatan dino. Tu i retanko ioti, osusaan do Yahudi, ka, bai sangkut om sambatan do mongorumpak om monolod di tana do Yahudi om monguripon dot ulun. Sid Amos 1,6 varo boros dot ioti diri minongouripon dot ulun Israel sampai minongojuval dioti sid Yunani. Iti-no o sabap it anak do Poniki om Pilisti ijuval om otobus sid ongobansa vokon sampai sid Yahuda.

9-12 Iri-ogi i nabi mindolongoi do muhabal om mongingut dit ongobansa sid rumpak dot i Tuhan ot orumpakan. Kinoringan kondiri mongonsug dit ongobansa do mongorumpak dot kobinasaan dioti o tomodon om rikoton. Sabap i nunu-nopo o gama dioti monodia do pakakas do rumpak do sampai it linggaman om i radu podzupuon do dila do bilok ko sapadang, kakali amu miuma do mongorumpak om sumaap do Kinoringan. Retanko it ongobansa, ong mongorumpak ioti, kopioondusan o panangan, dot ong otopot rumpak maganak do rumpak, okonko pengkod do gama misasaap it ongobansa. Topot ong Kinoringan mongorumpak, okonko it ongopakakas do rumpak ot apakai, inoi nga kabanaran om samod dau di mimbulai sid tanga di hukuman di Tuhan.

Ong imatan tokou i kinorotuan di hoturan do Komunism sid USSR ko Syarikat Russia hiza dit a-ko piro toun katalib, kaharati tokou dot ino kinorotuan dino okonko ginama di pakakas do rumpak. Songkuro-nopo i Amerika om i Russia minonodia di kosukupan do mananus di songriniba, gima rinumosi ioti dot lobipo ahakang i sangod, nga aso tinganan. Gam sid gama monodia om dumagang dit ongopakakas dino di banalko amahal, sompi okugui ioti, tu minsanko i kosukupan do bai kakanan, pinozimozo ioti sampai varo kodurhakaan sid dioti. Sid Russia, tilikop it ongoulun om sid Amerika i iadino. Topot asot elaan dit ongoulun do makan dit ongobajil om ongosenapang. Ong i kosukupan do radu om pakakas mukabun, okurangan sid dioti dino. Pengkaa dino i kogumuai dit ongobansa vokon, mangavi di balanja do pomogunan om bansa sid ongopakakas do rumpak, dumagang dot ongotarabang do rumpak di banalko amahal, nga aso tantu guna, tu amu elo it ongoulun do mongenjin dit ongotarabang om aso sangod kagi dot osusa rumpakon. Topot i razat kakali mosikim om aso kosukupan. Varo momoros dot ino pomogunan do Russia dino nababak-no om naratu-no om nohuzas-no, gima i gama dit ongoulun Kristian minta dua do mindamo do kotulungan do Kinoringan bahagi dit ongoulun Kristian sid Russia om sid ongopomogunan vokon.

Ino konopuan (a-nakarait sid Kitab Momogun), i ngaran dino, Yosaphat, ino-no o harati, Kinoringan o mongohukum, ka.

13-15 Iri-ogi popierad di nabi it adau di Tuhan ko it adau do hukuman di gama mongomot. It ongonabi vokon, iadino o gama posuntu dit adau dino sid Yesaya 17,5 om 63,1; Mikha 4,12; Yeremia

25,30 om Kentalangan 14,14. Ko i Yesus mamakai di suntuan do mongomot sid kahabaran di Habal do Kovosihan (Matius 9,35-38). Kakali do bai posuntu i nabi dit adau dino dot tigogi, boroson banal inot ongokosusaan di nokonong sid rinibuvan it ongoulun.

16-17 Ino-no i kosunuan di hukuman dino, kondiri di Tuhan mangagarak do iadko mondou om mundohong antad sid burul do Sion ko Yerusalim. Ino hiza dino om alanta banal dot i Kinoringan mongimbulai vagu di hoturan laid sid Yerusalim, ino karajaan di miabal di karajaan di Daud (2. Samuel 7,12-14 om Amos 9,15). Iri-ogi alanta dot i Kinoringan o monulung om manapul di bansa dau dot aso kosusaan vagu antad sid ongobansa vokon.

18-20 I barakat om i kopioondusan di hiza do penlaid.

Insanpo momoros i nabi do pentahan di hiza di rumikot-ogi: I hiza-no dino, ka. Nokopomoros-po do rumpak om kosusaan do rumpak om kobinasaan, tigogi,banalko tanid o vaza manarang di hiza di rumikot-ogi. Ino-no, Orombung it ongokobuburulan om ongoharas, ovizau it ongobahanan dit ongopangazam. Miuma i vaig sid ongobavang dot amu olosuan it vaig sid bavang om botung, gam ongis ino dino. Ong alasu i vaig sid ranahon, amu mopud i parai. Ong ongis ko azami om momurulun i vaig, banalko alangkas o kosuruto do parai. I hiza di rumikot-ogi iadko i hiza di kinotimpuunan sid kabun dot Eden. Varo korombungo om koulaan om paparazan dit amu asakapan.

Manjadi iti-no i pangalaman di nabi Yoel, dot iosido kondiri sid tanga di kogoruvangan do pomogunan. Ong it ongoulun sid Yahuda dino, varo kogolivongo om varo dit amu engat do harapan om opupusan. Sid pialatan dioti dino mongintutun i Yoel di kenginan om gama do Kinoringan, retanko sid sokovia i it ongokosusaan, butu ko koruzahan, sangod ko rumpak, karakapan om kouripanan, kakali i Kinoringan sino do mangagazad om monunda di bansa dau, tazonko muli vagu i bansa do Yahudi sid Kinoringan sampai mangasip sid Kinoringan om sumuhut di hoturan om kenginan dau. Sokovia i kahajangan om kosusaan, bai vaza do Kinoringan pemumui vagu di bansa dau, dot i tinomod do Kinoringan, pembali sid dioti di samod di varo-no laid om it amu engkod, songkuro-nopo o kobolikungo om korumaato di bansa dau. Sid kopupusan, i Kinoringan o kamanang om mangagazad di bansa dau pouli sid kangkap di samod om kovosihan dau.

I Panarangan di surat di nabi Hagai.

Fasal 1: Ong engin tokou mongintutun di surat di Hagai, atag ong ohorotizon tokou i vaza mongumpug dit a-ko piro o boros di Hagai om i tuturan sid manarang di kavazao om tomodon di nabi poromut di boros om imuhunan do Kinoringan sid bansa dau. It ongoayat 1,2-11, natandas do tudukan om imuhun do Kinoringan, isuhut di vaza dit ongonabi vokon poromut sid bansa dot Israel di suhu do Kinoringan. Topot ong it ayat 12-14, nga usul dot ulun di nokening di boros di Hagai, i manarang di gama di nabi Hagai. Kaluto ong ino-not ulun dino o minongumpug di sokovia i it ongoboros di nabi Hagai sampai iosido-no o minanantu di hiza di kinembulazan dit ongoboros dino (1,1. 15; 2,1. 10. 20) om i kuran-nopo i tudukan di nabi. It ulun dino o manarang sid kinompuso di surat dino di panangan di surat, ino-no, Kodung nokopongoromut i nabi di boros do Kinoringan sid ongoulun sid Yerusalim diri, tinumimpuun-no ioti pengkakat vagu di panambayanan sid Yerusalim, gima opiransangan-no i ginavo di gobinal om i sokovia i razat sino dino. Ino gama momiransang dino mad momosik om pengkakat dit ongoulun di mad nokodop-no ko malan mangagama ko nalalau-no o pongitungan ponong sid piumpugan om i Kinoringan. Sabap ino, i sokovia i it ongoboros di Tuhan sid kabang di nabi mad momosik om potungag ko pakansang-no di piumpugan om sambayang dit ulun sid Yerusalim.

Manjadi mongohodtol i Kitab dot ino gama momosik di piumpugan, nga nokosunu-no sid atantu o hiza, minsanko asarok varo boros do Kinoringan momosik dara dot ulun, nga a-kosunu i kopoulosan diri. Topot hiza di Hagai, nokosunu-no om nokoposik-no i piumpugan, ino-no adau

keso di vulan konom di toun koduvo di karajaan di raja Darius Keso (ong sid di tokou do kiroon, ino-no kovian di vulan Ogos TGM 520, sabap i hiza diri i Toun Bahru, nga piromutan di vulan Mar). Ong monginsosok tokou di kobuatano di hiza diri om i kobuatano di pomogunan do Yerusalim, mad varo tolu o hal di najadi sid saralom do duvo nopod toun (540-520 TGM) dit amu avantang bahagi di hoturan sid bandar do Yerusalim.

Keso, bai duvo toun (538-536 TGM) ot osinang banal it ongoulun di nokouli-no sid Yerusalim antad sid kinuripanan di narakop sid Babil (587 TGM). Sabap i raja Kurus sid Parsia nokopongimbulai do hukum di palabus di sokovia i it ongobansa di narakop-no di raja do Babil. Sabap ontok di toun 539 sinoruvang di Kurus i Babil sampai minangahaba-no di hoturan di raja do Babil. I kenginan di Kurus, posinang dit ongobansa di narakop-no, supaya it ongobansa dino humarap om monukung di hoturan dau momorinta di sompomogunan. Iti-no o sabap do minongoho i Kurus dot ipat-ipat i bansa mongimbulit om mongusaha di dau do koundango om harapan ko ugama. Bahagi di bansa dot Israel minangahatul i Kurus do mongumbas di panambayangan sid Yerusalim. Ino-no i suhu dau sid gobinal Sesbesar, i gobinal sid daerah do Samaria (i Yerusalim nokosuvang si kuasa di daerah Samaria). Pinouli di raja Kurus i sokovia i it ongopakakas om koburuo di panambayangan do Yerusalim, i rinampasan di Nebukadnezar (587 TGM), gam minanahak i raja Kurus dot ipongumbasi do potunggol vagu di panambayangan, gam nokopusan-no di bendahari di karajaan do Parsia (imatai sid Ezra 1 om i boros banal di suhu nokosurat sid Ezra 6,3-5). Ino-no rontob, nokouli-po it ongoulun di narakop diri, sampai i toun 536 TGM diri, rontob nokengkakat i padaha sid natad di pogun do panambayangan om ngaran-no nokotimpun monodia dit ongoorigi di panambayangan (Ezra 3,1-11). Ino-no ot atalahas, it ongoulun Samaria di nakavaliu sid daerah do Yerusalim, isuhut di suhu di Nebukadnezar diri, minoniag banal di gobinal om it ongomangahatul di raja Parsia, supaya a-kosunu i kotulungan di raja do Parsia do potunggol vagu di panambayangan sid Yerusalim. Sabap ino okudik nga aso kotulungan di porinta bahagi di piumpugan sid Yerusalim, gam varo-po gama mangasau.

Koduvo, ontok di toun 520 TGM okudik nga aso kogoos o ginavo di piumpugan sid Yerusalim mongumbasi vagu di panambayangan. It on sug di hiza di kinoulun antad sid Babil diri natanus-no di mad apui dit oduruk dot akansang om misok-no vagu. Banal-no, it ongoulun di nokogulu kouli antad sid Babil, nga okonko piro-piro sampai amu kogoos ioti do tumoguvang dit agazo o tugas potunggol vagu di panambayangan. Topot antad diri, lobi-po ong i hiza di kinorumpakan di Kambuses, it anak di Kurus di Faraun do Masir ontok di toun 525 TGM, tu ginumumui-no it ongoulun di minuli-no vagu sid Yerusalim. Kagi i hiza diri jinumadi i Zerubabel do gobinal bahagi di razat sid Yerusalim. I Zerubabel dino, muaki di raja Yoyakin, i narakop-no i toun 597, i kakal-po omulok iosido, nakanu-no do kuasa om hak antad sid pusat Parsia do pouli di sokovia i it ongotana om onpopogun sid ongosanganu laid diri, ombo-nopo o nokosuvang sid hoturan om nosivaan di administrasi di daerah, i nahatul-no di kuasa di raja do Babil dino. Manjadi ino hoturan vagu dino minongimbulai do gagut sid pialatan dit ongoulun di nokosoruvang antad sid Samaria, hiza di hoturan do Babil om it ongoulun di nokouli antad sid narakop sid Babil. Sabap varo hak di Zerubabel do iadino, otomon it ongoulun di nokouli antad sid Babil, gima kadapat-no vagu ioti manansanganu dit ongotana om kavavalazan dit angaki, gam minagavi ioti mangatag dit onpopogun om mananaom om momiara dit ongotana. Rontob-nopo, i piouhan sid pialatan do razat vagu om razat laid om i pangalaman dot amu tantu nokopud it ongotana om kabun, gima okurang o darun o minonusa dit ongoginavo dot ulun. Mininsavat-no it ongohorogo do kakanan sampai ogos-ogos ong a-kopud it ongoulun sid Yerusalim diri. Iti-no o sabap dot okudik nga aso kopurimanan om kohijahan do ginavo ponong sid kotunggaran om koimbulitan di panambayangan sid Yerusalim.

Kotolu, okonko bai i sid Yerusalim o mad aso harapan, gam ensanan i hoturan sid sompomogunan diri nga malang-alang om ogura. Antad di kinapangkatan di Darius Keso (TGM 521) mad ensanan i karajaan do Parsia odurhaka. Sid a-ko piro o tempat nga varo"z ongorombongan di mongondurhaka di raja Darius, gima i Darius okonko anak di raja Kambuses. Tu i Kambuses dino tamanang (aso"t anak). I turunan di Nebukadnezar III sid Babil, i turunan dit raja sid Madia om lobipo i Gautama, i retanko anak di Kurus om obpinai di Kambuses ensanan ioti dot engin monunggol di dau do hoturan om karajaan, vokon-no ong sumodiri, vokon-no ong manansanganu dara dit ensanan i karajaan do Parsia om pahaba di Darius I. Na minsanko it ongoulun dot Israel hinumarap dot sid tanga di korunggalan do pomogunan, kosunu i bahanda dit ongonabi laid diri, ino-no, kodung rumunggal i hoturan di sompomogunan sampai humuzas it ongoogomon dit ongoraja sompomogunan, tantu pengkakat-no vagu i Yahve di karajaan dot Israel sid Yerusalim, ka laid dit ongonabi. Rontob-nopo, pinopok om tinori-no kavi di Darius i sokovia i it ongomondurhaka diri sid saralom do toun. Kodung notori-no kavi it pendurhaka diri, pengrikot di Darius i habal di kinamanangan dau sid pentongkop di karajaan dau dot i surat di habal dino nokosurat-no sid tolu bansa o boros dot ulun (November 521 TGM) Ino habal dino alaid (tanga toun) om nokorikot-ogi sid Yerusalim om iri-ogi miningkakat-no i nabi Hagai. Iti-no o kotolu tanda di situasi di Hagai om i koposikan dit ongoginavo do razat sid Yerusalim: Nozom-no vagu i kobuatano di mad rumidi i sompomogunan di nokosuvang sid kuasa do Parsia. Manjadi i hoturan do Parsia diri hinatul-no dit ugama do Parsia, nga bozoturut it ongougama vokon, minsanko it ugama do Yahudi sid Yerusalim. Ino-no rontob, ong iadino, ino kobuatano dino, mad okonko hal di mongonsug om pohigak di harapan di bansa dot Israel ponong sid gama dau mongingkakat om mongimbulit di sambayang om panambayangan sid Yerusalim.

Sid tanga di hoturan di iadino o kinotimpunan di kinotunggaran vagu di panambayangan dot i kiroon dioti, limo toun om opongo-ogi i panambayangan. Ino-no o kogolivong di tokou, nokokuro, tu a-kosunu i koumbosihan di panambayangan hiza di varo kotulungan di raja Kurus (TGM 538-36), ko i hiza di kinoulian di kogumuo dot ulun antad sid Babil (TGM 525), ko i TGM 521, i hiza dot orunggal i hoturan do Parsia sampai oruhai-no posurut di dau om dau dot ugama. Kuran, tu suvai hiza di Hagai, i hiza dot malang-alang it ongoulun, tu varo pioduhan om gulou sid tanga do razat di sumaana di piumpugan om mosik-ogi i ginavo ponong sid kotunggaran di panambayangan. Sabap i hiza diri ogumu o gama di kogumuai dot ulun monongkudau posurut di dau om dau do kenginan om kopudan sampai okurang o kiroon ponong sid gotong royong om i kopudan dit ensanan o gamaon. Kuran-no ong sid tanga di kobuatano do pomogunan om razat di iadino nga mosik-no i ginavo dit ensanan i piumpugan pengkakat vagu di panambayangan sid Yerusalim? Ino-no ot elaan tokou tumimpa: ino-no o gama di Yahve Kinoringan momosik om potungag di piumpugan om gorija dau. Bai i tudukan di nabi o minionimban di kohuzanan om mad kimai i piumpugan sid Yerusalim.

Ong itungon tokou i di tokou do situasi om i vaza tokou mongiro om mongontupat di kavazao do hoturan do pomogunan, avantang ino ponong sid ugama ko varo kohigangan, osusa tokou monodiri dot ombo i di tokou do harapan keso: tumuku tokou sid hoturan do pomogunan om porinta om i nunu-nopo songhal di mad kadapat monusa ko posinang di tokou, ko mongining tokou sid Habal do Kovosihan. Iadko i hiza di Mustapha diri, sumurut i kosusaan posilam om tigagangon i razat kinumambang-no i piumpugan. It a-obinggori tinumalap-no sampai najadi do kotua gorija.

Sid surat di Hagai humarati tokou di kakansangan di boros di Tuhan di monimban di kokuguzo do gorija om momosik di mad nokodop om napatai o piumpugan, ino gorija di nosusaan di gama suvab-suvab om i nendorosi dit ongougama vokon di mintutuk ko ugama rasmi nokopud

om nokokuasa-no. Iti boros di Hagai diti minomosik om pinotungag vagu di piumpugan diri, hiza dot 520 tinounan guluko di Kristus. Na i boros di Hagai diri, okonko ensanan i tudukan do nokoromut sid di tokou, bai toriso-iso i linsou o boros dau. Sabap i kiroon tokou, i tudukan di Hagai diri iadko khotbah ontok di sinumambayang i piumpugan do Yahudi ontok dit adau piromutan, ino-no adau keso di vulan konom. Varo hoturan diri do kodung nabi sid panambayangan, kihak iosido do monuduk om mengkhotbah. Na i Hagai koubasan dit ongoimam di minangahatul di gama sumambayang (2,11-13). Ong itit a-ko piro ongoayat dino, bai a-ko piro linsou di tudukan di Hagai diri, ino-no apat ongoboros dit okonko enizo o vaza monuduk. Varo boros di mad miupakat om monodiri, varo-no ong mongimuhun om mamahanda, varo di manantu do hal. Ikid boros di iadino, varo-no panarangan dot, Boros di Hagai, ino-no i boros di Tuhan, ka (1,2. 3. 5. 7. 9). Ong sid Kitab Momogun amu nakamung kavi inot ongopanarangan dino, bai apajak-no sid ayat koduvo. It ulun di minongumpug dit ongoboros di Hagai diri, pinopiamung dinot ongoboros. Aso"t elaan tokou do nokosurat-no laid inot ongoboros dino ko bai hinondom dot ulun om iri-ogi nokosurat sid linundun dino. Ino-no ot atalahas, it ongoboros diti muonsi i sokoviai i tudukan di Hagai, mad onsizon i tudukan sampai inot onibak o boros dino di mad lavis nokosondot-no sid ginavo dit ongoulun di nokening di tudukan di Hagai. I harati dino, i boros di minomosik di piumpugan dot ulun Yahudi diri amu anaru o boros, okonko i mad pisok domburan, inoi nga onibak banal. Topot atarom iadko noboros sid Ibrani 4,12 i boros do Kinoringan iadko i karis di kitarom miampaping do kotogu banal. Atag do mongohondom tokou dinot ongolavis dit onibak dino.

I lavis keso (2-4) maanarang di tinomod di kopomosikan do piumpugan, ino-no, supaya i piumpugan potunggol vagu di panambayangan sid Yerusalim. Amu malang-alang i nabi, inoi nga tumoguvang di kosusaan di piumpugan. Mongimbulit i nabi di kiroon dot ongoulun sid piumpugan i retanko amu-po oriat pengkakat i panambayangan, ka. Banal-no, i hiza diri it ongoulun di nokouli antad sid Babil kakali ahatul o gamaon, tu mamanganu vagu dit ongotana om muvalai-po, supaya varo"t intoronon dioti. Kagi monombitil-po, nongokensavat i horogo do barang. I Hagai mongimbulit dit upakat dit ongoulun sid piumpugan di manantu dot atag dara ong potunggol do panambayangan. Rontob-nopo o sarangut amu-po otibang om aso-po kosukupu om kuran-kuran, okonko didino dot atag tumoguvang di tugas sid panambayangan, ka dit upakat dioti diri. Na i nabi gam mangagauk dioti: amu-po norikot i hiza bahagi di panambayangan, topot norikot-no bala ong i hiza dot ikou dino mizon sid ongovavantang o valai dit opihot om apapag di mad istana do raja, dot ino-ogi panambayangan di Tuhan nga kakali iadko pogun, ka. Okonko enizo ioti nakadapat dati do valai dot avantang. Topot i nabi mongusiba di gama posuhul di gama mongimvantang di valai om taap di dau dot intoronon mantadko it valai do Kinoringan.

1. Ong monginsosok om monodiri i nabi di tugas bahagi di panambayangan, ino-no o lavis di boros dino, Ombo ot atag do poguluvonon mangagama, i dang Kinoringan ko i dang kondiri? Pogili i nabi dot ombo ot atag. Ong nokouli-no ioti antad sid kinarakapan, gima nahatul-no i kolobusan antad sid kuasa do Kinoringan, iso-no ot atag do gamaon, monorima kaseh sid Kinoringan, ino-no potunggoron koduruk di panambayangan. Sid gamaon ponong sid Kinoringan om i sid valai dau kembulai i vaza do piumpugan om ipat-ipat it ulun Kristian, kembulai-no i mad gambal dau ponong sid Tuhan dau. Ong sid Kitab Laid, i panambayangan it tempat om ontok di gama mongoguna om mongohormat do Kinoringan. Ong sid Kitab Vagu, varo boros di Paulus dot, Ikou-no dino o panambayangan do Kinoringan (1. Kor. 3,16...) om, Ikou dino iadko babaal di napakai-no sid puvalazon. Nakavantai-kou-no sid ongorasul om it ongonabi. Ioti dino nokototol-no sid origi do kongkod, ino-no i Yesus Kristus. Iosido-no o kopihatan om kapangaan di valai dino, supaya ajadi do panambayangan dot osusi sid

Kinoringan, ka (Efesus 2,20...) ko 1. Petrus 2,5: Ikou dino iadko vatu do mizau, mokitunggol-kou-no do valai dot osundu... Manjadi iadko sid ulun Yahudi diri agazao o harati di panambayangan bahagi di kavazao dot ulun sid tinoguvangon do Kinoringan pengkaa dino i vaza tokou mamung om mongopud di piumpugan, tanda di gama tokou sumuhut om monuluk di kenginan do Kinoringan. Ino-no i lavis keso di nabi: Isai o poguluvon, ioku ko i Kinoringan.

2. Ong iadino o gama di nabi monginsosok, anangan tokou kavi di lavis dau do kuran i di tokou do pongitungan kananganko i hal do pribadi om i hal do Kinoringan. Okon-ka-ko enizo tokou mongitung-po laid di hal do pribadi, i valai, it onkob, i kabun, i ponsohorian tokou mantadko i Kinoringan om i kosurutan di gorija di Tuhan? Okon-ka-ko ogumu ot ongokosusaan, sakit, korukungan, om i-po vokon di mongohigong di tokou sid gama ponong sid piumpugan om sid Kinoringan. Ino-no i di tokou do hoturan, mogulu-po i kondiri om it onkob-ku, iri-ogi kakali i dato do hal. Suvai varo nobi ko varo-po koriatan om iri-ogi kotibang ponong sid piumpugan om ponong sid ulun sid sombol om ponong sid Kinoringan. Na ino-no ot atalahas, i nabi Hagai monodiri dot otopot o gama. Suvai kogulu i dang Kinoringan om iri-ogi i dang ulun om atag-ogi i gamaon. Kuran-no ong it ongoulun sid PCS di mangahatul dit ongopiumpugan, i Manaud Puruvan ko i ponulung? Kihak tokou momoros dot atantu iadko i Hagai ko i tokou kondiri nga ulun di monongkudau laid om iri-ogi ibibi-bibi i gamaon i dang piumpugan om Kinoringan? Na i Hagai tinoguvangan-po laid it ongoimam om it ongomangahatul do piumpugan diri (1), iri-ogi it ensanan i piumpugan (12). I harati, ino boros di momosik dit ongoginavo do piumpugan ponong sid Kinoringan kilavis-no ponong sid kavazao dit ipat-ipat it ulun om it ensanan i gamaon dau dino.

3. Banalko atarom o gama di nabi monodiri dot, i valai di Tuhan om i dikou do valai, i bai pogun di Tuhan om it dikou do valai dot apapag om avantang, i hiza bahagi di panambayangan om i hiza bahagi dikou kondiri, ka. Ong Momogun, asarok dot amu katama monondoko do boros, ong varo gama mongindaraat di kavazao om kobuatano dot ulun. Amu katama tumoguvang dot ulun, ong varo karaatan dau. Ogumu o gama mogihim do sambatan om suriban om i iadino. Topot i nabi Hagai monondoko dot, Nokokuro-ka, om, Timai-po dikou mongitung ino kobuatano dikou dino! Ino-no o lavis: I Yahve o Tuhan, okonko ikau. Sabap ino, kogulu i valai di Tuhan om iri-ogi i dikou dot intoronon.

I lavis koduvo ino-no kodim do pongitungon it ongoulun (5-6 om 9-11). I nabi mangakun om manantu di kobuatano om kosusaan di hiza diri: okurang it ula mantadko it ninasok. Torolikopo di kogumuai dot ulun. I koruzahan do pomogunan banalko ahatul. Nasak-no it ongotalaga, sinumavat it ongohorogo do koposizon. Amu miuma it ongogaji mangapus dit ongoutang. Monondoko banal i nabi di kavazao do pomogunan. Noboros-po dau i iadino, monginsosok-no i nabi dot, Nokokuro tu iadino om timpaon dau kondiri dot, Sabap kakali do iadko pogun o kematan di panambayangan, ka. Sid boros Ibrani mimbulai it a-kopitanggalan: Sabap pogun ong i panambayangan, kumansang ong i gama muvalai di dau kondiri, bai pogun ong i valai di Tuhan. Mianggan di sala om i hukum. I Kinoringan posondot di darun ko manahan di darun. I Kinoringan posuni om mongopud di pomogunan ko amu. Ong i dioti do kiroon om itungon, Sabap osusa i pomogunan, aso kotibangan potunggol di panambayangan. Na mangamabat i nabi dot, it a-agazo o ginavo dikou potunggol di panambayangan o sabap dot sumusa i pomogunan. Kodung olumpatihu i hoturan, miguli it ulun sid Kinoringan, olumpatihu-no i kavazao do pomogunan. Kodung mogidu it ulun, porosuma i gamaon dot ulun (11) mutanom om momiara do pangazam.

Induvo popuhondom i nabi dit ongoulun do Nokokuro-ka: Insasakai dikou do nokokuro tu kikosusaan-kou? Ino boros di iadino momosik di tokou, supaya mongitung ombo poguluvonon mangagama. Okon-ka ogumu o gama tokou di tasantanid-tanid o tomodon di mad monusa om

mongohigong di tugas banal tokou sid gama manaud do puruvan ko piumpugan ko i tugas ko i nunu-nopo. Malang-alang tokou sid tugas banal, tu ogumu ot ongokiroon vokon manangkut di tokou sid hal dit a-milo-milo osusa gamaon (Matius 6,33; Markus 10,29..).

I lavis kotolu dino pogili di panangan (7-8) om it atag o gamaon. Takad-kou-no, pokibabaal-kou-no, atagai-no dikou i valai-ku, ka. Tolu o suhu di minisusuhut-suhut o gama. Onibak i panangan. Osomok sid Yerusalim varo himbaan dot amu agazo banal. Sid himbaan dino, sid saralom do limo nopod toun amu noumo-no. Ong i dioti do pongitungan diri, Aso siin tokou dot idagang do babaal antad sid Libanon (minsanko hiza di Ezra (TGM 538) diri (6,4) varo"t ongababaal antad sid Libanon om i midagang di Foniki (TGM 536) Ezra 3,7). I tomodon di gama di iadino, potomon di Tuhan, gima ong kodung natagan-no i panambayangan, atalahas-no dot atantu-no i gama dioti sumambayang. Kodung otomon i Tuhan, abarakatan-no ioti. Nabahandaan-no laid di Yehezkiel 43 do kodung i kohormatan do Kinoringan gumazo sid tanga di bansa do Yahudi sampai sumampai sid panambayangan, sumondot-no i kovosihan di Tuhan sid dioti dino.

Atag do mongitung om mongohondom tokou do kuran i vaza tokou mongimpa di kohormatan di Tuhan di mongonsug di gama tokou ponong sid piumpugan. I hiza di kinembulazan di PCS kakali mosikim it ongoulun, gazo dara o ginavo dot ulun Kristian potunggol do panambayangan antad di dau om dau do kogofoo do ginavo om kosuksesan. Magavi it ongoulun diri potunggol sampai mamapag di panambayangan. Ong bianco, vokon-no ong minsanko sumambayang sid panambayangan di nagama-no, nga kohondom-ka om kohondom it ulun, tu okonko nakatabang iosido pengkakat, malang-alang-po sumuhut di kenginan do Kinoringan, tu ogumu o kenginan kondiri.

Na i laporan sid ayat 12-14 manarang do kuran i piumpugan sid Yerusalim di tinumorima di boros om bahanda di nabi sampai tinumoguvang-no sid tugas di nokogili-no di nabi i tudukan. di nabi. Ino-no i keso ot uva di bahanda: rinumonok-no i sokoviai i bansa dot Israel (12b) gima nakaharati-no ioti dot ino boros di nabi dino, antad banal sid Tuhan. Okonko i Hagai ot iningon dioti, inoi nga kondiri di Tuhan Kinoringan. Iri-ogi manantu i Hagai sid piumpugan dot kondiri di Tuhan sid tanga-no dioti do monozupo dioti. Ino boros dino koluu di boros di Yesus sid kinompusan dit Injil Matius: ioku diti mozo-vozo dikou sampai sid kovian do pomogunan, ka di Yesus. Sabap tu nopoulos-no i ginavo di bansa dot Israel, sumampai-no i kovosihan di Tuhan sid tanga dioti.

Nopoulos-po i piumpugan om it ulion dau, piniransangan-no di Tuhan i ginavo di gobinal Zerubabel om it imam om it ensanan it ongoulun, supaya kumansang ioti gumama. Suvai nopoulos-no i piumpugan om ipat-ipat it ulun, om nilombus-ogi di Tuhan i vaza dau mamakai dot ulun sid tugas dau. I koposikan dot ulun Kristian okonko bai hal do boros om kopurimanan, inoi nga kosurutan do gamaon (15). Manjadi kuran i tokou sid PCS mosik om tumungag, gima nopoulos di Habal do Kovosihan om opiransangan di palad do Kinoringan ponong sid atag o gama pohijau om potunggol di piumpugan om i gama pazazad om pasasi di Habal do Kovosihan sid tanga do razat Sabah. Vokon-no ong mad modop tokou sid saralom di kogumuo do kosusaan dit onkob kondiri om pongitungan dit aso tantu-tantu. Iti-no o sabap dot i boros di Hagai kadapat momosik di tokou om potugas di tokou sid atag o gama suvab-suvab sid tanga do piumpugan om i razat Sabah.

1,15a om 2,15-19 I kinasandatan di barakat do Kinoringan

Mad atag do mamahagi dit ayat ko-15 sid fasal keso. Ong kodori diri amu abahagi it onkofasal ko ayat. Iti-no o sabap dot oruhai popiamung i harati dit iso o hal sid hal koduvo. Ino-no o kosondoto di harati diti: Tinumimpun-no ioti gumama di koduvo nopod om apat di vulan konom, dot nopongo-po, varo-no vagu boros di Tuhan sid dioti, ino-no 2,15-19 manarang do

nopongo-no i panambayangan om nokosondot-no i barakat do Kinoringan sid dioti. Ino boros vagu antad sid Kinoringan nokembulai di tolu minggu antad di tudukan laid dit adau do piromutan, hiza do noposik-no i ginavo dot ulun sampai nokotimpun-no ioti mangatag di panambayangan. Okonko hiza do sumambayang ioti ontok dit adau do pongintaranan o poromot i Hagai di bahanda do Kinoringan, inoi nga hiza di mangagama ioti di panambayangan. Intolu mongohodtol i Hagai do "Biano",ka, ko "antad-no diti didino", ka, tu pentahan do nokotimpun-no i do hiza vagu di tanid mantadko i hiza di gulu diri. Nunu-ka i kogunaan om pitonidan dit adau diri i retanko "biano"? Ino-no, hopod om onom toun, okudik nga aso gama dioti sid panambayangan isuhut dit usul sid Ezra 5,16 ontok di toun 536 TGM. Biano-no, tu norongouno dioti i bahanda di nabi om noposikan-no i ginavo dioti, nokotimpun-no ioti mangatag dit origi, gam pavantai-no ioti dit ongolombiou di valai dino. Iti-no o sabap dot it adau do biano diti, adau dot agazo om adau do barakat do Kinoringan. Nipongontupat di nabi ioti do kuran sumimban i kobuatano do pomogunan. Ong i gulu diri, elaan-no dioti kavi, ino-no nunu-nopo it onkokoposizon, amu kouma. Toun-toun okurang i hasil mantadko it niasok. Sid tagad di varo koubasan do duvo tolu lingut, kosonglingut-po nga amu. It anggul, nga pengkaa dino. Salaid do minogihim ioti di dau do kosurutan sid valai om kabun dau, iri-no ko iri, tu mongoruzou om vitil dot agazo. Vokon-no ong minsanko mangasok om mananom, nga elaan-no laid dioti dot aso guna, tu okorop banal i tana sampai a-aradu. Topot ong biano, ka, amu-no songkuro om dumarun-no om manampangi sampai kemot di kosunuzan om kosurutan di kouvaan om gandum momusak om monguva. Ino-no i lavis di tudukan di nabi: Antad-no diti didino o barakatan-ku ikou, ka di Tuhan.

Asarok tokou mongimbulit di boros kananganko i barakat do Kinoringan, ko hiza di posurut di gama sumambayang, varo gama mindamo om poromot di barakat do Kinoringan sid piumpugan. Topot siombo-ka i barakat dino om kuran-ka kopurimon ko kumavid tokou di barakat dino? I hiza di nabi diri, tigogi varo"t ontok do nokosimban i lulupu di nokonong sid ongoulun sid Yerusalim sid barakat. Ino dino okonko ginama do riniba. Gam i sokovia i ginama dioti di mogihim di kosurutan sid gama mongumo om mananom, nga ensanan dot anangan di lulupu, tu aso hasil. Porosuma i gama dioti posurut di koposizon kondiri. Suvai nokotoguvang ioti mangatag di panambayangan om sumondot-ogi i barakat do Kinoringan.

Manjadi avantang ong humarati tokou di tudukan om i lavis di nabi dot i gama ponong sid Kinoringan ot abarakatan. Suvaiko it ongoulun Kristian mangasip om sumuhut di kenginan do Kinoringan om posurut-po di kabanaran do Kinoringan om sumondot-ogi i barakat do Kinoringan sid sokovia i kobuatano om kavazao om gagamaon dot ulun, sid ongekob om i kopiopinezan om kopianggazan dot ulun. Nakahagut-no i barakat do Kinoringan sid panambayangan. Biano nokokogos-no i barakat sid gorija om it ipat-ipat it tumpuk dot ulun Kristian do posurut di kenginan do Kinoringan (Yahya 2,21; 1. Kor. 12,27; Gal. 3,14; Efesus 1,3)

I dirii, ino barakat dino minozo di gama mangasok om mananom sampai mongomot om mongutu dit ongokouvaan. Pengkaa dino i barakat do Kinoringan okonko bai hal do rohani, inoi nga mongimbulit di kavantango sid koposizan dot ulun om sid kapangaan dit ongogamaon ko it ongokouvaan dit asapou. Atag do tumorima tokou di boros di Hagai diri sampai kumavid di hoturan di bahanda dino dot i nunu-nopo i gamaon ponong kavi sid piumpugan om sid gorija, a-milo-milo abarakatan sampai pembali do kavantango om hasil di kalabao. Sukul osodia tokou tumorima om humarap di barakat do Kinoringan.

1,15b-2,9 I nabi monginsasamod dit ongoulun dit opiduvo o ginavo.

I bahanda keso di nabi minomosik dit ulun di sid tanga dot aso harapan. I koduvo i bahanda pinentahan di barakat do Kinoringan sid ongoulun di nokotoguvang-no sid tugas sid

panambayangan. Manjadi iti kotolu bahanda diti monoguvang di kopiduvaan dot ulun, do pakansang vagu dit ongoginavo dit orukung o tomodon. I suhu sid ayat 4, *Kada-kou-no kopihoi do ginavo*, ino-no patatap dit ongoginavo dioti. Rinumosi i nabi do kumugui i kosipan dioti.

It a-ko piro it ayat diti, pengkaa dino, kogulu varo katarangan do sera i iadino i bahanda di nabi (1,15b om 2,1). I bahanda di Tuhan kiontok sid tanga do razat om tanga do politik dit ongobansa. Narait i ngaran di raja om iri-ogi i hiza sid saralom di toun diri, ino-no intanga di vulan Oktober TGM 520. Apat minggu antad di bahanda koduvo di nabi jumadi i bahanda vagu diti. Isuhut di hoturan di toun, inot adau dino, nga kovian di Pesta do poginakanan sid ongodundung ko kamatan. Isuhut di nabi Yehezkiel 45,25, ino pesta dino mad pesta rumbul satu, hiza do kamatan. Koturuan it ongoulun mintoron sid ongodundung sid kabun om tagad dot aramai ioti iadko i Yesaia 5. Osukup o kakanan om inumon.

1. Ino pesta dino minongohondom di kinopomukaan di panambayangan laid i ginama di Sulaiman om i janji do Kinoringan sid bansa dot Israel (Ulangan 31,10...) Sabap ino, minsanko i nabi Hagai nga minamakai di pesta dino sid bahanda dau kananganko i panambayangan vagu.

2. I poginakanan sid ongodundung diri kopihiza di Toun Bharu dit ongobansa diri. Sampai abad koturu GM it ongobansa minongiro dit ongotoun antad di vulan Oktober, om i bansa dot Israel minamakai di pesta dino sid gama mongohondom om mangajanji di harapan di hiza di rumikot-ogi, kuran i Kinoringan momorinta dit ensanan it ongopomogunan om ongobansa om pengkakat di dau do hoturan om karajaan do manguasa di sokovia. Sid a-ko piro it ongozabur kadapat tokou mamasa dit ongoliturgi di bansa dot Israel mongohondom di harapan sid hiza di rumikot (Zabur 47; 93; 96-99) Na i nabi mamung sid gama mongohondom do iadino om manantu do minsanko it ongobansa nga a-milo-milo tumabang momongo di panambayangan, gam i panambayangan dino o puun om panangan di sokovia i harapan dot Israel.

3. It adau di mamahanda i nabi dino adau do kinovian di pesta diri. Susuvab dino adau do gumama-no vagu, ong sukul amu mahalana. Rontob-nopo, mad alang-alang i kiroon dioti do kiguna ko aso i gamaon dioti sid panambayangan. Sabap ino mongonsug om monuhu i nabi do polombuso-no banal i gama dikou gumama, ka, mongohodtol i nabi do kuran-kuran, i gama dioti osukung di Tuhan kondiri: *sabap ioku-no diti o monulung dikou*, ka (4). Okonko nunu, sid saralom di turu"t adau sid poginakanan, a-oputut o pibabarasan dioti do minongitung do kosurutan di gama dioti mangatag di panambayangan. It ongogulu-gulu diri minongohondom di kobuatano laid di kavantango di panambayangan sid Yerusalem, it amu-po rinungoi di Nebukadnezar. It ulun di labaan do valu nopod toun ot umul nakadapat-po mongohondom di panambayangan laid, it norungoi di TGM 587. Ioti diri anganak-po i hiza di kinorungazan om kinarakapan sid Babel. Baiko minurung-burung-po ioti ongogulu-gulu sid gama mungkolu di panambayangan diri om i kagama do banalko agazo o pitonidan. Bai tolu minggu nakapangagama ioti sid bongunan dino dot aso tantu-tantu i babaal ko i kosukupu vokon. Topot it ongogulu-gulu kakali kohondom di panambayangan laid di ginama di Sulaiman. Ong mamasa tokou sid 1. Raja 5,27..., ongo 30 000 ot ulun do minokibabaal sid himbaan sid Libanon, varo-po 80 000 ot ulun di galaman do monodia dit ongovatu om varo-po"t 70 000 it ulun di minangakut dit ongokosukupu porikot sid panambayangan diri. Topot ioti"t ongoulun sid Yerusalem di nokouli antad sid Babil, otigas ioti om orukung o guvas om pongitangan sampai opupusan, nohuzan sid tanga do ralan om nokorikot-ogi sid pomogunan di monombitil om nozongou-no, tu limo-no nopod toun dot amu-no atanaman om opiara. Ong i raja Sulaiman diri, nga minanansanganu om minomorinta do sokovia it ongobansa sid watas om pialatan do Assur om Masir sampai nokelo i Sulaiman miupakat dit ongobansa. Osukup it ongoamas om it ongobabaal dot avantang antad sid Libanon om it ongovatu. Topot ong i hiza dino, bai minokibabaal sid govuton do Yerusalem om minongopuhul di vatu sid pogun. Iti-no o sabap do

miloloburung-no it ongoulun gulu-gulu dot banalko aso katagan om panangan di gama potunggol vagu do panambayangan. Na i Hagai mongimbulit di kopiduvaa di ginavo dioti dino di mangalalau di ginavo dit ensanan it piumpugan siri. Ioti ongogulu-gulu okonko nakatabang-po sid puvavalazan vagu. Ioti bai mimot om manazu di valai kagagama koingkakat vagu sampai pokihi di gama dino, aso guna i gama di iadino, ka dioti.

Ong otopot, asarok do varo gama do iadino sid tanga do gorija om piumpugan dot ulun Kristian, manazu, tu i gulu diri avantang mantadko ino biano, i kogooso di gama pengkakat do gorija ko i vaza miumpug ko mongonsug dot ulun sumuvang ko i retanko aso Sundu ong biano. Ogumu ot ongovaza om sabap di pokihi di kobuatano do gorija biano om i vaza mangasip om sumuhut di kenginan do Kinoringan. Na i bahanda di nabi monoguvang di turunan vagu, it ongoomulok di nosodia-no posurut om polombus di gama potunggol om mongusaha di gama do gorija. Aso guna ong bai kumovili sid hiza di nakatalib ko lumangad di kodori. Atag-no ong tumatap banal om tumoguvang om posurut di gama ponong sid panambayangan om piumpugan. Sabap i Tuhan o mozo-vozo dikou, ka. Antad di kinotimpunaan do varo bansa dot Israel (sid Masir), ino-no ko ino i Tuhan i mozo-vozo om mamarakat dioti, sabap nakapangajaji-no i Tuhan sid bansa dino dot iosido mozo-vozo, gam lumuzung sid dioti. Ong i kakal-po ioti sid belantara, varo mad kavut om varo mad binahang dot apui ong ontok do sodop, supaya oluhungan i bansa do Kinoringan di kohormatan om kovosihan do Kinoringan. Pengkaa dino i tokou ulun Kristian, ong varo kiroon dot okugui i gorija ko opiduvo i ginavo tokou, sabap okurang o harapan om kosurutan do gorija, ino-no it atag do hondomon om kovidan, ino-no, mozo-vozo-no i Tuhan do monunda om monukung sampai pakansang di tokou. Ong sukul mongohondom tokou di vaza di Tuhan momozo om monunda di tokou, kogoos om akansang tokou tumoguvang di nunu-nopo songtugas sid piumpugan om gorija.

Varo-po bahanda koduvo (6-9) do mongonsug di tokou posurut di kotunggaran do panambayangan. Ino boros dino monuduk di tokou do kuran i vaza dit ongobahanda dit ongonabi kakananganko i hiza di sid tohudi patatap di gorija sid tugas di suvab-suvab. Sabap i bahanda di iadino amu mangagazad dit ongoulun do bai humarap-po sid surga do pemozoon-no ong gama om kopolisan do suvab-suvab, inoi nga pakansang di kosipan, supaya kogoos sid tanga di kosusaan dit adau dino, gima kiharapan do varo rikoton om panangan. Ino boros dot, *oduruk-no om anggagon-ku it avan om i tana om i rahat*, ka, pentahan do iadko i gama do Kinoringan momurugou di hoturan do pomogunan, hiza di minonori i Kurus di karajaan do Babil (Yesaia 45), pengkaa dino varo vago gama do Kinoringan monimban di hoturan do sompomogunan. Manantu i nabi sid ongoulun dot Israel, on murugou i sompomogunan, antad kavi sid palad do Kinoringan. I sokovia i kobuatano om kosunuan sid sompomogunan, hinatul om tinaud om inontupat di Tuhan. I boros di iadino manantu om mongimbulit di bahanda laid di Yesaia 2,1-5 om Mikha 4,1-5 dot it ongobansa rumikot sid Yerusalim, tu mongohormat do Kinoringan. Iadko i Tuhan o minomosik di bansa dau, supaya magavi ioti potunggol di panambayangan o gama do Kinoringan momosik om mongonsug dit ongobansa ponong sid panambayangan dau. Sino-no o kotulukan di karamazan om kosinangan di bansa do Kinoringan (9). Sabap ino, onsugon di nabi it ongoulun tumatap om magavi sid gama potunggol di panambayangan sampai opongo. Sabap i panambayangan sid Yerusalim o panangan om rikoton di sokovia i it ongobansa.

Kagi, ong iovit-no it ongoamas om perak om it ongokolunduan sid panambayangan, kiguna banal inot ongokolunduan dino bahagi di kohormatan do Kinoringan. Sabap dang Kinoringan kavi ino. I bahanda di iadino minongonsug dioti, do minsanko ioti sid Yerusalim oupus-no, tu aso-no kosukupan muvalai om okurang-no banal it ongoharata om ongopomburuan bahagi di panambayangan diri.

Ong mongitung tokou do kuran i boros om bahanda di Hagai diri, tantu amu kosunu ino kavi isuhut do kohorotizan om harapan dot ulun. Tu ino valai do panambayangan diri amu nokerad di panambayangan di ginama di Sulaiman. Opihoi it ongorinding om mad bai pongodumparan i ginama dino. Topot kakali ong ino tudukan di Hagai minongonsug om pinatatap di piumpugan sid Yerusalim diri sid gama om kosipan dioti. Kagi ino boros dino o pinosuntuan laid di Tuhan Yesus, i minomoros iosido do mongohuzas di panambayangan (di guvas dau) om poturug vagu dot opongo sid saralom do kotoluvan-no. Ontok di Pentakosta om nohorotizan-ogi dit ongoulun sid Yerusalim dot ino-no o panangan di niturugnnan i panambayangan bahagi dit ensanan i riniba, ino-no i gorija sompomogunan. Nakapangatod-no laid it ongomajus di tanda d kolunduo do sompomogunan hiza dit anak-po i Yesus, i kakal-po sid susumadan. Sabap ino i bahanda di Hagai kiontok bahagi di tokou gorija di Kristus. Nakamung tokou sid tugas do poturug om pengkakat sampai pongopud di gorija di mad panambayangan di Kristus. I sokovia i gama tokou bahagi do gorija mad gama ponong kavi sid kengkakatan di karajaan do Kinoringan, songkuro-nopo okugui tokou ko i malang-alang sid piumpugan. Kondiri di Yesus minomoros dot *okudik ong it tumabang (Mat. 9,37)*. Atag do mongohondom om rumamit tokou di boros dot, *Oduruk-no om anggagon-ku it avan...* (6), supaya magavi tokou tumabang do gorija dot iseso o ginavo tokou ponong sid Kinoringan. Pengkaa dino atarang i boros di nabi dot, *Siti-no o panahakon-ku do karamazan...* (9). Ensanan i hal do Kinoringan okonko hal do pribadi ko i unu-nopo, isuhut dit ongokenginan om kiroon dot ulun, inoi nga bai iso-no o guvas di Kristus, ino-no i gorija, bai iso.no o meja di Tuhan om ensanan it ongovatu, nakamung sid iso-no o valai di Tuhan. Kagi ong varo bahanda do varo kosinangan, ino kosinangan dino okonko bai hal, ong minatai-no it ulun, nga retanko sid surga-no, inoi nga i kosukupu sid pomogunan, i miuma it akanon dot ulun, it aso pioduhan, i kopioondusan om koposizan di kilaba-po (Yahya 10,10). Ino-no o nihodtol di nabi, Suvai sid panambayangan (sid gorija), tu kopitoguvang tokou do Kinoringan om sino-no miuumpug i sokovia i it ulun om manganu di koposizan om kosinangan.

2,10-14 I nabi monginsosok dit ongoimam

Tanid-no vagu i gama di nabi Hagai pembulai ombo it atag o gama om amu. I surat do mongusul do kuran di nabi do nokotoronong sid ongoimam, supaya it ongoimam mongolumbatos mangaratu do kovosihan. Sabap varo gagut sid tanga dit ongoulun di mitatabang pengkakat di panambayangan. Valu-ogi minggu kinoturugan di panambayangan, varo-no kopiduvaan di vaza dioti humarati dot ombo it atag sid panambayangan, ombo it osusi om it amu.

Na noboros-no laid sid hoturan di Musa Ulangan 17,11 *Suhuto-no i nunu-nopo i hukum om onsug dit ongoimam om kadan-no monimban di pinonuhuan ponong sid gibang ko ponong sid vanan.*

Manjadi duvo o duaton di Hagai sid ongoimam, ino-no:

1. kuran ot onsi di nanu sid persambaan, i nokohigil-no sid ongokakanan vokon, tu rumaliu-no i kosusian sid ongokakanan vokon ko kuran, ka. Na it ambat dit ongoimam, Amu rumaliu i kosusian antad sid onsi dino sid ongobarang vokon.

2. Kuran ong kumuhamang-po do bangkai om tumudu-ogi dot akanon? Ong ulun do iadino akavasa gumavul sid piumpugan ko milang sid poginakanan, isuhut di boros sid Imamat 22,4 ko Bilangan 9,6... Ino dino atalahas-no laid. Na monginsosok i nabi do kuran, ong kotudu do kakanan, sumakau i kakanan sampai asakau-no i kakanan dino bahagi dit ulun dit obinsuhut di pinonuhuan, ka? Na it ambat dit ongoimam, Banal-no, rumaliu it asakau, sabap i kasakaho rumaliu. Nolumbatos-po i iadino, kadapat-no i nabi manarang dot, ong i kosusian, amu karaliu, bai i kasakaho o rumaliu. Sabap ino osusa mongontupat, supaya amu ohigilan do kasakaho.

Na suvai sid ayat 14 om ohorotizan tokou do kuran dioti mokitarang dit ongonabi di hal dino.

Mad amu atarang banal i kosolinan sid Kitab Momogun sid ayat 14. Lobipo atarang ong, *Iadino nagama-no di bansa dot Israel om iadino notiiman-no dit ongobansa vokon*. Peradon di Hagai i bansa dot Israel (AM ong Ibrani ko Umma) om it ongobansa vokon (Goi ko kafir).

Ong i tokou biano amu oruhai humarati di gama di nabi monodiri dot AM om GOI. Topot ong it ulun di nokening di tudukan di nabi, mad oruhai rumamit di boros di nabi. Gam i nabi minonuduk dot isai it ongoulun i retanko GOI. Tu i boros dau, *nunu-nopo i nisamba dioti sid meja diti, nga asakau kavi*, ka. Ong monuduk i nabi dot, Dioti, ka, varo dati"t ongoulun di nakagavul sid Yerusalim dit okonko bansa do Yahudi. Banal-no, i toun 536 TGM natagan-no laid i padaha sid panambayanan bahagi di persembaan di tunuvan (Ezra 3,3). Minsanko it ongoulun di nokezon sid Yerusalim, hiza do narakop-no it ongoulun Yahudi, mad nakamung-no sid gama monunu do dupot i retanko bahagi di Yahve om kopihiza do pinasamba ioti sid ongorogon di dau do bansa. Sid 2. Raja 17,24... varo boros dot i iadino i gama dit ongoulun do Samaria. Yesaia 56,9; 57,1-13 om 65,11 manarang i nabi Yesaia di kobuatano dioti dino. Isuhut di boros di Ezra 4,1-5 inot ongoulun i ngaran dioti Samaria minangasau di pengkakatan di panambayanan diri, gima rinumosi ioti dot it ulun di nokouli-no antad sid Babil om it ongoulun sid daerah do Yahuda nga mongimbulit-no di hoturan laid sid Yerusalim. A-koho ioti dot osimban i dioti do hoturan om koubasan mangahatul om manansanganu di pomogunan. Varo dati nakagavul dit ongoturunan di pokihi di hoturan do Yerusalim, iadko it angaki dioti di nokosuhut di hoturan di Yerobeam diri (1. Rajaa 12), i tinumongkizad antad sid hoturan di Sulaiman. Na hiza di nokosurut-no i panambayanan, ontok di kovian di TGM 520, minamung-no ioti sid gama manahak do persembaan, ino-no dupot di hompuvon-ko sorobon, isuhut di hoturan laid di Musa, tu i kenginan dioti, sumasi dot minsanko ioti nga mangasipi om humarapi sampai sumamba sid Yahve. Nakaharati-no dati ioti dot kodung sinukung di raja Darius i piumpugan sid Yerusalim, aso-no tinganan dioti sumaap. Iti-no o sabap do tumanggungai-no dara ioti mamung sid gama pasamba do dupot. Gam gumavul-po ioti sid rukut bahagi di panambayanan, sukul aandus om otorima ioti sid razat om hoturanon-no vagu. Manjadi sid pialatan dit ongoulun di nokouli antad sid Babil varo"t a-ko piro ot avantangan di gama dit ulun do Samaria mamung om monulung sampai gumavul mongorukut om i gama sid panambayanan.

Manjadi iti-no i kosusaan diri, nopoulosan-no i kosipan dit ongoulun di nokouli antad sid Babil sampai nokotimpuun-no ioti potunggol di panambayanan antad sid kosipan dit ohijau-no vagu sumuhut di suhu om kenginan di Tuhan. Tanid mantadko ino varo-po"t ulun vokon sid Yerusalim i misingtatap dara sid Kinoringan, dot ong otopot, aso tantu-tantu o kosipan, gam isuhut di kobuatano do pomogunan iadko bondira di tonguson do barat om mad iku do barangkas ioti dino, sukul mopud ioti sid kohuntungan do pomogunan. Minsanko maliu sid ugama vokon, ino-no i gama dot ulun di iadino. Ino kobuatano om kavazao dot ulun, okonko aso"t elaan tokou sid Sabah. Na i nabi Hagai amu mangakun di kobuatano om gama popigagavul di iadino. Gam mimbulai i kopioduhan do Yahudi om Samaria, i kakali varo sampai hiza di Yesus (imatai sid Lukas 9,51.. ko Yahya 4,9...)

Amu enizo it ongoulun sid piumpugan minongitung di iadko i nabi. Gam varo minongiro dot osuhul ong varo"t ulun vokon tumabang muvalai ko monuvang do kosukupu sid rukut bahagi di panambayanan. Kagi, sid tohudi, ensanan it ongobansa sumuhut sid Kinoringan. Ong iadino, osuhul do mamung laid ioti tumabang om monukung di gama sid panambayanan do Yerusalim, ka dati dioti dino. Kagi, ong i nokentoron inot ulun dino dot alaid-laid sid Yerusalim, varo-no kosukupu dioti om osinang-no ioti gumavul sid gama sid panambayanan. Ong it ulun di kouli antad sid Babil, ogumu o kosusaan dioti mogihim do monukup do koposizon ko monodia di dau dot intoronon om i iadino ko mangatag di kabun dau. Okon-ka ko

ino gama dioti mamung diri nga kenginan-no laid do Kinoringan, ka di pongitungan dioti dino. Na i nabi monodiri di gama mamakai dit timpa dit ongoimam. Iti-no o lavis di bahanda di nabi. Bianco agazo o tugas, ino-no pengkakat di panambayangan dot i piumpugan dot ulun di nokouli-no ot inanu do Kinoringan pengkakat di paanambayangan. Suvai atarang i kosipan dioti om kogoos-ogi ioti sid tugas dino om varo-ogi kapangaan. Ong gumavul it ongoulun vokon sid aso tantu-tantu o kosipan om vangun, okonko ikou kadapat polombus sid dioti di kosipan dikou, tu malang-alang om ohuzan-kou sampai amu-kou kogoos poturug kondiri, gam ikou atarik-no sid kavazao dioti dit aso tantu-tantu sampai sumuhut dit asakau. Okonko i kosusian dikou o rumaliu sid dioti, gam i kasakahan dioti o rumaliu om panakit dikou. I bahanda di nabi miabal di tudukan di nabi Elia diri dot a-kavasa do popigavul dit ongougama om i vaza pasamba sid Yahve om it ongorogon.

Ong i tokou PCS bianco, atag do monodiri tokou do kuran ot atag o gama pengkakat do piumpugan om gorija. Suvai antad sid agazo o ginavo om atarang-ogi o kosipan dot ulun om varo-ogi kotulungan dit atag om varo-no gama patatap om pakansang do piumpugan. Amu atag do pagavul sid piumpugan do karaatan ko kumodom tokou, supaya amu kemot do karaatan dot ulun di kakali sid tanga do piumpugan, gam mamung sid gama mangahatul om mangagazad do piumpugan. Okonko i panangan dit osusi o kadapat monusi di pakakas dit araat om asakau, gam it araat o vaza mongorongoi om mongunang dit avantang o panangan. Suvai atarang o gama monodiri om kosunu-ogi i boros di nabi Hagai (2,19) Antad-no diti didino o barakatan-ku ikou, ka di Tuhan.

2,20-23 I mongontok di Tuhan Kinoringan

Tanid mantadko it ongobahanda vokon di nabi, varo-po boros om bahanda sid iso ot ulun, ino-no i gobinal Zerubabel. Oimbulit-no vagu i bahanda laid sid 2,6..., ino gama do Kinoringan ponong sid songovinangun ontok dit tohudi"d adau. Rontob-nopo, ino bahanda dino kilavis sid iso it ulun. Kaluto ong amu oruhai i tugas di gobinal, i ponuhu di karajaan do Parsia, gima ensanan it ongoulun do Yerusalim nokosuvang sid hoturan dau om iosido, nga sumuhut nohoturan di raja do Parsia. I bahanda dino nokopihiza di bahanda laid (2,15-19), i minonodiri dit ulun om i kosipan dioti. Ong sumuhut i Zerubabel di hukum di nabi, a-koho iosido do gumavul it ongoulun labus sid piumpugan pengkakat di panambayangan, varo dati"t ikasana om o kohungoto dioti. Om it ulion di Zerubabel, nga amu ozi do iadino o gama di Zerubabel monodiri. Manjadi i bahanda diti monukung om mangalapis di tugas di Zerubabel, it ulun di minangahatul di piumpugan sid Yerusalim. Pentahan i nabi sid di Zerubabel do kuran-kuran, it ongokuasa do sompomogunan, nga humaba om tumanus sid ongorumpak om sid ongokosusaan vokon. I hiza diri, ombo i raja di varo sojal di sumako do kuda ko nokoudan sid kurita do rumpak, ino-no ot akansang om oruhai monoruvang sid pomogunan vokon om monori di sangod. Topot ino kavi dino tumanus sid tinoguvangon do Kinoringan i monguasa di sokoviai. Banal-no hiza di Hagai, minsanko sid karajaan do Parsia ogumu o gama mioduw om mititibas iadko i raja Kambuses om i Darius di miobpinai, nga mipapataii.

Na i bahanda bahagi di Zerubabel dino, varo tolu o panarangan di mad osundu:

1. i Tuhan momungaran di Zerubabel dot, URIPON-KU. Ino pongoretan dino mad garal om pangkat. Ong uripon di raja (2. Raja 2,12) ino-no o harati montiri besar, i mangahatul di pomogunan om mongusaha di sokoviai i kenginan di raja. Iosido dino ulun dot agazo o harapan di raja. I Yeremia mamakai di pongoretan dino bahagi di Nebukadnezar (Yeremia 27,6) ko i Yehezkiel mamakai di pongoretan bahagi dit muaki di Daud (34,23 om 37,24). Pengkaa dino i Yesaia momungaran di harapan dot URIPON DI TUHAN (42,1 om vokon). Antad diri ino-no o jinumadi di pongoretan do garal om pangkat di Kristus ko Almaseh ko Minananggung.

2. I boros sid Kitab Momogun, *pangkaton-ku do momorinta sid ngaran-ku*, ka (23), ong sid

boros Ibrani o harati, onuvon-ku ikau do sinsing di cap do ponumbuk, ino-no i tanda dot ipamanal i surat di nakasain om notumbukan-no di sinsing dino kihak-no. Na i hiza do manalin di Kitab sid Boros Momogun, apaganan-no do polombus di harati dino. Topot i suriban do sinsing do ponumbuk ko sijil, varo tradisi sid Kitab, ino-no sid Yeremia 22,24 varo boros di Tuhan dot, minsanko i sinsing di raja Yoyahin sid palad-ku, kakal iduon-ku, ka. Ino-no i harati, i ponumbuk, vokon-no ong sid sinsing, vokon-no iginid sid liou ko tinggolon napakai iadko golong, nga varo tanda ko ngaran di sanganu. Manjadi isai-nopo i kumavid di ponumbuk dino kikuasa mantadko i sanganu mongontok di sanganu (imatai 1. Raja 21,8). Okonko varo boros di nabi dot atahakan i Zerubabel di Kinoringan i ponumbukan, inoi nga i Zerubabel inanu di Kinoringan do ponumbuk dau. I harati, a-milo-milo i Zerubabel nga dang Kinoringan om tanda do Kinoringan monguasa di sokoviai.

3. Ikau dino o nopili-ku, ka. Ong i Yoyahin diri niada-no do Kinoringan. Topot i Zerubabel nopili-no do Kinoringan. Antad di tuturan di Yesus nohorotizan-ogi dot okonko it ulun di retan Zerubabel o noboros om narait sino, inoi nga i muaki di raja Daud. Tu banal-no om banalko i Zerubabel nga turunani di Daud. Asarok-no laid do varo boros dot i muaki lombus di Daud o jumadi do harapan vagu di bansa dot Israel om it ensanan it ongobansa. Na sid kiroon om boroson di Hagai, mad i Zerubabel it ulun di boroson do harapan laid diri (2. Samuel 7,12; Amos 9; Yesaia 9; Yehezkiel 34). Topot i diri it ulun di rumikot-ogi o boroson. Na sid bahanda di Hagai mad nokosunu-no i bahanda laid diri. Aso boros vagu sid surat di Hagai do kosondoto di iadino, tu amu kosunu it adau dino i retanko *ino hiza dino*, ka. Iti-no i suromo do Kinoringan dot i bansa dot Israel kakali monginud do limo natus-po toun. Iri-ogi nokorikot it URIPON-KU, om sijil-ku, i nopili-ku. Na i tokou ulun Kristian rontob humarati di Zerubabel do mongontok di Tuhan diri bahagi di piumpugan sid Yerusalim di songrosi-rosi sid tanga do kosusaan om kogugul i pomogunan. Na i tokou diti ulun Kristian kumavid di boros di Hagai iadko boros di manantu di Tuhan Yesus do harapan do gorija, dot ino boros do mongoho i Kinoringan sid ulun di harapan dau, nga kopihiza di tiag do Kinoringan sid nunu-nopo songgama di pagavul do karaatan sid kosipan. Okonko it ongoharapan om ongokuasa do pomogunan o kopihatan do gorija om it ipat-ipat it ulun Kristian, inoi nga i kuasa do Kinoringan i nokosondot sid di tokou sid saralom di Habal do Kovosihan. Manjadi iadko i piumpugan sid Yerusalim diri tinumatap, gima varo bahanda bahagi di Zerubabel, lobipo i tokou diti, i mopud om kumavid di Habal do Kovosihan sampai jumadi tokou di guvas di Kristus om i panambayanan do mizau sampai i sasi om sijil ponong sid songriniba om songvinangun, hiza dot osinang om hiza dot osusa, hiza dot ogugul i pomogunan ko oruzahan i pomogunan. I Hagai monuduk di tokou do humarap om tumimpan ponong sid tohudi, hiza dit ohuzas i hoturan dit ongopomogunan om ahaba it ongokikuasa om tumanus it ongomangahatul do pomogunan. Sabap i sokoviai it ongotuhan om ongokuasa do pomogunan, nga tumanus-no. Topot i di tokou do Tuhan, tantu rumikot-no vagu om potungag di karajaan om hoturan dau.

I NABI OBAYA

Iti buuk di nabi Obaya it opodok banal o buuk sid pongumpugan dit hopod om duvo it ongonabi. I tajuk di buuk dino, I nsosorou di nabi Obaya (1) Bai duvo nopod om iso ayat om navi-ogi i buuk dino. Bai i ngaran di nabi ot elaan tokou, aso boros do sera ko siombo ko siongo antad iosido om isai o koruhang ko koubasan dau. Minsanko i ngaran dau amu atantu, tu i harati di ngaran dau, ino-no Uripin di Tuhan (abed Yahwe) miabal di ngaran sid Silam Abdul = Abed Allah). Topot minsanko ino bai kokoluvon, okonko varo panarangan di siombo-nopo dot bai nipungaranan dot ulun. i nabi dit aso ngaran.

Varo tolu o bahagi di surat diti, ino-no, 1-15 i sorou ponong sid bansa dot Edom, iri-ogi 16-18 i

bahanda bahagi dit Adau di Yahwe, ino-no bahanda bahagi di bansa do Yahuda. I bahagi kotolu bahagi dit ongoulun di narakop sid Babil, retanko varo koulian dioti sampai kadapat vagu do tana om mingkakat vagu i karajaan dot Israel.

Na i bahagi keso, i sorou ponong sid bansa dot Edom dino, ensanan bai hukuman di mononsuli i Kinoringan sid dioti i karatan dioti hiza di minamung sid gama mongorongoi di kuta Yerusalim. Ino-no ot kiro, i nabi kakali andaman ino kinorungazan dino hiza di TGM 586. Gam sid Yeremia 49,7-22 oimbulit inot a-ko piro it ayat di Obaya dino.

Na i bahagi koduvo, mad tanid o hiza om kinembulazan om tanid o panangan, ino-no manarang dit Adau di Tuhan, di nentahan-no laid sid ayat 15. Okonko bai i bansa dot Edom o momurimon dit Adau dino, inoi nga i sokoviai it ongobansa. Ong sid bansa dot Israel, inot adau di Tuhan Adau do kosopulan, topot ong sid ongobasna voko, nga adau do hukuman om kotonusan, ka.

Sid kovian i nabi panarang di kosondoto dit adau di Tuhan bahagi di bansa dot Israel, tu mongulit vagu i Kinoringan di kobuatano laid dot Israel, ino-no i karajaan di dang Kinoringan, iadko i hiza di raja Daud diri.

Manjadi i nabi Obaya dino, ulun di nopung-no sid daerah do Yahuda hiza di narakop-no it ongoulun om inovit-no sid Babil om it ongopomogunan vokon. Amu nokovozi iosido dit ongoulun di minogidu sid Masir. Iosido dino ulun di kakali minangasip om hinumarap sid Yahwe sampai nakaharap dot i Kinoringan pengkakat di kabanaran dau sid tanga dioti. Nakaharati iosido dot i hukuman bahagi di bansa dot Israel om Yahuda, nga vaza do Kinoringan potorongoi om pouli di bansa dau sid dau do tunda om tinaud, okonko sid kobinasaan o rikoton. Bai it ongobansa di nakatabang om minikunsi do mongorongoi di bansa dot Israel om Yahuda, nga ohukuman do sid kotonusan o rikoton. Ong impurason tokou it usuran dit ongobansa, banal-banal, i bansa dot Israel, kakali elaan tokou do songkuro-nopo o kinosusaan ot hinajangan ioti diri do sampai bianco. Topot ong it ongobansa vokon, mad aso-no bianco di kakali mangarait dit ongongaran di karajaan kodori diri.

ayat 1. Ino dino tajuk di surat di nabi Obaya. Ino retanko sorou di Obaya, miabal di boros sid Yesaya 1,1; 2,1 ko Nahum 1,1 om Habakuk 1,1, ino-no o harati, kentalangan ko bahanda di nabi antad sid suhu do Kinoringan poromut sid ongoulun di kenginan do Kinoringan ko i kuran i Kinoringan mangahatul di pomogunan sid gama mongira ko mongohukum. Okonko riniba mongitung ko mangalu-kalu, inoi nga Kinoringan mumbongut om pentahan sid piumpugan om it ongoulun di dau do kovosihan ko ira om pajal. Iti-no o sabap, ong mumbongut i nabi, aso tenganan do dumahava di boros dau ko moniag mangahabal, iadko i Imam Amazia sid betel diri di minoniag di Amos. Sabap isot ulun nga aso kadapat manahan om monobon di boros do Kinoringan. I nabi a-milo-milo momoros om polombus om poromut sid ongoulun di boros do Kinoringan. (Imatai sid Amos 3,3-8) Na i sorou ponong sid bansa dot Edom dino miabal dit ongosorou dit ongonabi vokon, i Yehezkiel 35, Yeremia 25,15 ko Maleaki 1,2 om Zabur 137,7) Ino bansa dot Edom nga turunan di Esau, it obpinai di Yakub, i harati, songobpinai ioti di bansa dot Israel. Ong hiza di raja Daud, nokosuvang i Edom sid karajaan dot Israel. Topot asarok varo kopisaapan om kopioduhan dot isai o kikuasa do momorinta di vokon. Ontok di abad ko-8, nakalbus i Edom sid kuasa dot karajaan dot Israel. Kodung i karajaan do Babil minongorumpak di bansa dot Israel om Yahuda, minamung i Edom sid sangod do sumana dioti o tomodon. Norongoi-po ino duvo i karajaan dino (Israel Utara om Yahuda), hinumambil i bansa dot Edom sid ongodaerah om tana dot Israel om Yahuda. Iti-no o sabap dot it ongoulun do Yahuda di nopung sid pomogunan dau banalko hinumungot om sinumana di bansa dot Edom. Ino hungot dino mimbulai-po sid sorou di Obaya.

Monuturan-no i Obaya do nogutika dau sampai inimuhun di Tuhan bahagi di bansa dot Edom. Ino-no, kondiri di Kinoringan minonuhu do susuhuon, malaikat di minsamung dit ongobansa. Dot napajak-po nakarait it ongobansa, tigogi mimbulai dot ombo o bansa ot orikoton di susuhuon do Kinoringan, ino-no i bansa dot Edom. Sabap i Kinoringan manansanganu om momorinta di sokoviai it ongobansa, minsanko i bansa dot edom, nga nokosuvang sid kuasa om tunda dau, ponong sid katagan om ponong sid kobinasaan. Ong ohukuman i bansa dot Edom, ino hukum dino kosunu om kopihagut sid hukuman di Yahya ontok dit Adau di Yahwe (15). Ong sid nabi Yoel, iadino o vaza dau manarang, sid ongokobuatano sid tanga do riniba, iadko koruzahan ko kosusaan do butu, nga

mimbulai i hukuman do Kinoringan di mad hukuman do penlaid. I sokoviai it usuran dit ongobansa ohoturan om osukatan om otimbangan di hukuman do Kinoringan ontok dit adau di Tuhan.

2-4 Kondiri di Kinoringan mongusiba om pokugui di bansa dot Edom dit oholian minomuruvak, om it ongobansa mamung sid gama mongusiba dot Edom. Ong mumbongut i Kinoringan do varo gamaon dau, mad nopongo laid i gama dino. Oholian osumbung i bansa dot edom, gima varot a-ko piro o burul dit asavat om varo-po ongokuta sid ongoburul dino, retanko tumalib di sokoviai i vokon, ka. Ino-no i hoturan do Kinoringan, it ulun om i bansa i monginsavat di kondiri, nga ousiba om insibakno. Ino gama momuruvak om mokisususmbung monipu di kondiri, retanko apapag it ongokuta dioti dot aso tanganansaapon. Ino hoturan do Kinoringan mopud sampai bianco, it ulun di mongitung do banalko ahatul i kosipan dau do bai iosido ot otopot mangasip,ka, togogi, kotongkihal. Om i rasul mongimuhun om ipongontupot o boros dot, It ulun di mongitung do kengkakat iosido dot apapag o kengkakatan dau, atag do mongitung iosido, supaya amu tumongkihal om rumatu ko humaba, ka. Ioti Ongoedom minomoros sampai pinoperad dit ongokuta di rumun do koniu sid timpak dit ongoburul dot isot ulun nga aso korikot sid rumun dino, nga i ambat do Kinoringan, minsanko sid ongokorimbutuon-kou monongkuta-kou, kakali kotivol i palad-ku do mangahaba dikou, ka. Sid boros di iadino mimbulai do kuran i Kinoringan i Monguasa di sokoviai. Iti-no kagi i kinososizan dit ongouun dot Israel.

5-6 Narampasan i pomogunan dot Edom.

Sid lagu do mogkorudu i nabi manarang do kuran arampasan i pomogunan dot Edom. Iadko i gama dioti diri monolod do tana om it ongokabun dot Israel om Yahuda o gama dit ongobansa mangavi dit ongobarang om kosukupu dot Edom. I mangarampas iadko it ongouun di mongotu dit uva dot anggul dit amu mangalai do bai iso ot uva om panarangan dot anggul, pengkaa dino ovian banal i kolunduo om kosukupu dit ongoulun dot Edom. Ong i retanko dioti dot apapag it ongokuta dot aso tanganan suvangon, inot ongomangarampas kosoruvang dot aso tanganan tahanon ko sunsubon. Ong moniim it ongoulun dot Edom du sumunsut om sumondu sid ongobansa di nokokoruhang laid diri, tigogi, osunsub ioti sino dot a-kadapat ioti do mokisapul ko mokitabang dioti. Ino-no it ongoanggai sid karaatan, ong kodung iosido ot anangan do karaatan, tigogi, natanus-no it anggai sampai osunsub iosido di retanko anggai dau diri. Ino kinahajangan dioti dino koluu di hinajangan di bansa do Yahuda. Tu hiza dot akansang i Yahuda, kikoruhang om kianggai iosido sid ongobansa. Suvai okugui i bansa do Yahuda om tinumimpuun-no it ongoanggai laid do manakau om monolod di tana om ongokampong om daerah do Yahuda.

8-9 I kinorungazan di karajaan dot Edom.

Insanpo dino mumbongut i Kinoringan ponong sid bansa dot Edom. Mangalapis i Kinoringan di hukuman dau sampai momihot di boros dau laid dino, ino-no, tumanus it ongoulun dit elo. It ongoulun sid Taman, retanko i mononsiou, nga otonusani. Mavi matai, ka.

10-11 manarang di sabap di hukuman di Tuhan. Ino-no, amu nokonong i gama dot Edom ponong sid Israel om Yahuda. I hiza dot orumpakan i Yahuda om Israel, vokon-no bai minongimot i bansa dot Edom do kuran o kapangaan, vokon-no gam minamung-po maanangod dioti dino. Iti-no it agazo o sala di bansa dot Edom, ka. Sabap kodung obpinai, ino-no it atag o gama dot obpinai, monulung om manapul dit obpinai. Topot ong Edom pinosimozo dit obpinai dau, gam minokihuntung-po sid kinosusaan dioti dino. Okonko bai otomon i bansa dot Edom i hiza do norungoi-no i kuta do Yerusalim sampai nohuzas-no i panambayangan sino, gam minamung ioti do mangarampas dit ombo i nalazan mangarampas it ongosojal do Babil. Kagi, i Nebukadnezar diri minongodim-po di tantara dot Edom do mamung sid dau do tentara (2. Raja 24,2).

12-15 Insanpo dino mangarait i nabi di karaatan om kasalaan di bansa dot Edom:

Avantangan-no dioti i kosusaan do Yahuda

minongirak ioti hiza do inovian i bansa do Yahuda

Ohigak i Edom dit opogos i bansa dot Yahuda,

gam minomodrikot do bai memot do kuran opogos om osusa ioti sid Yerusalim om tinumimpuun-no ioti mamung mangarampas om mangavi di barang di dang obpinai. Om it oholian arat, ong varot ulun do Yahudi di minogidu sid sangod, it ongoulun dot edom minanabpo dioti sampai minongolombus dit

ulun dino sid sangod, supaya otorungku om arakop ioti. Iti-no o sabap dot anangan ioti di hukuman dit Adu di Tuhan (15).

Bahagi koduvo: 16-18 I hukuman dit ongobansa om i kosopulan di bansa dot Israel om i kobinasaan dot Edom.

Ino boros dino nokonong sid bansa do Yahudi di nohukuman-no. Banal-no, nokotiim i bansa do Yahuda dit opoit ot inuman, ino-no i norungoi i kuta Yerusalim om narakop i kogumuai dit ongoulun Yahudi. I harati, ong Yahudi, nokotiim di subung di hukuman do Kinoringan. Varo boros do iadino sid Yehezkiel 23,32 om Yeremia 25,15 ko Yesaya 51,17. Ino suriban ko suntuan do subung dot opoit ot inuman, ng vaza manarang di hukuman do Kinoringan. Isai-nopo i nokenum dino, matai sampai tumanus. Manjadi ino hukuman di nokonong-no laid sid bansa do Yahuda, lumombus sid ongobansa vokon sampai sid Edom-po. Topot ong i Yahuda, varo kaamanangan om varo kosopulan, sinod intoronon do Kinoringan, ino-no i burul do Sion, i retanko laid, hiza di Daud om Sulaiman dot intoronon do Kinoringan. I harati, koguli vagu i Kinoringan sid bansa dau do tumanga sid dioti. Iri-ogi manansanganu vagu i Yahuda dit ongotana iadko i hiza di gulu diri. Gam sid tohudi i bansa dot Israel iadko apui di momuvu di bansa dot Edom om mangahandab dit ongobansa vokon. Ombo i narampasan dotEdom, ouli vagu sid Yahuda, sabap i Kinoringan posurut di kabanaran, supaya ipat-ipat it ulun maansanganu i dau do bahagi om i dau do tana.

Bahagi kotolu: 19-21 Obohogizan i tana om kengkakat i karajaan di Yahwe.

Kavi i noboros laid sino, 1-18, nga iadko longoi o vaza mangahabal om poromot sid ongoulun di boros do Kinoringan. Bai it ayat 19-21 mongusul dot okonko longoi o kobuatano di boros dino. I nabi manarang do kuran it ongotana oabahagi-no vagu isuhut di gama di Yosua diri mamahagi dit ongotana do Kana sid ongorurungan dot Israel. Ino boros dino pentahan dot isai om isai manganu dit ongodaerah om tana ponong sid Edom om Pilisti om sid tupak do Yarden om i ponong sid belantara sid Selatan. Minsanko it ongoulun di narakop sid pomogunan sid Utara arait sino, tu nosodia i dioti do tana om pomogunan. Sokovia i naakop di siombo-nopo, okiro-no do varo dau om dau do tana. Ombo i mintoron sid Yerusalim monori di bansa dot Edom. Ino dino kavi ajadi, tu kakali i Tuhan o Kinoringan om raja di bansa dot Israel om Yahuda, ka di nabi.

Sid boros di nabi Obaya kembulai do kuran i Kinoringan posurut di kabanaran dau. Ong mamakai iosido dot iso o bansa iadko pakakas dau do mamambang om mangalapos do bansa vokon (mongohukum) gima i karaatan dioti do mangaranggal di hoturan di kinouragan, ino-no do kuran i Kinoringan minongurug om minangahatul di sokovia dot avantang-no kavi, kakali ino bansa dino di sid palad do Kinoringan amu kavasa do tumalib ko rumanggal di hoturan do Kinoringan kananganko i vaza momorinta om monoghukum dot ulun. Sabap ipat-ipat it ulun, nga suntuan om kolu di kobuatano do Kinoringan. Ong ousiba it iso it ulun ko orugizan om apagasan, Kinoringan o momurimon di kapagasan om kousibaan dino do iadko iosido ot ousiba om opogos om asaadan. Sid Kinoringan, bai i duvo ko tolu o pongoretan samod, kabanaran om kovosihan monuduk dit atag o gama sid tanga do riniba, ponong sid Kinoringan om ponong sid ongoulun dot amu monodiri dot isai-nopo it ulun dino, ondu ko kusai, anak-ko osukod, ombuvoi ko pasok ot ulun. Tu ong sid Kinoringan, isai-nopo it ulun kingaran om kihak, sampai ong kodung orualan it iso it ulun, Kinoringan ot orualani. Na i nabi Obaya pentahan sid tudukan dau dot varo harapan do varo hiza rumikot dot i Kinoringan mangatag di sokovia it ongohal dit amu otimbang om it amu atag. Ino hiza dino retanko Adu di Tuhan om kembulazan di karajaan do Kinoringan.

I NABI YUNUS

Na i Buuk di Yunus banalko tanid mantadko i sokovia i it ongobuuk do nabi. Sabap i surat dino okonko pongoupungan dit ongoboros do nabi, inoi nga tangon di nabi Yunus. Ino surat dino nokosiat-no sid pialatan dit ongobuuk dit ongonabi, tu tuturan dit iso o nabi om i nahajangan dau, ino-no i nabi Yunus, anak di Amitai. Sid 2. Raja 14,25 noboros-no dot i Yunus dino ulun di nokohiza di nabi Amos antad sid daerah do Nasaret, ino-no hiza di raja Yerobeam II (787-746). Iosido dino minamahanda sampai pinentahan dot i raja dot Israel kadapat manansanganu do daerah sid tupak do Yarden. Topot iti surat diti amu mongusul di tangon di nabi iadko it ongotuturan di nabi Eliya om Elisa ko i kuran i nabi Yesaya minagandaha sid raja Hiskia (Yesaya 36-39). Inoi nga i surat diti mad panarangan do kuran i kobinsianan do Kinoringan monunda om mangahatul dit ongobansa om i baiko iso-no it ulun, ino-no i ponuhu dau, i Yunus. Okonko bai i bansa dot Israel o nokosuvang sid kobinsianan do Kinoringan. Varo tolu bahagi o surat dino, ino-no,

keso (fasal 1-2) do kuran di nabi do tumiim mogidu sid tinoguvangon do Kinoringan, nga aso tinganan.

koduvo (fasal 3) Suvai kenduvo i Kinoringan monuhu om sumuhut-ogi i Yunus, do kodung nokendongou di Yunus sid bandar do Ninive i kovosihan om hukum do Kinoringan, moupus-no ioti sampai mokiada-no di karaatan dioti om tumorima-no di kaadaan do sala, ino-no, tu a-no nokosunu i hukum do Kinoringan.

kotolu (fasal 4) Nemot-po di nabi Yunus i iadino, humungot-no iosido sid Kinoringan. Suvai nera iosido do Kinoringan om nakaharati i Yunus di kobinsianan do Kinoringan.

I hiza di kinembulazan di surat om tangon diti, varo kiroon om pongitungan dot ulun Yahudi do rontob ioti ot samadan do Kinoringan. Topot ong it ongobansa vokon nakada-no kavi antad sid tinoguvangon do Kinoringan. Gam nokosumbung-no it ongoulun Yahudi sid gama mangarait dit ongobansa sid pongoretan di mongimbulai dot it ongoulun dit okonko Yahudi okonko ulun banal ioti, inoi nga bai mad dupot, tu amu gima nokelo do Kinoringan, ka. Sid kosumbungo do iadino, oholian-no o gama dioti pokihi om pakaraat dit ongobansa vokon dot amu gumavul sid dioti sampai mangaladtak-po ko mongorugi-po dioti. Tu ong okonko ulun ioti, a-kosuvang ioti sid hoturan antad sid Kinoringan di monuhu do manamod di sokovia i it ongoulun vokon. Sabap iadino i pongitungan om kosumbungo dit ongoulun, mongusul om monuduk i nabi Yunus do banalko tanid i kenginan do Kinoringan, ponong sid sokovia i it ongobansa. Isai-nopo it amu tumorima di kovosihan do Kinoringan di iadino, era-no iosido om apajal do Kinoringan dot okonko misingkavaro o gama mamajal.

Manjadi i tangon dino mamakai dot ongotangon laid kananganko i sada di monolon om mongilob vagu dot ulun, do manapul dit ulun o tomodon, ko i kosunizan di ranggasan. Tanid mantadko ino mamakai i surat dino do zabur, ino-no i pomintaan dua do monorima kaseh, gima osopulan it ulun (2,3-10). Ino-no i kososizan di buuk di nabi Yunus, Ong i ginavo do Kinoringan banalko nasaang om nogiang ponong sid sokovia i it ongobansa. Tanid mantadko i kiroon dit ongoulun Yahudi di hiza diri, retanko bai ioti ot opili do Kinoringan om bai ioti kotorima di barakat do Kinoringan, kondiri di Kinoringan oupus ong varo karaatan dot ulun sampai mogihim iosido do vazaan pemumui vagu dioti dino. Iti-no o sabap do monuhu iosido di nabi dau rumikot. Ong amu monumbozo i ponuhu dau, tu pokihi iosido dit ongoulun vokon, mongogorot sampai mangalapos iosido di ponuhu dau sampai sumuhut iosido om mongusaha di suhu dino. Ong varot uhango dau, amu abasan i Kinoringan mongira om monuduk, sampai kaharati i nabi.

1,1-16 Kinodim i Yunus, nga mogidu iosido sampai nakahajang do borizu sid tanga do rahat.

I ayat keso mongusul do kuran di Kinoringan kumiboros di Yunus, it anak di Amitai. Amu anaru i panarangan dot isai i Yunus om kuran o gama do Kinoringan momoros sid di Yunus, sid inipi ko nosorou ko kuran. I buuk di Yunus tumimpun iadko it a-ko piro it ongobuuk do nabi vokon: imatai sid Yeremia 1,4,11; Yehezkiel 12,8; 24,1; Hagai 1,3 om Zakaria 4,8, ino-no, Minomoros-no i Tuhan, ka.

Pengkaa dino onibak om arantang i suhu: Pamanau-no...ka. A-natarang do siombo i Yunus diri ko

songkuro i kosoduo kumaa sid Ninive. Okonko i pangalaman di nanangan di boros do Kinoringan ot agazo o guna, inoi nga i boros do Kinoringan om i gama do Kinoringan sid ulun. Ino boros dino nga suhu om tugas. Sabap i Kinoringan mamakai dit nabi om ponuhu dau, do mongolintang sid kobuatano dot ulun ko bansa o tomodon. Ino-no i rikoton dara, i bandar do Ninive, i bandar di banalko agazo. I tugas dau sid bandar dino, Mengkhotbah sid ngaran do Kinoringan do manala dioti, gima i karaatan di nokoronuw-no sampai sid surga. Na i Ninive, ibu kuta do karajaan dot Assur, nokogom sid bavang Tigris. I kinorungazan di bandar dino TGM 612 dot i Nebukadnezar o minonori om minongohuzas di kuta dino. Minsanko bianco varo-pot ompulongan di popul sid pogun dino di retanko Ompulongan di nabi Yunus.

Na it ulun di minonurat di tuturan di Yunus dino, nelaan-no laid dau dot natanus-no i bandar do Ninive, ino bandar di retanko Bandar dot nokosulad agazo om araat o kobuatano, iadko kobuatano dit ongobandar dot agazo dit nokosulad o karaatan om takau om pipapatai om agai dot ulun. Topot ong sid tuturan, kakali i bandar dino iadko sid tangon.

Na inanu-no di Kinoringan i Yunus, supaya iosido-no o poromot sid bandar dino di kovosihan om hungot om kotigiran do Kinoringan kananganko i kasalaan di nunu-nopo sid bandar dino. Ong iadino o suhu do Kinoringan, atalahas-no dot i Kinoringan okonko baiko Kinoringan di bansa dot Israel om Yahuda, inoi nga Kinoringan di sokovia i it ongobansa om hakim iosido di sompomogunan. I kuasa do Kinoringan aso rontob om aso volit do pomogunan ko karajaan. Sid palad kavi do Kinoringan it ongobansa.

Topot i Yunus, kodung nosuhu-no iosido, indoson atangkis dau i suhu do Kinoringan. Iti-no o sabap do minogidu iosido. I sabap di mogidu iosido dino, okonko iadko rumosi iadko i Yeremia di minomoros diri dot, Omulok-oku-po di, amu-oku kogoos, ka. Gam sid kovian di tuturan dino kaharati tokou dot ino-no i sabap di Yunus mogidu, rumosi iosido ko kiguna i khotbah dau sampai sumimban i ginavo dioti om sumamba-no vagu ioti sid Kinoringan sampai mokisian (4,2). I tomodon mongiduan do Kinoringan, a-engin dot it ongobansa vokon sumuhut di boros do Kinoringan, minogidu iosido, supaya i kovosihan om tulungan do Kinoringan rontob sid bansa dot Israel, amu-no kalandak. Iti-no o sabap do mogihim iosido do vazaan mogidu sid pompod tana ponong sid Barat.

Sid Yafa (Yope ong UR), i pangkalan dit agazo om nokoronuw, nakadapat i Yunus dot kapal di lumazag sid Spaniol (Tarsis), ino-no i daerah di dang Poniki sid Spaniol Timur. Nabarai-po i tambang, minudan-no iosido sampai hinumarap dot sid soduo dino kosusut-no iosido. Amu-no otimpan di mato do Kinoringan.

4 Rontob-nopo, i Yunus minonipu di kondiri dau, tu isot ulun nga aso kadapat do mogidu sid tinoguvangon do Kinoringan. Minsanko sid tanga do rahat, kakali i palad om longon do Kinoringan kadapat kumavid om pouli sid dau. Sabap i Kinoringan o Tuhan di rahat om i tindal. Tigogi varo borizu sampai titogob-no i kapal. Na it Anakoda sid kapal dino, okonko iseso o bansa, iadko bianco, asarok do tasantanid-tanid o bansa dit ongoanakoda sid ongokapal. Sabap siombo-nopo kodompil i kapal, ong varot okurang ot anakoda, onuvon-no it isai-nopo it engin mozo, tu mogihim do karaja. Na i hiza di nokembulai i borizu dino, banalko minomodrosi ioti sampai isuhut di dau om dau dot ugama om kosipan, mininta dua ioti sid dau om dau do harapan ko pinokokinoringan. Baiko i Yunus ot amu nakagavul rumosi, gam minodop iosido sid saralom di kapal dot aso kiro-kiroon dau do nunu-nopo. Osinang iosido modop, tu indoson dau, ong nakalabus-no iosido sid taud om tunda do Kinoringan dot amu-no osusa iosido mongusaha di iadino kavagat om kosusa do tugas.

Alaid-po, nemot-no di kopitan di kapal i Yunus sampai pinosikan i Yunus, sampai minindamo di Yunus, supaya iosido, nga minta dua-no sid dau do harapan om Kinoringan. Kaluto-po, ong i Kinoringan di Yunus, inot ulun Yahudi o kadapat monulung, ka di pongitungan di Kopitan, tu nelaan-no dau dot banalko okosog om elin it ongoulun do Yahudi.

Ong it Anakoda diri, tanid-no o gama dioti, minogihim ioti do mongintutun dot isai o kisala sid kosusaan dioti. Tu i kiniro dioti diri, ino borizu mad hukum do Minamangun ko i rogon do rahat, gima varo karaatan sid kapal dioti dino. Minongintutun-no ioti sid gama pangaratu do pili (monorou). Na i Yunus o nanangan. Manjadi minonginsosok-no ioti di Yunus dot isai iosido om sionggo antad. Na i timpa di Yunus, iosido dino ulun dot Ibrani, i bansa di mongohormat do Yahwe, i Minongurug

dit avan om i tana. Minsan nokopongidu-no iosido sid tinoguvangon do Kinoringan, aso tinangan dot okonko kasasi iosido do Kinoringan sampai sid kososizan dino kembulai i korosizan om kohorotizan di kogofoo om kokuasaan di Yahwe. Noboros-po di Yunus i tinomod dau sid kapal om kaharati-no it Anakoda dot i borizu dino, hukum do Kinoringan sid di Yunus di minogidu iosido. Minokitulung-no dara ioti di Yunus do minta dua iosido sid Kinoringan, dot ong otopot, iosido o sabap di borizu dino. Na banalko osusa ioti Anakoda dino sampai minindamo di kovosihan di Yunus. Ong i Yunus, iso-no ot elaan dau mancadang, ino-no, sabap iosido-no o kisala om nakagama di borizu dino, Osuhul ong padaon-oku sid rahat, ka dau. Minangakun-no iosido di sala dau sampai i harapan dau, ong sukul kada iosido sid rahat, tantu engkod-no i borizu sampai ozom-no vagu i rahat. I kenginan dau, iosido-no ot isamba sid kuasa do rahat (varo kiroon kodori diri dot kodung pasamba do dupot sid kuasa do rahat ko ulun, ozom-no vagu i rahat).

Na it ongoanakoda diri, banalko amu engin sumuhut di cadangan di Yunus do pasamba dot ulun sid rahat. Iti-no o sabap do minoniim-no vagu ioti do minsomok sid koribing do rahat di magavi ioti gumau. Suvai nelaan dioti do banalko aso tinganan om sinumuhut-ogi ioti di cadangan di Yunus do pada dizau sid rahat. Topot, amu-po nakada, mininta dua-no laid ioti sid Yahwe sampai minindamo, supaya i Yahwe monulung om manapul dioti sampai manangkis dioti, supaya amu sumuvang ioti sid sala do mamatai dot ulun. Antad sid ginavo dot omomos om otulid minindamo ioti di kosunuan di kenginan do Kinoringan.

Mad kenginan dit ulun di monuturan dit usuran di Yunus do manarang dot minsanko it Ongoanakoda, nga ulun dot elin om okosog, minsanko ulun ioti dit okonko ulun Yahudi. Sabap varo pamarasan sid ongoulun do Yahudi dot i sokovia i it ongobansa nga ulun dit aso tantu-tantu, lobipo ong ulun di sid ongokapal.

Onibak i tuturan do minangada ioti di Yunus. Nakada-po, nozom-no vagu i rahat. Ong it Ongoanakoda dino tinumimpun-no mongohormat om mongindazou do Kinoringan, isuhut di dioti do kohorotizan sampai minangagaras-no ioti do dupot om minonumpa-no do mangasip sid Yahwe. Monguji i buuk di Yunus di kavazao dit ongoulun dit okonko bansa do Yahudi di kodung nosopulan om napasi-no, monorima kaseh-no ioti sid Kinoringan sampai sumumpa-po do sumuhut di hoturan om kenginan do Kinoringan.

2,1-11 I kinosopulan di Yunus, sada o minanapul.

It a-ko piro ayat dino nokosiat sid tuturan di Yunus. Bai onibak (duvo-no ayat) mongusul do kuran di Yunus nosopulan, ino-no, i Kinoringan minonuhu do sada do monolon di Yunus om mongilob vagu sid tindal (2,1+11). Na sid pialatan di duvo it ayat dino varo Zabur dot longoi di monorima kaseh sid Kinoringan, gima i kosopulan antad sid tanga do rahat.

Onibak vagu i tuturan di kinosopulan. I hiza diri ogumu it ongotangon do varo sada di kadapat manapul dot ulun di mad suromo ko macik o gama. Aso boros siti do nunu sangsada ino. Bai sada do banalko agazo, ka. Iso nga aso panarangan. Rontob-nopo, i sada inanu do pakakas do Kinoringan bahagi di kosopulan di Yunus. Bai iti-no o mongohodtol i Monuturan, do banalko kikuasa i Kinoringan sampai kadapat iosido do monuhu dit sada dot agazo, gam i sada lobipo obinsuhut mantadko i Yunus.

Aso boros vagu do siombo o kinojodian do iadino. Bai iso-no o tinomod di tuturan, I nabi di minogidu sid tinoguvangon om suhu do Kinoringan, minsanko niada iosido sid rahat, kakali i Kinoringan mongogorot do posuhut di Yunus dot aso tinganan tumolikud sid tugas dino.

2 Ino longoi do monorima kaseh mad zabur dot okonko bai sino ot apakai. Sid ayat 6 mimbulai dot ulun vokon nokolosod sid rahat ko sid kohubungan dot ongovalahan, ino-no sid koribing do botung ko bavang nakadapat minta dua do iadino. Kagi, ino pomintaan dua suvai osopulan om opintaan dua-ogi. Na i Monuturan dino minamakai dino zabur dino do pinta dua di Yunus. Sabap it ulun di banalko osusa om asampit, amu kadapat minta dua do mamakai di dau do boros om pongitungan. Bai iso-po ot elaan dot ulun sid tanga do kosusaan di toropatazo, sumusui di Zabur dit kakali ohondom. Iti-kagi o kogunaan dit ongozabur ong asarakan oining, supaya ino zabur dino katandon sid ginavo bahagi di hiza do kosompitan om kosusaan.

3 Ong mongohondom it ulun di minta dua sid ongokosusaan dau dino, monguji iosido di kotulungan om kosopulan di palad do Kinoringan, gam ino kogofoo di kinotulungan dino o manarang di korolomo di kosusaan om kobinasaan dit ulun dino. Na it ongokosusaan oruhai manarang sid kobuatano do rahat (pusod, nanad, murintal, gumbang). Topot i pongoretan naraka manalahas dot okonko bai i rahat om vaig ot oboros, inoi nga i kavazao dit ulun di nokensodu antad sid tinoguvangon do Kinoringan sampai nokosuvang om notorungku di kuasa do rogon om naraka sampai i huntung. Sumasi i minta dua dot minsan sid tanga do kosusaan nokotoguvang-no iosido sid Kinoringan sampai i kosusaan dau, nga antad sid Kinoringan. Okonko i naraka om i vozoon do rogon o kikuasa sid ulun, inoi nga songkuro-nopo kosodu, kakali sid palad do Kinoringan dit okon bai monunda om manaud, inoi nga mamambang om mangalapos sampai mangada (imatai sid Zabur 139,7-8). Manjadi hiza do momurimon it ulun di lalapos do Kinoringan, andaman-ogi dit ulun sampai tilangad di hiza di kakal-po iosido okosog tumoronong sid Kinoringan sid panambayangan di banalko osinang iosido.

8 Suvai sid tanga do rondom om sid suvang do naraka om humarap-ogi vagu iosido dot minsanko sino, kakali ataud om otunda iosido. Iti-no o sabap do mindamo iosido di kotulungan om monorou do kuran mamung vagu iosido sid piumpugan sid panambayangan. Gam sumasi-po iosido dot iso-no o Kinoringan om iso-no o harapan bahagi dit ongoulun dit isai-nopo. I sokoviai it ongoharapan vokon, pinokokinoringan dit isai-nopo, nga aso guna om bai vazaan tumolikud sid Kinoringan. Iti-no o sabap do sumumpa-no it ulun dino, ino-no, kodung napasi, pasamba-no iosido sid Kinoringan do manahak do parsambaan om monuluk di janji dau. Ong sid Yunus o harati, sumuhut-no di suhu do Kinoringan kumaa sid Ninive.

Sid kovian monuturan i buuk Yunus do banalnoko nosopulan i Yunus dot inilob di sada i Yunus sid tindal.

3,1-10 I bandar do Ninive mokisian do Kinoringan

Manjadi i tuturan di Yunus mongimbulit-no vagu di kinotimpuunan di tuturan, (1,1), ino-no, kenduvo-no pomoros i Kinoringan sampai monuhu do mamanan sid Ninive. Ong i Yunus turus sumuhut dot aso-no nunu-nunu. Aso boros kananganko i kosoduo di rikoton di Yunus antawa i nunu-nopo o pangalaman ko nahajangan dau sid tanga do ralan. Baiko i kogofoo di bandar o tinuturan. I bandar do Ninive o tinomod di buuk diti, okonko i kavazao om kobuatano di nabi. (Ong antad sid ongopogun di Ninive elaan tokou dot i kogofoo di bandar diri, apat Kilometer o kosongoho). Topot sid tuturan dino, retanko kotoluvan om kototok-ogi, ka. Ino panarangan dino do bai monguji di kogofoo dot a-milod kiroon. Ong ulun sid bansa dot Israel om Yahuda dit amu elaan pabal i kogofoo dino. (iadko sid tangon di Kurudong ogumu o gama do pagazo banal, tanda do monguji om mongolumbok).

Nopongo-po di Yunus mengkhotbah i bai iso o tomodon, ino-no, mongonsug do sumamba sid Kinoringan om mokisian, aso boros do siombo pinamanahan di Yunus. Bai sid 4,5 om noboros-ogi dot i Yunus minogidu sampai sinumodia sid koribing di bandar, tu minud iosido di korungazan di bandar dino. Sid ompulongon sid sampaping do kuta oruhai mongimpa do kosunu ko kuran i hukum do Kinoringan, ka di ginavo di Yunus. Kagi, mad osinang i Yunus, tu i kiroon dau, amu songkuro om kosondot i hukum do Kinoringan sampai kasasi-no iosido di tinomod di khotbah dau.

5 Topot i raja do Ninive, mad tanid o pongitungan. I khotbah di Yunus nokosondot-no sid tolingo om ongoginavo dot ulun. Mad notobok-no i ginavo di raja (iadko i khotbah di Petrus ontok di Pentakosta). Manjadi anaru i panarangan do kuran di raja minonuhu di razat dau do tumolikud antad sid ongokaraatan om mongupus sampai mokisian do Kinoringan. I Yesaya diri minongogorot di bansa dau do iadino dara o gama, nga amu nokosuhut i bansa do Yahuda. Topot it ongoulun dit anakasip om amu kotutun do Kinoringan laid diri, nga sumimban-no i ginavo om tumoguvang-no sid Kinoringan. I vaza dioti mononsulung, baiko kulit-po do karong om amu-no modsu, gam sasadan dot avu it obuk om sid inan, tanda do mokisian om oupus do minsanko kagazaai do guvas nga opogos-no. Kondiri di raja, nga iadino o gama dau sampai monuhu-no iosido om mangahatul di gama momuasa om sumambayang. Ensan an it ongoulun, anak, osukod, ondu, kusai, lumundu ko mosikim,

kopiamung kavi sid gama mokitulung sid Kinoringan. Minsanko it ongodupot kopurimon di koupusan. Sabap minsanko it ongodupot osusa momuasa, gima amu-no atahakan-po do sumad. Varo harapan dioti dot i Kinoringan monimban di ginavo dau sampai engkod i hungot dau. Na bana-banalko orubatan i Kinoringan di bandar om it ongoulun dino sampai amu-no nosunuan dau i hukum di nibahanda di Yunus. Ong varot ulun muli sid Kinoringan, varo kovosihan dau di tumalib di hukum do Kinoringan. (sid a-ko piro it ongoayat dino, okonko Yahwe ot apakai, kananganko i Kinoringan, gima kaluto ong amu kaharati it ongoulun do labus dot isai i Yahwe).

Manjadi iti-no o mongohodtol i Monuturan di Yunus, Iso o bansa nga aso humalib dot a-kadapat muli sid Kinoringan. Minsanko i bandar Ninive dit opusok do karaatan diri, nga ong sukul mongining di boros do Kinoringan, kakali varo vazaan muli om tumoguvang sampai mangasip sid Kinoringan.

4,1-11 I nabi om i Kinoringan midadahava.

Sid fasal dino, bai i nabi kondiri ot oboros om otuturanan. Moguhang i nabi do Kinoringan. Ino gama dau moguhang do Kinoringan mad tinomod dau laid do tazonko mogidu ko sumuhut i sinuhu do Kinoringan. Tu, ka di ginavo di Yunus, Nunu-ka o guna do mengkhotbah do manarang di kotonusan do bansa ko bandar, ong kakali i Kinoringan do kikosianan om kikovosihan dot amu posunu di hukum dau. Kumioduw i Yunus di kovosihan om kobinsianan do Kinoringan. Okudik nga aso kiroon di Yunus it iso it ulun ko i kogumuai dot labaan do hatas ribu it ongoulun. gam nosodia-no i Yunus minud om mongozi-ozu di hiza do tumanus i bandar Ninive do iadko i Sodom om Gomora. Ong keningan di Yunus, avantang ong i kobinsianan om kovosihan do Kinoringan rontob sid bansa dau, isuhut di kosozisan dit ongozabur. Topot varo rontob di kosianan om kobinsianan do Kinoringan. I netung di Yunus, amu atag dot ino kobinsianan do Kinoringan lumabai sid ongobansa vokon, lobipo ong sid bandar di iadino karaat.

Bai iso-po o kenginan di Yunus di nakasasi iosido di kovosihan om kosianan do Kinoringan, hiza do nakatalib inot apad nopod tinadahan: Osuhul ong matai-oku, ka.

I Yunus iadko i Eliya diri (1. Raja 19,4) dit nopupusan-no iosido, gima norongou-no dot i Isebel o mogihim di kapatazan di nabi. Ino-no rontob o pitonidan. Ong i Eliya hinumongkob, tu i sokovia i gama dau poromot di kenginan do Kinoringan sid bansa dau, nga mad aso guna om aso kosimbanan dit ongoulun diri. Topot ong i Yunus kumioduw do Kinoringan sampai misimpatai, tu nokosuhut it ongoulun di norikatan di bahanda di Yunus. Amu engin i Yunus mangasip sid Kinoringan, gima i kovosihan om kobinsianan di Kinoringan tumalib di sokovia i kiroon di Yunus. Ong i Eliya misimpatai, tu humongkob dot sokovia i gama do Kinoringan a-kadapat monimban di ginavo dot ulun.

4 I mula-mula do iadino, i Kinoringan bai mongoduat dot otuntuvad o gama mongoduat di Yunus do banal-no-ka apatut i gama dau humungot antava amu. Ino duaton do Kinoringan, nembulit sid ayat 9 sampai nisondot i harati di duaton dino. Topot varo-no laid hiza dot otibang di Yunus mongitung do bana-banalko apatut i hungot dau ko amu. Mad kotoluvan o kotibangan dau monguog om manalasai di hungot dau.

5 Bianco om mongusul-no dot i tuturan dot i Yunus sumodia mogom sid sodu-sodu do bandar mongimpa do kumuro i kavavalazan. Na varo dundung dau ko basalag do sinunizan do ranggasan dot alangkas banal sumurut sampai minongodundung om mongoluhung dit mintoronon di Yunus sampai okonko rontob amu osidangan iosido, gam mad nensasamod-po dau. Mad tinumanus-no i hungot om i kolosuo di ginavo dau om tinumomon-no vagu iosido. Nengkod-no i pongitungan dau do misimpatai. Dot tigogi, varo gizuk di minangakan di gamut di ranggasan do linumondihu-no sampai rinumuzou-no i ranggasan dino. Aso boros do sionggo antad i gizuk. Rontob-nopo, varo barat dot alasu antad sid Timur, ino-no, antad sid belantara o nokoruzou, ka. Iri-ogi manarang i tuturan dot ino barat dino, antad sid Kinoringan. Na hiza dot osinang I Yunus munsud-sunsud sid sahau di ranggasan, tigogi, mad nosidangan, tu noruzou-no i ranggasan sampai surukanon-no iosido. Na nopupusan-no i Yunus sampai mokipatai-no vagu do Kinoringan iosido, iadko i sid ayat 4.

I pongitungan di nabi miuma-no do humungot iosido, tu Kinoringan o nokoruzou, tu nipakan do gizuk i gamut do ranggasan, om Kinoringan o nakagama di barat dot alasu.

Iri-ogi midahava-no vagu di Kinoringan om i Yunus, kananganko i ranggasan dino. Aso netung di Yunus dot okonko iosido o minananom om okonko iosido do minanaud di ranggasan dino. Na kakali i Yunus kagavi moguhang do Kinoringan, tinalahasan-no do Kinoringan iosido do nunu banal o tinomod dau posuni di ranggasan dino. Pongumpamaan do Kinoringan di vaza dau manaud om monunda do riniba sampai i kopurimanan dau kananganko i riniba, tu iosido o minongurug. Iri-ogi nokorikot-no i Yunus sid amu dau asansad humarati. Tu i Yunus, minsanko okonko iosido o minananom om aso nagama-gama dau, sinumuni om sinurut kondiri i ranggasan dino, kakali dot oruol i ginavo dau, tu oupus di noruzou i ranggasan. Dot ong otopot, ino ranggasan dino, aso guna tanid mantadko bai ipongodundung di pondok di Yunus, tu mongingluhung do tempat.

Na antad di bai ranggasan di kiguna, dot okonko palad do riniba o minongimbulai, i Kinoringan monuduk-no di Yunus di hal do lobipo agazo dit amu banal migimbang, ino-no i bandar dit hatas om duvo nopod ribu ot ulun, i kogumuai dit anganak dit a-nokelelo di sala dit ongomolohing ko it ongobahanan do dupot om pangazam sino. Sokovia i ino, okudik nga aso`t opurimanan di Yunus ong orungoi om atanus kavi ioti? dati o gama do Kinoringan mongoduat. Ong i Yunus amu oupus ko monian om aso-no kobinsianan dau, ombo-no. Topot ong Kinoringan okonko miabal di Yunus. Suvai sid guvas di Yunus om opurimanan-ogi dau i kosondoto di hukum do Kinoringan di bai ranggasan ot ohukuman om horotizan-ogi i Yunus do banalko osodu i dau do pongitungan om kiroon antad sid kiroon om pongitungan om samod om kobinsianan ong Kinoringan.

Manjadi aso boros vagu do nunu-po o pangalaman om rikoton di Yunus. Iti-no o sabap ino tuturan dino okonko keso tuturan di manarang di gama di Yunus, inoi nga i gama do Kinoringan om i kovosihan dau di lumabai sid volit di bansa do Yahuda sampai rumikot sid ongobansa vokon, ombo-nopo it ulun om bansa do kening di boros do Kinoringan.

Kinoringan o minonuhu. Kinoringan o minongimbulai di borizu om minonuhu di sada. Kinoringan mongogorot di nabi, supaya sumuhut iosido. Kinoringan o poupus di Yunus sid saralom di suromo di ranggasan, supaya i nabi humarati di kogozoo di tunda om taud do Kinoringan. I gama di nabi do sumaap om kumioduw do Kinoringan o vaza pembulai om monguji sampai mangarazou di kogozoo do Kinoringan di katalib di sokovia i kiroon om kenginan dot ulun. Iti-no kagi mad tudukan om panangan di buuk diti.

Na sid Kitab Vagu i Yunus jumadi do suntuan bahagi di Yesus do katalib di Yunus (Matius 12,38 om 16,1; Lukas 11,29) Mad aralom o pongohorotizan dinot a-ko piro o boros di Yesus kananganko i kobuatano di Yunus, ino kosopulan om i tudukan di kosopulan antad sid kapatazan, ko i kotoluvan di sid tizan di sada om i kotoluvan i Yesus sid rinuvang do lobong. Kagi, ong i Kinoringan, ong pendongou dit ongoulun di hukum dau, gima i karaatan dot ulun, kakali lobipo posurut di kobinsianan dau mantadko i bai hukum, pengkaa dino sid Tuhan Yesus om i gama dau pembulai di kogozoo di gama do Kinoringan monori di karaatan om karanggalan dot ulun, supaya sid kinogulianan di Yesus kembulai i kovosihan dau om i koposizan penlaid, ino-no i karajaan om hoturan vagu dit ongoulun, di nemvoguvan-no di Kristus (2. Korintus 5,17)

I NABI DANIEL

mpatod: I buuk di nabi Daniel dino, 12 o fasal dot i F. 1-6 tuturan kakanganko it iso ot ulun di nokotorungku om it ongokoruhangdau di natahan-no sid istana di raja Nebukadnezar om sid gumanti dau di karajaan do Babil, Madia om Parsia. I f. 7-12 mad atandas dot epi di Daniel di nosuvangan-no iosido do Sundu sampai tinarang-no do malaikat do Kinoringan. It iso-ogi i nemot om nosorou dau, misuvang banal dit inipi di raja Nebukadnezar sid Fasal 2 sampai inot usuran dino mad bantaran om kogos di duvo bahagi i buuk. Kananganko i boros di napakai sid buuk diti, i Fasal 2,4 sampai fasal 7 mamakai di boros do daerah dot Aram di nokembulai-ogi ontok dit abad koduvo GM. It ongofasal vokon, boros dot Ibrani banal. Minsan retanko sid Babil om Parsia o kinojodian dino, okudik o hal do nousul antad sid pomogunan dino. Topot ogumu o hal di mimbulai sid buuk dino, mad nokonong

banal sid hiza dit abad ko-2 GM, ino-no i karajaan di Antiokus Epifanus sampai varo pongitungan dit ongoulun dit elo mongintutun dot usul om boros diri, hiza dit a-po nokorikot i TGM 164 om opongono i buuk diti. Mad kakali minonginud i razat do matai ino raja Antiokus om i kembulazan di karajaan do Kinoringan, tu nipentahan-no di nabi i iadino.

Sid Matius 24,15 arait i buuk di Daniel, retanko i nabi Daniel o minomoros do iadino dot oholian i koinsasakahan di valai do panambayangan, ka, retanko ino dino tanda do nokensomok-no banal i kovian do pomogunan.

Minsan banalko tanid i vaza di buuk di Daniel dino mantadko it ongonabi vokon, varot iso o panangan di meradi, ino-no, pentahan iosido dot i hiza biano, nga varo kovian om rikoton dot i Kinoringan o porikot di kopupusan do hiza om monimban di kobuatano do hoturan sid tanga do riniba. Na i hiza do penlaid dino, varo`t adau do kopongo-hukuman do Kinoringan sampai mimbulaino dot isai kamung sid Kinoringan om isai o sinumaap do Kinoringan.

Na ogumu o monorou dot isai i Daniel ko i minonurat di buuk diti. Amu elaan tokou dot i Daniel i narait sid Yehezkiel 28,3 om 14,14.20 iri-no ko iri ot i Daniel, ko ulun vokon, tu sid 14, retanko di Yehezkiel do kerad iosido di raja Turus, ko sid F. 28, nga mad kerad di Noa om Henok.

Varo do poperad di F. 1-6 di tuturan di Yusup sid buuk Kinotimpunan 37-43, tu manarang dot ulun dot it ulun dot Ibrani nokogoos mamung sid hoturan do raja om istana vokon dot ulun vokon dot ahatul o gama sino, sampai noguna ioti di raja sori. Kagi, ino duvo tuturan dino manarang di kogozoo do Kinoringan, ponong sid kosurutan di bansa dau (Yusup) om sid saralom di hukuman do Kinoringan om ponong sid kovian di hiza do riniba.

Hiza-po di Nehemia (Abad ko-5 GM) nokotimpunan-no it ongoulun dot Yahudi do monodiri om sumaap di kaadato dit ongobansa vokon, retanko bai ioti ot ulun dot osusi. Na lobipo mantadko ino, hiza dit Abad ko-2 o gama dit ongoulun Yahudi sumodiri, gima varo nigorot dit ulion di karajaan diri dot miizo banal i razat dau sampai a-kavasa sumuhut do hoturan vokon, tanid mantadko i hoturan di raja.

I Daniel di kitugas iadko Montiri, sinumuhut di hoturan di raja om i koubasan sid istana, minsanko i karajaan dino, nga hoturan do labus. Suvai tiniiman di raja i ginavo di Daniel dot aso harapan dau vokon tanid mantadko i raja om i kuasa om ugama dau, retanko iosido dino antad sid Minamangun, ka, om sumasi i Daniel di dau do kosipan dot okudik nga aso nolim. I raja Antiokus diri, iti-no ot elaan tokou antad sid Usuran di Yosefus, amu tantu ginumavul ko minangasau di hoturan dit ugama Yahudi. Inoi nga varo`t a-ko piro o rombongan sid Yerusalim di banalko tinumanggih sid kavazao dit ongoYunani. Topot it ongotuo-tuo om lumohing it ulun Yahudi diri, banalko atapat dit amu minangakun do nakada-no i hoturan do Kinoringan om i kabanaran om katapatan dau. Ino-no o kososizan di buuk diti, It ongoulun Yahudi kiguna dara bahagi sid ensanan i riniba, ong sukul atapat ioti sid tinoguvangon do Kinoringan. Sabap sid saralom dit kosipan kadapat ioti pembulai sid ongobansa vokon di kovosihan do Kinoringan. Topot ong i raja Antiokus dino, gam sinumaap dit ugama do Yahudi sampai kenginan ong atanus i kosipan dioti. kenginan ong iso-no o harapan ino-no i raja kondiri. Na osusa-no it ulun Yahudi momili, mozo dit ugama di raja ko apatai iosido. Na kogumuai it ongoulun Yahudi minongitung sampai sinumasi dot suhulon-po do matai ko monimban do harapan, tu humarap-no sid raja, ka.

I F. 1 mad umpatod di buuk di nabi Daniel, tu manarang dot isai it ulun di mad mononsiou sid kosipan dot ulun Yahudi. Iosido dino kitugas sid istana di raja do bansa dot agazo, dot ong otopot, sid tugasdino pakakas iosido do Kinoringan.

Manjadi i tuturan dino manantu do minsanko ulun Yahudi dit atapat mangasip sid Kinorngan, kakali kadapat iosido gumavul sid ongotugas do jasmani om sid hoturan do raja dit okonko Yahudi. Topot varo rontob sid gama gumavul om mizo sid tugas dino, ino-no, ong humambil i tugas dino sid kuasa om hoturan om kenginan do Kinoringan. Ong sukul atapat it ulun, a-milo-milo orindingan it ulun di kovosihan om kosopulan do Kinoringan.

Ino buuk banalko kiguna di hiza dot ogumu it ulun Yahudi nakasasad-no sid ongobansa vokon. Ioti dino osusa mongitung om monodiri dot ombo kavasa om ombo ot amu gumavul ko sumuhut do hoturan do razat dit kinentoronon dioti, ko katabang-po mangahatul om mongumbasi di razat di

pomogunan di nakasako ioti. Tu ong nakasako sid bansa vokon dot osodiri o gama om kopudan, oruhai varo kosusaan do kopisasanaan om kohungatan, antawa varo mongorodsit, hiza do varo kosusaan sid pomogunan dino. Sid tohudi nokembulai i pamarasan sid bandar do Rom dot, Ong lumizud i bavang Tiber, ko oruzahan i pomogunan. Natandas-no dot it ulun Yahudi o kisala ko nakagama sid kosusaan dino, tu it ongokuasa di mangahatul di pangi om i manangadau humungot di gama dit ongoulun do Yahudi, ka. Sid ongoulun Kristian sid Rungus: nakahali o pangi, nga ulun Kristian o nakagama. Monorob nga iadino, gizuk, ikus, nga ulun Kristiani, tu it amu-no monogit di misavo, nontok do kalalaso do pomogunan.

Iti-no o sabap dot i Daniel dit inovit-no sid istana di raja di minanansanganu di sokoviai it ongopomogunan diri (i sid Asia Barat) jinumadi do suntuan bahagi dit ongoulun di narakop-no om it ongoulun, di nokorungkap-no sid ongopomogunan vokon, tu sino ot inintonon om kopudan dioti dino. I hiza di notori-no i kuasa do Babil di minangarakop dioti, varo bansa vokon di minongolombus di hoturan di ginumanti di raja do Babil, ino-no i raja do Madia om Parsia, om iri-ogi i raja Makedonia (I Iskandar om i sumuhuhut dau) om iri-ogi it a-ko piro raja do Yunani. Sid saralom di kinorunggalan dit ongopomogunan om ongohoturan dit ongokarajaan, nakazazad-no banal it ongoulun do Yahudi. Vokon-no, ong a-no tiuli sid pomogunan do Yahudi, vokon-no, ong aso-no balanja muli, ko nakasavo-no sid bansa vokon, ko varo-no valai om kabun dit amu-no atamaan mongiduan. Vokon-no ong asampit-no vagu sid pomogunan do Yahuda sampai kipongitangan dot osuhul-po mopud sid pomogunan vokon, tu agazo o tana om miuma i darun om koposizon. Iti-no o sabap, toriso-iso ot ongekob rinumungkap-no sid pomogunan vokon, tu engin-no mogihim om kematan do kopudan dit ongekob dau. Nakatanga-no dit ongobansa vokon om kaharati-ogi it ongoulun dot minsanko nakagavul-no ioti, kakali ioti dino ulun di tanid o kosipan om harapan sampai amu atag ong koezo dit ongoulun vokon. Na i tudukan om bahanda di nabi Daniel nokonong-no sid hiza dino, sid ongoulun di nakagavul sid ongobasnsa vokon, nga kakali minongitung do tumatap sid Kinoringan, minsanko varo`t a-ko piro o raja di minoniag dot ulun sumuhut om kumavid dot ugama do tanid mantadko i dang raja do harapan.

Na i buuk di Daniel mongusul di katatap dit a-ko piro it ulun Yahudi, hiza dot varo hukum do raja dot okodou dot isai-nopo it amu sumuhut dit ugama di raja, nga anangan iosido do kapatai. Minsanko iadino, i Daniel om i kinoruhangan dau kakali atapat, okonko iadko bondira ko linazang di sumuhut di nato do barat, avantang ko araat.

1,1-2 I buuk Daniel manarang di kinotorian di raja Yoyakim om i kinarampasan di valai do panambayanan dot osusi sid Yerusalim. Rontob-nopo, ong otopot i habal sid 2. Tawarik 36,6-12 om 2. Raja 24, tanid-no it usul dino. Isuhut di Yeremia 25,1-4, i Nebukadnezar suvai nakaraja sid Babil, dot apat-no toun laid i Yoyakim raja sid bansa do Yahuda. Do nakaraja-po i Nebukadnezar, okonko turus rinumumpak di bansa do Yahuda (Yeremia 36,9). Iso o boros nga aso sid 2. Raja ko i Yeremia dot narakop-no i raja Yoyakim, ko notori-no i kuta Yerusalim ko narampas-no i panambayanan hiza di Yoyakim diri.

Kaluto ong varo tomodon dot i nabi Daniel minonimban di sera nokosoruvang i Nebukadnezar sid Yerusalim, gima kenginan di Daniel do manantu do hoturan di toturu-turu-nopod tinounan. Tu varo bahanda laid dot i kinarakapan sid Babil, a-milo-milo 70 tinounan. Iri-ogi varo bahanda om kinasarahan di Daniel kananganko it ensanan i hiza do riniba do mad varo turu nopod do toturu-turu tinounan o koledo di kotimpunan di Kinoringan i karajaan om hoturan dau sid tanga do riniba. Ino koledo dino mimbulai vagu sid Buuk do Kentalangan. Kenginan di Daniel do manantu dinot 70 toun di karakapan di nibahanda di Yeremia diri. Kakali elaan tokou dot i kinarakapan, varo duvo-no, ino-no TGM 597 om iri-ogi 586-7. Topot ong i kolobusan antad sid kinarakapan dino, hiza di nokembulai i hoturan di raja Koros ko Kurus sid Madia TGM 540. Na i Daniel, nengat-no ino toun di kinolobusan dino sampai mongitung di turu nopod toun, ino-no TGM 610, hiza di raja Yoyakim.

Ong otopot, ino kavi, okonko tomodon ko panangan di buuk diti, inoi nga, kenginan di buuk diti do patatap dit ongoulun di nakatanga sid ongobansa vokon, supaya tumahan ioti dit ongopensubaan di manarik dara di ginavo dot ulun Yahudi sid ugama vokon om sid gama tumolikud di hoturan om

pinonuhuan do Kinoringan. Iso nga aso boros di Daniel, kananganko i langad dara dot ulun Yahudi sid pomogunan dit inantadon dau ko i harapan do tumalib i hiza di narakop.

Kananganko i raja Nebukadnezar, banal-no, iosido-no o minonori sampai minonoruvang di kuta do Yerusalim sampai minanganu dit ongokoburuo om pakakas sid panambayangan di perak om amas o ginama sampai minonuhu-no iosido mongohuzas di panambayangan dino. Ino gama do iadino koubasan dit ongoraja di koponori do pomogunan vokon, tu ino gama do iadino, tanda do kikuasa iosido do monori di bansa om i harapan di bansa dino, retanko notori-no i Kinoringan dit ongoulun do Yahudi. Ino kinosoruvangan sid Yerusalim dino, hiza di raja Yoyakin (598) om raja Zedekia (587-586). Kagi varo koubasan dot i sokovia i harata do panambayangan di sangod, oviton-no sid dau do pomogunan om pasamba sid harapan di dau do pomogunan. Iti-no o sabap, sid panambayangan di pinokokinoringan Marduk o nitahu-no i sokovia it ongokoburuo antad sid Yerusalim diri, vaza dot ipongohormat di harapan dioti.

Na i Daniel mamakai di ngaran koduvo do babil, ino-no, Sinear. I tinomod dino, mongohondom dot ioti sid Babil dino bansa om turunan di raja Nimrod (Buuk Kinotimpunaan 10,10) om i pomogunan di puvavalazan dot asavat sampai tempat di kinoburugahan doboros dit ongobansa (Kinotimpunaan 11,2). Sid nabi Zakaria varo boros dot i kobuatano dit ongoulun di pakaso do Kinoringan nolupu-no sampai nosunsub-no ioti sid pomogunan do Sinear, ka. Ong abarasan i Sinear, mad nokovozo i harati dot ino pomogunan dino o pomogunan om razat di sumaap ko pakaso do Kinoringan. Isai-nopo i humarap sid Kinoringan, dot sid Babil ot inintonon ko pinadaan, osusa-no iosido om omomoi do porinta, lobipo, ong sid istana do raja ot intoronon, ka.

3-5 Minsanko iadino ot ongokosusaan om pensubaan, kakali varo`t a-ko piro ot ulun Yahudi di nokoronuw sid istana di raja. Nousel-no di Daniel do kuran di raja minomili om minamakal dit ongoulun om ongomontiri dau. Sabap ogumu it ongobansa nokosuvang sid hoturan om karajaan dau, minomili-no i raja do boginisan ot ongoulun dot ulion om montiri dau. Tu i kenginan dau, popigagavul dit ongoulun sid ongopomogunan, supaya iso nga aso mintoron sid dau do pomogunan om it ongoulion, nga okonko i dau do bansa o hoturon. Sid gama mamahagi om mongihis om momorinta do iadino, oruhai dara posuhut om momorinta di pomogunan dau.

Iadino o gama di raja momili-po dot a-ko piro ot ulun Yahudi, dit inanu antad sid tirisian di raja do Yahudi om it tirisian do bagaral ko kibantug. I tugas do momili om mangagazad sampai posikuron inot ongosukod vagu dino di nabakal-no sid tugas dino, varot ulun dit obinsuhut banal di raja, ino-no i Aspenas, ulun di nontoluhan, gima i hiza diri, isai-nopo it osomok banal sid raja, nga iadino o gama, retanko, ong nontoluhan, obinsuhut banal, tu amu engat-po do kenginan kondiri ko karalazan kondiri. Minsanko it ongosavo om ongoapid di raja, sid palad dit ulun di iadino, tu amu mongondu iosido. Inot ongosolumpak vagu, tolu toun sumikul sid administrasi di karajaan do Babil, dot nokosikul laid sid dau do boros om surat.

Ino-no i sikuron dioti, misingilo-po di boros om surat do Babil, ino surat di mamakai dit ongotitik do tolu-no sunduk. Kagi misingilo ioti mamasa dit ongobuuk dit ongotangon om keloo dit ugama do Babil.

Manjadi ioti Daniel songkoruhang nopili-no sampai minisingilo-no di surat om boros om ugama do Babil. Aso kiroon sid buuk di Daniel do varo karaatan, ong it ulun di dang Kinoringan humarati dot ugama vokon om i vaza dit ugama dino do paharati dit ulun. Na hiza di sinumikul ioti, pinelang-no ioti di kakanan sid istana, isuhut di hoturan di raja.

6-17 Noboros-po di buuk do siombo o kinosunuan di tuturan dino om oretan-ogi it ongongaran dit apat i sukod vagu di mad mononsiou sid kosipan om suntuan di katatapo sid ugama do Yahudi. Noretan-po laid i ngaran banal do boros Ibrani. Sid Buuk di Ezra om Nehemia varot ongoulun di iadino o ngaran. Iri-ogi mangarait-no i buuk dit ongongaran do Babil, tu i susuhuan di raja minomungaran dioti do ngaran do Babil, ino-no o vaza do pamung dioti sid bansa do Babil.

Ong it ongongaran dot Ibrani, enizo do varo harati ponong sid Kinoringan, ino-no, Daniel = Nokopongohukum i Kinoringan, ka; Hananya = Yahwe o kikobinsianan, ka; Misael = Isai-ka o kerad do Kinoringan? ka; om Azaria = nokoponulung-no i Yahwe, ka. Topot ong it ongoharati di ngaran do Babil, pengkaa dino, Beltazar = iosido kadapat mangapad dikau, ka. Aso boros kagi dot amu atag do

mamakai-po do ngaran koduvo dit okonko dang Ibrani. Banal-no, varo-no laid a-ko piro o tuturan sid Kitab Laid di manarang dot varot ulun di nakagavul sid bansa vokon sampai nakadapat do ngaran di bansa vokon: I Yusup nokotokin-no laid sid bobolizan sid Masir, ko i Musa nakasavo sid bansa do Midian. Ko sid Kitab vagu, i Paulus minamakai do ngaran Rom do pensibak di kondiri dau o tomodon (Paulus = it opodok ot ulun; Saulus = it ulun di kotirai sid umpug dot ongoulun).

Na i kodolikatan keso dioti Daniel songkoruhang, ino-no, I hoturan di raja, ombo i sumikul sid istana, pakanon di kakanan om kenuman sid Istana. Na nelaan-no di Daniel dot i sokovia i it ongonsi, nga nakasamba-no laid sid ongorogon ko sid pinokokinoringan do Babil, om amu nagaras dot isuhut di hoturan dot Ugama Yahudi, ko varo-po kakana dot dupot dit a-kavasa akanon ong Yahudi. Na minindamo-no iosido dot amu garatan ioti do pakan di kakanaan dino, supaya amu karanggal ioti di hoturan dot ulun Yahudi. Minsanko a-nakakun it ulion di sikul, ino-no i Aspenas, dot nisodiri i kakanan dioti Daniel songkoruhang, tu rinumosi iosido di hungot di raja, kaluto ong amu osihat ioti ong amu miuma om amu ahatul o kakanan dioti, varo mitoruai di minongining sampai minangakun di cadangan di Daniel do poniiman do bai taduk om sayur ot ipakan dioti sid saralom do kahapadan, pongimatan do kumugui ioti ko sumihat di mangakan do tanid o kakanan. Do notoliban-no i hopod adau dino, osihat-no banal i Daniel om it ongokoruhang sampai minangakun-no it ulion dot bai totodukon ot akanon dioti dino nopengavi di sikul dioti.

Manjadi sid ongohal di iadino, tinumatap-no ioti Daniel songkoruhang sampai kogoos-no ioti sid ongopensubaan di lobipo agazo. Ong mongusul i buuk di kobuatano di Daniel om it kakanan dioti do iadino, aso kiroon do monguji di kakanan dot it ongotodukon lobipo kiguna mantadko daging, inoi nga i vaza di Daniel mogihim di vazaan sumuhut di hoturan do Kinoringan. Pengkaa dino aso kiroon di buuk dot ong kodung nokosuhut om nakatatap do iadino, a-milo-milo abarakatan it ulun di kovosihan do Kinoringan sampai nokemot do kosinangan om kosurupuvan. Kagi asarok do varo`t usul dot it ulun dit atapat, nga kakali opogos om asaadan, mad otori-no iosido. Sid 3,18 kondiri dit ongokoruhang di Daniel o sumasi dot, Minsanko amu-okoi otopulan, kakali dot amu-okoi sumuhut di hoturan di raja do mongindazou di pinokokinoringan om tiningulun di baiko amas o ginama, ka dioti.

Ong i di tokou do kiroon, aso hal dot avagat, ong i bai kakanan. Topot ioti ulun Yahudi sampai biano iadino o kiroon dioti. Sid kakanan nosodiri-no ioti dit ongoulun om bansa vokon, om ino vaza dioti momingig di kakanan o sabap do sampai biano amu katanus it ugama om bansa do Yahudi.

I hiza diri varot ongoulun do Yahudi di tinumanggai sid hoturan om kobudayaan do Yunani, retanko i hal do kakanan okonko hal do kosipan. Obebas tokou mangakan di nunu-nopo iadko it ongobansa vokon, ka. Inot ongopongitungan do iadino iadko it ongoulun sid Korintus di minomoros dot, Sokovia i kavasa, ka (1. Korintus 3,21 om 1. Kor. 10) sampai minangakan-no ioti dot onsi di nakasamba-no laid sid panambayanan do patong. Topot varot ulun vokon sid piumpugan dioti di nopiduvo o ginavo, gima it onsi dino. Na boros di Paulus, Okonko i keloo o kiguna, inoi nga i samod ponong sid piniizaan, supaya amu kalandu it isai-nopo sid pensubaan. Sabap iseso o ginavo dioti sid katatapo di hoturan dot ulun Yahudi kananganko i kakanan, ino dino minomihot di piniizaan om kososizan dioti. I Paulus pengkaa dino sid Rom 14,1.. Ihimon tokou-no i kopioondusan om i kosurutan di sokovia i. Atag-no ong amu mangakan dot onsi, ong ino-no i kapasadu dit obpinai-nu, ka (Rom 14,19-21).

17-21 Na i katatapo dioti nabarakatan do Kinoringan, tu nakapaas-no ioti sid sikul sampai nakadapat-no ioti do bantu om tugas sid istana do jinadi-no ioti do montiri di mogkovosihan di raja. Gam i Daniel atapat-no sino nopempatai di raja Nebukadnezar om i finumanti dau sampai nokembulai i porinta do Madia, ino-no i raja Kores.

Mongohodtol kagi i laporan dino dot sid kobuatano dioti Daniel songkoruhang nokembulai-no dot it ugama Yahudi do tinumalib dit ongougama vokon, sid keloo om i vaza mangahatul do pomogunan. Ioti-no ko ioti ot inanu-no do mogkovosihan di raja.

3,1-30 Ino fasal dino, tuturan banal, nga okonko i kobuatano di Daniel, inoi nga i pangalaman di tolu i koruhang dau ot iusul sino. Ong oretan ioti, apakai-nopo i ngaran dioti di dang boros do Babil.

Katama om kogoos ioti dot amu sumuhut di hoturan om suhu di raja, gima ino suhu dino pakaso do Kinoringan. Suhulon ioti do matai ko mangaranggal di pinonuhuan do Kinoringan (kadan-no sumamba sid kuasa tanid mantadko Tuhan Kinoringan). Na i kosunduvo o minanapul dioti antad sid apui. Iti-no o sabap do banalko ogolivong i raja, gam minonimban iosido di hoturan dau sampai minangakun-no dot it ugama di tolu it ulun dino notorima om noguna-no sid karajaan dau.

Okonko bai i Nebukadnezar, inoi nga i hiza di Antiokus Epifanas, nga varo-no tiningulun di banalko agazo di retanko i kuasa om harapan do pomogunan om i mongontok ko posuntu di raja. Ogumu o kososizan sid ongosurat sid Assur om Babil di pentahan do varo iadino di minongontok dit ongoraja om i pinokokinoringan dioti. Tu asarok do varo kiroon om hoturanon dot i raja dino anak ko wakil di kuasa om pinokokinoringan. Iti-no o sabap dot it ongoulun sinumamba sid tiningulun do mongohormat di raja o kabarasan. Ong varot adau dot agazo, iadko ulang toun di raja, mimbaris-no it ongoulun sampai momodsingkudou sino dot mongohormat om sumamba. Na varo hiza dot oholian o kosumbang di Nebukadnezar do minonuhu iosido dot ensanan it ongoulion di karajaan dau miuumpug sid sahau dit tiningulun di banalko agazo sampai sumumpa di katatapo dioti sid raja. I kiroon di raja, sid gama do iadino oruhai o gama momorinta di pomogunan om popezo dit ongobansa sid suvang di karajaan dau. Sabap i gama sumumpa sid tiningulun dino, iadnoko sid Minamangun o koponumpa. Kagi, isai-nopo it amu mamung sid gama di iadino, ulun iosido do tanid o harapan. Inot ulun dino initung-no do mongodurhaka dati, ong amu opunso laid.

8-12 Na varot ongoulion di minongivogu dit ongokoruhang di Daniel, gima ioti banalko kingaran sid raja om harapan di raja. Iti-no o sabap dominogihim ioti do vaza pahaba om momunso dioti, supaya anu ioti i pangkat dioti dino. Minongoruput ioti di tolu i koruhang di Daniel, tu atalahas-no dot ioti dino amu nakagavul sid gama sumumpa om sumamba sid tiningulun ko sid raja kondiri.

13-18 Nokoruput-po do momurangit di raja, hinumungot-no i raja. Sinumusui-no iosido di kenginan dit ongomongoruput om minongodim-no di tolu it ulun Yahudi sampai minonginsosok dioti dot otopot ko amu i gama di iadino. Gam minoniim-no i raja do monimban di ginavo dioti, tu minanahak dioti do kotibangan do sumamba-po om sumumpa sid hoturan di raja. Banal-no i kiroon di raja diri, minsanko it Kinoringan do bansa vokon a-kasaap di raja, lobipo a-kapanapul dikou, ka dau. varo-no laid do pongindorosi di iadino sid raja Hiskia (Yesaya 36,13). Kagi ogumu it ongoulion om ongoraja kodori diri di banalko osumbang, retanko aso rontob di kuasa om hoturan dau.

Topot ioti tolu koruhang di Daniel banalko katama dumahava om mangamu di raja. Iso nga aso boros do ponong sid sumamba sid raja. Atarang i kososizan dioti, iadko i boros di ruput diri. Okonko a-elaan dioti i rikoton, ong dumahava om mangamu ioti di suhut di raja. gam boros dioti, Ong engin i Kinoringan manapul dahai, tantu manapul iosido. Minsanko amu-okoi osopulan, kakali amu-okoi tumurut dikau ko tumolikud sid Kinoringan-za, ka dioti. Banalko katama ioti diri do tumoguvang om kumioduw di raja di minongitung do iosido-no katalib di kuasa do Kinoringan om sambaoan iadko i Kinoringan. Sid tinoguvangan di raja minomoros-no ioti dot, I dahai do Kinoringan lobipo o harapon dahai mantadko ikau om i dikau do harapan, ka dioti.

19-23 Sabap tu nolumbatos-no laid i suhu diri, aso`t nelaan di raja tanid mantadko monuhu dot isubo-no ioti sid apui. Gam noholian-no i hungot om kotigiran dau, minonuhu-no dit a-ko piro it ongomononsiou di tentera dau do mamalud om posubo sid apui di tolu it ulun dino, gima katama ioti sumaap om mangamu di suhut di raja. Minonuhu-po iosido do pahakangon banal it apui dit enturu kahakang i pogomutan sid valai dau. Ino-no o kiroon dau, pemot sid razat dau di kuasa dau om i vaza dau mananus dit isai-nopo i mondurhaka ko amu sumuhut di hoturan dau. Ino-no i vaza dau mongindorosi om posuhut di razat dau.

Ong i tuturan dino, mad mangagauk di hungot di raja. Minitom i vuoros di raja, gima i hungot dau. It ongosinuhu dau pamalud om patod dioti sid apui, kodung nokensomok sid apui di posubaan, nahandab-no om nokorundun sid apui dino. Topot ong inot tolu ot ulun do Yahudi dino, aso boros do nolonuk ioti dit apui.

Ong sid Buuk Daniel sid Septuaginta, ino-no i solinan sid boros Yunani, varo-po nakamung do longoi dioti sid rinuvang di tavun, vaza dioti mangarazou do Kinoringan.

24-30 Ong i raja di minud sinod tavun di mongimpa di novuvu-no it tolu it ulun dino, nokotigog, tu

nokemot iosido dot amu nosorob dot apui ioti, gam varo-po koruhang dioti sid tanga dot apui samapai mirimpanau ioti sid tanga dot apui. Indoson di raja ong baiko inipi dau ko bai navaal di mato dau di sumiroto sid banalko ahakang it apui. Iti-no o sabap do mongodim-no iosido dit ongomontiri om mongoduat do nunu ot ematan dioti. Na aso tantu timpa dioti, gima ioti rumosi ko humungot i raja. Suvai kondiri di raja manarang dit emot dau om minomoros-ogi ioti di dioti dot emot.

Iri-ogi mininsomok-no i raja sampai minongodim-no dioti do mang arait dit ongongaran dioti, retan dot ikou dino uripon do Kinoringan di banalko asavat, ka. Pinalabus dau ioti antad sid apui. Iri-ogi om kaharati-no i raja dot i kuasa do Kinoringan dit ongoulun Yahudi tumalib didau do kuasa om i dau do harapan, ino-no i pinokokinoringan Marduk sid Babil. Nakalabus-po, nakasasi-no di raja dot minsanko it obuk dioti ko it ongosulung dioti, nga amu nosorob. Avau-po dot apui nga aso. Dot it ongomononsiou di pinosubo dioti, novuvu-no do minatai.

Antad di pangalaman di raja di iadino, tinumimpun-no iosido mongindazou di Kinoringan dioti sampai minongimbulai-no do hoturan dot isai-nopo i mongusiba di Kinoringan dit ongoulun do Yahudi, nga ohukuman-no iosido dotapatai om ohuzas-po i valai dau om atanus i ngaran dau. Topot ioti tolu dino, pinangkat-no di raja do jinumadi-no ioti do montiri sid pomogunan sino.

Manjadi i tuturan dino nokembulai om notuturan-no hiza di raja Antiokus Epifanas diri, do mongosug dit ulun Yahudi patama sid kososizan di kosipan sid Kinoringan o tomodon. Sabap i raja Antiokus minoniag dit ulun Yahudi do lumombus sumamba sid Kinoringan. It ongoulun di minongusul di tuturan dino, vokon-no ong varo pongitungan kaluto ong sukul atatap it ulun Yahudi, kaluto osimbunan i ginavo di raja om iri-ogi a-ko piro ot ulun Yahuda manganu do bantug om tugas sid raja, ong sukul otulungan ioti di kosunduvo do Kinoringan.

Ong i Fasal 4 mongusul do kuran o kosumbang di raja Nebukadnezar sampai noulau-no om nokezon iosido sid himbaan om govuton do mad dupot iosido. Suvai nohukuman-no iosido do iadino om nakaharati-ogi di kuasa do Kinoringan sampai minongoguna-no iosido do Kinoringan.

5,1-30 I poginakanan di raja Belsyazar.

I Belsyazar dino, anak di Nebukadnezar om gumanti dau. Iosido dino ulun dit mad aso bahazan om misingkavaro-nopo. Aso kiroon dau di mongusiba iosido do Kinoringan. Amu asalaan iosido sid buuk di Daniel, tu minongogusa om minomogos iosido dit ongoulun Yahudi, inoi nga i gama dau mongusiba do Kinoringan om mamakai dit ongopakakas di panambayanan sid Yerusalim sid korusuko om kaavuko dau sampai misingulau-po om araat-po o boros dau mongolupu om mongimbuhal do Kinoringan. Ino tuturan dino varo panangan, tu i hiza di Antiokus varo gama do iadino mangasau om mangarampas di panambayanan om monginsasakau idt onkokoburuo di panambayanan. Manjadi i tuturan di kodori ot apakai do mamajal di kavazao vagu dit amu nokonong. Sid saralom do tangon mongimbulai i manangon do harati di kosondot sid kobuatano vagu dit amu atag.

1-4 Manangon-no laid i poginakanan di banalko ahatul. Minsanko it ulun di mongusul di hiza diri, ino-no i Herodot om Yosefus o pentahan dot ino poginakanan dino adau guluko otori-no i bandar om ibu Kota Babil dot otori-no di raja Kores. Ino-no i panangan di tangon dino, i hukum do Kinoringan sid ulun di mongousiba om mangagauk do Kinoringan, oduruk om kosondot-ogi. Kinoringan amu minud dot alaid om ohukumon-no it ulun.

I tuturan di poginakanan dino, isuhut di koubasan dit ongopoginakanan diri. Amu asarok i raja minilang dit ongoulun. Suvai varo poginakanan dot ahatul. Ong mogom i raja sino, kavi-avi it ulun sid tinoguvangon dau do iosido likudan di rinding, supaya isot ulun nga aso kadapat minsomok sid raja dot okonko sid tinoguvangon dau. Mad avuk-avuk iosido, sinuhu-no di raja do pongoi dit ongopongizanan di panambayanan do Yerusalim di nirampas-no dit ama dau (1,2). Ino-no i tinomod dau, monginsasakau om mangagauk om mongolupu dit ongopakakas dino sid gama monginum di kavuko om mongusiba-po di ngaran di Kinoringan di nakapangasanganu di pakakas diri. Kagi sid gama minum arait-po it ongongaran di pinokokinoringan do Babil, retanko ioti akansang mantadko i Kinoringan dot Yerusalim, ka.

5-9 Na i tangon lomombus sampai mongohodtol do kuran mimbulai it unturu do palad do dang riniba

di minonurat sid rinding di nasaat-no dot opurak. I rinding dino i-po inogom om insondiu di raja. Iosido bai nokemot di palad dit unturu dino ong tinumingaha iosido. A-no boros koduruk dot nunu ot osuratani. Bai i kobuatano di raja ot otuturanan, ino-no otomuk iosido sampai indorosi om okikip sampai mongogizak om mongodim-po dit ongobobolizan. Minsanko iadino ahatul o gama dau diri mangagauk om mokisusumbung, retanko iosido o monguasa di sokoviaai sampai otori-no kavi it ongokuasa, tu iosido o monguasa di sokoviaai, ka, tigogi, atalou iosido om songrosi-rosi sampai mokitulung dit ongohojimat om ongoborontuvilan, kaluto ioti kadapat monulung om mangaharati di hal dino. Gam sumumpa iosido dot isai-nopo it elo pangaharati di hal dino, kadapat do gaun do montiri om bintang do kikaraving do rantai dot amas (i bantug dit asavat banal). Topotminsanko iadino kagazo i suul dara, iso nga aso kadapat posondot om manarang di surat dino. Ensanan ioti di niumpug sino, iso nga asot elaan do kumuro om kuozon-no.

10-12 Hiza di banalko opupusan om osusa ioti dino, korikot it idi di raja. Norongou-no dau i gulou dioti dino sampai nakaharati iosido do varo kosusaan dioti. Manjadi it ondu dino monuturan di ginama laid di Daniel do posondot di harati dit epi di Nebukadnezar diri. Retan dau dot i Daniel, ulun di dang Kinoringan dit osusi. Mad tolu o keloo di Daniel, ino-no, nokosulad o pongilaan om elo mangaharati dot inipi om i hal dit olingob, ka dau.

13-16 Nokorikot-po i Daniel, otoguvangon iosido di raja di minonginsosok di Daniel, isuhut di laporan dit idi dau sampai minonguji iosido di Daniel dino. Minsanko bai sangjaham nakatalib do iosido minongusiba do Kinoringan om it ugama dit ulun Yahudi, tigogi, mad nataganau it avuk dau, gam mongoguna kapamarasan sid di Daniel do mindamo om humarap dot i Daniel ot elo pangaharati di surat dino. Mongimbulit i raja do suul, ong sukul elaan di Daniel do posondot di surat dino.

17-23 Na i Daniel turus momoros dot atagal-no do varo suul ko kogojian. Mad minamajal i Daniel di raja di mongitung, ong sukul agazo o gaji, asalazai-no kavi sampai i raja kakali elo do monguasa di sokoviaai, minsanko bai sid gama dumagang do kovosihan om pongohorotizan. Manarang-no laid i Daniel di kuasa di Nebukadnezar om kuran nokosumbung iosido dot oholian sampai naratu iosido. Suvai osibak vagu i ginavo dau om otorimaan iosido di kovosihan do Kinoringan, ka. Ong it ama-nu, alaid-no om misingilo-ogi dot isai i Kinoringan om kuran i kuasa dau. Topot ong ikau, raja, a-karamit om a-kopisingilo-ko di nunu-nopo sid kavazao om kopunavatan dit ama-nu. Iri-ogi pinajal di Daniel i gama di raja hiza di poginakanan dino di mongindazou dit ongopinokokinoringan dit amas, perak, basi om watu o ginama om i gama dau mongusiba do Kinoringan.

24-28 Iri-ogi manarang i Daniel dot isai o monguasa di raja, tu i timbagos di raja, nga sid palad do Kinoringan. Noboros-po i iadino om minamasa-ogi i Daniel di surat sampai pinosondot di harati, ino-no, Nezap, notimbang, nabahagi om minanarang-po do i panangan di surat dino kananganko i karajaan di raja. Nopongo-po di daniel i boros om pananrangan dino, minonuhu i raja do pamangkat di Daniel om podsulung dau. Mad amu nakaharati i raja di panangan di surat bahagi diosido kondiri om i karajaan dau. Inulit-no vagu it avuk dau. Bai i sumpa dau do songkuro o suul atahakan dau kakali andaman dau om ohorotizan dau.

29-30 Sid kompuso mongimbulai i tangon dot osuulan-no i Daniel om iri-ogi nengkosupan i raja di kopunavatan om kasalaan om hukum dau, tu gam dau do bansa minamatai do susuvab, nokorikot-no i sangod sampai minamadsanganu di pomogunan om karajaan do Babil. Na i tinomod di tangon dino, ino-no, ong sukul it ulun atapat sid Kinoringan, abarakatan do Kinoringan. Topot it ulun di pakaso do Kinoringan ko mongusiba om mongimbuhal di Kinoringan om i dang Kinoringan, a-milo-milo anangan iosido do hukum do Kinoringan dot oduruk om kosondot i hukum dino.

6,1-29 I Daniel sid kukurangan do mondou

Kananganko i tuturan diti, banalko apagon do monodiri di sera o kinosunuan dino antawa do bai tangon di manarang do keloo om katatapo dot ulun. Ombo-nopo ot inantadon, varo panangan, ino-no, mongonsug dit ongoulun do Yahudi do tumatap, minsanko sid tanga do pensubaan di nakaranzat ioti sid ongobansa vokon. Varo cadangan dot it inantadon di tuturan dino, ino ayat Zabur 57,5-7. Tu sino varo boros dot, ioku diti modop-odop sid tanga dit ongomondou di mongodila sampai mangakan om monolon dot ongoulun. Varo mongukat do luvang sid ralan-ku, nga nakasadu ioti kondiri sid luvang

dino, ka. Nabasa-po dot ulun ino boros dino, ulun pinosondot di boros dino sid tangon di manarang di kobuatano di iadino. I sabap di panarangan di iadino, Sid sokoviai it ongousuran dit ongobansa kodori diri, Madia ko Babil ko Parsia, ko sid Yahudi, iso nga aso kopionong di tuturan om tangon diti. Na it ulun di minongusul di iadino minomili di Daniel om i dau do hiza, sabap nokoronuw i Daniel do mononsiou iosido sid kosipan sid Kinoringan. Ong otopot, ogumu ot ongotuturan di iadino sid koundango dit ongorabi, nga a-nakamung sid Kitab Laid. Vokon-no ong sid Kitab Laid do Septuaginta, ino Kitab di dang Yunani, iadko i Buuk di Yudit, Tobit, Sirak, Bel, Naga, ko Makabai keso om koduvo om Keloo di Sulaiman. Vokon-no ong bai sid tradisi dot Ongorabi, i retanko Midras om Talmud. Minsanko it ongo-suriban di Yesus nga miabal o harati: Suntuan it ulun mukabun di paparazon, ko it ulun Samaria di banalko kikobinsianan antawa it ongosuriban di karajaan do Kinoringan. I sokoviai it ongotuturan om suriban di iadino, varo-po harati ponong sid kovian do pomogunan om i hiza diri.

Na sid tuturan dino mimbulai i keloo dot i Kinoringan kikuasa manapul dit ulun di sid tanga do kapatazan. Ong ulun mongitung, tantu aso harapan-po, tu nakada sid kukurungan do mondou. Topot ong Kinoringan kakali kadapat mangajaga dit ulun di kenginan dau om it ulun dit atapat o kosipan.

6,1 I kinapatazan di Belsyazar om i kinapamangkatan di Darius kopisuhut om kopisunu kumihiza. Ino kapatazan di Belsyazar nipentahan-no laid dit ongonabi om kuran lumombus i hoturan do Babil sid kuasa do Madia. Varo raja Darius sid tohudi (TGM 520). Topot tanid i tuturan dau dino. Iti-no o sabap mad tangon banal ino tuturan dino di mamakai dit a-ko piro pangalaman dot ongoulun kodori do monuduk om manatap dot ulun o tomodon.

6,2-10 Mongusul i tuturan dot i Daniel banalko asavat o bantug om tugas dau sid Istana di raja vagu. Na ino Darius Histaspis (i minonoruvang sid Babil TGM 520) kihoturan di banalko arangkap, tu minamangkat iosido do duvo nopod ot ongoulion i retanko gabinal sid ongodaerah (ka dit Usuran di Herodot, ulun Yunani di minanahu dit usuran di karajaan dot Yunani). Ong siti om sid Buuk Ester, gam 120 Ot ongodaerah dit inikid kiulion. Topot ong i Daniel om duvo it ulun vokon nga kumoduvo ko sakai di raja, supaya amu opogos i raja mangahatul. Na i Daniel lobipo kikuasa mantadko i duvo it ulun vokon. Iti-no o sabap mongivogu ioti sampai mogihim do vaza pahaba om pedu di Daniel. Rontob-nopo, i sokoviai i gama di Daniel mogkovosihan om mangahatul, aso borotuduon dioti om iso nga aso sala di miuma poruput sid raja ko pasala di Daniel. Alaid-nopo, bai isot andaman dioti do varo pitonidan dioti om i Daniel, ino-no i harapan dau, i vaza dau mangasip sid Kinoringan ot vaza pahaba om manala dau. Iri-ogi miniupakat ioti sampai tinumoronong ioti sid raja sampai minongonsug di raja, supaya iosido mangahatul dot a-kavasa do sumuhut dot ugama di tanid mantadko it ugama di raja. Na i gama dioti mongonsug do iadino, banalko minongolombok ioti di raja sampai sangkapamarasan dot i raja iadko kuasa antad sid savat di mad kinoringan. Na i raja amu nakaharati dit akal dioti dino, gam sinumuhut iosido di kovosihan dioti, indoson ino dino kiguna sid gama pezo di sokoviai it ongoulun om ongobansa di nokosuvang sid kuasa dau. Sabap asarok it ongoraja vokon, nga iadino o gama, retanko i raja nga antad sid savat ko surga, minaganak do kinoringan. Ioti kagi minindamo do sumain i raja, tu rinumosi ioti, ong ogomitan-po ino suhu di Daniel, elaan di Daniel do monimban di hoturan di raja. Nokosain-po om notumbukan di sijil di raja, atalahas-no dot ino hoturan dino aso tinganan do kakaton-po. Minsanko i raja kondiri a-kadapat sumuri, ka di pongitungan di duvo it ongoulion dino.

Banal-no, varo pamarasan di sampai bianco di momoros, Iti diti otopot om otiru iadko i hukum om hoturan do Madia om Parsia, ka. Ino pamarasan momihot di kovosihan om hoturan, retanko aso tinganan do simbanon-po ko omungon om iduon-po. Dot i sala di karanggalan di hoturan di raja, iada it ulun sid kukurungan do mondou. banal-no, varot a-ko piro tuturan dit it ongoraja do Babil diri ozi magasu do mondou, dot i koubasan, pokurung dit ongomondou sid istana. Sera ong varo kenginan di raja do magasu om monimbak do mondou, oruhai varo nosodia i mondou bahagi di kenginan di raja magasu om monimbak. Vokon-no ong oholian araat i raja, momunso iosido dot ulun dit sanaan dau sid gama pada sid kukurungan dit ongomondou, tu ipakan dit ongomondou.

6,11-18 Norongou-po di Daniel i hoturan dino, turus hinorotizan dau dot ino hoturan dino nokoponong sid di Daniel. Na minomongo iosido di koubasan dau do kodung tumonob it adau, minuli

iosido sid valai om sid abai di valai dau, tu minta dua iosido ponong sid Yerusalim. Ino koubasan dau dino, sid saralom dot adau, intolu minta dua iosido ponong sid Yerusalim dot ogiang-no i gondila ponong sid Selatan dino (Hakim 3,20; 1. Raja 17,19; 2. Raja 1,2; Yeremia 22,14) Sid pomintaan dua di Sulaiman di minangarasmii iosido di panambayangan (1. Raja 8) varo boros dot i Sulaiman mininta dua do ponong sid panambayangan o kotingahaan om kotoguvangan dau. Sid ongorabi varo hoturan do iadino. Minsanko i Muhammad i hiza di kinotimpuunan dit Ugama do Silam, sid Yerusalim ponong o gama minta dua. Suvai asanaan iosido dit ongoulun do Yahudi om nosimbanan-no i retanko kibla ponong sid Makka.

Sid gama minta dua ponong sid Yerusalim minimbulai i kogofoo do ginavo lumangad do Yerusalim dot i kiroon dot ulun do sinod Yerusalim ot inintoronon do Kinoringan om harapan di bansa dot Israel. Minsanko norungoi-no i Yerusalim om natana-no i kuta, kakali agazo o harapan sid bandar dino di sid pongitungan dot ulun lobipo osusi om apangkat om agasal mantad di hiza di kakalpo i raja Daud o minomorinta. Antad dit ongoharapan dino minimbulai-po i harapan dot varo-no vagu Yerusalim di mad bandar do Kinoringan (Buuk Kentalangan 21). Iti-no o sabap i Yerusalim najadi do suntuan di gama do Kinoringan manapul di bansa dau om monimban di hoturan sid ongopomogunan.

Amu atalahas do sera nokotimpuun i hoturan dot intolu minta dua sid saralom dot sangadau. Varo boros sid Zabur 55,17 dot minta dua do sasarp om tanga hari sampai sodop-no. Topot ino boros dino bai tuturan, okonko ponuhuan.

Manjadi hiza do mininta dua i Daniel, ingkosupan iosido dit ongosangod dau. Turus minangahabal ioti sid raja di karanggalan di Daniel. Topot poguluvon di ruput dioti i Daniel, pinopuhondom-no laid dioti i raja do kuran i hoturan dau di moniag dit isai-nopo it ulun do sumamba sid kinoringan di tanid mantadko i raja om i dau do harapan. Suvai minangalapis-no om minanantu vagu i raja di suhu laid diri, minongoruput ioti di Daniel. Iri-ogi nakaharati i raja dot otipu-no iosido dioti sampai hinumungot-nopo. Rontob-nopo, asot elaan dau i vazaan do mantas di hukum om hoturan dau. Asadapan om osuvaban iosido minonguog-uog dot sampai opupusan iosido om tinumurut dit ongomongoruput, isuhut di hoturan laid dau diri do sampai iada-no i Daniel sid kukurungan dit ongomondou. Ino-no rontob, minongonsug sampai minogkovosihan iosido di Daniel sampai minomoros dot varo harapan dau dot i Kinoringan di Daniel kikuasa do manapul di Daniel antad sid kabang dit ongomondou, gima atatap i Daniel sid tinoguvangan di Kinoringan dau.

Niada-po i Daniel, gam minangahatul i duvo it ulun dino dot otumbukan-po i rongobon, supaya isot ulun nga aso kadapat mongogiang om palabus di Daniel ontok do sodop. Nakaharati ioti dot amu osinang i raja sampai rinumosi ioti dot varo ginavo di raja do manapul om monindal di Daniel. Iti-no o sabap dot oholian o gama dioti songontupat dot aso tinangan sukabon i rongobon.

19-25 I sodop diri, a-kodop i raja. Osuvaban iosido kioruol do ginavo. Iti-no o sabap minomuasa iosido sampai minongohondom di Daniel di sid kukurungan dino. Dot otuvong-tuvong-po tinumungag iosido om sinumombol sid kukurungan do mondou, tu imatan-no (impurason) dit ahajangan i Daniel. Nokorikot-po, kinodim dau i ngaran di Daniel sampai minomungaran di Daniel dot, Uripon di Kinoringan di kapapasi sampai banalko ohigak om kiotomon iosido di nening dau i dolou om ambat di Daniel. Minonuturan i Daniel di kotulungan do Kinoringan di minonuhu do malaikat do manabaong di kabang dit ongomondou om mongohodtol dot ino kosopulan dau dino nga tanda dot aso sala dau sid tinoguvangan do Kinoringan om i raja. I kosopulan dino miabal di kosopulan di tolu i koruhang di Daniel sid fasal 3. I duvo i tuturan dino ihondom di Buuk Ibrani 11,33... I Daniel, nga aso otudu-no dit ongomondou, minsanko orongit i dupot dino. Sabap varo koubasan ong kodung mongohukum dot ulun dot ipakan do mondou, povitilon-po laid it ongodupot dot a-ko piro ot adau, supaya orongit banal. Nokotindal-po i Daniel, i raja minamakai di hoturan di retanko hoturan di Talis, ino-no, it ulun di minanala di Daniel asala-no sampai ioti om it ongosavo om anganak insani nisumad sid ongomondou. Ong ioti, amu-po kosondot sid taradas di kukurungan dino, inakan-no dit ongomondou. Ino hukum di iadino isuhut-kagi di niboros-no laid sid Ulangan 19,16-19 kananganko it ulun di monimbaal ko sumasi dot araat sid ulun vokon. Osulian it ulun dino isuhut di dau do ginama sid obpinai dau, ka.

26-29 Iadko sid Nebukadnezar sid Fasal 3, i Darius o mongimbulai do hoturan om hukum di moniag

do monusa dit ongoulun Yahudi ko mongindaraat di Kinoringan dioti. Gam monguji-nopo i Darius di Kinoringan, i kapapasi om i sampai penlaid, i kikuasa dit aso kovian om it elo manapul dit ongoulun. Ong momoros i raja dot i Kinoringan nga sampai penlaid iri-no ko iri, minongimbulai iosido di harati dot misanko mimban-simban it ongomogunan om it ongohoturan, ong i Kinoringan, nga iri-no ko iri dot harapan dit amu ahaba ko tumanus. Manjadi ino harapan dino o sondihon dit ongoulun do Yahudi di siombo-nopo ot intoronon om kolombusan. Na i kinompusan di tuturan dino, soumul-umul osinang i Daniel hiza di raja diri om sid ongoraja di sinumusuhut di Darius.

7,1-28 i nosorou i Daniel kananganko i hiza do penlaid.

I monuturan di tuturan dino, hiza di raja Antiokus Epifanas, manarang di kobuatano di hiza dau dino sid kobuatano di usuran di Daniel, di sid Babil iosido. Retanko minonorou i Daniel. Ino-no i kinasarahan dau dino, tinongus i barat dot ologod antad sid apat puun do barat om nemot dau it apat nenan o dupot dot ongogagazo om tanid o kobuatano. Na sid Babil varo-no laid tangon di kinourugan di vinangun om riniba, retanko it apat puun do barat pakakas di pinokokinoringan Marduk mangagama om mongurug do pomogunan. Inot apat barat minanahan di naga, supaya amu kedu i naga di minongindorosi di pomogunan. Sid tangon dino varo boros dot, I topirik, i naga om i mondou, it asu om i ompoluluhu, nga papakas di Marduk manahan di lizud om linusuvon, ka. I kinematan di Daniel, mondou di kialad om bovang om inanansad. I kapat dupot, nga amu minomungaran i Daniel. Ensanan it ongodupot mimbulai antad sid rahat.

It ongoulun di mongintutun di kasarahan di Daniel enizo manarang dot inot ongodupot dino posuntu dit apat karajaan di banalko kikuasa di minisusuhut-suhut minomorinta di songpomogunan ponong sid Asia Barat, ino-no i karajaan do Babil, Madia, Parsia om Yunani. (Varo-po buuk di Kentalangan di Ezra di manarang dot i kapat karajaan, ino-no i Rom. Ino kentalangan dino minimbulai hiza dit Abad keso GM).

Na i mondou di posuntu di karajaan do Babil kialad, iadko it a-ko piro tiningulun do Babil nosuntu-no do kialad. Kagi sid Yesaya 50,44 varo boros dot i Nebukadnezar iadko mondou.

Ong i bovang, inot dupot dit orongit banal, posuntu di karajaan do Madia, tu vokon-no banalko araat o hoturan do mongindorosi dit ongobansa (imatai sid Yesaya 13,17-18 om Yesaya 21,2...)

Ong i inanansad dino posuntu di karajaan do Parsia. Inot apat ot alad dau dino, mad i vaza di karajaan dino sumongou sid ongoapat puun do barat ko it apat raja do Parsia di minisusuhut-suhut diri.

Pengkaa dino i dupot kapat di mad posuntu di karajaan Makedonia, ino-no i Iskandar om i sumusuhut dau, bai retanko orongit om apapag i dupot dino (i karajaan) om varo a-ko piro sangau om nokosuni-po vagu do sangau dot opodok. Varo manarang dot i sangau keso, ino-no i Demetrius, anak di Seleukus. Iri-ogi i Antiokus om i Ptolemeus. Ong i sangau dot opodok, nga i Antiokus Epifanas di kakali hiza do nokembulai i tuturan dino.

9-14 Nokosorou do iadino, varo-no vagu kasarahan di Daniel, mad varo mongohukum di songriniba. I minogom sid ogomon di hakim, kiobuk dot opurak, i harati alaid-laid iosido ko sampai penlaid iosido. Minsanko varot a-ko piro ogomon sino, bai sid iso ot ogomon varo mogom. Siti dati pinongonuvan di Yahya om it obpinai dau i pongitungan do hiza do penlaid sid rompit di Yesus varo-po ogomon dot ioti dara ozi monolod dit ogomon dino tu rumompit di Yesus sid karajaan dau (Matius 19,28 om Lukas 22,30). Kagi varo boros sid di Paulus 1. Kor. 6,2, retanko it ongoulun Kristian o mongohukum di songriniba. Om sid Kentalangan 20,4 varo boros di Yahya dot sid ongoogomon dino mogom it isai-nopo i kikuasa mongohukum, ka. Topot ong i Daniel, bai i Kinoringan ot boroson dau do hakim iosido. Banal-no, i buatan do Kinoringan mad lumohing ot osukod di kigaun dot opurak om oponorominan do kiompiling o kosirou. Ino dino mimbulai vagu sid Kentalangan 1,13-14, retanko it Anak do riniba, ka. Ong it ogomon merad di kurita sid Yehezkiel 1 om 10. It apui sino, tanda di hukum. Sid Zabur 50 noboros-no dot ong kodung rumikot i Kinoringan, tu mongohukum, mogulu rumikot it apui di monorob. Pengkaa dino i Zabur 97, ino Zabur di manarang do kuran i Kinoringan manansanganu di karajaan sampai mogom sid ogomon dau, Ino-no, Kobanaran om katapatan ot origi dit ogomon dau. Apui monidia di ralan dau sampai monorob di sokovia i it ongosangod dau di

mintutuk.

Iri-ogi ogiangan om linizab it ongobuuk di mangalapor dit ongokaraatan dot ulun (Yesaya 65,6 om Maleaki 3,16, ino-no i buuk di pangahandaman dit ongokasalaan dot ulun, ko sid Kentalangan 13,8 i Buuk do kopoulosan, ka).

ayat 11: i dupot kaapat nipatai-no. Iti-no mad habal dit ohodtol di tuturan dino, ino raja Antiokus Epifanas, gam osorob i buntung dau sid apui. Ino raja dit oholian minongorongoi dit ugama do Yahudi, nga ohukuman dot a-kedu iosido. Tumanus iosido do iadko epi dot ulun. Kodung mumbongut i Kinoringan iadko niboros-no laid hiza di kinourugan, iri-ogi tumanus i hoturan di Antiokus di banalko osumbung di minongomogos dit ongobansa. Topot ong it ongodupot vokon amu korundun, gam masi-no vagu. I harati, it ongokarajaan di notori-no di Antiokus diri, kengkakat vagu. Topot amu momorinta vagu ioti dit ongobansa vokon. Iri-ogi varo-po riniba di nokembulai sid tanga do kavut om iosido dino manansanganu di kuasa dit aso kengkadan.

15-18 Basao-po laid i panarangan om umpatod sid Kitab Momogun nalad 411-412 kananganko it a-ko piro it ongoayat dino.

Ogolivong om nokotikab i Daniel di nokemot om nokosorou do iadino. Iti-no o sabap do mokitarang iosido dit mad Anak do Riniba.

19-27 I kogumuai dit ongogambar om suntuan om suriban, banalko apagon posondoton. Ogumu o gama dit ongoulun antad diri mangaharati om mangalu-kalu di nunu banal i puun om onsi di tuturan dino. Varo-po vaza dot ulun mongintutun dit ongohiza om it ongopangalaman do riniba, retanko iti om ino niboros laid di Daniel. Rontob-nopo, sampai bianco, iso nga aso bahanda om pananrangan nokosunu ko natapatani. Iti-no o sabap atag dot amu oholian o gama mongintutun ko mangalu-kalu om paharati dit ongoayat di Daniel, tanid mantadko i tomodon momoros dot a-milo-milo i karajaan do Kinoringan opihot om atantu sampai amu gumuzu. Ong i retanko mad riniba iosido, ko Anak do Riniba iosido, ino-no ot bahanda ponong sid di Yesus. Iti-no o sabap, sid ongoinjil asarok i Yesus arait dot Anak do Riniba, it antad sid avan om antad sid Kinoringan, ka.

28-29 Iti-no o kovian di tuturan di Daniel. Manjadi it ongofasal di nakamung vagu diri, Fasal 8-12, sid tohudi-no nakamung, nga manarang dit a-ko piro ongososoru vagu di Daniel. Ong sid Kitab Momogun, nga amu nakamung, tu keso apagon manalin om koduvo, amu tantu paamung-po do harati dit ongososorou di nisurat laid sid a-ko piro it ongofasal dino.

PONGOSUSUZAN

nalad

Tafsiran do Kitab Laid

Tafsiran di Buuk di Ayub	2
dit a-ko piro Zabur	17
di Buuk dot Amsal	40
di nabi Yoel	43
di nabi Hagai	53
di nabi Obaya	65
di nabi Yunus	69
di nabi Daniel	74
Pogihiman	85